

### *ASO TOFI, 20 IUNI 2013*

*Na nofoia e le Fofoga Fetalai le Nofoa i le itula e 9:00 i le taeao.*

Tatalo.

**FOFOGA FETALAI:** Ia, e i ai le agaga maualuga ua tatou taunuu mai i lenei taeao fou i le alafai mai i faguga lelei i le paia o le tatou Maota i ona tulaga aoatetele ma ona paia ma mamalu sauoo. O sa lava ma faigata e le avea, ae tau ia ina nuunuu atu faatini o tausala, aua e i ai le agaga ma le faamoemoe sa tatou faia se malologa, sa tatou momoe ma manu, o lea foi ua tatou toe alafai i manu i lenei taeao, o le ala lea o le tatou tapa o tulia i le tala i le Atua ma lona finagalo tatou te faafetaia ai ua tatou taunuu ma i le soifua manuia ma le soifua laulelei i le tatou Maota i lenei taeao.

E i ai le agaga faafetai ma le faamalo atu i le paia ma le mamalu o le tatou Maota, i lau Afioga i le Palemia ma lau Kapeneta aemaise foi lea tala na atoa i lau Afioga i le Taitai o le Itu Agai ma sui usufono mamalu uma o le Palemene o Samoa. E momoli atu le agaga faafetai tele i taualumaga o le tatou Fono i le aso ananafi. E talitonu o le agaga ma le faamoemoe o le faatuina o le lafo ina ia faaumiumiina le tatou taimi ia papaaveloa le tatou galuega ma tulitulimatagau, ia tatou tiga puupuu. E talitonu le faamoemoe a vave ona pasia le tatou Tala o le Tupe, ona vave lea ona faatino galuega a le Malo ona faapena lea ona faasolo le faasoasoina aua le tamaoaiga o le atunuu.

I lenei itula, o le a faaaoga pea e le Fofoga Fetalai tulaga masani e le mafai ona tuua. E tatau lava ona avatu le fautuaga, timaiga ma le saunoaga a le Fofoga Fetalai ina ia tatao i le ogatotonu taualumaga o le tatou Fono lenei. Le paia e ma le mamalu o le tatou Maota, e talii ae popoe ona e leai se tagata na te toe fuaao le atunuu, e leai foi se tagata e toe tatulaga Samoa o le atunuu ua uma ona tofi, aua ua iloa tupu, ua iloa aiga, ua iloa ona faleupolu, ma e leai se tagata e mafai ona soona laa pe toe fai se isi tulaga e sili atu leaga o Samoa o le aomamala, o le ia iviivia e leai se isi e toe fagota sagolegole i ai. O le fautuaga a le Fofoga Fetalai i le tatou Maota, le paia e, sui usufono mamalu uma o le Maota Fono o le atunuu, ia outou alofagia le tatou Fono. O le agaga maualuga o le Fofoga Fetalai, o lenei lava e taumafai atu ona o le tatou va tapuia ma le tatou va nonofo. E leai se isi e fia sii se ta, e leai foi se tasi e fia niuali pe fia tagata iloa pe toe faataatia se alafua, o le Fono lenei, Fonousu a le atunuu. Ma e leai se isi Fono i luga atu leaga o lo outou paia ma lo outou mamalu o outou uma na faia mai fuiuilupe o le filigalupe ma le sailiga mafua a le atunuu, tou te afifio mai ma tala mai aao e fai le tonu o Samoa mo se manuia nei ma a taeao. O lona uiga o lo o tele le faatuatuaga o le tatou atunuu o lo o lafo mai i le Maota lenei, ma e le tatau ona i ai se tulaga o se tatou fetagofi faatumutulima pe faapaole ona fai. E avatu pea le fautuaga a le Nofoa, ua uma ona faataatia tulaga tau faa-Palemene, ua uma foi ona pasia le

Faavae o le Malo Tutoatasi o lo o mulimulitai i ai faiga faavae uma a le tatou Malo. Ua maea foi ona pasia Tulafono Tumau e limataitaiina ai le tatou Maota. Peitai, e taualuga e le Fofoga Fetalai ma le Maota ma sou vaivai le tatou va tapuia ma le tatou va nonofo. E tele lava ona faaoololomaau ma talosaga atu i le agaga loto mauualalo, ina ia faifaimalu le faiva ma faatamalii. E le toe aoaia e Laupua Tamafaiga o lo o nofo fale Satuiamaa o lo o i ina le tofa oo ma le faautaga loloto e malu ai le atunuu, leaga o lea e faafofoga Samoa ma lana tapuaiga. O le pule aoao lena na tofi ai tatou tatou te omai i le Maota e fai upufai o Malo, a o lo o taumafai atu pea le Nofoa e limataitaiina le tatou Fono i le va faafeagai ai.

Ona ou manatu lea le Palemene o Samoa i le taumafai atu o le Fofoga Fetalai, e leai e le o se fia iloa po o se fia tausisi i le pule a le Fofoga Fetalai o le Maota, e leai. Ua uma ona faataatia le alafua i le Tulafono Tumau, ae malu le Nofoa ma le Maota i la outou tofa faalele. O le tatalo ma le olega mai lava i le aso ananafi, e maitauina pea le tatou felavasai o faaupuga ma upu ma tala mai lava i le taeao e o o foi i le poa napo. E tatalo atu ai i le paia mauualuga o le tatou Maota, ia outou alofagia le tatou galuega. O le tatalo ma le faamoemoe, afai e sala uta, ia tonu pea tai. O le faamoemoega ma lavasiga ina ia taunuu i faamoemoega o tolotolo o taunuuga lelei le tatou finauga. O upu a le atunuu, e le milia faauu upu pe a tatou o e lipoi upu o Samoa, a ia seua pea le manu ae tagai i le galu, aua o lo o tapuai le atunuu e a latou le tofa ma le faautautaga na mafua ai ona tatou seei i le Maota lenei.

E toe faamanatu atu e le Fofoga Fetalai i le matau ma le silasila i le aso ananafi, ua tulai mai lava le sui usufono ia agai i le isi sui usufono, tulai mai foi le faautautaga ia agai i le isi faautautaga. Na ona ou tuitui malofie ma ou faaoololomaau, o lea tatou faatulaga i le tulaga o le tuu atu lava o le avanoa ona tulei saunoa lea o sui usufono mamalu. O nisi foi sui usufono, e tiga lava ona tuu atu e le Fofoga Fetalai le faatagaga i le sui usufono mamalu e saunoa, ae pisapisao lava i tua. O lea ua outou matau nei, ua apo le maeaalalo ma apo le tala salatua, ua atili ai ona sese faamaumauga a le Palemene ma tulai mai ai i nisi o tulaga. O le Maota lenei e faatuatua i la outou faautautaga ma la outou tofa faatupu e faamaumauina ai mea mo le manuia o Samoa mo le lumanai. O lea ua ou talosaga atu ai ma le agaga faaaloalo i sui usufono mamalu uma o le Palemene, o le uluai taimi lenei ua ou talosagaina ai le talosaga lenei, ia outou alofagia le faamamaluina ma le soalaupuleina o le tatou Fono i tulaga o faiga faavae e tusa ai ma le tatou Tulafono Tumau.

E avea foi lenei avanoa e tuuina atu ai le faamatalaga ia i latou o lo o faia faamatalaga tusitusia i le atunuu. O lo o avatu pea le avanoa ma le faanaunautaiga i le Maota ina ia tatala avanoa e mafai ai ona lipoti atu faamatalaga o le Palemene ma ona taualumaga, peitai, ua atagia mai ua le faaaogaina tatau avanoa nei na tuuina atu. Ma o le lapataiga lenei a le Fofoga Fetalai, ia aua ne i toe faaaogaina ni faamatalaga le tusitusia i luga o faamaumauga aloaia a le Palemene. Afai loa e toe solia le faatonuga lea ua avatu, ia ona le toe faatagaina loa lea o se tagata tusitala i totonu o le Maota lenei, leaga o lea ua aumai, ua atagia ai, ua vavamamao sasae ma sisifo ma sopo ai le taieleele i le taiao, ua le fetuunai ai muniao e pe i o le mea e tatau ona i ai. Ma ua tatau ona ou tautalagia le mataupu lenei ina ia taofi ai loa ma aua ne i toe tulai mai i le lumanai. Ae tatalo atu foi i le paia mauualuga o le tatou Maota, ia lauama tootoo mea uma. O le talitonuga o lea o le a faaiuiu le tatou galuega, pe toe tasi pe toe lua lauga o lenei taeao ona tali lea o le tatou

Malo. E momoli atu foi malu i puega i le faafofogaaga a lau Afioga i le Palemia ma le Kapeneta, aemaise le paia o lea tala na atoa o le tatou Maota. O moomooga alofa na ma le talosaga vaivai a le Fofoga Fetalai, aemaise o lea Itu o le Maota i lau Afioga i le Taitai o le Itu Agai. Ia, e afua mai mauga manuia, e pei o ni puao e utu i timuga faamanuiaga ma le vaai o le faata a le atunuu, o le tatou Maota lenei e fai ma faataitaiga mo le lumanai i upufai o le Malo o Samoa. Ae manatu le lagona, o le a faagasolo le tatou galuega i lenei taeao. O a upu ma tala, pe faatama a le po le gagana pe sa faapuou toli i le gaoa, e faamalulu atu.

Ou te pai atu foi i le faafofogaaga a Samoa i lenei itula o le taeao. E manatu foi e le lilo e le lanu, ma e le toe po malae i lau faafogafoga mai. Samoa e le faigofie le lauiliuina o upufai o Malo ma le sailiga o le mea moni ma saili le auro i le afi, leaga e le faigofie i le Palemene lau tapuaiga. O a upu ma tala, o suaga faatamalii ua outou masani, ae a gase lava, e gase lava i malolo ma manuia. Ae a tetele foi pesega, ona matua lea i le oo. Ona i ai lea o le talitonuga o le Fofoga Fetalai, ia lafo atu, o lo o i ai Tootouli ma Fuesinaloloa o le Palemene i lenei taeao, ia matua atu i ina le tuu. Matou te ololomaau ma matou faatoloto atu, matou te asuasua atu malu i puega ina ia magalo mea uma i le Atua ma lenei taeao.

Ona i ai lea o le talitonuga o le Fofoga Fetalai, e faamalo atu le onosai, ae o le a tatou alo mo le galuega i lenei aso.

**Afioga Hon Palusalua Faapo II (Taitai o le Itu Agai):** Lau Afioga i le Fofoga Fetalai, ou te tulai atu lava ma le faaalalo.

**FOFOGA FETALAI:** Ia, se i tuu atu le avanoa. Malie le Taitai o le Itu Agai se i tuu atu le avanoa i le Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoi (Palemia):** Lau Afioga i le Fofoga Fetalai, ua i luma o le Atua le faafetai na e siitia ma e auai uma loto ma finagalo o le tatou Maota nei. O lea foi ua taoto lau faasilasilaga i le tatou Maota, e talosagaina ai le lauama tootoo o le fefaaaliaiga o taofi. O le ta galuega faitoalua lena. O lea foi e ia te au le malosi e mafai ona ou tapaina ai aulape o lo o i lalo o Tulafono Tumau, a o lea lava ou te faaololomaau ou te le o faaogaina aulape na, ona o le agaga lava lea e tasi o lo o e aumaia, ae lelei ona ou faasilasilaina, e i ai foi aulape o lo o ia te au e mafai ona ou faaogaina. Na amata mai foi i lou tutu atu, o lea lava e taumafai e faamalamalama, ona o le tele o vesiga e afua i le le femalamalamaai o mataupu. O le ala lena lau Afioga i le Fofoga Fetalai e taua ai lenei taeao. O lea ua aumai lau fautuaga, ona taofi lea lafo mai lau fautuaga i le Maota nei, ou te iloa foi o lea foi e i ai tootoouli ma tootoo sinasina o lenei itu ma le la foi itu e tatou te apo ai le maea a lalo, ina ia saofaga le faamoemoe o le tatou Fonotaga.

Ae ua uma foi ona ou faailo i le aso muamua, le agaga lava lea o le Faigamalo lenei mai lava i le amataga, e faamalamalama ma faamaioio, e le o se mea leaga le faamalamalama ma le faasao, e le o se mea leaga, ina ia malamalama ai mataupu lea e mafua ai ona vevesi le Maota lenei, lau Afioga i le Fofoga Fetalai pei o anapo, pau lava le mea sa ou taumafai atu ai i le po anapo, o le faatumau, faamalamalama ma faamanino le taunuuga o le faamoemoega atoa o le manulauti o atinae fuafua a lo tatou Malo lenei, o lo o

faafoe e le HRPP, o fuafuaga mamao a le HRPP, o le autu atoa o nei fuafuaga ia maua galuega mo tamafanau a Samoa.

Silasila i le taeao lenei, o ananafi, o lea foi sa tatou mataituina le omai o fanau a le atunuu, e matua le aoga atoa lava aoga nei e aooga ai fanau pe a leai ni galuega, o le aoga atoa ma le auau o fuafuaga a le Malo lenei, fuafuaga mamao ia maua galuega e agai i ai fanau nei. Aua a maua galuega lau Afioga i le Fofoga Fetalai, ua siitia i luga le tulaga o le tamaoaiga o aiga, e tasi lava le atalii, e tasi lava le teine, a lelei le galuega e mafai e lena teine po o lena tama ona siitia atoa i luga ia le tulaga o le tamaoaiga o le a i ai lona nuu, ekalesia, a o le sao foi e maua ai ia tagata aoaoina e taitaiina le Faigamalo lenei.

O le agaga atoa lena na ou taumafai atu ai anapo, o mea ia o lo o faataua e le Faigamalo lenei, o galuega. Ae mafua aisea ona ou tutulai atu i le po anapo? E mafua ona o saunoaga faaoloataua a le sui usufono mo Falealupo i se tasi o atinae fuafua a lo tatou Malo e faaoga i ai seleni mai fafo, o mea ia sa ou taua i lau lauga i le aso muamua. Lea na ia saunoa ai ia le sui usufono, o se tulaga maualalo tele le tulai atu o Samoa e auauna i se palagi i se tasi o atinae fuafua a lo tatou Malo. A uma le tetee i Saina, le sui usufono lava lea, (*faasino i le sui usufono mo Falealupo*), ua faalafi ma faa'alo ane le tetee i papalagi, le iloa po o le isi Fono ua faaoso mai i Initia. O le Faigamalo lenei lau Afioga i le Fofoga Fetalai, lea sa ou tautala manino ai, e le taua le lanu o tagata, pe samasama, pe uliuli, pe enaena, pe lanumeamata, pe lanumumu, e le taua, ae faataua le atinae e sau ma ia e aumai e latou e faatupe i a latou tupe e maua ai ni galuega se tele, e pei la o le Yazaki Samoa, la le o lo o aeae ai nei le toatele o aiga sa le tagolima, a o le atinae lea, o le atinae mai Iapani, o Iapani e tu i tafatafa o Saina, tu i tafatafa o Korea e faafeagai ma Kanata ma Amerika i le isi itu o le sami po o le vasa.

Lau Afioga i le Fofoga Fetalai o le ala lea na ou tu atu ai, ona o le sui usufono lava lea e pototo tele e faaoloataua, e faalafi solo mai i lalo o muagagana ma mea eseese, e faatu mai e ia i luma ona agai lea i ai o mafaufauga ae o la e ailililo ia le tuuina mai o le mataupu. O le mea lea sa ou avatua ma faataua i le aso muamua o le Fono, e le tele ni a tatou seleni e faatino ai a tatou fuafuaga aua atinae e aoga mo fanau a Samoa. O le ala lea e o ai ia Minisita i fafo ma taumafai e talanoa aumai tupe a atunuu i fafo, o malo, faalapotopotoga e faatino ai a tatou atinae ina ia maua galuega mo a tatou fanau. A o le a le mea lea tatou te faalogo i ai? Auoi tafefe! O lea foi ua omai ia Saina, o lea foi ua omai ia...o le mea lena o lea e taumafai uma lava i ai atunuu o le lalolagi, atunuu mafaufau, atunuu e magafagafa o latou taitai, e toso atu faalapotopotoga ma atunuu i totonu o latou atunuu e faa-atinae ai, ia televave le atinae, e oo lava ia Amerika o le atunuu e tafe ai le suasusu ma le meli le anoano o le mau atinae o Saina, Iapani, Peretania o la e faatu ai i totonu o Amerika, e faapena foi i atunuu lenei. Afai e fai i la atunuu a o le a le mea e tatou te faia ai?

Lau Afioga i le Fofoga Fetalai, o le ala lena o lou tutulai atu ai anapo ma ou inaina ai i mea ia, inaina i le tulaga, aisea, e le mo au, e le mo le vaega lenei, ae mo le lumanai o a tatou fanau lea e tilotilo mai, a nonofo mai ma aoga, o fea le mea e o i ai, o fea le mea e o i ai? O le mea lena e faataua, faataua a tatou Fono, faataua le atinae o Samoa, ae le o le faataua o le ola faalagolago.

Lau Afioga i le Fofoga Fetalai, e le tatau ona ou aloese mai i upu tautino mo le agai i luma o le tatou atunuu, ae le o le tatou nofonofo ma alu lo tatou taimi i mea le aoga. Ia manuia le tatou Fono.

**FOFOGA FETALAI:** Malo, faafetai le saunoa malamalama i lau Afioga i le Palemia. Ia lau Afioga i le Taitai o le Itu Agai, sei tuu atu pea le avanoa, o le a le mataupu?

**Afioga Hon Palusalua Faapo II:** Lau Afioga i le Fofoga Fetalai, faafetai lava, e tulai atu ma le agaga faaaloalo ona o lea ua maea ona e malele, ua momoli foi lapalapa o malo i le viiga ma le faafetai i le Atua i lenei taeao fou, ia e fono faapipii atu foi.

O lea ua saunoa le Afioga i le Palemia e tusa ai ma le mea na tupu anapo, ma ua aumai foi mafuaaga, o mafuaaga uma lava ia o lea tatou te taumafai i ai, ia maua galuega a alo ma fanau. A oo foi ina matou naunau atu, ia o lenei vaega toaitiiti e taumafai atu ni avanoa.

O le mea la lea lau Afioga i le Fofoga Fetalai ua ou tulai atu ai ma le faaaloalo, e momoli atu malu i puega i lau Afioga, pe afai foi ua i ai se upu ua laavale, leaga o la e faafogafoga mai Samoa, o le naunau lava ina ia avatu la matou feau. O le mea lea e faamalulu atu ai, o le a se upu ua laavale, ia lafo i nuu le aina, ia tatou agai i luma mo le tatou galuega.

Lau Afioga i le Palemia ma lena itu Afioga i Kapeneta, lau Afioga i le Minisita mo Tina ma Tamaitai, Atinae o Nuu ma Afioaga ma Agafesootai, ia e toe avatu foi malu i puega e tusa ai ma le po anapo, afai ua laavale sa matou faamatalaga, ia o le naunau lava ina ia momoli atu le feau, pe eseese a tatou itu pe eseese foi le avatuina o matou manatu e tasi lava le agaga pei ona saunoa le Afioga i le Palemia, ia manuia alo ma fanau. O le mea la lea, o le a se upu ua laavale, ia lafo i nuu le aina, ia tatou maua le loto fefaamagaloai, pei lava ona tatalo le sui usufono o lenei itu i le po anapo, ia tatou maua le agaga o le fefaamagaloai, ia tatou agai i luma aua se ai o Samoa o lo o tapuai mai. Le paia o Samoa o lo o faafogafoga mai, e avatu foi ia faamaluluga a lenei itu pe afai ua i ai se tala ia aemaise foi ni lauga ua aafia ai le mamalu aemaise o la outou tapuaiga aua faiva o le Palemene, 'E poto lava le tautai ae le atoatoa 'ia isi ona vaa'. O le faamoemoe ia omai au auauna nei e soalaupule ina ia maua se ai o la outou tapuaiga. O le mea lea ia tatou fale i le fale o le Atua, aua lava le faagasologa o le tatou galuega.

O sau tala lea lau Afioga i le Fofoga Fetalai, aemaise foi lena itu o le Malu i lau Afioga i le Palemia ma le Kapeneta i lenei taeao, ae a le tatou Palemene. Ia manuia lenei taeao ma le tatou Fono.

**FOFOGA FETALAI:** Malo, faafetai saunoa i lau Afioga i le Taitai o le Itu Agai.

**Tofa Hon Tolofuaivalelei Falemoe Leiataua (Minisita mo Tina ma Tamaitai, Atinae o Nuu ma Afioaga ma Agafesootai):** Lau Afioga i le Fofoga Fetalai ona o lea ua taua lou igoa, ma le faaaloalo.

**FOFOGA FETALAI:** Tulai mai lau Afioga i le Minisita mo Tina ma Tamaitai, Atinae o Nuu ma Afioaga ma Agafesootai.

**Tofa Hon Tolofuaivalelei Falemoe Leiataua:** Faafetai i lau Afioga i le Fofoga Fetalai ua tatou maua foi lenei taeao ua mua mea i matautusa, ua e aami uta mamao ma uta lalata aua le alofa o le Atua, aua pe mamao lava le lagi e afio ai le Alii ae aupito sili lava ona latalata mai ia i tatou, aemaise ituaso e lofia ai i tatou i uiga o le alii o le lalolagi ma le tiapolo, vaeatu le faafofoga a Samoa.

A o paia o lenei Maota ma le faafofoga tapuai a le atunuu, le mamalu foi o lo o sasao nei, ia leai ua ou tulai lava ona sa i ai lava le manatu e le toe faaluaina le saunoaga a le Afioga i le Palemia, o le saunoaga a le Afioga i le Palemia o le saunoaga foi lena a lenei itu, peitai ona ua saua i le va le saunoaga a le Afioga i le Taitai o le Itu Agai, ia e leai, ua alu lava anapo ia ma ona foi afaina na tulai mai, ae o lea ua e saunoa lau Afioga i le Taitai o le Itu Agai, leai e pei lava ona malele le Afioga i le Palemia, o lape o lauga, pau lava lea o lau tatalo, a tatou o i le moa o le ala e faaoga le gagana maotua a le atunuu pe a oo ina tatou oo i tulaga faapea, ou te talitonu lava e leai se mea, o la e faafofoga Samoa, a o ni lafoga faapea e, 'tui le gutu o le Minisita,' ia o se lafoga e aupito sili ona toilalo. O lau lava fautuaga e i ai lava upu a le atunuu e fai i le tautai, 'o le vaa sii soo, o le vaa sii vale lena, a o le vaa e seasea sii, o le vaa foi lena, o le vaa sii tonu.' O upu a le atunuu lea ou te tautala i ai, leaga ua o i tuugamau le autalaia ma le aupuputoa, ae tatou te taofi mau, o upu na e faaoga e lo tatou atunuu, o upu o le alofa, ae aua le tee ai le uluuluga na ona ou faapena atu, ua tatou lafoai foi le faatuatua i le faifeau anapo, e i ai foi vaega o iu o lana tatalo, 'e le fiafia i ai le Atua,' e moni lava. Ia o le a la le silasila a le faitatalo anapo, afai ua na le tapuaia o tatou faiva ua le maua sona manatu i lana talitonuga i lana ekalesia, e tuua atu loa le lotu ia te ia, tatalo o ia o le faifeau, ia a o mea ia o le tagata e le ala mai i le aso a taeao, ia o le tagata lena ua i ai le toasa o le Alii. Ia na o upu lava e fai atu ae ia vaatele foi, e tatau ona ou tautala i vala ia leaga o Samoa ua uma ona tofi, ioe, o au o le Leulumoega.

O lea ua ou fai atu i lenei aso, lau Afioga i le Fofoga Fetalai, faafetai mo lau faatofalaiga, faafetai mo le timai, aua e leai lava se tagata e atoa, e i ai lava lape o le tagata soifua, ia ae peitai, lele ua malele le Afioga i le Palemia ua saunoa foi le Taitai o le Itu Agai, o so matou leo foi lena. O le mea la lea lau Afioga, ia manuia ou faiva, ia manuia le alofaiva o le Palemene i lenei aso, ia faamanuia mai le Atua, ia tele sona viiga i le tatou galulue, ma foi pea ia te ia le faamanu ma le faaneetaga. O lau soso atu lea ma le agaga faaaloalo. Faafetai mo le avanoa.

**FOFOGA FETALAI:** Malo. Ou te manatu o lea ua taatia i lagatonu le tatou mataupu i lenei taeao, ou te manatu foi o le aso ma le filiga o le aso foi ma le mataigatila, ma e tautalaaso le igoaipu a le tamaloa o le Alataua. O a ni upu ma ni tala i le aso, ia ola pea le faugagana, a o le timai ma le talosaga atu lau a Fofoga Fetalai le Maota e o le atunuu, ia, lau Afioga i le Taitai ma lena tala na atoa i lau Afioga i Minisita ma le Kapeneta, ou te faamalulu atu foi. O lea foi ua momoli vaimalu i puega i lea Itu o le Maota i tuleiga ma saunoaga e pei ona ou fai atu i le po anapo, a felelei loa manusina ua sa manuvale. A ta loa fosiga a le paga ma le paga, aua le toe i ai se oso faalava. A tatou o i le manatu lena ma le tulaga lena o le tatou Tulafono Tumau, e leai lava se vevesi ma ia outou faatuatuaina si au galuega o lea e talatala malie atu le mau iumaea o le tatou galuega nei. E faafetai atu, ma o le agaga e tau mea uma i

le Atua. Lau Afioga i le Tiakono Toeaina po o lau Susuga i le Aoa Fesoasoani, aua ia e te mele le tatalo a le susuga i le Faafeagaiga. Afai lava o le Aoa Fesoasoani ma le isi Aoa Fesoasoani lea na tau feoi lima anapo, ia o lo oulua lava lea finagalo. A ua ou tapa le susuga i le Faafeagaiga ina ia o le tatou tatalo i le Atua, leaga o lea ua tau va le fogavaa ia te oulua o le sa avea ma Tiakono Toeaina ma le Aoa ma le isi Aoa, a o lo o lalago lelei lava le Aoa o le Lotu Nasareta. E leai lava se mea e tasi o fai ma lua tau faataitai i ai ma le tele o le tau sese o aoaoga ia e te lua aumaia i le itu faaleagaga.

Ia le paia e o le Maota, ou te talitonu ua taatia i lagatonu le aso ma ua pae ma auli mea uma. O le agaga ma le faamoemoe o lenei aso, ia aoga mo le lumanai. E pei foi ona saunoa nisi o sui usufono na taunuu mai i le Maota ananafi, o le talosaga lena a le Nofoa, e le tu tu ifo lava le sui usufono lele i o. E ui mai i le Nofoa ona ou faatagaina atu lea faatoa e saunoa. Ae le o le saofai i lalo ae alu lava lau tomumu a o la e maua uma e leo. Ia ona o loa lea o le aufai nusipepa ave news, ua matua sese atoa lava le tatou mea lea e fai.

Malilie le tatou Maota ua na ona ou lapatai atu ma ou tuitui atu malofie i lo outou mamalu, ia faifaimalu le faiva ma tauaao mai o lea ou te faasoasoa atua le tatou taimi.

O isi faasilasilaga a le Fofoga Fetalai. Ua tatou faatasi i lenei taeao ma le vaega lona lua a le Polokalame a le Palemene o le tatou faalauiloa i le paia ma le mamalu o le atunuu a ua tatou amatamea i tulaga tau aoaoga. O le vaega lona lua lenei o alo ma fanau a le tatou atunuu i le Vasega 12 ma le Vasega 13. Sa tatou faatasi ai ma nisi o alo ma fanau a le atunuu i le lua aso talu ai, o le vaega lona lua la lenei o le tatou polokalame. E pei ona ou fai atu, o le auga ma le faamoemoe o le Matagaluega o le Fono ina ia uluulu matafolau tupulaga o lalovaoa o Samoa, ia outou matau ma outou tilotilo ma outou vaavaai ma aoaoga i tualumaga o le Palemene a le atunuu. O le agaga ma le faamoemoe e le gata ina outou aoaoga tulaga o le poto salalau, a ia outou omai i le Maota e faalogologo lelei o outou taliga i tualumaga o le Fono Aoa, aua o le Fono sili lenei a le tatou atunuu e to ai manu i ao ma iu o Malo aua le tatou atunuu mo le lumanai, ina ia mafai ona outou silasila i tualumaga o le Fono Aoa ma mea tau Palemene, ina ia outou malamalama lelei i le faafoega o Tulafono ma Teuteuga aua mea uma e tuuina mai i le Palemene e manuia ai si o tatou atunuu mo le lumanai. E fai ai lou leo e fai ma sui o le Palemene e faatalofa atu ai i lo outou mamalu i lenei taeao. Ou te talitonu o le a ao manogi mo la outou faatofalaiga aua Samoa ma lona lumanai, aemaise la outou sailiga mo le poto salalau.

**TULAFONO TAU FAAOFI O LE FAATATAUINA O TUPE  
FAAOPOPO (NU.2) 2012/2013 MA LE TULAFONO TAU FAAOFI O  
LE FAATATAUINA O TUPE 2013/2014 – felafolafoaiga i luga o le  
faitauga faalua – Aso 3**

**FOFOGA FETALAI:** E tolopo le tatou Fono i le po anapo i le itula e 11:00 ua faamaea mai le saunoaga a se tasi o ulutaia o le tatou Maota le Afioga i le sui usufono mo Falealupo. O le avanoa lenei e tuuina atu i lau Afioga i le sui usufono mamalu e faaiu mai ai lau saunoaga.

Tulai mai le sui usufono mamalu. Se i tulai mai lava le sui usufono mo Saleaula.

**Tofa Levaopolo Talatonu (Gagaemauga Nu.2):** Lau Afioga i le Fofoga Fetalai, ona o lea ua e saunoa e faamaea le saunoaga a le Afioga i le Sui Taitai. Ma le agaga faaaloalo ou te tulai atu ai, *Ina ia faaopopo ni minute o le Toeaina ua matua foi e faaauau ai lana saunoaga.*

Ma le faaaloalo lava.

*E le i faaluaina le lafo.*

**FOFOGA FETALAI:** Ua lelei, faafetai le faamanatu mai Saleaula. E te le tau faamanatu mai o lea ou te iloa lelei le mea e tatau ona fai. Aua e te atugalua o lea ua maea ona palelauniu ma pae ma auli le taeao nei, ae lafo maia le faatuatuaga i le Nofoa.

Tulai maia lau Afioga i le sui usufono mo Falealupo.

**Afioga Hon AEAU PENIAMINA LEAVASEETA (Falealupo):** Faafetai tele mo le avanoa lau Afioga i le Fofoga Fetalai. Ou te faatalofa atu i le ava e tatau ai ma le faaaloalo i le pau o le Palemene i leni taeao i le Fonousu a Samoa ae tainane a tatou malo ua ofaga i le Maota o le Palemene nei. Ia, tulou o outou sa ma outou faiga. Lau Afioga i le Fofoga fetalai, faafetai mo le avanoa e faauma atu ai sa matou faamatalaga. O le mea moni lau Afioga, e tau soogata upu o le pogisa anapo ma le taeao nei, e malamalama tele. Ona ou manatu ai lea, o le a seu i fanua sa matou faamatalaga. Na pau lava lea lau Afioga ua maua atu le tanoa i le Afioga i le Tama foi o le atunuu, le afioga i le Palemia, faapea lava ita o se Ministerial Statement lea na amata ai, aua e le o tulaga masani ia e pulea mai e lau Afioga. O lea la ua toe maua atu, e pei e foliga o le faaauauina o se tatou fetufaiga anapo, aemaise maua i le tulaga o le fesasiai.

Lau afioga i le ava e tatau ai ma le faaaloalo, ou te talitonu e leai se isi e atoatoa sona sao ma se tonu o ona lava manatu, ae le tuu gofie foi la le tanoa a le Afioga i feeseeseaiga po o le le tusa ai. Na ou faaogaina lau Afioga anapo le upu lea, o lea la ua toe agiga i leni taeao, e le o fiafia le Afioga i le Palemia, le upu foi lea i le muagagana i aso ia, tulouna lava le Maotaga nei, aemaise lava po o le Standard 4 i aso ia po o le Form 1 foi sa ao ai le isi faitau lea e faapea, e ao mai le faitau ona ao lea i tamaiti. E i ai la le faitau lena anapo, I think this one is parking on the wrong tree. E ese mamao lava le mea lea ua sui ai e le Palemia lau lauga anapo, na alu lava. O lea foi la ua toe tulai mai nei...

**FOFOGA FETALAI:** Malie le sui usufono o lo o saunoa se i tuu atu le avanoa lea i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai, o se mea e fia faasao. Ia manatua foi o le sui usufono na ou fautuaina e aloalo ese mai le mea lea o le faaoloataua, aua o lea e faitau uma atu lava i nei faaoloataua a le sui usufono, ua aliali foi lou vaavaa. O fea le mea e te taumafai e te kami mai ai, ua uma ona ou faitauina oe mai lava i ou matiutiuvae. O le upu foi lea na e



faaaogaina nei, tasi lena mea e fai e tatou, e te faaaogaina le gagana Peretania ae uiga, e uiga. O le a le mea ua tuu ai le gagana Samoa? O le mea la lena na ou fai atu ai ia te oe anapo, o le fautuaga faa-tama, soia e te fia nanu. O le Maota lenei o le Maota o Samoa, o tamalii Samoa, o le isi lea mea e faataua e tatou o le tatou gagana. A ua tumu oe i lou fia nanu, ona e aumaia lea o nanu faatamaiti i totonu o le Maota lenei. Faapea e logomalie i lau faalogo. A o oe ua aliali lou vaavaa. So o se taimi lava e te saunoa ai, afai e sefulu au antennaes ia e i i, e ola uma au antennaes e le mafai ona pepe leaga ua ou iloa lelei oe. O lea sa i i, sa foafoa atu iinei lou soifua faapolokiki, ou te iloa lelei ai oe, ou te iloa lelei ai lou taitai. So o se mea lava la e te lua amata gaoioi ai, ua ou iloa, the end, le faaiuga. Ua ou iloa le faaiuga o le mea lea e te lua agai i ai.

Lau Afioga i le Fofoga Fetalai, e tataua ona faamaea upu o le po. Ma o lea la, ua maea, ua uma ona ou fai atu ua uma. O upu lava o le po ua uma, a o lea foi amata ona toe saunoa le uso nei, tasi lea tama autu a St Joseph. E tasi lea mea e iloa lelei lava e le isi St Joseph le isi St Joseph. E iloa lelei lava o le a kami. Na ona ou tuu atu faapena.

**FOFOGA FETALAI:** Malie le sui usufono mo Falealupo, se i fai atu le faasilasilaga lea a le Nofoa. Se i malie lava se i alaala mai i lalo lau Afioga i le sui usufono mamalu. E pei lava ona ou taumafai atu i le taimi ua sola ma ou toe tapa ai lau Afioga i le sui usufono matua o le Maota, ma e taliu tele ae popoe ona o lea ua uma ona fai a tatou upu o le taeao. E silafia foi e matua leai se matega, leai se masalosalo i le tofa lena e i lau Afioga i le sui usufono mamalu. Silasila foi o lea na ou taumafai atu lava i le taeao e palepalealuga, ma o le aso fou lenei, e fou mea uma. O lea ua saunoa malamalama le Palemia, ua uma le po anapo. O le tagata e toe tepa i tua, e liu tupua masima e pei o upu a le Tusi. O le toe aumai foi o mea o le pogisa e pei ona e malele tatou te toe talanoa i le malamalama, ia, e le au le pule po i le pule ao. Lau Afioga i le Sui Taitai o le Itu Agai, ou te toe tatalo atu, e ava tele atu leaga o oe sa e Fofoga Fetalai, e te iloa lelei le vevela o le nofoa lea ou te nofo atu ai e faafoefoe outou finagalo. E mua le tagata, ae a? E matau ia Samoa leaga e le sau faatagata se malaia o se isi e faasagatau i le Fofoga Fetalai. I have all the powers. Se i vaai mai i le samala lea, I havent use it for the last two years when I became Speaker. Vaai la ne i te i ua faaaoga i le tatou Fono lenei. Le Sui Taitai o le Itu Agai, e le faatagaina ni uiga faauigalua. Ia o lea ua ou fai atu, o lea o le a amata ona ou sitepu i Claus pe a tou mananao i ai. Ia faifaimalu mai le faiva o lea ua iu lau saunoaga. O nisi mea o totoe, ona spa mai lea o le Taitai o le Itu Agai, ae tuu maia lau Afioga i le Tama Matua e faaiu maia lau saunoaga, o lea ua faamaea mai e le Afioga i le Palemia ona faaiu ai lea o le tatou Fono.

**Afioga Hon AEAU PENIAMINA LEAVASEETA:** Faafetai. O le malelega e le agaia mai le Nofoa. Lau Afioga i le Palemia ma le mamalu o le faafofogaaga a Samoa, se o lau uo le Afioga i le Palemia. A faapea lua te uo, e te malamalama lelei lava i ona uiga aua foi lua te uo. E vave tele ona sui atoa se mea i le mea o lo o manatu ai lau uo, ona taitaiseseina ai lea. O lena foi se leo. O le upu foi lea leaga e faafofoga lou itumalo, pe fia nanu ea le tamaloa Falealupo. E faamalulu atu e leai. Ae manatua foi le Tulafono Tumau a le Maota lenei, e faaaoga gagana e lua, e taga. Ae a e tago e faaaoga le taimi

i le gagana faa-Peretania, e vave ona malamalama mai tagata. E pei lava ona fai atu, e silafia uma lava e le Maotaga nei. Ia taatia ia mea. Lau Afioga i le Fofoga Fetalai, ua uma le lauga.

E i ai le itu taua lau Afioga, na ona ou faaleo lava aua o le a ou le o o i ai, o mea o tulaga mamalu faa-Palemene, aua e le na ma le laina lau Afioga i le Fofoga Fetalai, o Samoa ma le Palemene, i le latou faafogafoga silasila i fatia sa ufitia ai ma afaina ai tulaga mamalu o le Palemene lenei i se vaitau ua tea atu, e le mamao, sa aafia ai le Afioga i le Palemia ma lana Minisita o Tupe.

Sa i ai le manatu o le sui usufono mo Falealupo e ava i le atunuu, o le a mea lea e tupu? A afaina e logona e le Palemene pe leai? O le mea lena sa ou fia tautala i ai ae tainane lea ua faalava le Amoa. Lau Afioga i le Palemia aua nei folo molemoleina lea mea ae o lea a lafo atu iina. Aisea? Leaga o la e faafogafoga le atunuu, e fia faafogafoga le atunuu po o a tou mea o fai sui usufono o le Palemene ao lenei e tafili saunoa faapenei saunoaga.

Ia ua uma le matou lauga.

**FOFOGA FETALAI:** Malie le sui usufono mo Falealupo sei tuu atu le avanoa i le Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai, o mea ia ua laga e le sui usufono ua uma ona ou faalauiloaina i le atunuu tali o mea nei, ua uma ona ou faalauiloaina e le faatasi, e le faalua, masalo ua oo i le faalima po o le faano. Ua malamalama la le atunuu sei vagana ai le sui usufono mo Falealupo ma le Taitai o le Itu Agai e le fia malamalama. O le tulaga lena, se o tatou o le aufai polokiki, e tiga lava po o a ni mea ua pepe, pala ae manao lava e laga iinei ae ua pala. Lau Afioga i le Fofoga Fetalai, e le aoga aua e i ai le upu faa Peretania e faapea, “e te fiu lava e sasa le solofanua ua pe lava le solofanua. Lau Afioga i le Fofoga Fetalai tuu ia le sasa o solofanua ua mamate e leai se tatou mea e maua ai. O le mea sili o lea ua uma le lauga, ua uma foi.

**Afioga Hon AEAU PENIAMINA LEAVAISEETA:** Ua uma foi le matou lauga aua ana sao le alafua ae faataape le tatou Palemene ae ta toe omai...ona atoa ai lea o lau tala lena o le agaga lena o le sui usufono lenei.

**FOFOGA FETALAI:** Faafetai le sui usufono mo Falealupo aua ia le alo lau foe ma faanape aua foi le solia vasaga. O le a tali le Malo ona tali manino lava lea i mea ia tou te atugalua ai o le aua lena. Ae faafetai atu i le saunoaga a le sui usufono mamalu ae lauama tootoo lou finagalo i lenei taeao ma le amataina o le tatou fonu.

Tulai maia lau Afioga i le Taitai o le Itu Agai o lea ua avanoa le Maota mo lau saunoaga i lenei taeao. Lau Afioga i le Alii Aoa Fesoasoani o le Ekalesia EFKS po o lau Afioga foi i le Taitai o le Itu Agai o le paaga tutusa a le Minisita mo Tina ma Tamaitai, Atinae o Nuu ma Afioga ma Agafesootai. Ia manatua foi o lea e loma le tatou fusuaga sue tupe e fau ai le tatou Fale Fonu ao lea ua latalata mai lava ae sa ou vili ananei i uta i Seb pe maua ni mea faipule 8ounce e aumai a toe tupu mai ni pefea o le a taofi loa le tatou Fonu ae o le a tatou o e molimau le lua popooga i fafo.

Tulai mai le Taitai o le Itu Agai.

**Afioga Hon PALUSALUE FAAPO II:** Faafetai i le avanoa ua tuuina e lau Afioga i le Fofoga Fetalai. Ua ou tulai atu foi ma le faaaloalo e fai sina sao i lenei Tala o le Tupe e taua. O lea ua saunoa lau Afioga i le Fofoga Fetalai, o le ma paga ma le Minisita mo Tina ma Tamaitai, ou te le paga i ai, e tasi lava le tagata ma te paga nao le Palemia, ma te feagai. O le mea lea lau Afioga i le Fofoga Fetalai.....

**FOFOGA FETALAI:** O le mea e fia faasao nei taitaiseseina le Maota le Taitai o le Itu Agai, o le tulaga tau taitai o iinei ao le tulaga tau fusuaga te lua paga ai ma le Minisita mo Tina ma Tamaitai. O le faasaoga lena nei tei ua taitaiseseina le...ua leva ona tu mai le lui a le Minisita ao lea e te le o taliaina.

**Afioga Hon PALUSALUE FAAPO II:** O lea ua faafogafoga le Maota, faafogafoga Samoa ua out alia le lui a le Afioga i le Minisita mo Tina ma Tamaitai. O lea la o le a sulu ma mea faipele ona ma popo laia faatamalii ao lenei taeao.....

**Tofa Hon Tolofuaivalelei Falemoe Leiataua:** Lau Afioga i le Fofoga Fetalai leaga o la e fai ma tusitusi mai le Taitai o le Itu Agai ia te au ae ua ou tulai atu ma le agaga faaaloalo, e le o au na luita o ia lava la e faalele mai lava ana mau ia te au. O la e toa le tai ia Leulumoega ae pau lava le mea afai o lea ua lui au o le a silasila i ai le atunuu. O le a faatoa vaai lava lea o le Aiga Sa Tunumafono e avatu lava le latou tama ave sao loa i le mea e tatau ona taoto ai ae le faaogaina mea fai pele na oni ie lava e fusi ai o ma lima ia aua nei tiga le lima. Ma le faaaloalo.

**FOFOGA FETALAI:** O lea ua molimau le Palemene i le aso lenei ma ua faamau i faamaumauga ma e le toe alofia le mataupu lenei. O le a faamauina le aso ma faatulaga e le Afioga i le Minisita mo Faamasinoga ma Pulega Tau Faamasinoga ma le Afioga i le Minisita mo Punaoa Faalenatura ma Siosiomaga e faaauau ai le feiloaiga lea.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Na ona ou faamanatu atu lau Afioga i le Fofoga Fetalai.....

**FOFOGA FETALAI:** Tulai mai lau Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** O le a ou nofo sauna foi e pasia ni iuga a le Kapeneta mo ni pusa oti se lua mo laua.

**FOFOGA FETALAI:** Tulai mai lau Afioga i le Minisita mo Faamasinoga ma Mataupu Tau Faamasinoga.

**Afioga Hon Fiamē Naomi Maatafa (Minisita mo Faamasinoga ma Pulega Tau Faamasinoga):** Lau Afioga i le Fofoga Fetalai ona o lea ua e saunoa ma tau ai le Minisita mo Faamasinoga ao au lea sa ou fia tu atu i luga e fai atu sau lafo, faamolemole sei aveese mai ia mea ma faamaumauga a le

Palemene e tauvatea ai fua tatou. Aua ana omai o ni tagata e lelei ni lima e lelei, e le gata i le le talafeagai ma mataupu o le fono ae mataga ai foi mea tau fusuaga i le toalua lea. Ma le faaaloalo lava.

**FOFOGA FETALAI:** Ia aua ia le atugalua ia te oe le Afioga i le Minisita mo Faamasinoga ma Mataupu Tau Faamasinoga. Sa ou tau fai atu o oe le laufali ae e le afaina o lea ole a valaau fuimu uma i le atunuu po o ai se isi o le toalua lea o le a fui muamua.

Tuu atu le avanoa i le Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielega:** Ou te lei soona tu atu lau Afioga i le Fofoga Fetalai ona o le mataupu lava lea e laga e Fiamē. Sa faataga mea faapea e le Fono Aoaio a le Malo o Amerika Congress faatoa taofi nei lava po o le tausaga e 1912 po o se taimi faapena. Na lui ai e le isi faipule le isi faipule ao le taimi la lena sa taga mea ia ona omai loa lea i fafo fai atu i ai le Fofoga Fetalai, ia omai loa o le a tatou mataituina ouluga ae faaoga nai tama'i mea pupuu foi ia. Ona tofua loa lea o laua ma le mea puupuu, ona fultua loa lea ae faitau laa e sefulu ma le lima e faitau lava e le Fofoga Fetalai tasi, lua, na ona oo lava i le sefulu ma le lima fai atu loa le Fofoga Fetalai seiloga lava ou te fai atu pa, tau fai liliu loa tau fai amoti lua mea puupu. Na ona valaau atu lava o le Fofoga Fetalai, pa loa, na ona liliu mai lava o le isi fana misī, fana misī, fai mai loa kaoga mai loa i totonu ua paupaua uma le mea ia ouluga. O le mea lena na tupu na omai loa lea i totonu faasa ai loa iina ona toe faia ni mea faapea ao le mea sili lea ua uma ona outou faafofoga o le a omai taavale fuimu a le Malae Vaalele e tutu i i e fui ai ni mea faaletonu.

**FOFOGA FETALAI:** Sei tuu atu le avanoa i le saunoaga a le sui usufono mo Faasaleleaga Nu.3.

**Tofa Tuileutu Alavaa Voi (Faasaleleaga Nu.3):** Faamolemole lau Afioga i le Fofoga Fetalai pe mafai ona faataga mai au ou te alu i Savaii e aumai mea faipele.

**FOFOGA FETALAI:** Faafetai fesoasoani mai lau Afioga i le sui usufono mo Faasaleleaga Nu.3.

Tulai maia lau Afioga i le Taitai o le Itu Agai aua le faapopoleina o le mai suka ma le toto maualuga o le mea faafuasei aua e te naunau tele i le fusuaga lea sei ou mafaufau pe faataunuu pe leai. Ae tulai maia e faaauau le saunoaga ina nei tei ua e atugalua tele i le lui lea ua aumai.

**Afioga Hon PALUSALUE FAAPO II:** Leai ou te le popole i ai aua e tasi lava lou lima e fai ai. Ae o leni taeao lau Afioga i le Fofoga Fetalai ou te tulai atu ma le faaaloalo e faigata le pau o le Malu nei aua le afioga o lau Afioga i le Palemia, Sui Palemia, le mamalu o le Kapeneta ma lena foi Itu faapea foi leni Itu o le Kapeneta Agai o le Palemene.

O lea foi e faafogafoga mai le tapuaiga a Samoa mai lava i mauga tetele seia oo foi i se ua aupito itiiti aemaise le Afaigaluega Paia a le Atua o lo o nono manu aua Samoa ma lona lumanai. Pe ou te oo i ai pe leai i paia ma sa ma faiga, o paia lava e tumau ma mamalu e le avea. Ao leni taeao lau Afioga i

le Fofoga Fetalai, o lea ua maea ona sausaunoa Afioga i Minisita Agai, o lea ua soo taiao ua tau foi le ai pei o le faiva o tapalega. Aua o le tiute lava lea o le Itu Agai, o le matafaioi lea a le Itu Agai, e fautua, taulagalaga, faamanatu ma tuualalo, e fai ma leo o le au le taualoa ma le vaivai, fai ma leo o le fia ola ma ua fia maua se mapusaga i le taugata o le soifuaga, fai ma leo o le aufai faatoaga lea e laina, timuia ao faatau latou faaeleeleaga. O le matou tiute lea faa Itu Agai e molimoli atu le feau i le Malo aua Samoa la e tapuai mai. O le faatemokarasi lena, aua pulega manino accountability ma le transparency i totonu o le Palemene le avanoa e momoli atu ai le feau. Ua avea lava ma faafitauli lau Afioga i le Fofoga Fetalai sui usufono o lenei Itu e taumafai atu, taumafai atu a ua faavatuia lava i faauilavea ma uma ai o matou taimi faatulagaina. Lau Afioga i le Fofoga Fetalai ua maitauina pei o se metotia ua sili musa ai le Afioga i le Palemia aemaise le Minisita mo le Soifua Maloloina.

**FOFOGA FETALAI:** Malie le Taitai o le Itu Agai sei tuu atu le avanoa i le Afioga i le Palemia.

Tulai mail au Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai o le mea e fia faasao. Sa e faasalalauina anapo i se tasi foi sui ma e faasalalauina manino ai le tele o lona taimi lea ua tuu atu i luga atu o taimi faatapulaa. E le o aafia i taimi o matou faasaoga. Silasila o lea foi ua toe sau ai lava, e tiga lava ona faamalamalama ma saga faamalamalama ae le tuua lava. O le mea lea ou te fautua atu ai pea, i le mea lea o le faaoloatua, faaoloataua e le valea uma le atunuu o la e foi e faafogafoga mai i le saunoaga manino a le Fofoga Fetalai o lea e lava outou taimi e sili atu ona umi nai lo le taimi faatapulaa ona e le mafai ona tuua matou faasaoga o le aiatatau o lo o i totonu o Tulafono Tumau. E le mafai ona tuufau le mea e sese e alu pei foi la o lau mea sese lea na fai mai nei lea ua ou tu atu e faasao leaga e taitaiseseina ai le faafogafoga mai a le atunuu. E pei lava ona ou tauina atu e le mafai lava ona tuufau e le Vaega lenei ni mea faaletonu ma ni mea sese faaoloataua tou te aumai i taimi tou te saunoa ai. Silasila i saunoaga anapo a isi sui usufono ia, e leai lava se isi o matou na faauilavea, leai lava se isi ona o la e sau sao lava i mataupu e leai lava ma se isi o matou na faauilavea i isi saunoaga ia a outou. Ae sipa loa le mataupu ua amata ona faaoloataua ona matou faasaoina loa lea.

**FOFOGA FETALAI:** Malie le Taitai o le Itu Agai sei fai atu le tala lea a le Fofoga Fetalai. O lea na ou talosaga atu i le taimi muamua ae lei amataina le tatou fononua o lea ua atagia i lau saunoaga le Taitai o le Itu Agai lea ua e fesiligia lau galuega o lea e taumafai atu. O lea foi ou te maitau lau Afioga i le Taitai o le Itu Agai se ou te ava tele atu, a maitau foi i avanoa ia e tuuina atu e ava tele ona o le maitau a le Fofoga Fetalai ona e vaavaai ia outou le Itu toaititi ma ia tausisia outou avanoa ia maua pea. Ao lea lava e maitau atu lau Afioga i le Taitai o le Itu Agai, e te tusasae ane lava i luga e saunoa ae pei ona ou fai atu i le taimi ua sola o iu ia o saunoaga e le aafia i taimi taualoa lea la ua apo e le aufai nusipepa sese uma ai ma tatou mea ia e fai. Aua tou te fesiligia le galuega o lea e taumafai atu le Fofoga Fetalai, o lea lava ou te tuu avanoa mo outou uma lava le Itu Agai. Na maua uma outou avanoa talafeagai

ma faale-Tulafono. O le mea foi lena na ou talosaga atu ai i tuleiga ma talosaga faa-Tala o le Tupe, aua le taetae lapisi oto le lauava muamua ma mea e manuia ai le itumalo. A lea na saunoa i ai nisi o sui usufono, leai foi se talifuaitau a le Malo, leai se faalavelave. O lea le Taitai o le Itu Agai ua ou talosaga atu, sagatonu lau o le fo i lau saunoaga ma ia agai tonu i mataupu o lo o i ai le...e le mafai ona nofonofo le Malo e tatau ona tali atu, pe afai e le tuu sao le fesili i le mea na tuu i ai, ma aua le toe fesiligia le taimi lea ou te fuafua atua le taimi. O le saunoaga a le fofoga o alii ananafi, ia na tu lava minute mo tali a Afioga i Minisita, ae le o le Tulafono Tumau lena, o le Tulafono Tumau o minute lava e aafia ma le faauilavea, ae le mafai, e le mafai le ava atu i o outou finagalo ne'i te'i ua oti i tua se lagona pe gata i fafo, o lea na saunoa lea o le sui usufono mo Gagaemauga Nu.2, o le a alu e faauma i luga o le TV lana fetalaiga, sei silasila outou. Ae na ona ou faapena atu ae le mafai ona tuua. E talosaga atu le Itu Agai, don't take advantage of my hospitality, aua tou te saunoa i le mea lena o lea ou te fuafua atu.

**Afioga Hon PALUSALUE FAAPO II:** Lau Afioga i le Fofoga Fetalai....

**FOFOGA FETALAI:** Ia o lena foi ua e toe tu ae o lea e lei uma lau tala. Alaala i lalo. Malie lau Afioga ia fai oe ma faataitaiga, silasila i le mea lea na tau tupu ananafi i le sui usufono mo Alataua Sisifo ma le sui usufono mo Faasaleleaga Nu.4, ia o lea la, o lea o le a faataitai le aualii le la i le mea lea e te faia. O le soli Fono e saunoa ae lei faataga atua e le Fofoga Fetalai, o lea o le a ou toe faamanatu atu, e tuu atu lava le avanoa, ia ona tāusi lava lea o lau saunoaga maua lou avanoa. Ia a o le mea lea o le tu ane lava...ia e faapefea ona fai le tatou Fono? E le mafai ona limataitaiina aemaise o le taua o lenei taeao, o lea e alaala mai alo ma fanau o le tatou atunuu o faata lea mo le lumanai e limataitaiina ai le tofa ma le faautautaga, leaga e le ese le fono a nuu ese le tatou Fono lea e fai.

O lau toe lapataiga lea ma le fautuaga lau Afioga i le Taitai o le Itu Agai, agai sao lau lauga i mea ua uma ona faatulagaina ina ia sologa lelei le tatou Fono i lenei taeao.

Tulai mai lau Afioga i le Taitai o le Itu Agai e faaauau le saunoaga.

**Afioga Hon PALUSALUE FAAPO II:** E tulai atu ma le agaga faaaloalo tele i lau Afioga, o lau folasaga lea e fai lau Afioga, folasaga faa-Taitai o le Itu Agai, folasaga aua le saofaiga lea e avatu e lenei Itu, o le mea lea lau Afioga i le Fofoga Fetalai o le a ou see ese.

**FOFOGA FETALAI:** Faafetai.

**Afioga Hon PALUSALUE FAAPO II:** Leaga e mamafa tuuaiina ia e fai, e le gata i saunoaga faa-Minisita a o felafolafoaiga faapea e matou te faaoloataua, faamasino mai Samoa, faamasino mai Samoa po o se faaoloataua lea e fai, po o le feau o lo o tau molimoli atu i le Malo, o le ala lea, ae ui i lea, a le lava lo matou taimi i i o fea o le a matou sulu i ai?

Lau Afioga i le Fofoga Fetalai, o fea matou te sulu i ai e ave le feau o le au vaivai ma le le...ou te sulu i le TV....

**FOFOGA FETALAI:** O le a fai atu lau tala lea, le Taitai o le Itu Agai, tau lava ina ou fesoasoani atu, o anafea na le maua ai so outou avanoa, o anafea? O anafea na outou tagisa mai ai e le tuua atua se avanoa mo le Itu Agai? Ia outou malamalama i le mea lena. Sa ou fautua atu foi e le faia i fafo upu o le Maota e fai i i, leaga e le faia mai fafo tonu o le atunuu, e fai i i. O le ala lea o le tatalo atu. O lea lava ou tem au iumaea ma ou faatonutonu malie atu, e le tau aoaia e Laupua Tamafaiga lau Afioga i le Taitai o le Itu Agai. O lea foi la o le a uma le agai i le Palemia ae agai mai e tau mai le pua ma lafo mai i lau galuega, 'aia tou te tau le pua ma lafo, tau le pua ma fai ai lau faasolo ma sei, o le taeao fou lenei o lea ua amata le tatou Fono.

O le talosaga lea lau Afioga i le Taitai o le Itu Agai, leaga o lea o le a matuia tuuaiga, ou te le avatua ni o outou avanoa.

**Afioga Hon PALUSALUE FAAPO II:** Lau Afioga i le Fofoga Fetalai, ou te faatoese atu foi pe afai ua faaliliu ese se gagana, e le o ni avanoa a o le le uma o avanoa, o le mea lea ou te faamalulu atu ai i lau Afioga, afai e te silasila mai ma e faafofoga mai o le tagi a le pumate, tagi a le pumate.

**FOFOGA FETALAI:** Le Taitai o le Itu Agai o lea o le a tau toso le tatou Fono o lea ou te faamalalama atu.

**Afioga Hon PALUSALUE FAAPO II:** Ae ui i lea o le a ou see ese i le Tala o le Tupe.

**FOFOGA FETALAI:** Ia see i le Tala o le Tupe.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai....

**FOFOGA FETALAI:** Malie le Taitai o le Itu Agai, sei tuu atu le avanoa i le Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** O le taimi lava e fono ai le vaega lenei, o le faitioga lava lea, lea ua uma a matou lauga, ae discipline, a o le finagalo autasi o le vaega ia aloaia taimi ia e faatapulaa mai i totonu o tatou Tulafono Tumau. E oo foi la i le vaega lenei, e tele lava ina le uma a latou lauga, aua foi e le o tuufau a tatou Tulafono, a tuufau nei e fia lauga, a tuufau e fia lauga, o lona uiga e uma le tausaga lenei o tatou nofonono o lea tatou te fiafia i ai, tatou fiafia i le mea lea o le faaalu, faaalu o le ea, o le lauga e tatou te fiafia uma lava e fai, ina nei tei e na o outou e faapena foi ma le vaega lenei, tasi lena faaoloataua ua fa ai au faaoloataua i le tolu minute lea faatoa amata.

**FOFOGA FETALAI:** Ia tulai mai le sui usufono mamalu e agai i le Tala o le Tupe.

**Afioga Hon PALUSALUE FAAPO II:** Ia o le a ou le tali atu, e faamasino lava le atunuu. O le Tulafono Auro lava o le Faaola, Ia e alofa i le Atua, muamua lava lea, alofa i le Atua, lona lua, alofa i ou tuaoi, ia e alofa i ou

tuaoi. Peitai ma lou faaaloalo i le Tala o le Tupe lea, o se Tala o le Tupe le alofa.

**FOFOGA FETALAI:** Sei tulai mai le Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai, ua fai soo lava e le sui usufono lenei le Tulafono sili, na ona ou faamanatu atu, e masani lava ona faamalamalama e Iesu le Tulafono lena, o le alofa, ae na ona faaletonu lava o le vaega foi lele e faaoga sese le malumalu, o le a le mea na fai e Iesu? Aapa loa i le maea, e tele lava le feau lena e sau ai iina, o le alofa tatau, a faaletatau loa le amio, maea loa.

**FOFOGA FETALAI:** Ia tulai mai lau Afioga i le Taitai o le Itu Agai.

**Afioga Hon PALUSALUE FAAPO II:** Lau Afioga i le Fofoga Fetalai ou te le tali.

**FOFOGA FETALAI:** E manaia le mea lena, aua e te tali ma le umi ai o le tatou Fono ae saunoa oe.

**Afioga Hon PALUSALUE FAAPO II:** Ou te le tali i le mea lea. Ou te le vivii atu lau Afioga i le Minisita o Tupe, ou te le viia oe, leaga nei tei ua e faapea o ou vivii atu ona o se isi tulaga, e iloagofie lava le tagata e alofa moni ia te oe, e avatu fautuaga sao, e tau atu faaletonu, e tau atu ma fautua atu, o le mea la lea ou te faamalulu atu ai i lau Afioga. O lea ua manino lava le Tala o le Tupe tele ia o tupe faaalu, tele e le lava a tatou tupe maua e faatino ai le manao, ioe, a o le mea lea e tupu, le faatonutonu le faaoga tatau o tupe, aisea? A lea e gasea le Afioga i le Minisita mo Tupe Maua ma le afaigaluega, e manaomia le tatou lagolago uma i ai, e manaomia le lagolago, ia tuu mai uma seleni e manaomia mo le atunuu, o le sini lava lea e tuu sao atu i lau Afioga i le Minisita mo Tupe Maua, o maua uma tupe nei, o maua uma tupe ia e faamoemoe i lau Matagaluga mo le atinae o Samoa? E le na ma le laina le agaga faafetai o le afaigaluega, i o latou tiute e saili mai seleni....

**FOFOGA FETALAI:** Malie lau Afioga i le Taitai o le Itu Agai, sei tuu atu le avanoa leaga o lea ua e taua le Afioga i le Minisita mo Tupe Maua, tulai mai lau Afioga i le Minisita.

**Tofa Hon Tuiloma Lameko (Minisita mo Tupe Maua):** Lau Afioga i le Fofoga Fetalai faapea ia sui usufono mamalu o le Maota, o le tali atu, o tupe lava ua tatau ona maua i le taimi lenei o lea e maua uma, o lea e i totonu o le Tala o le Tupe, o le tali atu lea, tupe e tatau ona maua, ioe, afai o tupe e tatau ona maua e tatau ona totogi nei, o lea e lavea i totonu o tupe maua ia a le Malo ma le Tala o le Tupe, ma le faaaloalo.

**FOFOGA FETALAI:** Tulai mai lau Afioga i le Taitai o le Itu Agai.



**Afioga Hon PALUSALUE FAAPO II:** Ia faafetai o lea ua tali mai, ona e ala ona ou fesili, ona o le Lipoti a le Okika lea ma te faafesagai, o le tele ia e \$20milionā na tuu e tataua ona maua, \$13milionā le maua i le aoina o le VAGST, o le tele ia o ia seleni e tau mai i i, o le ala la lena o lou fesili atu i lau Afioga, po o le mea e le o galulue faatasi Matagaluega, po o le mea...

**FOFOGA FETALAI:** Malie lau Afioga i le Taitai o le Itu Agai, sei tulai atu le Afioga i le Minisita mo Tupe Maua.

**Tofa Hon Tuiloma Lameko:** Lau Afioga i le Fofoga Fetalai, o le tulaga i le...aua o lea ua ou vaavaai atu o lea e te talanoa agai i le Lipoti a le Pule ma Suetusi Sili, o tiute na o le Pule ma Suetusi Sili na ala ai ona tofia, e maitaulia e pei o le Tala lenei, o le Tala o le Tupe lenei o le Tala fuafua faatatau agai i ai, o lo o i ai le Expectation Board, o lo o i ai le mafaufau o tupe ia e maua i le taimi lenei mai Matagaluega taitasi. O le tala la e lei oo mai foi le tulaga o le faiga lena o le Ofisa Suetusi ia, ae o le a oo i ai le suesuega ona iloa ai lea po o a ni tupe ua le mafai ona maua, a o le tala lena ua ou fai atu, o tupe lava e tataua ona maua, o lea e i le Tala o le Tupe.

**FOFOGA FETALAI:** Faafetai i lau Afioga i le Minisita, mo le faasaoina o le taimi o le sui usufono, sei tulai mai lau Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai ou te toe tulai atu e toe lagolago atili le saunoaga lea na saunoa i ai le Minisita, tupe fuafua, tupe faatatau, o le upu fuafua po o le faatatau o lea tatou te talanoa i le aso 1 o Iulai 2013 sei tau ia Iuni 2014. Ua tatou amata Iulai? E lei amata Iulai, ae o le a le lipoti lena e tilotilo i ai, o le lipoti e faasino i le tausaga ua tuanai. O lea la e fesili mai oe i le Tala o le Tupe lea, po o mea ia ua tataua ona maua? O lena ua tali atu le Minisita, o le faalavelave lena o le a e aumaia le Lipoti o actual accounts a, e talanoa ai i mea ia, o mea ia e fuafua mo le lumanai. E lelei ona e see ese i mea na e maimau atoa ai lau...o lena e sese le faavae o lau talanoa mai, ae i ai mea na tutupu ua le mafai ona maua. Na e faalogo i le Afa foi lea o Eveni lea na tupu ma mea ia e tutupu i fafo, e aafia uma ai lava ia tupe maua a le Malo pe a tutupu mea faapena, leaga o lea ou te iloa, soia tou te...ua galo ia outou o le tasi lena mea e masani ai ona aafia ai galuega a le Malo i ana tupe alu ma ana tupe maua, o mea o Afa.

**FOFOGA FETALAI:** Ou te faamanatu atu i lau Afioga i le Taitai o le Itu Agai, sei alaala mai i lalo le Taitai o le Itu Agai. O le a avatu le fesoasoani a le Nofoa. O le Lipoti lea a le Pule ma Suetusi Sili lea ua taua, e le tataua ona tautalagia i le tatou Fono leaga o lea faatoa taunuu mai le Lipoti, e lei avea i le Komiti ona faatoa aumai lea e pasi ona faatoa mafai lea ona talanoa i le Maota. O le agaga moni lena e faamanatu atu i sui usufono mamalu, e le mafai ona tatou talanoaina le Lipoti lena, o le Lipoti ua tea o lea foi ua saunoa malamalama le Afioga i le Palemia, ia e faamalulu atu ua le mafai ona tatou tautalagia seiloga e pasia ma ave i le tatou Komiti e fai ai le iloiloga pei o mea masani, ia ona toe tuuina mai lea i le tatou Maota.

Tulai mai le sui usufono mamalu e faaauau mai le saunoaga.

**Afioga Hon PALUSALUE FAAPO II:** Lau Afioga i le Fofoga Fetalai ma le faaaloalo, leai e le o talanoaina aua o lea ua uma ona faataoto i le Palemene, ae na o se faataitaiga, reference, e refer i ai ia...nei tei foi ua faapea o manatu e le faavaea....

**FOFOGA FETALAI:** Le Taitai o le Itu Agai, ia, a le faataitaiga o lena ua e aumaia ia, ae malie agai i le isi mataupu.

**Afioga Hon PALUSALUE FAAPO II:** Ae ui i lea o lea o le a ou see ese, pau lava le agaga ia avatu le lagolago i lau Afioga i le Minisita ina ia mautinoa leaga o lea e utiuti le faasoa a le Afioga i le Minisita, o tupe ia mautinoa ua ao uma tupe e tatau ona maua, o le matou tuualalo lea, e le o se faaoloataua, o le tuualalo ina ia mautinoa, ua ao mai uma tupe mo le Tala o le Tupe.

**FOFOGA FETALAI:** Malo, sei tuu atu le avanoa i le Afioga i le Minisita o lo o aoina tupe a le atunuu, le Minisita mo Tupe Maua, tulai mai.

**Tofa Hon Tuiloma Lameko:** Lau Afioga i le Fofoga Fetalai, pei ona ou taua i le Tala o le Tupe, o tupe ia ua fuafua e tatau ona maua, ae le o i ai se tulaga faapea, o tupe ia o le a maua, o lea na ou fai atu ai, o tupe lava ua fuafuaina e ono maua e tatau ona maua, pei la o le Tala o le Tupe. O le uiga o le mataupu i le tulaga lea o le taua o le aoina o le tupe, o le mea la lena e i ai le Matagaluega. O le latou tiute lena e ao ia maua uma tupe e tatau ona maua i le taimi o le Malo.

**FOFOGA FETALAI:** Malie lau Afioga i le Taitai o le Itu Agai, o le a le mea lea e faauilavea ai oe le sui usufono mo Gagaemauga Nu.2.

**Tofa Levaopolo Talatonu:** Nao sina mea lava lea i le saunoaga a le Taitai o le Itu Agai e fia faamalamalama atu. Lau Afioga i le Fofoga Fetalai e saolele lava le saunoaga a le Taitai o le Itu Agai. O tupe ia e maua pe na o le afa piliona, pe na o le \$500,000+ ao tupe e tatau ona tatou maua i le tausaga lenei e ova atu ma le piliona. O le upu moni lava le upu lena ao le faalavelave e le o faamaoni le aufaigaluega i le aoina o le tupe.

**FOFOGA FETALAI:** O lea ua maua le saunoaga. Tulai mai lau Afioga i le Minisita mo Tupe Maua leaga e fai sina tuga o le tuuaiga lea i le le faamaoni le aufaigaluega.

**Tofa Hon Tuiloma Lameko:** Lau Afioga i le Fofoga Fetalai o faaupuga nei aemaise le tuuaiga o le aufaigaluega o ni faaupuga e le mafaufau. Silasila lelei o alo o le atunuu la e faigaluega ai, a su nei la o fea la e maua ai se molimau? E iloa ai po o ai la tagata na aoina tupe na e faapea e le o maua? O le mea lea lau Afioga i le Fofoga Fetalai, ou te fautuaina e tuuese faaupuga le mafaufau ia e fai agai i tagata faigaluega a le Malo. O tagata ia lea e ao ma le o galulue i le faiga o galuega aemaise le aoina o tupe nei. O le Matagaluega lenei mai le Budget atoa lenei e sili atu i le \$500miliona e \$470miliona na ao lava e le Matagaluega o Tupe Maua a le Malo. A silasila i faaupuga faapea.

**Tofa Levaopolo Talatonu:** Lau Afioga i le Fofoga Fetalai.....

**FOFOGA FETALAI:** Malie le sui sufono o saunoa sei tuu atu le avanoa i le Afioga i le Palemia.

Tulai mai lau Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai tasi lenei mea e le o malamalama i ai tagata e o atu tagata mo le Ofisa o Tiute, oka mai ni au containers ona avatu lea faatumu sese ma e pepelo i o i mea ia i le tiute. E i ai la taimi e matua suesue ai ae auiliili e le Matagaluega documents ia ma iloa ai e sese mea e aumai ai. O lea na aumai ai alcholo i totonu o le mea lena e tupu ai le faalavelave pe aumai le taavale la e sau le afi e foliga mai e finau o lea e i totonu o le 12 tausaga ae aumai le box o le mea lea fusi ai le tagata ae tau mai ua 15 tausaga. O lona uiga la e faigata ona malamalama i ai tagata e mafai ona nofo ma fesui ai le afi ae galo ai ona fesui ai ma le fusipau. O le mea lena lea e tele ai galuega a Minisita ma au o le omai o tagata aua o lea ua maua e le afaigaluega mataala o le sao o le taavale ua 15 tausaga le tuai ao le afi lea e i ai lea ua osiosi ese le.....la e iloa le titina o le mea ae taumafai e osiosi i ai le tausaga ina ia pau i totonu o tausaga ia. O mea ia e fai e tatou tagata e mafua ai ona o le faatumu sese o le pepa ma mafua ai ona mama tupe ae talu ai ona o le mataala o le afaigaluega lea e maua ai. E tatau ai ona tatou faapea ane aemaise lava ta ita lea e tau aafia i mea faapea e ese le mataala o le afaigaluega ae ta te le sau i i ma tutu atu ai faapea atu e ese le le faamaoni o le afaigaluega.

Lau Afioga i le Fofoga Fetalai o le faamatalaga lena e faauma ai lea mataupu.

**Tofa Levaopolo Talatonu:** Lau Afioga i le Fofoga Fetalai ona ua tuuaia au i le le mafaufau. Ae finagalo malie lau Afioga e eseese lava auala a le Atua, a le faasese pepa la e faigaluega i le taimi nei e leai ma se mea o faia i ai. O la e faigaluega i tai i le Ofisa o Tiute. Lau Afioga i le Fofoga Fetalai o le uiga o lau faamatalaga i mea tau tupe lea e i ai a faatupe oloa ia e ave i tua e le tiuteina e le afaigaluega.....

**FOFOGA FETALAI:** Tulai mai lau Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai, e matuia tele le mea lea ma e leai lava se tagata e tuuaia i se agasala sei vagana ua ave i le Faamasinoga E matuia le mataupu lea ua aumai e le tuufilemuina foi e le Minisita ma lana afaigaluega.

**FOFOGA FETALAI:** O le a avatu le fautuaga a le Nofoa. Tulai mai lau Afioga i le Minisita mo Tupe Maua.

**Tofa Hon Tuiloma Lameko:** Lau Afioga i le Fofoga Fetalai e pei ona ou taumafai o le upu le mafaufau o le tuuaia o ni tagata e le o iloa pe i ai se mea na fai, o le mea lena na ou fai atu ai aua le soona faia ia upu leaga o le mamalu o fanau a le atunuu lea e galulue ai. Ae a tuuaia faapea ua le.....o

lona uiga o lea ua tuuaia ae leai se mea e faamaonia ai na mea. Ao le isi la mea o le a ou tau atu ina le mafuaaga e le maua ai tupe ia sa fuafua pei o tupe ia e i ai. O le omai o tagata ma pepa pepelo e aumai i totonu ina ia mafai ai ona assess ni tiute i luga o ni pepa pepelo ae le aumai pepa sao o mea ia e aumai i totonu o le atunuu. Ma le faaloalo lava.

**FOFOGA FETALAI:** Ua manatu ua malamalama le mataupu le sui usufono mo Gagaemauga Nu.2. O lea ua e faafofoga o le manatu lea na tau avatu e le Nofoa e le mafai ona tali mai le afaigaluega a le Ofisa o le Tiute i le lafoga lea na e saunoa mai ai. O lea la ua tali mai le Afioga i le Minisita ma molimoli mai leaga o le fofoga lea o le Matagaluega. E tuga tuuaiga le sui usufono mo Gagaemauga Nu.2. E le mafai ona e lauina se le faamaoni o se tagata i lumafale leaga o mea e faamaumau mea ia e tau i le oti. Ao lea ua ou faamalamalama atua lau Afioga i le sui usufono mamalu mo Gagaemauga Nu.2, e talitonu foi o lena ua e saunoa e faamalamalama le tulaga o lou atugaluga, o mataupu na o lea e i luga o le faamasinoga le mea lea ou te musu e tautala i ai. Malie le sui usufono mamalu a tatou o loa i ooooga o le mataupu lea o nisi mea e i tua atu o le a tele loa le afaina.

Malie le sui usufono mo Falealupo o lea o le a tautalagia ma isi tulaga i tua atu o le mataupu lea na popoe i ai le taofi o lea o le a amata ona saunoa le Afioga i le Palemia ma saunoa le Afioga i le Minisita mo Tupe Maua i le tulaga e le mafai ona tatou talanoaina o lea e i luma o le faamasinoga le mataupu lenei o pepa sese na tuuina atu i le Ofisa o le Tiute. Ao lena foi e te taumafai mai ma saunoa mai, o itu ia e popole ai le taofi.

Tulai mai le sui usufono mamalu mo Falealupo.

#### **LAFO MO LE TAPAINA O FAAMAONIGA O TUUAIGA O LE LE FAAMAONI O LE OFISA O TIUTE I LE AOINA O LAFOGA**

**Afioga Hon Aeau Peniamina Levaiseeta:** Lau Afioga i le Fofoga Fetalai o lea ou te tau faatu se lafo, *Ina ia faataatia mai ni faamaoniga o le mea lea e molimoli atu iinei agai i le faaaliga a le Afioga i le Minisita o Tupe Maua.*

**FOFOGA FETALAI:** Lelei, le sui usufono mo Falealupo o le a faamanino le tulaga lea ua e finagalo i ai. O le lafo lea ua faatu o le faamaoniga o le le faamaoni o le Ofisa o Tiute i le aoina o lafoga.

Afai la e tuuina mai se faamaumauga i le Maota lenei i le faamaoniga lea, ona ou alofa lea mulimuli, a o le a fai outou finagalo.

*Na faamaonia le lafo mo le tapaina o faamaoniga i tuuaiga a le sui usufono mo Gagaemauga Nu.2.*

**FOFOGA FETALAI:** O le a tuuina atu i le sui usufono mamalu le avanoa e tuuina mai ai faamaoniga e tusa ma le lafo ona o tuuiga ua tuuina mai, a le faamaonia ona fai loa lea o ai o le aso.

Tulai mai lau Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoui:** Lau Afioga i le Fofoga Fetalai, na ona ou fofogaina le taumafai

ia maua mai pepa aua a le maua mai, o au ou te faatuina le lafo mo le iuga o oe (*e faasino i le sui usufono mo Gagaemauga Nu.2*) i totonu o le Palemene lenei.

**Tofa Leavaopolo Talatonu:** Lau Afioga i le Fofoga Fetalai, se i ou fesili lava la i le Afioga i le Palemia po o nei po o taeao e aumai ai faamaumauga ia? Ma le faaaloalo lava.

**FOFOGA FETALAI:** Tulai mai lau Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoui:** O le a tuuina atu le 24 itula.

**FOFOGA FETALAI:** Faafetai o lena ua logona le Maota i le Tulafono ma le lafo na tuuina mai e tuuina atu le 24 itula e tuuina mai ai le faamaoniga o le le faamaoni o le Ofisa o le Tiute i le tauaveina o latou galuega ma le aoina o tupe maua a le atunuu.

Tulai mai lau Afioga i le Taitai o le Itu Agai.

*Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu.2) 2012/2013 ma le Tulafono Tau Faaofi o le Faatatauina o Tupe 2013/2014.*

**Afioga Hon PALUSALUE FAAPO II:** Lau Afioga i le Fofoga Fetalai, o le a ou see ese ma lea mataupu ona o la ta ita lava fautuaga na avatu.

Lau Afioga i le Minisita o Tupe, se ua tau galo foi le lauga, o le faagasolosologa lea o au mau o le Paketi ma le Tala o le Tupe le alofa lea o le a toe faauau atu. Lau Afioga faafetai lava i le tulaga lea o le a siitia ai tatou i luga aua ua leva lava ona i ai isi atunuu o le Pasefika i le tulaga faapea e lelei tamaoaiga. Ua leva na i ai Toga, Fiti, Papua New Guinea, Vanuatu ao lea faatoa tatou oo lea i ai. O le vaaiga lena mai fafo ao totonu o taugofie ai mamoe, o taugofie ai le moa, o le mea lena lea e tupu i le tatou lotofiale. E manaia.....

**FOFOGA FETALAI:** Malie le Taitai o le Itu Agai sei tuu atu le avanoa i le Minisita o Tupe.

Tulai mai le Minisita o Tupe.

**Afioga Hon Faumuina Tiatia Faaolatane Liuga:** E leai sou agaga e faalavelave i le saunoaga matagofie a le Taitai o le Itu Agai. Ou te faafetai foi i le Itu Agai ua saunoa faapea n ate le sau e viivii mai au. O le soifuaga o le tagata soifua e fai galuega e viia ai le Atua. Sa saunoa foi le Taitai o le Itu Agai i le tulaga o le Paketi e le alofa faapea lava au ia o goto uga le tatalo a le tatou uso a faifeau ia Tapuai i le finagalo o le Taitai o le Itu Agai i le mea lava e tau o le alofa. Ao i ai sau Tusi Paia iina ona sue lea i le 1 Korinito 13: 4-8 e tau mai ai iina le mea e tau o le alofa. O le alofa e le o se mea e pa'o tele e pei ona fai mai ai le Tusi Paia. I le tulaga lea faapea o tatou e maualalo le tatou tamaoaiga e faatusatusa i isi atunuu, ou te iloa a outou afifio ma malaga i atunuu laiti, e pei o Samoa e maoae le lelei o le tamaoaiga i lo isi atumotu laiti o le lalolagi. O le mea lea e matuai sesea i i Sini le itu lea na

saunoa i ai le Afioga i le Taitai o le Itu Agai. O le tele o isi atunuu laiti ua leva ona fia ave ama LDC ona e tele ni faamanuiaga e maua mai ai. Ua faigata nei ona tatou puipui i le stage lea a le LDC ona ua maoae le faatupulaia o le tamaoaiga o Samoa. O Solomona, Vanuatu, Fiti ma Toga e leai ni auala o i ai e pei o Samoa. Ao le mea lea e i ai nei na o Papua New Guinea lava ma Timoleste o lea e 2.5% le growth o le latou tamaoaiga. Ao isi atunuu e aofia ai ma atumotu laiti lea e i ai latou natural resources, o lea e i lalo o le 2%. O tatou i le taimi lenei sa expect e 2.5% ae talu ai le afa o Evani lea ua pau ai i le 1.3% le growth o le tamaoaiga. O le faamalamalamaga lea i lau Afioga i le Fofoga Fetalai ma le faasaoga e pei ona saunoa i ai le Taitai o le Itu Agai ina nei taitai seseina ai le faafogafoga mai a le atunuu i le eseese o le tamaoaiga o Samoa e faatusatusa i tamaoaiga o isi atunuu o le Pasefika. Ma lou faaaloalo lava.

**FOFOGA FETALAI** Malo saunoa i lau Afioga i le Minisita o Tupe. Tulai mai lau Afioga i le Taitai o le Itu Agai.

**Afioga Hon PALUSALUE FAAPO II:** Lau Afioga i le Fofoga Fetalai, e eseese mamao lava mea ia ou te taumafai atu ai. O le uiga o lau tala ua leva ona tatou vivii o lea e lelei le tamaoaiga ao lea faatoa tatou oo i ai i le tulaga lea. O le mea lea lau Afioga i le Fofoga Fetalai i le tulaga lava ia i le tatou o ese mai le LDC po o le tulaga i atunuu tauatiae mo le vaauga i fafo. O lea na ou fai atu ai i le amataga aua e te mimita, ou te le viia oe aua le fai mea mo le vaauga a tagata ae le tilotilo i le tatou lotoifale. Ia silasila la lau Afioga i le aitalafu lea ua i ai nei? Pe fai mai lava le Afioga i le Palemia e aua le popole, aua le popole, aua le popole. A o lea ua ou fai atu, a leai se alofa, e pei lava o le sumepalo tagitagi, lea na tatalo ai le sui usufono mo Salega anapo. Ia vaai mai le atunuu, vaai mai fafo, a o totonu lava ia...

**FOFOGA FETALAI:** Malie lau Afioga i le Taitai o le Itu Agai se i tulai mai le faauilavea a le Minisita o Tupe.

**Afioga Hon Faumuina Tiatia Faaolatane Liuga:** Lau Afioga i le Fofoga Fetalai, e faafetai atu i le – o lea ta te talanoa lava i le mataupu e tasi. E le o forcé ina tatou, o faamaumauga lea e mafua ai ona o tatou i luga. O le tatou tamaoaiga, ua maoae le faatupulaia i le faavasegaina o atunuu laiti. E le na o le Pasefila la, e aofia ai ma le Carribean, e aofia atu ai ma le Vasa Initia. O lona uiga, o lea ua tatou i ai nei i le tulaga, ua faigata ona tatou toe nonofo i le LDC status. A na leai le Tsunami i le 2009, e le toe tolo maia le graduation o Samoa mai le 2010 sa fuafua i ai, i le tausaga e 2014, lea o le a gafua nei toe ono masina tatou taunuu i ai. Lau Afioga i le Fofoga Fetalai, ma le faaaloalo i le Taitai o le la Itu, o le faamalamalamaga lena. O le tulaga lea faapea o le alofa, e le mafai ona tatou tautala i le alofa pe a leai ni galuega mo le lelei o le atunuu e faamaonia ai. Ma lou faaaloalo lava.

**FOFOGA FETALAI:** Tulai mai lau Afioga i le Taitai o le Itu Agai.

**Afioga Hon PALUSALUE FAAPO II:** Ia, o lea o le a ou see ese ae na ona fai atu o sau faataitaiga, aua o la e faafofoga mai Samoa. Afai e piliona le

aitalafu, fanau mai loa le pepe, e \$6,000 le aitalafu. Afai e toasefulu lou auaiga, pe toalima ona faatele lea i le \$6,000, ona iloa ai lea o le aitalafu.

**FOFOGA FETALAI:** Malie lau Afioga i le Taitai o le Itu Agai, se i tulai mai le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoui:** Lau Afioga i le Fofoga Fetalai, sa tau atu anapo e \$760miliona le tatou tupe lea e fuafua e tataua ona maua. A o tatou aitalafu na o lea e totogi i fafo i tausaga taitasi, o lea e avatu manino lava i totonu o tatou faamaumauga, na o le \$45miliona. A toese la le \$760miliona mai le \$45miliona, ona totoe lea o le \$700+miliona e fai ai isi a tatou fuafuaga e faasino lea i tupe totogi i tausaga taitasi. Sa ou tau atua le tatou uluai loan lea na fai e fai ai le tatou malae vaalele e faitau miliona ma miliona, le malae vaalele lea i Faleolo. O le tului o lo o totogi ai e \$232, ae na o le \$31,000 le mea e totogi i le tausaga, ae faitau miliona ma miliona le tatou seleni na aumai e fai ai le tatou malae vaalele. O le mea la lona na ou faateia ai oe anapo i lou tulai ae ma e oi, o le a 200 tausaga o totogi aitalafu. O le mea lona o lea tatou te mananao i ai, o le faapea mai o se Faalapotopotoga e avatu le tou loan lea totogi i le 200 tausaga, o le a le mea e ono tupu? O lona uiga na o le \$2 tausaga le tului e totogi i le tausaga ae \$10 le principal. O mea nei o lea tatou te mananao i ai a o lea e te fefe ai. Lau Afioga i le Taitai o le Itu Agai, e te le malamalama i mea tau tupe, e te le malamalama i mea ia e te talanoa mai ai. E ese le alofa o le Itu lenei ia te oe, ae o le matua e le malamalama lava i le mea lona e te talanoa i ai. O i ai sau nonogatupe i se faletupe? O le mea taua, o lou toaga e totogi lau nogatupe ua tuu mai e totogi atu i le tausaga. O le mea lona e taua. A ia manatua foi, na ou talanoa atu, afai na e alu e aumai lau \$1,000 e fai ai lau togakapisi, ona e alu lea fai ai le togakapisi, e totogi lava e le togakapisi ia le loan. E faapena foi pe a tatou o e aumai se loan pe \$100miliona e fai ai le eletise, e totogi lava e le eletise ia le loan. O le tulaga lona, e faapefea ona totogi? Aua foi o lea e ola ai le tele o le mau pisinisi, maua a latou tupe e tele, aumai a latou oloa mai fafo, tiute. Maua a latou polofiti, totogi le lafoga, ona aumai lava lea o seleni na, e toe totogi lava e le eletise ia lona nonogatupe. O le matua e le malamalama lava. Se oso ese ia ma lea mea, e faigata tele mo oe.

**Tofa Hon Tolofuaivalelei Falemoe Leiataua:** Lau Afioga i le Fofoga Fetalai.....

**FOFOGA FETALAI:** Malie mo le faasaoina o lou taimi, o lea e tulai mai le.....

**Tofa Hon Tolofuaivalelei Falemoe Leiataua:** Ua lava le faamalamalama a le Afioga i le Palemia, ae pau lava si upu lea o lo o aumai i le Tusi Paia ou te faamanatu i ai i le Afioga i le Taitai o le Itu Agai, 'e popole lava le aso i ona ai, e popole taeao i le mea foi e foai e le Atua.' A o le mea lea e popole i ai, ia, faafofoga mai alo ma fanau, aua e te popole taeao, a e fanaua le tama lelei, o le tama lona e faia le tiute lea. Ae le safa ai se isi, e leai ma se isi, o lea e manaia lava le tulaga o le tamaoaiga o Samoa, o lea foi

e lelei lava le tauaveina e le Malo, leaga o le Malo e agavaa. Ma le faaaloalo i lau Afioga i le Fofoga Fetalai.

**FOFOGA FETALAI:** Malo. Ia malie o lea o le a fesoasoani atu ou uso faaleagaga. E lelei lena e faaleagaga ai lou finagalo. Ia tulai mai le sui o le Ekalesia Nasareta, le Minisita o Tupe.

**Afioga Hon Faumuina Tiatia Faaolatane Liuga:** O le taua lena o le saunoaga a le Taitai o le Itu Agai, o lea ua taua le faavae lea e faavae ai, a uumi taimi e totogi ai a tatou aitalafu, e laitiiti le tupe e totogi. O le mea foi lena o lea e talosaga mai ai sui usufono mamalu o le Maota e extend ai periods o latou faaunegatupe mai le 15 tausaga i le 20, 25, 30 ina ia togitogi gofie ai. O faiga faavae na o lea e faaoga. O la e foi e soiso le Taitai o le Itu Agai, aua o lea e lavea ai i le vaega lea, ona a tele le taimi, ua laitiiti le mea e totogi, lava le faasoa. O fuafuaga na, o lea ua uma foi ona fai le faaiuga a le Kapeneta e tau tuutuu ai i lalo tului o tupe mai le Faletupe o Atinae, ina ia mafai ona fai atinae a le atunuu ma faauumi taimi e togitogi ai loans ina ia laitiiti repayments e fai. Ma lou faaaloalo lava.

**FOFOGA FETALAI:** Malo. Ia tulai mai le Taitai o le Itu Agai e faaauau mai le saunoaga.

**Afioga Hon PALUSALUE FAAPO II:** Lau Afioga i le Fofoga Fetalai, na pau lava lau tala lea o le a fai atu ou see ese ai loa, e ala ona outou fiafia e fai le mea lea o aitalafu, aua tou te le totogia, e totogi e le atunuu. Ioe. O lea la o le a ou see ese.

**FOFOGA FETALAI:** Malie lau Afioga i le Fofoga Fetalai ae te le i see ese.

**Susuga Hon Tuilaepa Fatialofa Lupesoliai Aiono Neioti Sailele Malielegaoui:** Lau Afioga i le Fofoga Fetalai, tasi lea mea sese tele lava, aua o taimi uma lava ou te alu ai au e faatau le falaoa, o lea e i ai le VAGST i le totogiina o le falaoa, e alu i totonu e fesoasoani i le totogiina o le mea lea. O la e tatou te totogia. E faapena. A e alu foi e faatau se mea mai le faleoloa, o la e i ai i totonu le tiute, o la e i ai totonu mea uma lava e fesoasoani i le totogiina o mea ia. O la e tatou te i ai i totonu o le totogiina o mea nei. O le fesoasoani atu lena i mataupu lea tatou te talanoaina, e fai lava si lavelave, a o le mea sili o lou aumaia e fesoasoani ai matou te faamalamalama atu, ma le faamoemoe e te le toe alu i le TV e tutu mai ai. Ou te alofa ia te oe pe a e alu e tutu mai ai i luga i ina. O e manatua foi au polokalame ia i Aso Lulu ma le Aso Tofi, o i ina ou te tali atu ai faalauaitele ma atili iloa ai e le atunuu le faaletonu tele o au faasalalaua ia e fai.

**FOFOGA FETALAI:** Malo. Ou te manatu o lea ua e saunoa malamalama lau Afioga i le Taitai o le Itu Agai o le a e see ese. O le a faaauau lau see ese pe a tatou foi mai i le taimi malolo. Ae tatou te le i malolo, e avatu pea le lapataiga lenei a le Nofoa, leaga o lea faatoa tatou faatasi mai ma le au faasalalau. Ou te faatonuina le mataupu lenei ina ia aua aua ne i toe faasalalaua ni felafolafoaiga le aloaia a le Maota, leaga e limataitaiseseina ai



taualumaga a le Fono Aoa ma mea nei e faasalalau mai. O le faatonuga lena a le Nofoa. Na maitau i le aso ananafi toe maitau i le taeao nei, ua eseese Tutuila ma Ape i taualumaga a le Fono Aoa ma le faaugaina o mea ia tou te laua i luga i tou faasalalau. A manatu loa le Nofoa e le usitaia le tulaga lena, o le a le toe talia e le Nofoa se tagata faasalalau i totonu o le Maota lena. O le tulaga lena ina ia sagatonu lau o le fo ma ia tuusao le faamoemoe ina ia lipotia mea aloaia ma saunoaga aloaia a le mamalu o sui usufono mamalu o le Maota i totonu o le Maota Fono i taimi Fono ma taimi o lo o fai ai felafolafoaiga. Ma o mea na e tuuina atu i aao o le au faasalalau, ona faasalalau sao lea o le mea e tatau ona faasalalau e ala i taualumaga a le Fono Aoa.

Ou te faasilasila atu o le a faataatia ese Taualumaga a le Fono Aoa mo lana malologa masani o le taeao.

*Na faataatia ese Taualumaga a le Fono Aoa mo lana malologa masani i le itula e 10.44 i le taeao.*

*Na toe faaauau Taualumaga a le Fono Aoa i le itula e 11.20 i le taeao.*

**FOFOGA FETALAI:** Ou te faasilasila atu ua toe amatalia nei taualumaga a le Fono Aoa Faitulafono. E manatu ua tatou taunuu mai i le vaega lona lua lena o le tatou Fonotaga. E talitonu ua maua lo outou faasiliga malosi. O lea ua maitau atu ua sologa lelei le tatou koko araisa le ana outou taumamafa ai nei. E momoli atu le faafetai tele i le paia maualuga o le tatou Plemene. E faamalulu atu, o a mea ua foai e le Atua i lena aso ma le tatou Fonotaga, o la e tapena e tama le tatou suavai aua le aoauli ma le taligasua. Ae lauama tootoo o a mea ua maua i lena taeao, ia tatou talia ma le fiafia Iesu.

Ou te fia faailoa atu ma faasilasila atu mo le silafia e le tatou Maota, ua tatou faatasi foi ma nisi o tupu ma ee o le tatou atunuu, faletua ma tausii saao ma tamaitai ma alo ma fanua ua taua o le Taimua Samoa, Leadership Samoa. Ma e i ai le faamoemoe o le a timata le upega ma aotauina le faamoemoe ia avea ma ni taitai lelei i le lumanai, e le gata i Samoa nei a o atunuu i fafo. Ua auai mai i lena aso i le tatou polokalame ma le faataua, ua ogatusa ma le polokalame o le tatala atu o le avanoa ina ia faalauiloa le tatou Palemene. I lou agaga faaloalo e fai ai au ma sui o le Palemene matou te ofo alofa atu ma faatalofa atu. O lea ua outou omai tonu lava i le ioimata o la outou faatofalaiga. O i inei, o le Palemene o le atunuu, o le Fono sili lena a Samoa. O le mea tou te silasila ai ma outou vaavaai ma outou tagatagai i tu ma aga a taitai o le atunuu e faafoefoe ai lo outou soifua auauna, ma ia ao ni manogi mo le tou faamoemoe. O manu ma faamanuiaga i le Maota, ia sagai ane ai o le tai aua lo outou faamoemoe. A o le auga taua, o le ala i le pule, o le tautua faamaoni. O le auga atoa lena o le faamoemoe, aua o le filifiliga o le Maota lena, e le filifilia na o le taulaga, tatou te foi lava i tua i tupu ma ee, faletua ma tausii, saao ma tamaitai, ma taitai o nuu ma afioaga, o le fatu lena o le tatou faa-Samoa ma o le fatu foi lena o sui e omai i le Maota lena. E le gata ia lelei lo outou tomali i le mafaufau, tino ma le agaga, lelei la outou saunoa ma le faatinoga o outou tiute, ma ia toa le loto e fai le tautua mo le atunuu. O

le upu faapapalagi, ‘the way to the authority is through hard service. Ia outou manatua le tulaga lena e faamau faailogaina ai, e le gata ina avea le tagata e fai ma taitai lelei, a ia faamaoni ma fai ona tiute.

Ia, e faia le tatou malologa o lo o saunoa pea le Afioga i le Taitai o le Itu Agai. Lau Afioga i le Taitai o le Itu Agai, e tatala lava le avanoa, e leai se faatapulaa o lou taimi. A alu alu lava ua uma lenei po atoa o e saunoa, e pei lava oe o le lauga a le matua o Iuli na ola ai lo tatou itumalo. Ia, e tuutalaloa lava ma ia tautuana ma lau Afioga, ia oto le lauava mua e pei ona talosaga atu, ma aumai mea moni mo le tatou faamoemoe ina ia maua ni fesoasoani mo le Afioga i le Minisita o Tupe aemaise le tatou Malo.

E momoli atu foi le agaga faafetai tele i Ofisa Sili o Pulega i lenei taeao, faamalo le onosai. O le mea sili pe afai ua tali lelei le sua ma sao i alo le taliga o le sua i lenei taeao, e manatu o le a tele se faasiliga malosi mo le lumanai e faaauau ai le tatou galuega. O le mea lea, ia lafo atu pea i lau Afioga i le Taitai o le Itu Agai e te tulai mai e faaauau le saunoaga.

**Afioga Hon PALUSALUE FAAPO II:** Faafetai mo le avanoa e faaauauina ai le tuualalo a lenei sui usufono. O lea ua palega auau foi le taliga o le sua i sui usufono mamalu o le Palemene. E momoli atu le faafetai i lau Afioga i le Fofoga Fetalai ma le Pulega aua o lea ua maua ai faasiligamalosi e faaauau ai. E ui lava ina fai sina suavaia o le sua araisa ae ou te talitonu e sili foi lea aua o lea tatou te sauni atu i le mea tele pe a malolo i le 12.

**FOFOGA FETALAI:** Lau Afioga i le Taitai o le Itu Agai o lena foi la e mele le taumafaiga a le...o lau Afioga o le sui o le SPAGHL. Ia e manatua lelei o mea lava e aveese ai le suka lea e te gasegase ai lea e taunafai e tausii ai tatou mea taumafa.

Tulai mai lau Afioga i le Taitai o le Itu Agai e faaauau le saunoaga.

**Afioga Hon PALUSALUE FAAPO II:** Lau Afioga i le Fofoga Fetalai o lea o le a ou see ese. E pei lava ona amata lau folasaga o le fautua sao atu i lau Afioga i le Minisita o Tupe ia maua ni fesoasoani e te tua i ai lau faasoa mo le atunuu. Sa i ai le faamoemoe i le faatuina o tatou Faalapotopotoga Tumaoti. O lea la o le a ou oo faasolosolo lemu atu.

Ona ou oo mai lea i le Pulega o Uafu ma Taulaga. O le agaga lelei sa faamoemoe i ai le Malo aemaise lava le atinae i Satitoa. E ui lava i se matou faamanatu ma tuitui atu ae fai pea lava pea, lava pea. O i tonu lava na gau ai le uafu o le atinae la e i tua. Sa alu i ai le matou asiasiga ua tulaga i se tulaga faaletonu ae fia sefulu miliona a le tatou atunuu ua goto ai i o. Ona o le a? O atinae soona fai e le o manaomia i le taimi lenei.

**FOFOGA FETALAI:** Malie le Taitai o le Itu Agai sei tuu atu le avanoa i le Afioga i le Minisita mo Galuega, Felauaiga ma Atinae Eeseese leaga o lea ua taua le Matagaluega a le Afioga i le Minisita.

Tulai mai lau Afioga i le Minisita.

**Afioga Hon Manualesagalala Enokati Posala (Minisita mo Galuega, Felauaiga ma Atinae Eeseese):** Lau Afioga i le Fofoga Fetalai ma le paia o le Maota ona pau lava sina popolega i le saunoaga a le Taitai o le Itu Agai e pei o se tupe ua le aoga. Ao le faamoemoe sa i ai le Malo, ua uma foi ona

folasia lagona i lea tulaga. O le faatinoina o galuega tau faatoaga ma faiga faiva ua oo i le taimi e tatau ona siisii ai aua tasi lea tamaoiaiga lea tatou te agai i ai o le siitia o le tulaga faafaigafaiva. Ua le o toe gafatia e alia ia e i ai, ua i ai le tulaga ua tatau ona aumai ni vaa e faaaoga e kamupani e fai ai faigafaiva ma maua ai foi galuega. O le auala lea ua i ai o la e ua i ai le vaa toso vaa e mafai ona faaleleia ai tulaga ia. O vaa ia e pei o le siitia o le auaunaga i tulaga ia ma ofi mai foi ma investors o tagata mai fafo e mafai ona....ae o lea faatoa maea le scoping study sa fai i le masina na tea nei ma ua tuuina mai foi ma latou fautuaga i auala e mafai ona faaleleia ai tua i Satitua ma le uafu ma le vaega o le sleep way. O tulaga fiafia ia ina ia mafai ai aua o lea ua maua le auaunaga e faatino ai, pei ona i ai foi i Savaii i le itu Asau faapena lea itu o le atunuu o lea ua mafai ona tatou laa laa i luma.

**FOFOGA FETALAI:** Malo faafetai mo le faamalamalamaga a le Afioga i le Minisita mo Galuega. Mo le faasoina o lou taimi le Taitai o le Itu Agai, sei tuu atu le avanoa i le Afioga i le Palemia.

Tulai mai lau Afioga i le Palemia.

**Susuga Hon Tuilaepa Fatialofa Lupesoliai Aiono Neiote Sailele Malielegaoi:** Lau Afioga i le Fofoga Fetalai, o le masina o Setema 1989 sa ou i ai i Filipaina ou te savali ane loa o le a ou tuua Filipaina ae oso mai loa le breaking news, ua lulu le mafuie i LA ma o le tele o auala sima highway ua collapse uma lava ma pauu i le malosi o le mafuie. E faapena foi i Christchurch ina ua lulu le mafuie iina, tele fale tetele ma le malolosi na pauu, goto i lalo le elele. Ua amata ona toe fausia ae toe oso le isi mafuie. E i ai le faitioga sa faasaga foi i fuafuaga a le Malo ona e tusa ma le \$300miliona e tatau ona nono i le vaiaso mai fafo e toe faaleleia uma ai mea na faaleagaina i le mafuie i Karaiesetete. E NZD300miliona i le vaiaso. Ua ala ona ou taua le mea lea aua po o a fuafuaga mamao e fai e le tagata ae o le ale lava i galuega mamana a le Atua ma le afaina o le uafu lea. E leai se isi na iloa o le a agi le sunami aua o mea uma lava ia e faafeagai ma tatou. E tatou te fuafua tatou fuafuaga ae tatou te le iloa ni mala e tupu mai ae le mafai ona tuua le atinae leni. Aisea? Leaga foi o le atinae leni e tupu pea, tupu pea, tupu pea, ona o le nofoaga lea e aupitosili ona tulata i Amerika Samoa e uunaina ai feaatauaiga i le va o Malo e lua. O lea foi ua uma faatalanoaga ma le Malo o Amerika Samoa a mafai ona see mai le latou uafu e alu atu le tatou vaa i Aleipata taula ai, a saosaoa le vaa pe na o le lua itula e malaga mai ai i Aleipata ona agai atu lea taula i Leone. O le mea lena o lea e faataoto, e leai lava se mea o fai atu loa lelei. Tatou te le ma iloa mea e tutupu lea e toe afaina ai tatou taumafaiga. E le faapea o leaga fuafuaga na fai. Lau Afioga i le Fofoga Fetalai, o le tulaga lena pau lava lea mea o le toe faaleleia o mea na faaleagaina ona leai lava o se mea e atugalua ai fua le taofi aua o mea nei, o mea e aoga i le atinae o le tatou atunuu aemaise lava le va lea ma Amerika Samoa.

**FOFOGA FETALAI:** Malo faafetai i le saunoaga a le Palemia. Tulai mai le Taitai o le Itu Agai e faaauau le saunoaga ou te manatu ua malamalama lea vaega.

**Afioga Hon PALUSALUE FAAPO II:** Faafetai lava mo le faauilavea aemaise o faamoemoega o le Malo. Pau lava lo ta ita manatu aemaise lava le Pulega o Uafu ma Taulaga e ave i ai le faamuamua. A silasila i le taimi lenei o le matua tele o le faaletonu o le Tala o le Tupe a le Pulega lea ae i ai foi vaega e mafai ona maua ai latou tupe ao le faatamala. Silasila i le eleele lea i tai o le Marina, o le eleele aupitosili ona taugata i totonu o le atunuu lenei ao lea ua lisi. Aisea na le fau ai e le Pulega fale ona lisi ai lea aua o le matua taugofie lava o le lisi lea e fai ai. O ai lea e fai i ai le lisi?

**FOFOGA FETALAI:** Malie le Taitai o le Itu Agai sei tuu atu le avanoa i le Sui Palemia.

Tulai mai lau Afioga i le Sui Palemia.

**Tofa Hon Fonotoe Nuafesili Pierre Lauofo (Sui Palemia):** O le lisi la e lisi e le Kamupani masalo o le lona tolu ai lea o Ofisa Sili o Pulega talu mai le Ofisa Sili o Pulega sa nafa ma le mataupu lenei. O le mataupu lenei sa valaaulia uma lava le toatele o le aufaipisinisi e fai atu ni a latou proposals po o ni ata e fai ai le filifiliga a le Komiti Faatonu a le Pulega. Ona faapena lea ona faagasolo masalo na amata mai lona mea po o le valu tausaga talu ai. Ua leva ona tapenapena ma fuafua mai. Ia ona faasolo mai lea ma fai le filifiliga faapena foi tulaga uma sa faailoa i le Malo ma le Kapeneta ma tulaga uma faapena. O le lisi foi sa fuafua le totogi o le lisi i luga o valuations sa fai. Sa tapa uma lava lipoti ma tulaga faapena a i latou o lo o fuafuaina le tau o le lisi ona fua lea i ai le totogi o le lisi. E faapena foi le mea lea sa fai i le isi foi fanua lea e pito i o. O le mafuaaga pei sa faaailoa i lona vaiata, e leai se fuafuaga e faaoga lea fasi eleele. E manatua foi o le mea lea sa i ai le matafaga i aso ia ona tanu lea. E lei i ai la se fuafuaga i lona vaiata e i ai se mea e faaoga ao le manatu le manatu o le Pulega sa faalauiloa e faaoga ia e maua ai se isi fasi seleni a le Pulega. Pei o le tulaga lona na silasila ai foi e lisi le tamai fasi fanua lea e le tele foi sona tau. O le tulaga foi la e i ai i tuutuuga o le lisi a manaomia loa e le Pulega le fanua e faaoga i sana galuega po o se mea e fia faaoga i ai e tusa ai ma ana galuega fai, e mafai lava ona toe ave e le Pulega e le o natia le tulaga lona. E faigofie lava ona fai aua e leai se mea atugalua ai fua le Taitai o le Itu Agai i lea vaega. O la e manino mea uma leai lava ma se mea o faaletonu.

**Tofa Lealailepule Rimoni Aiafi (Faleata Sisifo):** Lau Afioga i le Fofoga Fetalai.....

**FOFOGA FETALAI:** Mo le faasaoina o lou taimi le Taitai o le Itu Agai sei tuu atu leaga tasi lea sui usufono sa saunoa i le mataupu lea.

**Tofa Lealailepule Rimoni Aiafi:** O lou sui usufono na laga le mataupu lea. Ma le faaaloalo i lau Afioga i le Fofoga Fetalai, o le lisi lea ua uma ona talanoaina e le Komiti o Tupe Maua ma Tupe Totogi ma e leai se isi o le Komiti o Tupe e lei faaalua sona finagalo i le le talafeagai o le lisi. O lea na avatu ai lau fautuaga e toe ave le isi e toe tusi faalelei ma faasao. O lona e tele le vaivaiga la e i ai e le o tutusa le tupe e maua ma le tulaga la e i ai le fanua.

**FOFOGA FETALAI:** O lea ua maua le sui usufono mo Faleata Sisifo. Sei tulai mai le Sui Palemia.

**Tofa Hon Fonotoe Nuafesili Pierre Lauofo:** Lau Afioga i le Fofoga Fetalai e le mafai ona...o le tulaga foi i le lisi ua uma lelei ona siaki ma pasia e le Ofisa o le Loia Sili. E lei i ai la se mea faapea na faaletonu i totonu o le lisi ae sa tatau la i le tou Komiti ona aami le Loia Sili e alu e fai atu se tala i le lisi pe a faapea o lena tou te manatu e i ai se mea o faaletonu i le lisi. O le mea lena sa tatau ona tou faia, o le mea la lea se taumafai e faaatoatoa tou galuega ae aua le faataetaealuga.

**Tofa Lealailepule Rimoni Aiafi:** Lau Afioga i le Fofoga Fetalai o lea o le a avatu lou manatu mulimuli lea. O le Pule Sili o le Pulega o le loia la ua ave i ai fautuaga a le Komiti e toe o faasao le lisi o lena e sese. O la foi ua malie i ai le Susuga i le Alii Pule.

**FOFOGA FETALAI:** Sei tulai mai le Sui Palemia.

**Tofa Hon Fonotoe Nuafesili Pierre Lauofo:** Lau Afioga i le Fofoga Fetalai na o le tasi lava le loia e amanaia e le Malo na o le Loia Sili a le Malo, o le loia lena na te fautuaina le Malo. O ia lena na te fautuaina le Malo a siaki loa ma pasia mai e le Loia Sili o lena, o le tulaga lena.

**FOFOGA FETALAI:** O le a tuu atu muamua le avanoa i le Taitaifono o le Komiti o Tupe Maua ma Tupe Totogi ona tuu atu ai lea o le avanoa i le Minisita o ia lea e vaaia le lisi lea.

Tulai mai le Taitaifono o le Komiti o Tupe Maua ma Tupe Totogi.

**Susuga Hon Papaliitele Niko Lee Hang (Taitaifono o le Komiti o Tupe Maua ma Tupe Totogi):** Faafetai i lau Afioga i le Fofoga Fetalai mo le avanoa. Ma le faaaloalo tele e fia faaali foi se manatu i le tulaga lea ua aliaie mai i le lisi lea. E sao le saunoaga a le sui usufono mamalu sa tapa e le Komiti o Tupe le lisi ona o le tulaga o le tupe lea e faaogaina mai le Tala o le Tupe e le Pulega o Uafu ma Taulaga. O la e talafegai le faaupuga o le lisi ae pau le mea sa fesiligia e le Komiti o le tau o le lisi. Sa manatu le Komiti ua fai sina maualalo e \$3,500 i le masina. Pau lena o le tulaga sa fesiligia e le Komiti ae o le faaupuga o le lisi o la e talafegai i lalo o le Tulafono. Ma le faaaloalo lava.

**FOFOGA FETALAI:** O lea la ua manino le mata o le vai. Malie lau Afioga i le Sui Palemia o lea ua manino.

**Tofa Hon Fonotoe Nuafesili Pierre Lauofo:** E leai na ou faapea atu lava e vave lava lau Afioga i le Fofoga Fetalai o lipoti o valuations sa tapa ma silasila i ai le Komiti Faatonu ma itu e lua lea e mafua ai ona i ai le maliega i le lisi lea e pei ona totogi ai le lisi. Ma lou faaaloalo lava. E leai la se isi faiga o faiga masani lava na e fai i lisi ma tulaga uma. Ma lou faaaloalo lava.

**FOFOGA FETALAI:** Malie lau Afioga i le Taitai o le Itu Agai sei tuu atu le avanoa i le Minisita mo Pulega o Uafu ma Taulaga.

Tulai mai lau Afioga i le Minisita.

**Afioga Hon Manualesagalala Enokati Posala:** Lau Afioga i le Fofoga Fetalai o le itu foi i tai i le mea Matagofie i le itu i tai o le uafu, o la e foi e lisi, la e lisi i lalo o le Tanoa o la e lava e maua ai seleni e ui lava e lei faatinoina le galuega ao la e lava e lisi foi. O Iona uiga e le faapea na o le pau lea o le lisi o la e i ai lava vaega o le uafu o la e lisi atu i le aufaipisinisi ina ia maua ai seleni. Ma le faaaloalo.

**FOFOGA FETALAI:** E manatu lau Afioga i le Taitai o le Itu Agai o lea ua manino le faamalamalamaga, o lea foi ua faaali le finagalo o le Afioga i le Taitaifono o le Komiti o Tupe Maua ma Tupe Totogi, ma ave foi la outou fautuaga i le Loia sili pe a talafeagai le lisi lea e i ai le atugaluga o le Komiti, a o lea ua saunoa manino le Afioga i le Palemia, ia e valu tausaga talu ai, he was unimproved the value, sa fai ai tulaga o le faafoega o valuation eseese na tuuina mai. Ina nei meaane ua silasila la outou Komiti i le progress o le mea la ua i ai, ona outou nonofo fua lea ma fai le valuation i luga o le mea sa fai e le unimproved value.

O lau lea fesoasoani atu leaga ua faalua ona ta talanoa o lea ua toe tuuina mai le faamalamalamaga, ou te manatu lau Afioga i le Taitai o le Itu Agai ua manino le lisi. O lea foi ua saunoa i le front line lea o le a alu atu i i, e maua ai ni a oulva lisi ma le sui usufono mo Faleata Sisifo. O le tulaga lena o lea o le a faatulaga ai, e tele lava le mea o le a oo i ai le faamoemoe e tofu lava le tagata, have his piece, ia ona outou o ifo uma lea ia outou na le aufaafiafia e fai uma ia tulaga o lea e tali a tatou malo i le 2015.

Tulai mai lau Afioga i le Taitai o le Itu Agai.

**Afioga Hon Palusalue Faapo II:** Lau Afioga i le Fofoga Fetalai, o lea ua...ou te le iloa po o le a le mea e vevesi ai i le lisi, pau lava lau fautuaga, o ni tupe maua e fesoasoani i le faafitauli lea e tulai mai i le Pulega o Uafu ma Taulaga, a o lea ua tu ae le Sui Palemia a o lea e i ai faiga faavae a le Malo, lea na faamavae ai nei ia...aveese le aufaipisinisi ia mai le Minisita o Tupe, a o le conflict of interest la lea, ona o le Sui Palemia...o le mea lena o lea ou te tulituli atua.....

**Tofa Hon Fonotoe Nuafesili Pierre Laufofo:** Lau Afioga i le Fofoga Fetalai.....

**FOFOGA FETALAI:** Ia le Taitai o le Itu Agai, leaga o lea ua faalala ou aao e toe tusi agai i le Afioga i le Sui Palemia, o lea la o le a tali atu le tagata na ia saunia le faamoemoe lea. Tulai mai lau Afioga i le Minisita mo Fesootaiga ma Faamatalaga Tekonolosi, o le sa avea ma Minisita o le Port Authority.

**Afioga Hon Tuisugaletaua Sofara Aveau (Minisita mo Fesootaiga ma Faamatalaga Tekonolosi):** Lau Afioga i le Fofoga Fetalai, faafetai. O lena ua faamalamalama lelei atu lava le faiga o le lisi sa i ai, na uia uma auala uma na faasalalau le lisi o i latou na mananao e fai ai le pisinisi lea sa tali mai, uma fai le negotiations i le lisi ma le amount sa i ai i le taimi lena, aua e leai se mea sa i ai, o le ogaelele lava ia e na o mutia ma le vao sa i ai. Na fai la le

valuation a i latou sa ofo mai, fai le valuation a le SPA sa i ai i lona taimi, fai loa lea ua malilie i le tulaga o le totogi ona ave loa lea i le Loia sili, kilia mai iina aumai fai ia tulaga, ae lei Sui Palemia le Afioga i le Sui Palemia o lo o i ai i le taimi nei. A o lea la ua aumai e outou i le taimi lenei, a o mea ia na fai atu pei ona fai i le valu, fitu talu ai, e lei afio le Afioga i le Sui Palemia i lona taimi, nei tei ua faaelelea lona suafa i lea mea ae lei aafia faatasi ai i lona tulaga. Ma le faaaloalo lava.

**FOFOGA FETALAI:** Ae o le a faasaoina le taimi, o le a avatu le avanoa i le Afioga i le Palemia, ona tuu atu lea o le avanoa i le sui usufono mo Faasaleleaga Nu.4, tulai mai lau Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoui:**

Lau Afioga i le Fofoga Fetalai, e i ai le mea taua lava lea ou te fia taua, i le 1991 na fai ai le iuga a le Malo o le a faamatuu atu ni fanua i tua pe ma le 1,000 ni kuata eka mo ni aiga fou, ona fai lea o le tau i le taimi lena e \$30,000 i le kuata eka masalo o le taimi lena e \$40,000 i le kuata eka, ae na faapau ifo i le \$32,000 e fesoasoani i tagata e leai ni fanua, o lea la ua tumutumu ai uta i Vaitele mai Savaii ma tua. O tau o fanua lea ua i ai nei i le valuation, ua i le va o le \$80,000 i le \$100,000 i le kuata eka talu mai le 1991 ua alu i luga le tau. O le tausaga o lea ou tau manatu o le 1967 na tatou ave ai le tatou talosaga e fia fai le tatou eletise o le vai i tua i Afulilo, o le taimi lena e na o le \$40,000 le tau, ae fai mai le ADB fou lava faatoa faatu, e taugata tele le tau o le eletise lea e alu i le vai. E mafua i se a? Aua o le taimi lena na o le seleni ma le sisipeni pe na o le 15sene i le kalone suauu, o nei la ua alu i luga tau, e toe talosaga atu tatou ua toe fia fai tua, ae sau le faaiuga o lea ua talafeagai tonu lava, ae sau le tau ua lata i luga i le USA\$100miliona eseese o tau. O le faalavelave lea e tupu i i, ua tapa e le Komiti le tau, tilotilo i le tau i le fia ausaga talu ai po o le sefulu tausaga talu ai pe fia tausaga lea na fai ai le lisi lea, toe tilotilo loa i le taimi lenei, taunuu loa i le faaiuga lea ua taugofie tele le lisi, o le faalavelave o lea ua outou tilotilo i le tau i le taimi lenei, sei vaai i le tele o le mea sese ua fai. O le mea lea na ou faapea lava tou te atamamai ma outou iloa le eseese o tau. O le mea lea ou te fai atu ai, afai e ta te le o faaletonu e sili ona ta gugugu nai lo le masua mai ae iloa ai le faaletonu tele lena e ia te oe. Ia o lea ua ou iloa nei le tele o le sese, ia faaauau lau saunoaga.

**Tofa Lealailepule Rimoni Aiafi:** Lau Afioga i le Fofoga Fetalai.....

**FOFOGA FETALAI:** Malie le sui usufono, sei tuu atu muamua le.....

**Tofa Lealailepule Rimoni Aiafi:** Malie lou finagalo ona o lea o le a tuuaina sese le Komiti lenei i le vaivai o le Komiti, o le lisi o lea e ia matou le lisi. O tuutuuga o le lisi e review tai tolu tausaga ae le mafai ona sili atu i le 10% o le tupe la e i ai, e le faapena le faiga o ni lisi, o lea matou te iloa uma le taimi na i ai ma le agai i le lumanai, e fua le tupe e tataua ona totogi ma le tupe lea ua aumai ma le alu i luga o le atinae, a o lea ua tamau i totonu o le lisi ma o le lisi foi e lei tusia e se Loia sili. Ma le faaaloalo lava.

**FOFOGA FETALAI:** Ia o le a taatia le manatu lea i le Matagaluega, lau Afioga i le Minisita e ona ia le Matagaluega, leaga o lea ua fesiligia faiga faavae ma le faamaoni o le tusiga o le lisi, o le a lafo atu i lau Afioga ae talitonu le faamoemoe o lea na ioeina i ala o le Tulafono. Afai ua uma ona lesitala, ua uma ona lesitala le lisi lau Afioga i le Minisita?

**Afioga Hon Manualesagalala Enokati Posala:** Lau Afioga i le Fofoga Fetalai o lea lava.

**FOFOGA FETALAI:** Ia uma la le mataupu, o a uma aiaiga ma mea uma sa faatulagaina i lea taimi, afai na ioeina e le Matagaluega ma le Afioga i le Minisita i lea taimi, ia ua le iloa la po o le a le mea lea e toe talanoa ai.

Tulai mai le Afioga i le Minisita o lo o i lalo o le Palemia, le Sui Minisita e faasao atu.

**Afioga Peseta Vaifou Tevaga (Faasaleleaga Nu. 4):** Lau Afioga i le Fofoga Fetalai toe faasao ifo lava, o le Palemia lona lua pe afai o lea e sese lou aumaiga o le mea lea.

Lau Afioga i le Fofoga Fetalai leai ua ou tulai atu ona o lea foi ua toe aumai e le Itu Agai lea foi sa saunoa i ai le sui usufono mo Alataua Sisifo i le aso ananafi, ma o nei mau sese ma faavalea ai le atunuu ma itumalo, e le moni, a o lea e toe aumai foi e le Taitai o le Itu Agai, a o ia lava lea ma le sui usufono mo Gagaemauga Nu.2 na la omai i luga o le TV ma aumai le talosaga e ma te o ese ma lou uso a Minisita Lagolago, ona o le tulaga foi lea o le masalomia. O upu a le Tusi Paia, 'amuia ē e tuuaifuaina,' o lea la ua pulea e Peseta lona loto, o lea la ua ou alu ese ai ma ou faamavae atu i le Matagaluega, aua foi la nei galo leaga o lea e faafofoga mai le sui usufono lea mo Alataua Sisifo, o le Matagaluega lea ua ou tuua nei, o i lea na alu atu ai le tupe lea e faaola ai le vai lea e i Neiafu.....

**Afioga Lafaitale Patrick Leiataualesa (Alataua Sisifo):** Lau Afioga i le Fofoga Fetalai....

**FOFOGA FETALAI:** Malie le Alataua sei maea mai le saunoaga ona avatu lea o le avanoa.

**Afioga Peseta Vaifou Tevaga (Faasaleleaga Nu.4):** E tatau la ona manatu i se isi tulaga i lo ma alolofa ma le alofa o le Minisita o Tupe, pe faapefea ona faatino le poloketi lea i Neiafu, e mafua i se a? i le tuualalo lea, a o tuuaiga ia ua aumai nei, lea foi na saunoa le Afioga i le Taitai o le Itu Agai i le tulaga lea, o oulua malamalama o lea ua ou alu ese nei ma le Matagaluega lea, o le Matagaluega lea e avatu ai tupe e faatino ai, o le paoa, eletise ma le vai, alu ifo lea i luga e ola ai mea uma ma pepe ai mea uma. Ia afai la o lea ua sua le vai o Neiafu ae oo i le vaiaso fou ae pe, malie lau Afioga i le sui usufono, aua e te toe tolotolo mai ia te au. Ma lou faaaloalo lava.

**FOFOGA FETALAI:** O le a avatu pea le avanoa le Alataua, ae le o ni ai i avea, ou te ofo lava i lou amanaia o le taumafai o le Alataua, Faasaleleaga ona o le tuuaia o le conflict of interest, ae o le a avatu pea le avanoa.



**Afioga Lafaitale Patrick Leiataualesa:** E leai foi se agaga e faoa le taimi o le Afioga i le Taitai o le Itu Agai. O le mea e fia faasao, silasila foi outou i le saunoaga tuulafoai a le sui usufono fai mai, leaga o lea faatoa sau ananafi, o le vai lea a le itumalo lenei ua leva ona talosaga faatoa sau ananafi le sui usufono. O le mea lea, se taatia ia ia mea, a ou talosaga atu nei i lau Afioga i le Fofoga Fetalai sei tuu mai se taimi sei ma o ai i fafo po o ai e toe foi mai i totonu, o le mea lena ou te manumanu i ai.

**FOFOGA FETALAI:** Ia malie ia oe le sui usufono mamalu, e manatu e le o ni...sei faataunuu muamua le isi fusuaga lea ua tusia, ona sauni mai lea o le lua paga ma le sui usufono mo Faasaleleaga Nu.4.

Ia o le a lafo atu i lau Afioga i le Taitaifono.

**Susuga Hon PAPALIITELE NIKO LEE HANG:** Lau Afioga i le Fofoga Fetalai faafetai mo le avanoa. Ua ou tulai atu ma le agaga faaaloalo ona ua manatu le Komiti ona o le saunoaga a le Afioga i le Palemia, ona ua saunoa mai e vaivai le matou Komiti. Ma le faaaloalo tele lau Afioga e leai sa fesiligia lava le tulaga lea e le Komiti fai le faaiuga, o la e talafeagai le lisi na o le pau lava le mea sa...e sao foi le mau lea ona o le lisi sa saunia i le valu tausaga talu ai, sa base lava la le lisi i le taimi lena, a o le naunautaiga lava a le matou Komiti, ona o lea e manaomia e le SPA le \$4miliona, o lea la na agai loa le Komiti e saili nisi tulaga e maua ai nisi tupe maua e fesoasoani ai foi i le Matagaluega po o le Faalapotopotoga. Ona tulai mai lea o isi vaega ia sa soalaupuleina e le Komiti ma ua faamalieina foi ona sa tapa le lisi. E sao le mau lea ona o le tau sa fai i le valu tausaga talu ai, e le tutusa la ma le tau i le taimi nei, ona o lea foi ua alu i luma le pisinisi, ia o uiga lava na faalenatura a tatou, a avatu loa i se tulaga faapena ia o le mafaufau lava lena, e tataua ona sii le lisi, ae paga lea o la ua saisaitia le Faalapotopotoga le lisi lea ua uma ona sainia. Ona o lea ua toe lagalaga mai finagalo o le matou Komiti, ae ua uma lava ona fai le matou faaiuga e talia ia faapena leaga o lena ua saina le lisi, ae i ai tuutuuga la e i ai i le isi pei sa fesiligia foi e le matou Komiti, ae ua leai se mea sei uma lava le 20 tausaga ia ona toe review lea o le lisi. Ma lou faaaloalo lava.

**FOFOGA FETALAI:** Malo faafetai. Tulai mai lau Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai, e le o agai atu si au mataupu i le Taitaifono a o lea e agai tonu ia i latou nei o lo o faapea mai, o lo o sese ona fai le lisi, o lea lava e manino lau saunoaga. Pau lava le mea ou te faamanatu o lo o maioio ia tiute o le Tafatolu, o le tulaga lava ia o le sailiga o auala e faatupe ai ia Matagaluega a le Malo, o le matafaioi lena e fitoitonu lava i le Pulega, e le fitoitonu i la outou Komiti, e le o se mea lena a la outou Komiti e fai. E pau lava le mea a la outou Komiti e fai, o le tapa o ni lipoti e aumai ona aumai lea o ni a outou fautuaga i i le Palemene, a o le matafaioi o sailiga o mea e faatino ai galuega, o le matafaioi lena a le Pulega, e le o se matafaioi a le Palemene. Atonu foi o le tulaga lea o le a tauau ina oso-pa ai nisi sui usufono i luga atu o latou tiute o le mea e le oo i ai, pau lava le mea a outou e fai, o le silasila i Lipoti interview latou e omai, ia ona aumai lea o a outou fautuaga i totonu i i tatou te talanoa ai ia ma fai ai iuga ma faalogologo

atu foi ia Minisita i se mea e talafeagai ia ma se mea foi e le talafeagai. Ia o lea la ua laga laga nei le lisi o lea ua outou faafogafoga mai, o mea tonu ia tau le Pulega, lea e i ai i latou o lo o i ai le tomai i le faatinoina o faiga faavae o i ai i lea taimi ma lea taimi, aua e faapena ona fai e fai lava ma sui sui faiga faavae mo le agai i luma o le Malo. Lau Afioga i le Fofoga Fetalai, ia o le toe tali atu lena i le mataupu.

**FOFOGA FETALAI:** Malo faafetai. Lau Afioga i se tasi o sui usufono mo Palota Taitoatasi, na taua lou igoa i le feutagaiga lea na fai?

**Afioga Maualaivao Pat Ah Him (Palota Taitoatasi):** Lau Afioga i le Fofoga Fetalai, e fia fai se manatu i le saunoaga i le Afioga i le Palemia.

**FOFOGA FETALAI:** Tulai mai le sui usufono.

**Afioga Maualaivao Pat Ah Him:** Faafetai, o se mea e fia faasao. Faafetai mo le avanoa lau Afioga i le Fofoga Fetalai. Ou te fia tautala ma le faaloalo i le tulaga e faalautele ai ni lagona e aafia ai le toatele o tagata e pei o le upu lea o le aufaipisinisi. O lo o faapea mai ua tutuli le aufaipisinisi, ou te talitonu i le afifio mai o sui usufono i totonu o lenei Maota.....

**FOFOGA FETALAI:** Malie le sui usufono se i avatu le avaoa i le Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoui:** Se i ou fesoasoani atu lava i le matupu lea. E lelei ona ou faaalua le tulaga lenei, o le faaiuga a au na fai ai le toe fesuiaiga o tofiga. A outou silasila i le Tulafono o lena e tau mai ai i ina o le iuga o le iuga a au. O le Tulafono o le Tofiga o i latou o Minisita Lagolago, e faapena ona faatino ou tiute, a ou iloa lava o le a fesui ai e faapena lava ona fesui ai, a o le tulaga na ou fesui ai ona o le tele o le masalosalo.

Masalo e sili ona ou taua le tulaga lena o le masalosalo. E masalosalo faapea ai o i ai ni konekarate o lo o tuu atu ia i laua nei. O le mea moni e leai ma se mea faapena na faia aua o le faaiuga o mea uma e omai ia te au Minisita o le Kapeneta, e leai lava la se mea ua oo mai e aafia ai i laua uma ia. A o luga o lou lava manatu o le a fesui ai o latou tulaga ona o le tele o le masalosalo, o le mea lena na fai ai. A o lea ua avea se faiga lelei ma mea ua tau atagia mai ai le tuuai pea, tuuai pea o i laua nei. A o lea ou te talanoa atu e leai lava se mea o afaina ai le tulaga o ni konekarate ua ave i ai. E leai lava se mea e tasi ua aafia ai e tusa ai ma iuga ua faia e le Kapeneta.

O le faamalamalama lena lau Afioga i le Fofoga Fetalai, faataatia ese ia mea ona o lea tatou te fetogiai lava i suaga aua o suaga mea ia e fai. Ona ou faapea atu ai lea, o lena ua pasia le mea lea leaga na oo i ai lou malosia ma o au foi na ou alu saina. E leai ni mea faapena e faia, e leai se Minisita Lagolago e saina i nonogatupe. E le mafai ona ia saina se mea faapena, a o tifiga faatamalii tatou te talie ai i le faalili e le isi sui usufono o le isi sui usufono.

Lau Afioga i le Fofoga Fetalai, o le mea lena e ala ai ona ou fautuaina ai pea la outou Itu Agai, a outou faalogo i ai i se tala, aua tou te vave faasalalau ae saili po o le telefoni atu ia te au po o le Minisita ma fesili i ai, “E moni le mea

lea?” Ona faamatala mai ai lea. E faapena ona fai ma taofia ai le alu atu i tua o ni mea e le faavaea ma atili atagia ai foi i tatou o lea e tau o Taitai o le Atunuu na filifilia.

**FOFOGA FETALAI:** Malo faafetai, out e faamalulu atu i se tasi o sui usufono mo le Palota Taitoatasi, Afioga Maualaivao Pat Ah Him, out e talitonu ua manino ma malamalama le saunoaga a le Afioga i le Palemia, aua ia le alu le foe ma faanape pe e te atugalua ona o lea e taua le aufaipisinisi leaga o le tulaga lautele. Out e talitonu ua manino ma malamalama ma o le a vaatele i lou tau tulai mai, e leai se mea o le a e atugalua ai pe toe saunoa o lea ua malamalama le faamalalamamaga a le Afioga i le Palemia.

O le a toe tuu atu le avanoa ona o lea sa tua le sui usufono mo Vaa o Fonoti.

**Afioga Tialavea Fea Tionisio Seigafolava (Vaa o Fonoti):** Faafetai lava mo le avanoa i lau Afioga i le Fofoga Fetalai, faafetai foi i le Afioga i le Palemia mo le faamalalamaina o le mataupu lea. O le po anapo sa maimoa ai le atunuu atoa a le interview a se tasi o sui usufono na faapea ai lana faamatalaga; “O ia na fautuaina le Afioga i le Palemia ina ia aveese maua”. O saunoaga faapea e le logo lelei, a o lea ua saunoa le Afioga i le Palemia ua ou malie.

**FOFOGA FETALAI:** Faafetai i le faatofalaiga i lau Afioga i le Feagaiga le Vaa o Fonoti. Ou te manatu ...e i ai se isi mea le Alataua.

**Afioga Lafaitale Patrick Leitaualesa:** Faafetai i lau Afioga i le Fofoga Fetalai, masalo e sese le faalogo a le sui usufono. O au e ona le interview lea, e leai sau tala faapena na faia. O fea o i ai le TV 3 lea e saofafai mai i i? E leai se tala faapena a le sui usufono mo Alataua Sisifo na fai, ae silasila foi outou i le saunoaga a le Afioga i le Palemia se o masalosaloga. O lau upu na fai atu ona na ou fesiligia le mea lea ananafi, e le iloa po o le aualii ia o lea e faaletonu ai le Tala o le Tupe. O tala faatofalaiga, ae leai se agaga e faapea ua fai atu le sui usufono mo Alataua Sisifo o ouluga e gaoi. O le mea lea ou te fai atu ai, ina ia toe faafoi saunoaga a le sui usufono leaga o lea e nonofo mai le TV.3 na omai e interview Au, na ou fai atu o lau lava faafetai i le Malo i lou vai a o lea ua outou fesiligia le mea lea. Ou fai atu e sao, sa afea i lau faamatalaga atonu e manaia foi lea suiga ae ou te le i fautuaina se Palemia. Ia saunoa sao oe i le vaega lele na faia le au faitatala lele.

**FOFOGA FETALAI:** Malo faafetai i le sui usufono mo Alataua Sisifo, ou te manatu ua gata i i lea filauvi ua manino ma malamalama lea mataupu.

**Afioga Maualaivao Pat Ah Him:** Lau Afioga i le Fofoga Fetalai o le mea lea sa taumafai atu ai ona o tulaga faapea, ae ui o lea ua saunoa malamalama le Afioga i le Palemia ma ua malie foi o matou loto, atonu o le a faapena ona faaoga pea le agaga tataua ina ia malupuipua ai tagata ma soifua fiafia lo tatou atunuu.

**FOFOGA FETALAI:** Tulai mai le Taitai o le Itu Agai e faaauau mai le saunoaga.

**Afioga Hon PALUSALUE FAAPO II:** Faafetai, silasila i le Itu lenei e olo lava le fua, e maopoopo, e le femisaai i i. O le mea lea lau Afioga i le Fofoga Fetalai, se se i tuu a outou misa se i outou o i le tou faa-Faletui fai ai.

Lau Afioga i le Fofoga Fetalai....

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai, o lea sa e i i, o le tele o misa faapenei e atili ai ona maopoopo. Ua galo ia oe lua fusuaga ma le isi sui usufono?

**FOFOGA FETALAI:** O le faaoo lima i le isi sui usufono lau Afioga i le Palemia.

Tulai mai se tasi o sui usufono mo Aana Alofi Nu. 1, Afioga Hon Leaupepe Toleafoa Apulu Faafisi.

**Afioga Hon Leaupepe Toleafoa Apulu Faafisi (Aana Alofi Nu. 1):** Lau Afioga e pei o le a sala ese le tulaga o le tatou Fonotaga, ae na ona ou tulai atu ona o lea matou te lavea i le aao o le Taitai o le Itu Agai o lo o faapea mai o le Itu atoa lava lenei o lo o olo lava le fua. E le o oloina se fua i i ma le faaaloalo o lea matou te tapuai, ae lafo atu i nai tamaitai faitatala ia o lo o sue ai a latou tala i le Palemene. Ae na ona tau atu mo le faafofogaaga a le atunuu ma le paia o le Palemene, aua ne i galo i le tatou Itu Faaupufai a le HRPP o le Palemia lava na saunoa, a ua i ai lava le sui usufono e naunau i le pisinisi, tuu le sui usufono ae alu e fai le pisinisi. Ioe, o le mea lea ua i ain a ona tau lava o le aufaipisinisi e pei o le a le tutu ane i luga, tout e le o omai i inei ona o ni faiga pisinisi ae na outou omai i inei o sui usufono o Itumalo. O le a alu le taimi ia outou i lo outou tutu soo i luga, ma le faaaloalo lava faafetai.

**FOFOGA FETALAI:** Malo faafetai le fesoasoani mai i lau Afioga i le toe ulutaia o le Maota ia lava le onosai. O le mea lena na faafaigata ai le lua seei ma le sui usufono mo Siumu i ina leaga o taimi uma lava e faalala ai le aao o le Taitai o le Itu Agai o lea e manao e toso mai oulua i i a o lena lava e mau le toovae i lau Afioga i le alii matua aemaise o le paia i lea itu o le Maota.

Tulai mai le Taitai o le Itu Agai.

**Afioga Hon PALUSALUE FAAPO II:** O lea ou te sese lau Afioga, faape au o lea ua i i le aualii lea, ioe. Lau Afioga i le Fofoga Fetalai, e faapena le fai ma tatou tōtōē. O le upu moni lava lea e fai atu ai se tuualalo lau Afioga i le Minisita ina ia silasila i Faalapotopotoga Tumaoti nei, o le tele o tupe o lo o soona faaalu a o lo o manaomia e lau Afioga. O le faataitaiga o le maketi i Salelologa sa alu foi i ai le matou asiasiga. E ui lava foi ua saunoa le Afioga i le Palemia e le tatau ona matou o i ai i o, ae na matou o e mataitu le tele o le tupe a le atunuu na alu ai. O le tele o faleoloa laiti o lo o i ai ua le toe faaogaina a o luga i le fogafale i luga na o le tasi lava le faleaiga o lo o i ai, e ala ona o tagata i luga ona o le faleaiga. O atinae nei e silasila i ail au Afioga ina ia maua ai se fesoasoani i le Matagaluega ma le Malo i le utiuti o le faasoa.

Lau Afioga i le Fofoga Fetalai o le falemai i Vaipouli. E oo mai lava i le aso o le o manino le Palemene po o fea na aumai ai le tupe na fai ai.....

**FOFOGA FETALAI:** Malie le Taitai o le Itu Agai ona o lea na e taua le afioaga o le Afioga i le Minisita.

**Tofa Hon Faamoetaulao Ulaitino Faale Tumalii (Minisita mo Punaoa Faalenatura ma le Siosiomaga):** Lau Afioga i le Fofoga Fetalai, ua ou tulai atu leaga o au o le sui usufono mo le Itumalo ma o lo o faafogafoga mai foi. Sa ou faapea e le fesili le sui usufono i lea tulaga, ou te iloa a na faapea e oo mai ia te au ma faamalamalama atu i ai, out e iloa e le fesili ai. Ou te iloa foi ua na maua uma faamaumauga o lea galuega ae musu ma le fia malamalama i ai. Ia pe e te fesili ane foi i le sui usufono mo Gagaemauga Nu. 2 lena o le tasi o sui usufono o faa-falemai o lo o i ai i totonu o le falemai lea. O lea o le a ou tau atu ia te oe le mea na aumai ai le tupe, na aumai i le Grass Root Community Project Proposal a le Itumalo na ave i le JICA ma pasia ai mai lea tupe e ova ma le \$282,000 lea na fai ai le falemai. O aiaiga lava o le tulaga o lea falemai e fili lava e le komiti faafalemai le konekarate e faia. O lea e taua o le konekarate na fausia na ia faaali atu ia te oe le tusi na aumai i le JICA, sa ou faapea e te le toe laga mai lea mataupu, e faaali mai ai o na e alualua lou loto i le tulaga o lea galuega. Ma lou faaloalo lava.

**Afioga Hon PALUSALUE FAAPO II:** O le mea la lea e igoa o le le mafaufau o le Afioga i le Minisita, ioe. O le a le alualua? O lea e mama le fesili, e leai se tulaga faapea e.....

**Tofa Hon Faamoetaulao Ulaitino Faale Tumalii:** A lea ua faamalamalama atu, o i ai i totonu o le Tala o le Tupe se vaegatupe o taua ai le faiga o le falemai lea? E leai, sa tatau la ona e le laga mai lea mataupu e pei ona faamalamalama atu e le Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoui:** Lau Afioga i le Fofoga Fetalai, o le mataupu lena masalo e le tatau lava ona tulai mai pe a na faapea e le i faia i ai le faaiuga a le Malo. Ua uma ona faia i ai le faaiuga ina ia tapunia le Aoga a Vaipolu ua le o toe moomia ona o le tulaga ua i ai nei le atunuu ua silia i le 25 Kolisi. Sa lelei i aso la e na o le tasi po o le 2 kolisi sa i ai i Apia nei, a o lea ua tolu Kolisi ma ua le tatau ona toea faia lena Kolisi ae tatau loa ona tapuni ae alu le tagata i le aoga la e i tafatafa o lona fale e le toe alu ai ni tupe a le Malo i le nofotumau a lena Kolisi ma lona faauauina. Na fai loa le iuga lena tulai mai loa ma faafitauli nei. O le a le auala e tatau ona faaaoga mo fale nei a o fale foi ua tele ina faaetonu. O na e i ai eleele o le Malo ma fale lelei, lea na fai ai le iuga i le falemai o lo o i tai a le nuu ia sifi i uta e faaaoga ai nei fale ina ia i ai pea le Malo i ina. A alualu ona toe tulai mai lea o nisi mea tetele e umia e le Malo le eleele.

O lea foi e i ai ma le agaga e faatu ai ma se isi falemalii e tuu ma ii tua o le private sector e leai se tupe a le Malo e alu ai. E le gata i lea a o le Ofisa o le Fuimu lea ua i ai le Fuimu i Salelologa, ua i ai le fuimu i Asau, o le isi lea vaega aupito toiatele e manaia foi pe a faaaoga nisi fale o i ai i ina e tuu i ai le Ofisa o le Fuimu ma se lala a le Matagaluega o Faatoaga ia a latou polokalame o lo o faia nei. O lona uiga o le taumafai mai a le Komiti a le Itumalo ma faatino ia latou lava sailiga seleni le faaleleia o lea fale mo a latou mai e pei ona i ai i tai. O le a tapuni la tai ae faaaoga loa uta.

O le fesoasoani atu lena i se faaiuga na matua tuu i ai le tofa mamao a le tatou Kapeneta, na i lo le tapuni ma o ese ae tiafale ma eleele. Lau Afioga i le Fofoga Fetalai o le fesoasoani atu lena i lenei mataupu.

**FOFOGA FETALAI:** Malo faafetai. Lau Afioga i le Taitai o le Itu Agai, a o le i avatua le avanoa, ou te manatu o lea ua tali malamalama le Malo e ala i le atugaluga lea na e saunoa i ai, o lea foi ua saunoa malamalama le tofi o le itumalo e faamalamalama le pitolaau a le itumalo. O lea la ua manatu le Nofoa le Taitai o le Itu Agai, ua manino lea tulaga, ona o tala lava a le tai ma le usoga, o lea e fesoloai faapea, lea na mafua ai ona tatou tuufesili po o le a le mafuaaga. O lea ua tali manino le Afioga i le Minisita e ona le itumalo ma le mea na o lava latou sue le latou tupe. Ia silafia foi, e faapena foi le faamoemoe o lea na i ai nei le falemai i Safotu, e faapena le Itu o Tane. E le taliga i le Malo e faatali seiloga e alu atu le Malo. O le sao lena o le itumalo e alolofa moni i le Malo, o le omai o latou e amatamea ae faatini pe maua se fesoasoani mulimuli. Ae ou te fautuaina le sui usufono, ia see i se isi mataupu o lea e alu le tatou taimi.

**Afioga Hon PALUSALUE FAAPO II:** E leai e sau lava le fuauli e toa ai le moa, e faamalamalama lelei mai. A o le fiti foi lea pei o le ia o le papau, o le mea lena o lea e fai atu ai, faamalamalama lelei mai. Pe tupe a le JICA pe tupe o le a, o le tupe lava.....

**Afioga Hon Faamoetaulao Ulaitino Faale Tumaalii:** Lau Afioga i le Fofoga Fetalai, o lea ua i ai uiga le mafaufau i le sui usufono lea ma ana saunoaga. E leai o oe o le ia o le papau, se i tulou, o le upu moni lena. O ia nei o ia o le moana sausau.

**FOFOGA FETALAI:** Malie ia lau Susuga i le alii Aoa, ia faale-Atua lou finagalo.

**Afioga Hon PALUSALUE FAAPO II:** Lau Afioga i le Fofoga Fetalai, o le a ou le amanaia le pola motu i tua. O lea ua ou malamalama. Na pau lava le mea, ona ua alu atu le asiasiga, ae toetiiti lava tutu ma le falemai i Safotu le falemai lea. Ae ui i lea, o lea ua fai lau faaiuga. O fautuaga lava nei e avatu ina ia silasila i ai lau Afioga i le Minisita e maua i ai se fesoasoani.

Ua gagana le atunuu i lou Ofisa ma ua faamalamalama foi e le Palemia. Na pau lava le mea, mo le agai i luma, ua uma le faamoemoe, e ui lava ina tele se tupe e alu ai. O lo o avanoa Matagalalua ina ia e silasila totoa i ai, o lena foi e i ai au mafuaaga na fai ai, a o le matou faamasinoga e fai si taugata tele o lou ofisa lau Afioga. O le mea lea ou te fai atu ai, o le alofa e fesoasoani i a tatou mea e fai, o le alofa e maitau mai e le atunuu po o faapefea tatou.

**FOFOGA FETALAI:** Malo. Tulai mai le Minisita o Tupe.

**Afioga Hon Faumuina Tiatia Faaolatane Liuga:** Lau Afioga i le Fofoga Fetalai, ou te faafetai i le uo po o le uso le Taitai o le Itu Agai. I le tulaga a silasila i mea o rentals o ofisa nei o le Malo, o Matagalalua, e \$32 i le square ft e tasi spaces la e i ai. O le Central Bank e \$23, \$24 i le \$29 i le square ft e tasi. O le Development Bank, e \$33 i le floor lona lua e tau i le lima. O le

rental space o le ground floor ma le 6 floor, e \$35. O le ACC, o le mea la e occupy e le MCIL, e \$22, a o isi vaega, e \$24 i le square ft e tasi. O le mea la e i ai le Embassy a Amerika, e \$30 i le square ft e tasi. O le PLAZA, e \$28 le mea la e i ai lou ofisa i le square futu e tasi. O isi vaega i luga atu, e \$32, \$31, \$28. O le TATTE Building lea e i ai nei, e tetele atu ofisa lea e i ai o CEO i le TATTE Building i le ofisa o le Minisita o Tupe. Ae o le mea lena o lea tatou te agai i luma. O ai na te iloa pe te i ua o o se tasi o sui usufono mo Salega, Afioga Afualo Wood Uti Salele i le mea lea ou te i ai, ona iloa lea o le lelei. O le mea lea e i ai, e le o agai i tua Samoa, o lea e agai i luma. O le mea lea tou te finagalo i ai, o lena tou te silafia. A omai tagata o tatou afioaga i tua, e tutu solo i corridors o ofisa o le Malo, e nonofo isi i lalo le floor. O le mea lena e te manao i ai? Ou te le o manao e omai le mamalu o le atunuu ona laulaututu lea. E deserve foi e o tatou tagata mea lelei. E le o se vaaiga lelei lea mo le mamalu o le atunuu o lo o autovaa mai i ofisa o Minisita. A e fesili i leoleo ia na o atu i East Timor, e le faatusatusaina le ofisa lea i ofisa sa ou faigaluega ai. Ma lou faaaloalo. Malie lau Susuga, o lea ua e tau maia, o lea ua e iloa, le iloa po o oe le isi tagata e te faaaogaina le ofisa lea i le agai i luma ona e silafia ai lea, e le o sou ofisa, o le ofisa o le atunuu. Ma lou faaaloalo lava.

**FOFOGA FETALAI:** Tulai mai lau Afioga i le Taitai o le Itu Agai.

**Afioga Hon PALUSALUE FAAPO II:** O le aoga lea o le tatou soalaupule. Na pau lava le mea e tuualalo atu, ina ia fua se tapu i ituaiga ofisa faapenei e faasaina ai tupe. O le mea la lea lau Afioga i le Minisita, e le o au lea e mafua ai ona fesili, e le o le Itu lena e amata mai le sui usufono mo Vaisigano Nu.2, ioe. O outou lava na tusi atu, o outou na avatu....fai mai ua le faatuatuaina oe. O le mea lena o lea e tuufesili ai lena Itu.

**FOFOGA FETALAI:** Ia, malie le Taitai o le Itu Agai se i tuu atu le avanoa i le Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai, o le mea muamua lava e tatau ona faamalamalama, so o se ofisa lava o le Malo e totogi. E pei lava o le mea lena e le o silafia e tagata. Po o le ofisa o le NPF po o le ofisa o le Malo, e lisi uma lava mea uma, e pule ai le tatou Matagaluega e vaaia lisi i fanua ma suafa, le MNRE. E pule uma lava i fanua uma lava. Ua ala ona ou fai atua le mea lea, ona o articles ia e sau fai mai ana ua taugata ona o le o fua i o. E leai lava ma se mea o nofo fua ai se isi i totonu o le Malo. E totogi uma lava lisi. E totogi uma lava lisi.

O le vaega lona lua ina ia silafia, ina ua fau le fale le la o le Malo, pau lava lea o le fale aupito lelei maoae na manatu le Malo i lena taimi e tuu uma ai Minisita. A o le mea masani lava, e nofo lava le Minisita i le mea o i ai lana Matagaluega, e faaoga le mea o lo o i ai le Matagaluega po o se Faalapotopotoga. E faigofie ona iloa le mafuaaga, o le mafuaaga, o le a le mea e manao ai le pule, valaau alu atu. O le a le mea e manao ai le afaigaluega, valaau e o atu pe a manao i ai i le afaigaluega. Ina ua uma ona fau le tatou fale le la ma tatala po o le 1992, ona tupu ae ai lea o se finagalo i le Palemia, e lelei ona matou faatasitasi uma lava i o i le ofisa e tasi, o la e ua

lelei. E faigofie foi ona fono le Kapeneta, a omai foi le mamalu o le atunuu e faigofie ona maua i latou uma i o. Ae se i vagana la au ona o lea ua tulai mai foi le fale ia, ua lelei foi le fale ia o le Central Bank, ona faapea mai loa lea o le Palemia, leai la, nofo oe i ina o lona ua lelei lou ofisa e te le tau sau i i. A o le tulaga lava ia na i ai, ma o le mea sa tataua ona i ai, ia nofo lava le Minisita ia i le mea o i ai le latou Matagaluega ia faigofie ai fesootaiga. A o suiga ia, o suiga ina ua tulai mai le fale o le Malo ua lelei, ma e ave lava mea lelei i le Palemia ma le Kapeneta e nonofo ai. O le tele o le faaletonu o le faiga lona, a agi loa se mafuie, pe tupu se afi feoti uma ai le Palemia ma le Kapeneta, ua leai se Malo. O le tulaga faaletonu lona o le nonofo ai i le mea e tasi. O lea la, ina ua fesiligia i le tatou taimi foi le Taitai o le Itu Agai, sa fai ma faaputu mai le tuualalo a lea, ona ou nofo lea ma ou mafaufau i tulaga ia, pe tulai mai se faalavelave ona ou faamatuuina lea o mea faapea. O le a le upu foi lea e masani ai tatou? O le uta a le potu e fetalai. O le tele o Malo Afaatasi, a malaga, e le malaga faatasi i se vaalele e tasi, e o eseese. Lea na oo lava i le Faauluuluga o le Malo Afaatasi nao ti i le malaga a le vaalele ma nisi na o ai. E faapea foi i Korea, e toafitu Minisita na oti faatasi ma le latou Palemia i le faalavelave na tupu. O le mea la na faapena e ala ai ona fetuutuunai le faautautaga i taimi faapenei e tulai mai ai, o lea ua amata ona faasolo mai ma lelei fale o le Malo, o le mea lona e tataua ona fai. A lelei mai lea fale see i ai lea Minisita ae faalaolao le fale i o aua o potu foi latou, o le matua laiti lava o potu.

Lau Afioga i le Fofoga Fetalai, o mea na e fetuutuunai ai le mafaufau i le Palemia i tulaga faapea. Ae i ai la le mea ia manatu, po o o, po o fea lava le mea e alu i ai, e totogi lava le lisi. Pe le o i ai le Minisita i i pe leai, e ave foi e le isi tagata o le Malo le space lea. E le faapea e le sau i i ona le faaaogaina lea. O lona uiga, e tupu lava le tupe alu e faalelei ai le potu mo se isi lava e laa i ai pe afai e le alu atu le Minisita.

Lau Afioga i le Fofoga Fetalai, o aga na o faaiuga faapenei e fai. A o lea foi e i ai le vaai lautele atu i tua ma le anoano o le gaogaosa, a o le tulaga lona o lea e faatino ai le faaiuga a le tatou Malo. O lea ua ou matua avatu manino lava, o le mea foi lona sa ou aveina i totonu o le matou vaega ma faamalamalama ai le itu lea. Masalo o le lape o le Minisita i le taimi lea, ona e le i faamalamalama lelei maia, ma e le natia, ou te lagona o mataupu lava ia e o atu faateia ai le Minisita, ae le o maua e ia fuainumera. Ou te lagona o le tulaga lona na le mafai ai ona faamalamalama auiliili i le taimi lona, aua e le na o le tasi le ofisa, o lea ou te vaai atu e fitu ofisa o lea e aofia uma i le ofisa lea. Ma so o se maota, o la e i ai uma lava i totonu le faatulagaga o tau.

Ia o le faamatalaga lona, o le lape lona ona e le i maua se avanoa ona o uiga lava ia o le au tusitala, e te lua fetui loa aemaise pe a musumusu ifo le isi i le isi, ia sunui mai loa ma le fesili, pupuna loa ma le toto, alu atu loa ma le tali ua le atoatoa.

Ia o le tali atoa lava lea ua ou avatua ma le faamoemoe o le a tuu ai ia masalosologa e i ai, a o le tulaga lava lona i le agai i le lumanai, o le mea aupito sili ona talafeagai, a atoa loa le Ministry i lalo o le latou fale, e lelei lava le mei i ai ma le Minisita, saofai ai i ina e faigofie ai latou feuaiga ma le pulega ma le afaigaluega.

**Afioga Hon Aeau Peniamina Leavaiseeta:** Lau Afioga i le Fofoga Fetalai, faamolemole lava na o sina au fesili lea i le saunoaga a le Palemia.



**FOFOGA FETALAI:** Ua lelei, faapuupuu mai le sui usufono mo Falealupo, e ava tele atu i lau Afioga, ona tuu atu lea o le avanoa i le sui usufono mo Alataua Sisifo la e tulai mai.

**Afioga Hon Aeau Peniamina Leavaiseeta:** Ua lelei, o lea o le a faapuupuu atu. Faafetai atu lava i le tau justify ina o le \$600,000 lea i le vaega lea aua ua taugata atu na i lo le falesa. O lona uiga e \$100,000 i le Ofisa. A o le fale fou, manatua o tatou lea e matitiva.....

**Susuga Hon Tuilaepa Fatialofa Lupesoliai Aiono Neioti Sailele Malielegaoui:** Se i ou fesili atu lava po o le a le fale fou lea e te fai mai ai. O aumai i totonu o le Budget.

**Afioga Hon Aeau Peniamina Leavaiseeta:** Ia manatua a fou le fale, na ona e alu atu lava ma au palaka uma togi i totonu. Ua e maua mai? Ok. A o le mea la lea e tau fai atu ai, o tatou lea e utiuti le seleni, a o Minisita, e tofu Minisita ma le potu, o lea e tau justify mai lava lau tala. E oo foi i le failautusi ua i ai foi, e tele la. E \$100,000 i le ofisa. A o Minisita foi, if you dont have to go there a? Ia manatua foi tatou fale la e i tai, ua leai foi ni galuega a Minisita Lagolago, tulouna lava.

**FOFOGA FETALAI:** Malie le sui usufono mamalu, o lea ua maua lou finagalo.

**Susuga Hon Tuilaepa Fatialofa Lupesoliai Aiono Neioti Sailele Malielegaoui:** Lau Afioga i le sui usufono mo Falealupo, e leai se sami o tu i luga o le sami. O le sefulu ai lena o faaoloataua talu ona e tulai mai.

**FOFOGA FETALAI:** Ia, e manatu ua malamalama le mataupu le sui usufono mo Falealupo.

**Afioga Hon Aeau Peniamina Leavaiseeta:** Ia tatou faapea ona fai.

**FOFOGA FETALAI:** Faafetai. Tulai mai le sui usufono mo Alataua Sisifo.

**Afioga Lafaitale Patrick Leiataualesa:** Lau Afioga i le Fofoga Fetalai, e maitau atu lava ma le totoa i le saunoaga a le Taitai o le Itu Agai. I lau faalogologo, o lea e agai mai ia Tui ae tusi mai lona lima ia te au. Aua ne i avea mea a lena Vaega Faaupufai e te pasese mai ai, a leai lava ma sau feau i mea a le Vaega Faaupufai lena. Afai lava e vevesi, vevesi i le makimakiga o le maopoopoga o le Vaega Faaupufai, ae ua ou tau vaai atu ma le faanoanoa e tau le igoa o le sui usufono mo Siumu ae tilotilo mai ia te au, aua e te pasese mai ai fua i lena mea ae agai sao mai lava oe i le Minisita o Tupe. O le Vaega Faaupufai lena e faapea lava ona fai, a i ai lava mea e faaletonu e fautua le Palemia, ae leai sau feau i le Vaega Faaupufai lena. E faalua lava ona ou faalogologo atu o e agai mai lava i le autafa lea.

**Afioga Hon PALUSALUE FAAPO II:** Lau Afioga i le Fofoga Fetalai o lea foi out e fesoasoani i ai. E tatau foi ona e faafetai mai o lea out e fesoasoani atu i lo outou nonofo ai.

**FOFOGA FETALAI:** O le tau faaoso le tau o le mea lea, malie lau Afioga i le Taitai o le Itu Agai.

**Afioga Lafaitale Patrick Leiataualesa:** Lau Afioga i le Fofoga Fetalai, tusi pea lou aao tusi pea lou lima i ina ae aua le tusia mai ia te au leaga o lea out e fai atu e leai lava ma sau feau i mataupu a le Vaega Faaupufai lenei, a vevesi lava latou vevesi, e faapena le Vaega e makimaki lelei ma maopoopo. Ae o le fai mai i ina ae uma toe omai i ina lau mai i inei.

**Afioga Hon PALUSALUE FAAPO II:** O le a ou see ese.....

**FOFOGA FETALAI:** Ia manaia...tulai mai le sui usufono mo Siumu.

**Tofa Hon Tuuu Anasii Leota (Siumu):** Lau Afioga ona o lea ua saunoa le sui usufono mo Alataua Sisifo ma fai mai o lea e tusi mai le aao o le Taitai o le Itu Agai ia te au. Out e le o malamalama po o le a tonu le mea lea e.... A faapea o le Tusi lea e tau soo e le Taitai o le Itu Agai, e i ai la se avanoa se i ou faamatalapipi au ai le Tusi lau Afioga i le Fofoga Fetalai, ina ia manino ai le Taitai o le Itu Agai.

**FOFOGA FETALAI:** Malie ia le sui usufono mo Siumu, ua e silafia foi o lea o le a tuu le tatou Tulafono Tau Faaofi o le Faatatauina o Tupe 2013/2014 ae faamatala le tatou Tusi. Onosai, o lea ua malamalama – silasila foi se i ou faamatalaina atu le mataupu e tutusa lelei ma le mataupu lenei. O le tatou Maota Fono lea na i luma i o, na muamua lava alaalaga le Itu Agai e tala i lalo, ona taumafai atu foi lea o le Maota e faamalamalama ae toe o foi toe tutu i luma e aua le talaina i lalo. O lea foi ua tutusa foi ma le mea lea, lau Afioga i le Taitai o le Itu Agai, malie ia, fai sa outou mau ma agai i le fautuaina o lona Itu, ae taatia pea le Itu e matimati i tulaga, o lea ua faamalamalama ma saunoa le Palemia ona malamalama lea.

O le tulaga o lo o fai mai le sui usufono mo Alataua Sisifo ona o lona e fai ma e tusitusilima, e le o avea sau lui i le sui usufono mo Siumu o lea e te luia le Afioga i le Minisita mo Tina ma Tamaitai, Atinae o Nuu ma Afioga ma Agafesootai. O le faamalamalamaga lona ina ne i te i ua liliu le paga i le sui usufono mo Siumu ae tuu le Minisita.

**Afioga Hon Tuitama Talalelei Tuitama:** Lau Afioga i le Fofoga Fetalai o se mea e fia faamalamalama po o le a le uiga o lea Tusi, po o le pointing po o le writing? Po o se tusi foi lea e tusitusi i le limatusi po o se Tusi foi lea sa tusi i le peni, ma le faaaloalo lava.

**FOFOGA FETALAI:** Malie o le a ou le tapa lea tulaga o le Tusi lava o le Tusi, ae taatia ia leava vala ua malamalama.  
Tulai mai lau Afioga i le Taitai o le Itu Agai.

**Tofa Hon Tuuu Anasii Leota:** Lau Afioga i le Fofoga Fetalai ua ou talia lau fautuaga, o le a ou le seetia foi i le malu o le tai taeao i le tau faaoso o le Taitai o le Itu Agai faafetai.

**Tofa Levaopolo Talatonu:** Lau Afioga i le Fofoga Fetalai na o sina mea lava lea faamolemole. O matou e le i malamalama lelei i lea mataupu a o lea ua manino mai i le toalua lea o lona uiga o le Taitai ma le Sui Taitai o le au fai Tusi lea..

**FOFOGA FETALAI:** Malie ia o le a taatia lea tulaga ua malamalama

**Afioga Hon PALUSALUE FAAPO II:** Lau Afioga i le Fofoga Fetalai, ua ou iloa uma lava le Tusi ma e o lo o saina ai. O lea o le a ou see ese.....

**FOFOGA FETALAI:** See ese ma le Tusi.

**Afioga Hon PALUSALUE FAAPO II:** O lea o le a ou oo loa i le pagatia lea ua oo i ai le atunuu ona o mea ia, e a Ulu tafega ae selefutia ai Vaisigano.

Lau Afioga i le Minisita o lea o le a siitia le alu i le falemai. O lea o le a siitia le penisini, o le a siitia le tau o le soifuaga, siitia le tau o le iunite o le eletise. O le mea la lea out e fai atu ai o le Tala o le Tupe, o se Tala o le Tupe e le alofa.

**FOFOGA FETALAI:** Malie le Taitai o le Itu Agai se i tali atu le Afioga i le Minisita.

**Afioga Hon Faumuina Tiatia Faaolatane Liuga:** Lau Afioga i le Fofoga Fetalai, faafetai i le saunoaga a le Taitai o le Itu Agai. A lea e manino lava o le faamama avega a le Malo e tele ana fuafuaga, ae le o i ai se fuafuaga e siitia ana lafoga ona e aafia uma ai le atunuu. O le siitia o services ia ina ia aveese le subsidy lea e fai e le Malo. E te silafia le Taitai o le Itu Agai o atunuu nei o Europa Sasae ma atunuu Komenisi e 50% i le 60% le tax a tagata, e ala ona faapena e subsidize e le State mea ia e te saunoa i ai, ae le tatau ona tatou toe faalagolago faapena, o lea ua outou saunoa e saili tupe. O services nei ua leva ona i ai, o lea e naunau le Malo aua a e alu atu lava e faatau le oloa taugofie o le mea foi lena e te maua. O lea foi na saunoa le toatele o sui usufono o lena Itu ma lena foi Itu ia efficient ma ia siitia le standard o le auaunaga. E le mafai ona siitia le standard o le auaunaga pe a le mafai e oe ona totogi le tau o lena auaunaga ma o lena foi auaunaga e le totogia uma e tagata seia vagana ua e alu e faaoga le service lena aua foi o lea ua avatu le choice. O le mea lea e tupu tou te lauga mai ina ia tatou fesoasoani i le private sector o lea foi la ua taumafai ina ia laina faatasi totogi o fomai tumaoti ma fomai a tatou, e fai le choice a le tagata o le support lena i le private sector. Afai la e subsidize e le Malo, o le a la le mea e tupu? Na o le o o Fomai o le Private Sector ma nofonofo i ofisa ae leai se client.

O lona uiga a e filifili oe i le tatou falemai, o le taimi nei e mafai ona e alu e totogi le taxi e te alu ai, totogi le taxi e te sau ai e end up ane ua e totogia le mea e tatau ona ave i le fomai e pei o le sui usufono mo Vaisigano Nu. 2 lea e i tafatafa o le fale o Amau, \$20 po o le \$25 e vaai ai le fomai tumaoti. E tutusa lelei ma uta, o le isi tau e faaopoopo i ai o lou alu atu e faatalitali, o isi

taimi e tai lua ma tai tolu itula a o mai e tatau ona alu atu loa vaai. Ma lou faaaloalo lava.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** E toe tasi lava le mea lea ua misi i le saunoaga a le Minisita. E \$200 i le itula fomai mai tua nei o lo o taamilo i tua, e o atu i le isi falemai po o i ai ni mai, a leai ua o i le isi falemai ma o i le isi falemai. O lona uiga a valu itula o le aso pe sefulu itula o le aso e alu ai ua \$2,000. O le mea lena o lo o maua nei e falemai i tua e pei o le sui usufono mo Vaisigano Nu. 2, e mafai ona maua le \$2,000 i le aso pe a faamaoni. O le isi mea o lo o tupu e tiga lava na o le 4 itula ae aumai ua 10 itula o le aso ona sailiili loa lea pe sa faamaoni. O le tulaga lena sa ou faapea e te oo i ai ona e tele le mea lea o lo o ono fai e le Malo ina ia faatofutofusia ai falemai i tua e taamilo ai i ni gasegase o lo o taotoo i falemai i tua.

**FOFOGA FETALAI:** Malie lau Afioga i le Taitai o le Itu Agai, mo le faamamaluina o a tatou faamaumauga o le sui usufono mo Vaisigano Nu. 2, Afioga Motuopuaa Uifagasa Aisoli Vaai, o le faamaumauga lena ina ne i mea ane ua tatou tapa lona suafa taulealea a o lea e i ai le suafa o le.....

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga, ua ala foi ona faapea ua ta le iloa po o a nei suafa? E pei o ni suafa Toga.

**Afioga Hon Faumuina Tiatia Faaolatane Liuga:** Lau Afioga i le Fofoga Fetalai, out e faamalulu ua avea foi le vavalalata o le ma uo ma le sui usufono mo Vaisigano Nu. 2 ua ou taua ai lona suafa taulealea a o le Tofa Motuopuaa o le Fetalai e fai e malu ai le Itumalo o Vaisigano Nu. 2, e faamalulu atu i le uso e pei ona.....

**Tofa Motuopuaa Uifagasa Aisoli Vaai (Vaisigano Nu.2):** Lau Afioga i le Fofoga Fetalai, sa olo lava le fue e le matou vaega lea e toatolu. Le sui usufono mo Siumu ma se tasi o sui usufono mo Aana Alofi Nu. 1, Afioga Hon Leapepe Toleafoa Apulu Faafisi e faaoso a e le isi le isi e tu i luga, ia o lea ua faaosooso au e le aualii ia ou te tu atu i luga se i tali atu i le saunoaga a le Afioga i le Palemia faapea e \$2,000 sau tupe e maua i le aso. E faamalulu atu a outou o atu o tumu lou ofisa o le afa o na tagata o tagata mai lou Itumalo e fai o le vaai fua ae toe aisi mai i se tupe e totogi ai vai ma se pasese e toe foi ai i Savaii.

O lau tali atu lea ma le faaaloalo ae ta le oo i se \$2,000 maimau pe ana ta oo i se \$2,000 i le vaiaso ta te le toe sau i le Palemene ma le tiga o ou taliga.

**FOFOGA FETALAI:** Lau Afioga i le Fofoga Fetalai, o le mea sa i ai a o le i ai se siitaga sa i ai le choice a tagata, a leai se tupe e alu e saofai i o i le aso atoa e taugofie, a o le taimi lena e sili ai le mai ae aua le alu i le falemai aua e le gafatia. O le mea lena o lea e fai atu ai leaga e afaina tagata e le faigaluega, o le mea lena ou te fai atu ai.

**Afioga Hon Faumuina Tiatia Faaolatane Liuga:** Lau Afioga i le Fofoga Fetalai, po o le mea masani aua ou te iloa e tele au uo fomai, ou te alu a ou fai

i ai, se i aumai lava lau lesitala lea se i ou tilotilo i ai. O le toatele o tagata nei o loo o i le Falemai o le Malo o tagata e maua tupe, a o le toatele o tagata nei o lo o faaogaina Fomai Tumaoti, o tagata mai tua - e molimau le uso a sui usufono fomai ma isi foi fomai tumaoti, o tagata e omai i pasi mai tua, na ona oo mai lava alu loa i le fomai tumaoti, a o lea e te fai mai i le tagata o la e i tua, e leai, o le tagata faipisinisi e o i uta.

**Afioga Hon Leaupepe Toleafoa Apulu Faafisi:** Lau Afioga i le Fofoga Fetalai, na ona faamanatu atu i le Taitai o le Itu Agai, e tele atu tupe a i latou o lo o feoi e leai ni galuega na i lo i latou o lo o faigaluega. A silasila foi i le Matagaluega o Faamasinoga ma Pulega o Faamasinoga, e tumutumu lava i tapuaiga, o i latou na e tai selau i le aso ma le au saili maliu e tai lua selau i le aso ma le ietoga tele ma pusaapa e lua, e tele atu tupe a i latou ia na i lo tatou o sui usufono.

**FOFOGA FETALAI:** Malo, ou te manatu ua malamalama le tali mai a le Malo lau Afioga i le Taitai o le Itu Agai ina nei te i ua tulituliaupu le mamafa lea e te atugalua i ai. O lea ua faatolu ona tutulai mai le Minisita o Tupe i lenei taeao, ua faafa ona nei ma ananafi i le Minisita mo le Soifua Maloloina, o le faalavelave lenei aua a toe tulai mai nei foi le Minisita mo le Soifua Maloloina ona tatou toe talanoa lea i le isi ono itula.

Lau Afioga ia alu ese ia ma lea mataupu ae faasolo mai i isi mataupu.

**Afioga Hon PALUSALUE FAAPO II:** O le ala ou le oo lenei i le Minisita mo le Soifua Maloloina.....

**FOFOGA FETALAI:** O le siitaga lea e te saunoa i ai le Taitai o le Itu Agai.....

**Afioga Hon PALUSALUE FAAPO II:** E leaga o i na faia le siitaga o le Minisita o le Soifua Maloloina.....

**FOFOGA FETALAI:** O le ala lenei o lou taumafai atu ina ia e see ese ma lea mataupu.....

**Afioga Hon PALUSALUE FAAPO II:** Lau Afioga i le Minisita tatou te faaataata lafoga a o lo o faafofoga mai Samoa ma faafofoga mai le tagata e leai se galuega. O le au mamai ia e vave lava ona mamai aua e leai ni meaai e mafai ona ai, a le maua se meaai paleni ua mai, fiu sue se tupe e sau ai i le falemai ua sili ai ona malolo e faatalitali i le Atua.

**Afioga Hon Faumuina Faaolatane Tiatia Liuga:** Lau Afioga i le Fofoga Fetalai e leai ma se isi ua mai ona ua leai se tupe. O le tele o ma'i o le tino, o le 90% o e mamai e mafua mai i le mafaufau e mafua ai. E le o toe mamao foi ae gasegase le Taitai o le Itu Agai, o lea ou te vaai atu la ua amata ona punou le Sui Taitai ua mai. O mai o le tino e mafua mai i luga i i, ma lou faaloalo lava.

**Afioga Hon PALUSALUE FAAPO II:** Lau Afioga i le Fofoga Fetalai e le i lavea lava i sau tala le Afioga i le Minisita mo le Soifua Maloloina.

**FOFOGA FETALAI:** O lea la o le a tatou taunuu i le taunuuga o lau lauga lea out e naunau atu ai e aua ne i tulai mai le Minisita mo le Soifua Maloloina aua e le mafai ona le tautalagia le mataupu lenei.

Malie lau Afioga i le Minisita mo le Soifua Maloloina, e tumu i le ava leaga e comprehensive uma au tala ia pe a e saunoa, very detail manino a ia e alofa i le tatou Fono o lea e tau tulituli. O le a tuu atu lava le avanoa i lau Afioga e te aumaia ni short form e faamalamalama atili ai le finagalo o le Taitai o le Itu Agai.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** A o le i tulai mai le Afioga i le Minisita, faamolemole pe mafai ona matua faapuupuu lava i se afa itula.

**FOFOGA FETALAI:** Tulai mai lau Afioga i le Minisita mo le Soifua Maloloina.

**Afioga Hon Tuitama Talalelei Tuitama:** Lau Afioga i le Fofoga Fetalai, e laitiiti lava sina vaega lea ua ala ai ona ou tulai atu ona e fia faamalamalama, o le tino puta, ona o lea e taua e le Afioga i le sui usufono ua taugata le soifuaga ua fiaai tagata. O le tali puupuu lava i le vaega lea, tusa o le 50% o tagata Samoa o lea e aafia i le tulaga lea o le tino puta, ia ou te le iloa lava se tagata fiaai pe mole manava e puta, e mafua ona puta ona ua ova le ai, ae pei la o lea e fai sina contradict laitiiti e le Afioga i le sui usufono ia le tulaga lea. Aua o le manaomia o le tino o le ituaiga meaai, e eseese ituaiga meaai, o le vaega e aupito tele i ai le taumafa ma le tausami a Samoa.

**Afioga Hon Palusalua Faapo II:** Lau Afioga i le Fofoga Fetalai, ua ou matuai malamalama lava, ioe, e umi loa atili ona ou le malamalama. Ua ou le iloa po o a upu ia ou te le o malamalama ai lau Afioga i le Fofoga Fetalai, ioe, ou te manatu nei umi ona tu le Afioga i le Minisita, ae ua matua malamalama ia te au le mataupu lea. Ma lou faaaloalo lava.

**FOFOGA FETALAI:** O lea ua faafofoga mai le Minisita e fua i ai lana tali. Tulai mai le Minisita e faaauau mai le saunoaga.

**Afioga Hon Tuitama Talalelei Tuitama:** Lau Afioga i le Fofoga Fetalai, o le a tuu atu le avanoa e saunoa ai le...ona ou toe tu atu lea e faauma pe a toe asiasi mai.

**FOFOGA FETALAI:** Sei silasila la i ai i le faatamalii o le Afioga i le Minisita, ia tulai maia, mei le ta mataupu i se isi Matagaluega.

**Afioga Hon Palusalua Faapo II:** Ia o le tulaga lea leaga o lea na taua e le Minisita pisinisi laiti, ae a silasila i le tupe lea ua faavagavaga na o le \$450,000 e tufa ma pisinisi laiti, afai la ae selau pisinisi laiti na o le \$450 e ave i ai, pe afe foi pisinisi laiti na o le \$45 e ave i ai. Sei silasila i lenei tupe a o lea e te saunoa o pisinisi nei o le malosiaga lena o le tamaoaiga, ae silasila la i tupe ia ua ave i le Komiti Faufautua e lata i le \$7miliona, ioe, o lau faataitaiga la, na alu le matou asiasiga i Salelologa na matou talanoa lea ma le

Pulenuu o Salelologa o latou e momoe i le maketi e vaai oloa a nai tagata, ona ou fai atu lea, a o fea Komiti Faufautua, o a latou mea e fai a o le tiute tonu lea o latou e omai e vaai le mea lea a o nai Pulenuu e tele o latou tiute, o le mea lena o lea ou te fai atu ai, o pisinisi laiti a ola, e tele galuega a tagata e maua, maua lafoga e fesoasoani i le Tala o le Tupe, e faamasino ifo lava lau Afioga i le mea lea i Komiti Faufautua ia, ioe, e matua tuulafoai lava nei tupe e ave i ai, e leai ni galuega o faia.

**FOFOGA FETALAI:** Tulai mai lau Afioga i le Sui Palemia.

**Tofa Hon Fonotoe Nuafesili Pierre Laufofo:** Lau Afioga i le Fofoga Fetalai, pau le vaega ina ia fesoasoani ai ona o lea e talanoa i le Tala o le Tupe mo pisinisi laiti, o lona uiga o le vaega foi lea o le SBEC ma nai isi seleni ia mo pisinisi tumaoti o vaega na o mea o polokalame, pei foi ona faamalalama muamua o lea foi ua sii le fesoasoani i lena vaega mai le \$400,000 i le \$450,000. O le lipoti mai o i i le vaega lea o le SBEC o le tele o pisinisi laiti lea e i ai o faifaatoaga, e maua le 300 le aufai-faatoaga lea e lesitala i i i le polokalame ia lea e i ai le fesoasoani lea, lea e i ai le \$10,000 e 100% le guarantee a le SBEC e fai ai le loan \$10,000 a le faifaatoaga e fesoasoani ai le latou atinae o faatoaga, o faatoaga laiti faapena aua e fai faapisinisi, ia ona faatau lea e le mamalu o le atunuu, o iina lea e maua ai foi a latou seleni e soifua ai ma fai ai latou mea e manaomia. E pei o le tulaga lea lau Afioga i le Fofoga Fetalai.

**FOFOGA FETALAI:** Malo, faafetai saunoa. Tulai mai lau Afioga i le Taitai o le Itu Agai e faaauau lau saunoaga.

**Afioga Hon Palusalua Faapo II:** Lau Afioga i le Fofoga Fetalai, o lea lava ua faasolosolo ina...ae tuu nisi mea mo...leaga o lea ua ou alofa atu, pau lava o lenei, o Samoa o lo o faafogafoga mai, o le fesili lea, o le a se mea mo oe i lenei Tala o le Tupe, o le a se mea mo oe? E taugata ai le tau o le soifuaga, ia faamasino ifo oe, e taugofie ai le tau o le...sei faamasino ane oe Samoa....

**FOFOGA FETALAI:** Malie lau Afioga i le Taitai o le Itu Agai, sei tuu atu le avanoa i le Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai, masalo e galo i le Taitai o le Itu Agai le tele o polokalame ia e fai nei, tai pei o le \$6miliona lea e ave i a tatou aoga, tai pei o le fesoasoani lea e fai i falemai uma i tua. Ua galo ia te oe? O le mea lea e tupu lea e gasegase ai le Taitai o le Itu Agai ma le latou itu, pei e manao foi lele e avatu tupe tufa, tusa lava pe leai se mea tufa pea, e le faapena ona faia se Malo. E oo foi la i pisinisi ia sa e laga nei, o pisinisi laiti na e i ai nai a latou mea e fai lea e moomia, e moomia ai le mea lea po o le lesitala i se faalapotopotoga i fafo e moomia ai le lesitala lea, a o lea e mafai lava ona latou faatinoina galuega, po o le fesoasoani e totogi ai le failautusi, o mea na laiti faapena. A manaomia e se faifaatoaga se fesoasoani o tupe la e faulalai i le Development Bank, ma isi faalapotopotoga e o i ai e avatu ai a latou fesoasoani. Ia o le tulaga lena o lea e fai ma galo pea ia te oe le tele e oo

foi i a tatou penisione e ola i penisione, o isi aiga ua faalagolago i tupe a penisione nei e totogi ai le moli ma isi mea, a o mea na fai e avatu faapitoa lava mo matua taus.

Lau Afioga i le Fofoga Fetalai o lena, ae o lea e lei oo i le taimi matou te tata ai ma tali atu ai, a o lau fesili lea e faapea mai, faitau ane e oe le mea o lo o e maua i le Tala o le Tupe. Ua galo ia oe le tatou polokalame, ou te ofo sa le tataua ona galo ia oe o lea sa e saofai i totonu o le Kapeneta i le umi e lima tausaga.

**FOFOGA FETALAI:** Tulai maia le sui usufono mamalu.

**Tofa Hon Tolofuaivalelei Falemoe Leiataua:** Lau Afioga i le Fofoga Fetalai....

**FOFOGA FETALAI:** O lea o le a avatu le avanoa i lau Afioga i le Minisita mo Tina ma Tamaitai, Atinae o Nuu ma Afioga ma Agafesootai, tulai mai.

**Tofa Hon Tolofuaivalelei Falemoe Leiataua:** Faafeai i lau Afioga i le Fofoga Fetalai ma le faafofogaaga foi a le Maota, leai na ona ou fia faamalamalama lava i se isi vaega taua o le saunoaga a le Taitai o le Itu Agai le vaega lava lea o le Faalapotopotoga lea o Pisinisi Laiti le pulega lea o le SBEC. O lea e tilotilo le Taiai o le Itu Agai i le vaegatupe lea e faamatu e le Malo e fesoasoani i a latou i tupe e faasoa atu i pisinisi laiti, ae le o silafia. O le mea lea ou te fai atu ai, aua o le mea e tataua ona sailiili e fesili mai i Minisita e malamalama i faiga faavae a le Malo. O le isi vaega taua o le galuega a le SBEC latou te guarantee ina loans e le avea i ai se tupe a le tagata lea, ae mafai ona latou guarantee ina le loan a le tagata lea e alu e aumai i le Faletupe o Atinae, alu e aumai i le faletupe o le Samoa Commercial Bank faletupe faapena, ia ona guarantee lea e latou, afai e alu alu suataga a le vaatele i le faaogaina e le tagata lea e taumafai le pisinisi laitiiti e faaletonu, e tauave lava e le SBEC, ioe, ona o la e tele a latou galuega pei o le latou faiga faavae lea e i ai nei, e latou te totogi le auvaega foi lea o tamaitai po o fale lalaga e fai a latou sootaga e latou te lalagaina le lea a le Malo ua uunai i le taimi lenei, e totogi la e latou le tupe i le tamaitai lalaga toga lea a uma e toe faola mai le latou tupe ae taofi e latou le toga a o la e totogi e latou ua maua le tupe pei lava o la ua faigaluega le tagata le tausala lea o le atunuu o lo o aafia i le latou faiga feagaiga lea. O mea la na e le o silafia e le Afioga i le Taitai o le Itu Agai, e le na o tupe ia e silasila i ai, a o faiga faavae a le Malo e saga uunaia ai ia le faiga vavalalata lea po o le partnership lea a tagata o taumafai a latou pisinisi tagata taitoatasi, e faapea foi le vaega lea o tamaitai o le atunuu i fale lalaga, o lea la e tele le fesoasoani i ai ae le tau avea ni tupe, vagana le tupe lea e totogi ae aumai le ietoga faatau e latou. Pei o le tulaga lena e ese le taua o le faiga o lo o i ai nei. Ma le agaga faaloalo.

**FOFOGA FETALAI:** Malo, faafetai fesoasoani mai lau Afioga i le Minisita. O le a toe tuu atu le avanoa i le Afioga i le Sui Palemia.



**Tofa Hon Fonotoe Nuafesili Pierre Lauofo:** Lau Afioga i le Fofoga Fetalai, na o sina mea puupuu lava lea, o lea ua saunoa atu le Afioga i le Minisita mo Tina ma Tamaitai, Atinae o Nuu ma Afioga ma Agafesootai, o le tupe lea mo pisinisi laiti o le SBEC e i ai ma le \$600,000 o fesoasoani a Niu Sila, ona sili ai lea i le miliona tala le tupe o lea e faaagaaga mo pisinisi laiti nei, o tulaga na e i ai, e \$450,000 le sao a le Malo ma le \$600,000 le fesoasoani a Niu Sila e tuufaatasi i i aua mo le polokalame e fai faatasi fai faapaaga. O le tulaga lena i ai o le guarantee e amata atu lava i lalo sei tau i le \$10,000 e 100% e guarantee e le SBEC, o le tulaga lena e i ai.

**FOFOGA FETALAI:** Malo faafetai, e manatu ua malamalama le....

**Afioga Hon Palusalue Faapo II:** O lea la ua ou malamalama, matuai ou le malamalama lava i le Minisita mo Tina ma Tamaitai, o lea faatoa ou malamalama ina ua e faamalalama mai. A o le mea la lea ou te fesili atu ai, le \$7miliona foi lea e alu i le Komiti Fauautua ioe, e tele lena tupe e fesoasoani i le Afioga i le Minisita, ioe.

**FOFOGA FETALAI:** Ia sei tulai atu le Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai e le taitai lava le seleni lena e alu i tagata atamamai o le atunuu o lo o i totonu o Komiti Fauautua o lo o faaoga e le Malo lo latou tomai e fautua ai le Malo i vaega eseese, aemaise ua outou tilotilo i le polokalame foi lele, Toe Sasaa le Fafao, o le matua manaia o lena polokalame o latou foi na o lea e faafeagai ma le tatou tusi foi lele le Tusi Faalupega, e tele a tatou Komiti e i ai foi Komiti e tai pei lava o le tou Komiti foi lea i totonu o le Maota lenei, Komiti o le Maota lenei e faapena foi ma Komiti faale-Tulafono e pasia atu e tatou Tulafono iinei, o Komiti Fauautua uma lava na, le Komiti e Fautuaina le mataupu i le EPC Komiti faale-Tulafono, lea e te fai mai e maimau tupe, oi a maimau tupe o tupe a le atunuu o la e i ai o latou tomai faapitoa lea e faaoga? O e malamalama ea, o le tatou atunuu o lea e pulea faa-Komiti, o lea e pulea faa-Komiti le tatou Komiti o le Kapeneta, Komiti a outou i i o le Tupe, o lea la ua ou faalogo atu o la ua feoloolo le Komiti, a o amio foi la e fai ai iina, e pei o le matua lelei o la outou Komiti o Tupe o la foi e lelei le Komiti a Toeaiina, o le mea la lea tuu ia lea mea, ua outou iloa ea o le mea lena o lo outou aa i tui o taitai o Samoa, o taitai o Samoa ia tou te upuvale i ai maimau ai nei tupe, o le a maimau ai o la e maua mai ai ia fautuaga lelei? O le atunuu lenei e pulea e matai. Ua e malamalama le Taitai o le Itu Agai, e pulea e matai, e moomia le fautuaga a matai o le atunuu ina ia tatou iloa ai tuutuu mai i totonu a tatou amio pei o ni matai e omai e pulea. O le a foi le mea lena e taumafai ane e le tama lena? Ia manuia le faaiuga o lau lauga.

**FOFOGA FETALAI:** Ia malie le Taitai o le Itu Agai, o lo o i ai le faauilavea a le sui usufono mo Siumu, tulai mai le sui usufono.

**Tofa Hon Tuuu Anasii Leota (Siumu):** Faafetai i lau Afioga i le Fofoga Fetalai, leai na ona ou faamanatu i le Afioga i le Palemia a o i ai le Afioga i le

Taitai o le Itu Agai i i ma le sui usufono mo Falealupo, e aupito toatele lava a la Komiti Faufautua na i ai, ma lou faaaloalo.

**FOFOGA FETALAI:** Ia tulai maia lau Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai, na ona ou tulai atu e faasao le saunoaga a le sui usufono mo Siumu.

**Afioga Hon Palusalua Faapo II:** Lau Afioga i le Fofoga Fetalai, na ou manatu ona o tupe a le Malo e fia faasaoina na ou fai loa i ai i au Komiti, tatou o tatou malolo, tatou o e fai a tatou maumaga, ioe, o lea la ua tele tupe a Komiti lea ua maua ona o la e lau mai i Safata le talo, o fai. A o le mea lea ou te tau fai atu ai, o le leai o se galuega e fai, e tai lua vaiaso omai saina totogi.

**FOFOGA FETALAI:** Malie le Taitai o le Itu Agai sei tuu atu le avanoa i le Minisita o Tupe.

**Afioga Hon Faumuina Tiatia Faaolatane Liuga:** Lau Afioga i le Fofoga Fetalai ina ua alu le Taitai o le Itu Agai ua le fia pati i i ae fai mai ia te au ae alofa tuu au Komiti iina aua le tutulia. Ou fai atu lea o le a tuu i i ae fai mai loa le Pati e tutuli, tutuli loa.

**FOFOGA FETALAI:** Ia sei vaai la o lea foi e.....sei silasila la i ai. Faafetai lou alofa le Minisita o Tupe faafaigaluega pea le paia o le Aiga Malosi.

Tulai mai se tasi o sui usufono mo Aana Alofi Nu.1, Afioga Hon Leaupepe Toleafoa Apulu Faafisi.

**Afioga Hon Leaupepe Toleafoa Apulu Faafisi:** Lau Afioga i le Fofoga Fetalai ona o le Taitai o le Itu Agai o le paolo o le nuu nei, e mafuta ma le tuafafine foi le Afioga Leaupepe ao lana tala lena ia ua pau lava lena o le mea lea e le fiafia ai i le HRPP ua aveese uma ana Komiti. O le fesoasoani atu lea.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Malie lau Afioga i le Fofoga Fetalai ou te fia taua ona e lei faapea na aveese ona o nisi tulaga, ae pei ua alu atu lava le Taitai o le Itu Agai ma faapea ai foi ma uiga. Ua le fia omai i fono, e le gata i lena ua le toe usitai i le Taitaifono e pei o le tulaga lena e le mafai ona moomia ni tagata faapea aua o mea lava na e tupu i totonu o se Komiti. Afai e tiai fono faamalolo, afai e faatonuina galuega e fai ae le faia faamalolo, afai e faatonu atu e le Taitaifono latou galuega e fai ae muna faamalolo, lau Afioga i le Fofoga Fetalai. E le o se isi la tulaga ao le tulaga faapena lau Afioga i le Fofoga Fetalai aemaise la o le le umi ae tau mai ua mai, ia sosoo le mai ma le oti. O le tulaga lena e i ai lava Komiti e ese le televave ona feoti tagata. E fiu lava e sui atu ae uma le soifua ona o le tele o latou galuega e fai.

**FOFOGA FETALAI:** Malie lava lau Afioga sei tali muamua le Malo. Tulai mai lau Afioga i le Minisita mo Galuega, Felauaiga ma Siosiomaga. Tulai mai lau Afioga i le Minisita.

**Afioga Hon Manualesagalala Enokati Posala:** Ona o lea e taua nai toeaia ma matai o lou itumalo, sa matou talatalanoa ma faaalua le le fiafia tele i le Taitai o le Itu Agai ona ua aveesea ae tele lo latou sao sa faatino sa fai ai latou ma Komiti Faufautua. Ae pei ua le fiafia ona o tulaga lena, lea sa lelei ma sologa lelei mea uma ae ua alu ese fua ona o nai nisi mea laiti.

**Afioga Hon PALUSALUE FAAPO II:** Ou te lei alu ese na ou sack ina le HRPP ua ou le talitonu i ai. E lei tulia au e se isi, o ai e tulia au. O le mea lena e fia faasao.

**FOFOGA FETALAI:** O le sack lava o le tuli. Tulai mai le sui usufono mo Faleata Sisifo.

**Tofa Lealailepule Rimoni Aiafi:** Lau Afioga i le Fofoga Fetalai o le mea lena aua o lea sa lala vale ou taliga i Komiti ia e saunoa i ai le tatou Palemene. Aua o lea ua valu nei ou tausaga iinei ae leai ni au Komiti. O lona uiga o Komiti, o Komiti a le HRPP, e faasa ni matou sui e i ai? Ma le faaloalo lava.

**FOFOGA FETALAI:** Ia o le a tuu atu pea le avanoa e tali mai ai le Minisita o Tupe.

Tulai mai le Minisita o Tupe.

**Afioga Hon Faumuina Tiatia Faaolatane Liuga:** Lau Afioga i le Fofoga Fetalai, ina ua pasia e le Kapeneta o le a fai le taavale a le Taitai o le Itu Agai, pasia ai ma le avetaavale ona ou fai loa lea ia Palu sei aumai se toeaia o lou itumalo e aveina lana taavale. Ae fai mai lana tala, e leai o le a aumai se tasi o lona itumalo. O le ituaiga mea lena e tataua ona silafia e leai se mea o le a sau ai fua le isi tagata e te le masani ai aua a fai atu faatonuga ae tetee, pei o le mea lena lau Afioga i le Fofoga Fetalai.

**Afioga Hon PALUSALUE FAAPO II:** O le a faauma atu lau lauga lau Afioga i le Fofoga Fetalai. E le maimauina fua lou taimi ou te taea lava ma ni lapisi aua o lea ua ou fai atu nei o ai a toe talitonu is au upu. O ai e toe talitonu i sau upu e le faatuatuaina oe. O le mea lena lea ou te fai atu ai o lea ua maea lou taimi ao lau fautuaga i lau Afioga ia manuia ou faiva.

Lou itumalo e o lo o faalogologo mai, malo tapuai, o tatou atinae una ua leva ona ou talosaga ai faafetai o lea ua tulai mai lou uso a sui sufono. O lea ua fai auala galue, pau lava lea o le mea lau Afioga i le Minisita mo Punaoa Faalenatura ma le Siosiomaga aua e te ita ia au ae fai ia uma ta taligalu leai lava ma se aoga o le taligalu le la ae sau sami alu i totonu o le nuu.

Ona maea lea si ou itumalo e, faafetai atu foi i lou uso a sui usufono ona o mea lelei o lo o faia i tua talu ai au talosaga ua leva ona faataoto mai. Pau lava o lea aua e te manatu faapito ia taua o upu lava i luma iinei ae fai ia uma mea a le ta itumalo. O se upu ua sala.....

**FOFOGA FETALAI:** Malie lava le Taitai o le Itu Agai, sei tuu atu le avanoa i le faauilavea a le Minisita mo Punaoa Faalenatura ma Siosiomaga.

**Tofa Hon Faamoetaulao Ulaitino Faale Tumaalii:** Lau Afioga i le Fofoga Fetalai leaga o lea ua taua lou igoa e le Taitai o le Itu Agai, leai ou te le ita ia te oe o lo o fai lava le galuega i le tulaga e tataua ona oo i ai. O le faaopoopo atu lea.

**FOFOGA FETALAI:** Faauma le taligalu o le Taitai o le Itu Agai malie lau Afioga i le Minisita aua le tuua i le tausaga o apipa.  
Tulai mai le Taitai o le Itu Agai e faaauau le saunoaga.

**Afioga Hon PALUSALUE FAAPO II:** Lau Afioga i le Fofoga Fetalai ona faauma atu lea o sau tala. O le a se faafogafoga mai a lau Afioga, o le a se upu ua laavale, o aga lava o faa Palemene e tau momoli atu so matou manatu. Lau Afioga i le Palemia ma le la Itu ia outou faamagalo mai foi. O le faafogafoga a Samoa o le tulaga lena ia maua le agaga faamagalo pe afai ua laavale se faamatalaga. Manuia lau Afioga i le Fofoga Fetalai, manuia lau Afioga i le Palemia, Sui Palemia ma le Kapeneta ola foi lena Itu ma le mamalu o le Palemene soifua.

**FOFOGA FETALAI:** O lea ua ae i manusina le faatofalaiga a lau Afioga i le Taitai o le Itu Agai ma e manatu foi o le lauga mulimuli foi lea o finagalo, tuleiga ma saunoaga a le tatou Maota ae lei tali atu le Afioga i le Taitaifono.

E momoli atu le agaga faafetai i lau Afioga i le Taitai o le Itu Agai, e le tau faafuluina le tofa ma le faautautaga ma le malelega momoli leaga o le faalupega o lau Afioga, o le paia o le Aiga Malosi. O sa ma faiga o le Falefa o le Ulugatagifa ma le Nofo Tula ia Safata, e leai se isi aiga malosi ia Samoa. O lea o tuleiga ma saunoaga agai i le Malo ma fautuaga e momoli atu le agaga faafetai tele. Ou te talitonu lava o lo o e taumafai pea e faaali lo outou agaga ma lo outou finafinai i fautuaga e aumai i le Malo, ia ailao le Atua ua maua sula ua ula i tuleiga ma saunoaga. Atonu ia i ai se aoga ma se manulauti lelei e faafoefoe ai fautuaga ua aumai i le Malo.

Ou te manatu ua tatou taunuu tonu i le tatou taimi malolo faatulagaina mo lena vaega o le aso. O lea e momoli atu ai le faafetai tele i le tatou Maota o le a tatou malologa masani ona tatou toe taliu mai lea i le aoauli nei e faaauau ai le tatou galuega i le itula e 3, ta le 7 ona tatou laa atu lea agai i le 11 nanei i le afiafi.

E momoli atu le agaga faafetai tele i le tatou Komiti o lea ua sauni le taumafataga, ua vela le suavai a taulelea o lo gaseseina ma tautuaina le tatou Maota o lo o i ai foi le ofu faafaleolo ua uma ona saunia mai e Tuisamau ma le aumaga e fesoasoani i le tatou faamoemoe i lena aso ae ia tatou tauaofia i le itula e 3 i le aoauli nei.

*Na faataatia ese Taualumaga a le Fono Aoa o le itula e 1:00 i le aoauli seia aulia le itula e 3:00 i le afiafi.*

*Na toe faaauau Taualumaga a le Fono Aoa o le itula e 3.00 i le afiafi.*

**TULAFONO TAU FAAOFI O LE FAATATAUINA O TUPE  
FAAOPPOPO (NU.2) 2012/2013 MA LE TULAFONO TAU FAAOFI O  
LE FAATATAUINA O TUPE 2013/2014 – felafolafoaiga faaauau i luga  
o le faitauga faalua**

*Na toe faaauau felafolafoaiga.*

**FOFOGA FETALAI:** E faamalo atu i lenei vaega o le aso i le paia maualuga o le tatou Maota ua mafai ona toe aufaga potopoto i lenei itula o le taeao na liuga lua. O le agaga lava ma le faamoemoe aua le faaauauina o le tatou Galuega e pei ona faatulagaina i lenei aso. E momoli atu le faafetai ma le faamalo i le onosai mai aemaise o le lava papale o le Maota i ona tulaga faalupe a o tatou alo mai i le tatou galuega muamua i le taeao analeila.

E faia le tatou malologa ma le taligasua ua tatou taunuu i le taunuuga o tuleiga ma saunoaga a sui usufono. O lea o le a sauna mai le Taitaifono ma le faamalamalama muamua lenei a le Malo e ala atu i le Komiti o Tupe Maua ma Tupe Totogi atoa ai foi ma le saunoaga lava ia a le sui usufono ona lafo loa lea i le Malo e amata ona tali ma faasolo ai taulumaga o le pasiaina o le Tulafono Tau Faaofi.

O le avanoa lenei mo lau Afioga i le Taitaifono o le Komiti o Tupe Maua ma Tupe Totogi, tulai maia o lea ua avanoa le Maota mo lau saunoaga.

**Susuga Hon PAPALIITELE NIKO LEE HANG:** E momoli atu le faafetai i lau Afioga i le Fofoga Fetalai mo le avanoa. E manatu foi ua maua se faasiliga malosi a lau Afioga aemaise o le paia ma le mamalu o sui usufono o le Palemene i se faiga malologa puupuu sa alo atu i ai ma ua sauna foi mo le taamilosaga e pito i le taamilosaga mulimuli. Malo faafetai, malo le onosai i lenei aso.

Ou te muai faatulou atu i lau Afioga i le pau o le Maota o lo o sasao ne ii le afio o lau Afioga i le Fofoga Fetalai, afio foil au Afioga i le Palemia ma Minisita o le Kapeneta. Afio lau Afioga i le Taitai o le Itu Agai, afifio Minisita Lagolago aemaise o sui usufono mamalu o lena Itu o le Maota. O lo o faavailolo foi Ofisa Sili o Pulega ma Faalapotopotoga Tumaoti a le Malo.

Afio lau Afioga i le Failautusi o le Maota aemaise o le paia maualuga o le Matagaluega.

Ou te fia faatulou atu foi i le paia maualuga o Samoa mai ona ao seia oo i ona iu o lo o faafofoga tapuai mai i faiva a lana Palemene. Aemaise foi o le tapuaiga a le aufaigaluega paia a le Atua i ona fata faitaulauga e fia o lo o nonomanu i nuu ma afioaga aua se manuia o Samoa ma le lumanai.

Ou te fia faatalofa atu foi i le tapuaiga a lou itumalo o le au Palota Taitoatasi, malo le soifua. O outou paia ma mamalu o le a le afea i sau faamatalaga a o le a nuunuu atu faatini o tausala.

Lau Afioga i le Fofoga Fetalai e fia faamauina le agaga faafetai ma le faamalo i le Afioga i le Minisita o Tupe ma le Ofisa Sili o Pulega ma le Matagaluega aemaise o le laolao o le Matagaluega o Tupe e ala i le tapenaina o le Tulafono Tau Faaofi o le Faatatauina o Tupe 2013/2014 ua i lumamea nei. E le i faigofie la outou galuega, malo faafetai, malo le onosai, malo le tauatai. E le faagaloina foi le sao taua mai Ofisa Sili o Pulega o Matagaluega ma Faalapotopotoga Tumaoti a le Malo sa molimauina la matou galuega i le suesueina o le Tala Faatatau o Tupe, malo faafetai.

Lau Afioga i le Fofoga Fetalai, na ou faamauina e 38 sui usufono sa saunoa i le Tulafono Tau Faaofi o le Faatatauina o Tupe 2013/2014, o lau maitau e leai ma se sui usufono sa fesiligia la matou Lipoti e tau mai ai ua 100% le tapenaga a le Komiti o Tupe Maua ma Tupe Totogi.

Mo sau faatagaga lau Afioga e fia to se matupalapala i la matou Komiti, e fai ai lou leo faatauvaa e fai ma fofoga taumomoli o sui usufono uma o le Palemene e momoli atu ai le faafetai ma le faamalo i sui usufono o le Komiti o Tupe Maua ma Tupe Totogi ona e taua le galuega sa feagai ma outou i le ao ma le po ma o lea ua tini lau o le faamoemoe ma ua i totonu i lumamea nei le tatou Lipoti. E pei ona ou fai atu i le taimi ua sola ua matua i 100% le Lipoti a le Komiti o Tupe Maua ma Tupe Totogi ma ua talia atoatoa e le Palemene. E momoli atu ai le faafetai ia outou afioga sa sautia i le ao ma le po ona faataunuina o le galuega sa fuafuaina aua le faatalanoaina o lenei Tulafono Tau Faaofi o le Tala Faatatau o Tupe 2013/2014 ma ua tau lau o le faamoemoe, e momoli atu ai le faafetai ma le faamalo.

Lau Afioga i le Fofoga Fetalai, a o le i faaauauina lau folasaga e muamua lava ona ou fia avea lau Afioga i le Palemia, e faamalulu atu foi i lau Afioga ona sa e saunoa i le tulaga o galuega e faia e le matou Komiti, e sao lau Afioga, matou te le faia ni suiga pe matou te saili mai ni mea e maua ai ni alagatupe o lo o silafia lelei ma malamalama i ai le matou Komiti i lea tulaga. Ona pau o lea, na ona suesue, sailisili ma fautua, ona pau lea o le galuega a le matou Komiti, e saolele lava lau Afioga matou te le faia ni tonu ae fai e le Pulega o Ofisa Sili o Pulega le sailia mai o ni tupe maua ma auala e faasaoina ai tupe faaalu a le Malo.

Lau Afioga i le Fofoga Fetalai, o manulauti na agai i ai le faatofalaiga a le matou Komiti i a matou saililiga, o le saili lea o ni auala e mafai ai ona fautuaina le Malo mo ni vaegatupe e faasaoina aemaise o nisi auala e maua mai ai ni tupe maua faaopopo a le Malo. A silasila lau Afioga i tupe maua masani po o tatou ordinary revenues \$538.2miliona ae a fua atu i tupe faaalu e faagaioi ai le Malo po o current expenditures e tusa ma le \$549.7miliona. O lona uiga e manaomia se isi vaegatupe pe tusa ma le \$11miliona, ua ala ona ou taua ia meal au Afioga i le Fofoga Fetalai e faavae ai se manatu po o ni motugaafa e lagolagoina ai se fautuaga e tuuina atu e lou nei sui usufono.

Lau Afioga i le Fofoga Fetalai o lou manatu e lua lava fofo e fesoasoani ai i le Malo i lea tulaga, o le fuafuaina lelei ma faaoga tatau tupe ua fuafuaina e faaalu mo Matagaluega taitasi aemaise o le saili i nisi tulaga o lo o lape ai le Malo i le aoina mai lea o ni tupe e tatau ona maua. Lau Afioga sa saili foi le Komiti ma Iloilo Lipoti sa tuuina mai ma molimauina ai le tulaga o le tele o Matagaluega e over spend a latou budget aemaise lava pili o telefoni, pili o le eletise, pili o penisini o taavale, repair ina o taavale lavevea ona o le faatamala ma nisi lava tulaga faapena e mafai ona fuafua lelei e Matagaluega aemaise o Faalapotopotoga Tumaoti a le Malo ina ia faasaoina mai tupe nei e soona faaoga le tatau ma faapena ona tele ai tupe faaalu ae le o lava sa tatou tupe maua.

Lau Afioga i le Fofoga Fetalai, ua tele foi ni faasea ma ni faitioga mai le mamalu o le atunuu i le faaaogaina faale-tatau o taavale a le Malo i taimi after hours ma ova ai le faaaogaina o penisini o lo o faaoga e taavale, lea e molimau ai le Lipoti a le Pule ma Suetusi Sili. Ia se i silasila ane le Malo i lea tulaga. O le maitau foi a le Komiti aemaise lava i taavale a le Malo, e i ai taavale o lo o molimauina mai i lipoti a Matagaluega o lo o faaaogaina e

Afioga i Minisita ae le o laiseneina i ni laisene o le Malo. O le popolega lava o le Komiti ina ia transparent le tulaga o le faaaogaina o aseta a le Malo, ona e maitauina ua i ai foi Minisita ua laiseneina a latou taavale i licences plate a le Malo ae peitai o lo o maua mai i faamaumauga a nisi o Matagaluega o lo o i ai ni taavale o lo o faaaogaina e Minisita e leai ni license plate a le Malo. O lea e fautua atu ai i lau Afioga i le Palemia ina ia silasila ane ai i lea tulaga ona o le naunautaiga lava o le Komiti ina ia taofia mai nisi a tatou tupe o lo o faaaogaina faale-tatau. O le tuualalo a le matou Komiti lau Afioga i le Palemia ma Minisita o le Kapeneta, e le aoaia e le matapia le manaia, ae fautua ina ia silasila ane le Malo i se tulaga e taofia ai le faaaogaina faatautala po o le abused o aseta a le Malo.

Ona ou oo mai ai lea o lau faamatalaga lau Afioga i le Fofoga Fetalai ia tatou tupe maua, o le isi vaega o tupe maua e auala mai i dividends mai tatou SOS po o le vaega lea ua faatulafonoina o le Public Trading Bodies. E moomia ai le totogiina mai i le Malo o le 50% o a latou polofiti e fai ma o latou sao i le Tala o le Tupe a le Malo po o dividends. O le current budet a le Malo lea e i ai o le 2012/2013, o lo o molimauina na o le tolu lava tatou Faalapotopotoga o le Public Trading Bodies lea e maua mai ai ni tupe maua, a o le aofaiga o Trading Bodies o lo o i ai nei e 16. O le fesili la po o le a le tulaga o le isi 13, o lou talitonuga a faapea e perform uma nei Faalapotopotoga e tusa ai ma le Tulafono o le Public Bodies Act e tele foi se sao o se tupe pe fia ni miliona. O Faalapotopotoga nei e tolu ou te tautala atu ai ua maua mai le Lipoti a le Matagaluega o Tupe e \$1.1miliona le tupe tuufaatasi a nei Matagaluega e tolu mo le tausaga faaletupe o lo o faagasolo nei. A silasila la lau Afioga i le isi 13 e maua mai ai foi nisi miliona se tele e fesoasoani ai i le Tala o le Tupe, ona o le tulaga lea na ou faaalua i le amataga o lau folasaga e le lava a tatou tupe maua masani.

Lau Afioga i le Fofoga Fetalai, e miliona ma miliona aitalafu nei e lipotia mai e le gata i Matagaluega e pei o le Fale Lomitusi aemaise o Faalapotopotoga Tumaoti e pei o le Faalapotopotoga o le Malosi faa-Eletise, Faalapotopotoga o le Suavai aemaise o le Ofisa o Tiute. E miliona ma miliona aitalafu nei e aumai i lipoti a nei Matagaluega po o Faalapotopotoga foi e le aoina e le Malo. E avatu ai se fautuaga malosi ina ia silasila ane i lea tulaga, e oo lava i a tatou Faalapotopotoga o lo o nofo aitalafu lava i totonu o le Malo aemaise o le Fale Lomitusi, e maoae foi aitalafu a Matagaluega o lo o i ai i totonu o lea Pulega, ona i ai lea o se manatu, ae a pe a toe silasila le Malo i le faagaioioiga o le Ofisa Lomitusi e le gata e fesoasoani i le Malo mo le faaitiitia le tau o lomiga po o a uma ni mea e gaosi i le tatou Fale Lomitusi a ia maua mai se sao ona o lea foi e tele tupe a le Malo o lo o faaaluina ai.

Lau Afioga o le fesoasoani atu lena i lea tulaga ona a oo ina faamalosia le aoina uma mai o aitalafu nei out e talitonu e tele foi se fesoasoani i le tulaga o tupe maua.

Lau Afioga i le Fofoga Fetalai, ou te toe fia faamanatu atu foi i le Malo e tauala atu i lau Afioga tiute a Pulega po o aufaigaluega a le Malo i lalo o Tulafono Tumau. O le mataupu lea ou te fia tautala atu ai lau Afioga o le tulaga o le valaauina o tatou Faauluuluga po o nisi lava o le aufaigaluega a le Malo e mafai ona oo mai i luma o Komiti Faa Palemene e molimauina ni mataupu o lo o fia malamalama ai le Komiti aemaise lava o le naunautaiga ia aumai lipoti a Komiti i totonu o le Palemene ao sao ma atoatoa le faiga o lipoti. Ae paga lea a le oo mai Faauluuluga ma nisi e valaauina i so o se

Komiti Faa Palemene o le a faapea foi ona le maua se atoatoa i se lipoti e tuuina mai i le Palemene. E faamanatu atu foi e i ai aulape o le Tulafono lea e mafai ona tapa le Ofisa o Leoleo ae sa manatu lava le matou Komiti i le aganuu ma le ava fatafata na le faatinoina ai lea tulaga. O le tuualalo i lau Afioga i le Palemia faapea foi le Aiga Kapeneta sei faamanatu atu lava i Faauluuluga o latou tiute i lalo o Tulafono Tumau a le Palemene ina ia tausi ai pea le mamalu o Afioga i sui usufono aemaise foi le mamalu o le Palemene a Samoa. Sei silasila ane i ai le Malo i lea tulaga.

Lau Afioga i le Fofoga Fetalai, sa mafuli foi le sailiiliga a le matou Komiti i le tuuina mai o lipoti faale tausaga mai Matagaluega ma Faalapotopotoga Tumaoti i le taimi ua fuafuaina i lalo o le Tulafono. E maitauina e le Komiti e fai lava sina tuai mai o lipoti i totonu o le Palemene ae sei toe silasila ane le Malo po o le a se tulaga ona e taua tele le aumai o lipoti lata mai e mafai ai ona update le silafia ma le iloa i le tulaga o lo o faagaioi ai aemaise lava Faalapotopotoga Tumaoti e pei o le isi tulaga lea i tausaga uma lava e aumai ai matou fautuaga ina ia usitaia e Matagaluega le taimi e faatulafonoina e tuuina mai ai lipoti i totonu o le Palemene. Ae peitai, o le tausaga faaletupe lenei lona tolu o lo o maitauina lava e le matou Komiti lea tulaga faaletonu. Sei silasila ane le Malo e faaleleia lea tulaga.

O le naunautaiga lava ia faapena ona faaopoopo nisi tatou tupe maua e fesoasoani i le Tala o le Tupe aemaise foi le taofiofi le soona faaogaina o fasi keke ia e tuuina atu i Matagaluega taitasi ona o tausaga uma lava e le o lava le faasoa a le Malo. E pei o le tulaga lea lea e faamamafa atu ai ma le faaloalo atu.

Ona ou oo mai lea i nai manaoga o si ou itumalo Palota Taitoatasi. E le tagisa foi lenei itumalo e ui lava e le o mautinoa le lumanai o Nofoa ae o le tiute lava o le sui usufono i lenei taimi o le talosaga i mea o lo o manaomia e le itumalo. E tatau pea la ona ou faamanatu atu i lau Afioga i le Minisita mo Galuega, Felauaiga ma Atinae Esee, masalo o le lona tolu lenei o Tala o le Tupe o le faatolu foi lea ona ou lauga i auala o si o matou nuu o Aleisa i le Leopardine Rd aemaise le auala lea e agai atu i le faleaoga i Aele e manaomia lava le faatania o lea auala ona a louloua le tau ua faigata e alo ma fanau ona uia le aualatele ona o le palapala ma vaivaia, e toe faamanatu atu i lau Afioga i le Minisita.

Aemaise foi le auala taavale agai i Vaitoloa o lo o maitauina pea le faaleagaina o lea auala pe a louloua le tau ae toe faamanatu atu i lau Afioga tulaga ia. E momoli atu le faafetai tele i lau Afioga i le Minisita aemaise le Pulega o le Suavai o lea ua maua faamatalaga o la ua tapena le faatanoa i uta i Aleisa, talosia ia ia vave ona maua se suavai taumafa o le matou afioaga lea ona o lea faafetai ua oo i Savaii le tele o le suavai taumafa, ua oo lava i Neiafu ma Falealupo ao lea lava e lata mai Aleisa iinei o lo o fia inu foi i se suavai mama. Ia na o le pau ia o nai manaoga lau Afioga i le Fofoga Fetalai, e tuuina atu i le Afioga i le Minisita mo Galuega, Felauaiga ma Atinae Esee.

Ona faaiu atu ai lea o se matou faamatalaga e faapea ia agalelei pea le Atua i lau Afioga i le Fofoga Fetalai, maua lou soifua laulelei, faatumu pea lau utu aua le atamai ma le malamalama aua le faataunuuna o tiute faigata o lo o feagai ma oe. E ui lava e lui mai pea oe e le la Itu i le tele o taimi ae o lo o maua pea lou loto onosai e faatino ai ou tiute.

E momoli atu foi le faafetai i lau Afioga i le Palemia aemaise le Kapeneta, e ui lava e faitioga i le Malo e talitonu lava action speaks louder than words. O



lo o maitau pea e le atunuu le tele o galuega ma developments i lenei taimi o le mea taua lena.

Ia manuia foi lau Afioga i le Taitai o le Itu Agai, malo lava le onosai i lenei vaiaso sa luga lalo foi le tatou fonotaga ae e moni lava e tele lava i pesega ae matua lava i le o o. E momoli atu le faafetai tele i lau Afioga aemaise sui usufono mamalu o le Palemene. E ono faauma atu ai lea o se matou faamatalaga ia manuia lava lau Afioga manuia le tatou fono. Faafetai lava mo le avanoa.

**FOFOGA FETALAI:** Malo. Faafetai saunoa malamalama ma le saunoa manino i le saunoaga atoatoa a lau Afioga i le Taitaifono. E momoli atu le agaga faafetai tele i lau Afioga i le Taitaifono, e le gata i lea o sui usufono uma o le tou Komiti. Ou te talitonu ua tapena faafafine toaga la outou galuega sa outou gapatia ai i le tolu vaiaso e oo mai lava i le taeao nei, o lea lava ua talatala ma le la la outou taofi. O lea foi ua faafofoga ma le totoa le tatou Maota ia faafetai i le galuega tapena maeaea o lea ua tatou tini tauao i le saunoaga a lau Afioga i le Taitaifono, ou te manatu ua faafofoga ma le manino le Maota.

Ia lafo ia atu i lau Afioga i le Palemia po o fea le itulau e te finagalo e amata mai ai le Tali a le Kapeneta ona faasolo ai lea o le Tali a le Malo i le Afioga i le Palemia.

**Susuga Hon TUILAEPA FATIALOFA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fetalai ou te tulai atu ma le agaga faaaloalo e molimoli atu le faamalo i sui usufono uma o le Maota na sausaunoa i le Tala o le Tupe. E i ai foi le taofi ua sausi lava le fefaaaliaiga o taofi. Ou te faamalo foi i le Taitai o le Itu Agai i lo latou taumafai mai, e amata mai lava i le tutulai soo atu o matou nei i mea e fia faasao ma mea e fia faamalamalama e atagia ai iina le taua o saunoaga e faaalai i totonu o le Maota lenei. Aua ana faapea tou te saunoa mai ae matou nofonofu lava e leai se tali e avatu, o le a le uiga o le mea lena, ua le amanaia, o iina e atagia ai le le amanaia o tou finagalo. Ao uiga ia o le tutulai atu o le Kapeneta po o le mea e fia faasao po o le mea e fia faamalamalama o iina lea e atagia ai le taua tele o tou finagalo.

Faafetai foi i le Taitaifono o le Komiti o Tupe Maua ma Tupe Totogi, ou te lei soona tuua oe e te Taitaifono i le Komiti o Tupe Maua ma Tupe Totogi, e mafua ona ou tuua oe e te Taitaifono i le Komiti o Tupe ona o lou tomai ma lou agavaa. O le taimi sa e Minisita ai o Tupe, o mea tonu lava ia ua agai mai ai o mea foi ia sa agai mai le taimi sa e Minisita ai. Ou te iloa foi sa e taumafai ao le taua o le toe fagufagu mai o mea ia, lea e faafogafoga mai ai Afioga i Minisita aemaise Faauluuluga o Matagaluega aua o le mea moni lava e i ai lava taimi e laaloa ai le faataua o aitalafu ae peiseai e lafo i latou tautusi ma latou o lo o vaai le Tala o le Tupe. O lea la ua faafogafoga mai, e le mafai ona gaioi le tatou Faalapotopotoga o Eletise pe a aitalafu pea Matagaluega ma le totogia. E le o se mea lelei le mea lea ma o se mea foi ua leva ona ou tautala i ai ma ou tautala pea i ai. Faafetai o lea ua aumai manino i le Lipoti a le Taitaifono ma o uiga lelei o tulaga lava o le faiaga o le isi Matagaluega i le isi Matagaluega. O le mea lena e masani ai e le o se mea fou, e vaai atu loa ua tau uma le tausaga ae ua tau leai ni tupe o totoe ona faatuatua loa lea ona totogi pili atonu la e le afaina i totonu o le Malo, ae a

aafia loa le Private Sector latou ia e i tua mai o le Malo, o lo o faalagolago lo latou ola i le Malo o se mea inosia tele lea mea ma e faalagolago foi latou i tua atu o le Malo i le Malo. O le mea lea e taua ai le toe fagufagu. Lau Afioga i le Taitaifono o lea ua ou toe faapea atu e le fou mea ia ae aoga le aumai pea, aumai pea ina ia faafogafoga mai i ai Faaululuga o Matagaluega. Aua foi le tuufaua outou Ofisa Sili Sinia i mataupu ia ona a tuufau loa Ofisa Sili e lalo ifo o outou, o le mea lea e tupu aua e lipoti mai pea le Suetusi i totonu o le Palemene leni ma auamai ai tou faaletonu i totonu o le Palemene. O le mea foi lea e taua ai i Minisita ona sialsila totoa i ai i mataupu ia e aofia ai foi ma le aumai o lipoti i totonu o le Palemene. E sao le tulaga lea i le tuai mai o lipoti ao lau vaai i ai i lipoti o lo o avane i le Kapeneta o lo o tapa o lo o ou maitauina ai le faaleleia atili o tiute i le lipoti mai i le Palemene nei. E leai nisi o toe aisili o le fono usu leni a le atunuu e tataua ona aumai i ai mea uma o lo o galue ai le tatou Malo, e aoga foi le silasila o le Maota nei i taualumaga e aumai ai foi le latou tuualalao.

Lau Afioga i le Fofoga Fetalai, e pei ona masani ai galuega faale Kapeneta o le a tuu atu i o i le Minisita mo Leoleo ma Falepuipui ua leva ona taofiofi gata le Minisita e fia tali mai i tou mataupu. Na o lou tilotilo atu lava ae fai mai ua lava ia ae tuu mai. O lea o le a tuu atu e amata mai e oe ona faasolosolo mai ai lea ao nisi o mataupu e totoe o lea o le a ou faatalitali ogaumu atu i i. Ae lei amataina le galuega, e i ai lava nai mea e lua ia ou te fia oo atu i ai.

O le tulaga lea i le tau o le soifuaga. O le mataupu leni i le tau o le soifuaga, o se mataupu ua faafagogo tagi ao, e leai lava se tupu o le lalolagi leni ua mafai ona ia faia na mea o le taofiofi o le tau o le soifuaga. E leai lava ma se Malo o mafai ona faia lena mea. Aisea? Aua foi e alu i luga le tau o le soifuaga. A alu i luga tupe maua ua faapena foi ona alu i luga mea uma lava. I le tausaga e 1952, sa masani ona ou sau faatau atu le matou tautalo i le maketi a o ou nofo i Apia, e 40sene le tau o le tautalo, a o le tau o le tauia e 20sene. O le a la le tau lea ua i ai nei? Ua alu i luga le tau o oloa. O le tagata lava la e talatalanoa pea i le tau o le soifuaga, o lea ua ou tau atua. E leai lava se isi i le lalolagi ma se poto i le lalolagi na te mafaia ona tuu i lalo le tau o le soifuaga, se i vagana mea o faiga faavae a le Malo e faataoto na ona taofiofi ma faatelegese. A o le toe faafoi i lalo i le 40sene, e leai lava ma se poto o i ai na te toe faafoia le tau o le tautalo sa i ai i le 1952 i lalo i le aso leni i le 40sene se tautalo. Se i alu ane la e finau i le tagata e aumai sau tautalo i le 40sene, na o le pau o le mea, o le tau o le talo i le muaulu. O le tulaga lena. A ua faafagogo tagiao leni mataupu. O lea la, o le fofo e fofo ai le mataupu leni, o le faatelevave ona faaalu le atinae o le tamaoaiga. O le a le uiga o lea mea? O le mea tonu lava lena o lea e agai i ai le galuega a le Malo, o le fai o galuega, o le fai o auala galue ina ia lelei auala galue e o ai tagata i uta latou te galueaiina le eleele ma lava.....

**Afioga Hon Palusalue Faapo II:** O se mea e fia faasao lau Afioga.

**FOFOGA FETALAI:** Malie lau Afioga i le Palemia, se i tuu atu le avanoa i le Taitai o le Itu Agai po o le a le mea lea e fia faasao.

**Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI:** Ou te le iloa po o le a le mea lea e fia faasao.

**FOFOGA FETALAI:** Faapuupuu mai o lea ua tali le tatou Malo.

**Afioga Hon Palusalue Faapo II:** O le mea e fia faasao, o lea e faapea mai, e leai lava se Malo e nofo ma tuu i luga se tau o se soifuaga. Ae a silasila lau Afioga i le Tala o le Tupe lenei, o lea ua sii le tau o le soifuaga i auunaga nei e fai nei ma le tau o le penisini ma le tau o le eletise ma le tau o le suavai. O ai la na faia nei mea? Na fai e le Malo. O le mea lena e fia faasao ma fia faamalalama.

**FOFOGA FETALAI:** Tulai mai lau Afioga i le Palemia.

**Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI:** Lau Afioga, o le tulaga lena. A silasila i ai i le tau, i le siitaga, o isi siitaga e ono tausaga e le i siia, ae ua leva ona sii mai tau mai fafo. Se sa faapea na lava le taimi na tatou mafuta ai, ua tataua ona e malamalama i mea ia? Alaala i lalo. O le tele o tau lea e i ai nei, o le faalavelave lea, tasi lea mea e faitioina ai foi le aufaigaluega a le Malo, o le alu i luga o tau o mea a o la e lava e nofonofo. O isi mea ua tai 6, 7, 8, 9, 10 tausaga faatoa toe sii. O le tulaga la lena o lea e mafua ai ona avatu le tau ae sau le faitio ona ua tuai tele ona faatulaga le tau e tataua ona i ai. O le tulaga lena, e oo foi i le tau o telefoni.

O le isi mea na taumafai i ai lo tatou Malo, o le faaoga.....

**Afioga Hon Palusalue Faapo II:** Lau Afioga i le Fofoga Fetalai, leaga o lea o le a see ese le Afioga i le Palemia.....

**FOFOGA FETALAI:** Ou te avatua le avanoa lau Afioga i le Taitai o le Itu Agai, e lelei lava le saausi, leaga e fefelegelei. Taatia pea se i faausi le saunoaga ona avatu lea o le avanoa. E laufelegele.

**Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI:** O le faaoga o mea nei o tauvaga, a fai tauvaga, o le tauvaga lea e uunai ai i lalo tau. O le tausaga e 1984 na fai ai le faaiuga o le a faatauva le supply o penisini. E fa kamupani suauu sa i ai i inei, ona o se mea uiga ese lena mea ona o le tulaga faigata o le tulaga tau tupe na i ai. Na fai loa lea o le faasalalaua, fai mai isi, a faapefea ona fai lena tauvaga? Ona o le tala, o la e fai le tauvaga e pei o le tauvaga a sui usufono, a tauva tauva a sao mai i totonu, e lima tausaga e nofonofo ai, a sese i lava le itumalo i le latou sui usufono, sese i pea. E lima tausaga o le tauvaga, e faaoga le tau. Ona fai loa lea o le tauvaga, e tasi le tausaga. O le Mobil sa tataua ona malo, le kamupani a Mobil. Aisea? Aua foi na o le Mobil o lea latou te aumaia le suauu tele mai fafo, ona tafana lea i lalo e pamu mai lalo, e i ai latou pamu lea e taoto i lalo, e 50 futu le maualalo i lalo ifo o pole la e taatitia i tai, sa tai masina ma ou alu ou te moulu i lalo e vaai. O le mea lena e leai se tou tomai i mea tau moulu. Ona pamu mai loa lea o le penisini i uta. Ua oo loa la i le taimi e faatauva ai, ua iloa uma lava e isi kamupani, o le British Petroleum, e i ai isi kamupani e tolu na i ai. O la e la e iloa uma lava e latou le tau a le British Petroleum aua e sapalai mai a latou penisini mai le Mobil. O lea la ua latou iloa tau. E tapuni ifo le tender, ua faaina le kamupani a

Mobil i isi kamupani e fa lea i totonu o Samoa. Ia ona taaifala ai loa lea o kamupani nei toe o i fafo ae sapalai e le tasi lea le tatou penisini. Na oso ane lea o le pule ma talanoa, ou fai atu, e faapefea ona outou... maualalo faavalevalea le tou tau? Fai mai le tala a le alii lea, vaai, a fonu nei le matou kamupani, e le taua i e ana le kamupani le pau i lalo o le matou tupe maua, ae faataua ia latou atunuu ia e i ai. A alu atu nei la le mea ua leai Samoa, tailo pe tutuli uma lava matou i ina. O lea la ua matou tender ai. E te iloa o le tele ia o le matou gau lea matou te gau ai ia Samoa? A faapefea la ona kava lenei gau? Fai mai, aua tou te popole, na ona faapasi mai lava o le faatau i Papua Niu Kini faasikuea ai le mea, ona le iloa loa lea, o la e faapea lava shareholders ai na maua se polofiti ii, ae gau. Ona oo mai loa lea i le 1984, leai loa se faasalalaua, toe omai uma lava, ae le i sau la le kamupani lea. Faasolosolo faasolo mai ai lava i fafo, toe oo mai nei i le 1997 toe faasalalau, lea la e oo mai lava i le taimi lenei, o lea e alu ai lava tatou. Ia manatua o le taimi lenei, sa luga lalo ai le Palemene ina ua ou aumaia le mataupu i totonu o le Palemene. Ia, a o le a la le mea lea e tupu? Na ona omai omai o faalapotopotoga mai fafo e fia sikaki le tatou mataupu, ona na o Samoa lava lea e pito i maualalo le tau o latou penisini, pe sii ae maualalo lava le tau o penisini a Samoa na i lo atunuu uma o le Pasefika. Lau Afioga i le Fofoga Fetalai, tasi la lenei auala e faaoga e tatou, o le tauva. A o le mea lava ia o le tau o le soifuaga, o le ala lenei o lea e fai ai aiaiga nei a le tatou Malo, e uunai a tatou atinae eseese, o atinae o manupapalagi, o mamoe, o moa... O le a le mea o le a e alu ai fua e faatau mai ni moa pe afai e lava lau lafumo? Atinae o talo; afai lava la e te fia tausami oe i araisa a tagata mai fafo ma alu ai au tupe, o oe lava. E le i fai atu se isi e te alu e te ai araisa. O lea lava e i ai meaai a Samoa, o taumafa Samoa e mafai ona tausami, ona leai lea o se tupe e alu. A o le oi faapea mai o le tau o le soifuaga, lau Afioga i le Fofoga Fetalai, o auala uma lava nei e fai e le Malo, o auala e fai ina ia taofiofi ai le sii i luga o le tau o le soifuaga, ae leai se isi na te taofia. O le tala, afai lava e sau sau ona oso lea i luga le tau o araisa a Ausetalia ma araisa a Saina, ona alu lava lea i luga. E i ai le taimi na oo ai i le \$100 le tau o le taga araisa i fafo i le tausaga lea na tea nei. Ia na alu alu lava ua tele foi le araisa i fafo, ona toe tifato foi lea i lalo i le tulaga o tau talu ai nei. O lea la ou te fai atu, soia tou te toe aumaia lenei mataupu, e leai lava se tagata na te mafai ona taofiofia le tau o le soifuaga, a o tatou faiga ia e fai nei, o faiga na ina ia maua ai se manavaga ma mafai e o tatou tagata ona foia aafiaga o lo o feagai ma i tatou ona o tau mai fafo.

Lau Afioga i le Fofoga Fetalai, o le itu lea sa ou maua i le itu lea i le maketi ma le faalala o tagata.

**Afioga Hon Palusalua Faapo II:** Lau Afioga i le Fofoga Fetalai, e le o lota avanoa lea o lea ua malolo le Afioga i le Palemia?

**FOFOGA FETALAI:** Malie le Taitai o le Itu Agai, silasila foi i le taeao, ua fa nei aso o fai a outou saunoaga. O lea faatoa amata le tali a le Malo. Afai nei ae tatou fesoosootai faapea, o lona uiga o le a toe foi i tua le tatou Fonu. A uma loa ona saunoa malamalama le Afioga i le Palemia, ona ou tuuina atu lea o le avanoa i mea ia e te atugalua i ai i mea ia ua avatu.

Tulai mai lau Afioga i le Palemia.

**Susuga Hon TUILAEPFA FATIALOFA LUPESOLIAI AIONO NEIOTI**

**SAILELE MALIELEGAOI:** O le masina lenei, o le a fai ai loa le iuga faaiu mo le filifilia loa o latou o le a feagai ma le fausia o le maketi. E pei lava ona silafia o lea ua toe fetuunai le tau ona o nisi manatu ua tupu ae i le Kapeneta ma le tulaga e mafai ona fausia ai taiala uma lava, o taiala na ua 300% le manaia o le maketi pe a uma. A o le upu lea faapea ua faalala, ou te le iloa pe ua lima nei vaiaso na ou fautuaina ai le Pule, o e faatu ni tapoleni. E fa lelei aso e le ai se isi e nofo ai i fale tapoleni na i le isi itu auala, a o la e faalala lava i tafatafa o le auala. Aisea? Aua foi e atamamai foi tatou tagata faifaatoaga. O le a le mea o le a soona alu mamao ai a o le mea lea e tupu, o le isi na o le tu lava o le taavale tago i le tupe aapa atu lava i lalo avatu le \$30 lea ae aumai le tautalo lena. A e soona alu la i tua ma e eva i lalo o le paolo, e leai sau mea e maua. E atamamai tele o tatou tagata i tua. A o mea ia e faasalalau mai, o mea uma lava a le aufainusipepa e nonofo nonofo lava i tua ua leai ni mea e tusi, tusi. Nofo nofo ua leai ni mea e tusi, tusi. A o tatou lea tatou te vaavaai i aga a tagata. O le mea moni lena, e nonofo lava latou i fafo po o le la po o le timu, e nonofo ai lava i ina. Aisea? E faataua le taulia o le mea lea. Ia o le a lau paupau e maua i lou alu e nofo i le paolo, alu le vaiaso atoa e le taulia talu ai lou fia paolo?

Lau Afioga i le Fofoga Fetalai, o le tulaga lena. O le mea ou te ofo ai, o le tusi o nei mau tala, a o lea tatou te vaavaai i mea o lea e tutupu i le olaga. E le mafai ona pepelo e le isi le isi. A faapefea ona pepelo o lea tatou te vaai i ai? Lau Afioga i le Fofoga Fetalai, o le tulaga lena. Ia, se i ou malolo ae tulai maia alii na o lou manavanava mai i ina e amata le tatou galuega, ae faaiu mai ia te au. O nisi mea o totoe, ia ona ou salusalua atu lea ma faaiu ai le tatou galuega. Ae toe momoli atu lau faamalo ia te outou uma lava sa sausaunoa. A outou silasila mai, e leai se mea ou te le i faamaumuina, o lea ua ou faamaumuina uma lava i i, e fai ma ou vaavaai i ai i outou finagalo faalia. Ia manuia le tatou Fono.

**FOFOGA FETALAI:** Malo faafetai i le saunoaga malamalama a lau Afioga i le Palemia. O lea ua maua le laolao lau Afioga i le Taitai o le Itu Agai, se i alaala ane lava i lalo se i fai atu le faaupuga lea ina ne i te i ua alu i luma ma alu i tua le tatou Fono. O lea lava e tuu atu le avanoa i le taimi talafeagai ina ia aua ne i afaafa le faamalamalama a le Malo a ia manino ma malamalama le auga o lo outou atugaluga. O le mea lea ia faapuupu mai.

**Afioga Hon Palusalua Faapo II:** Lau Afioga ua ou pulea lou loto, o le a taatia lau faauilavea ona ou te ava atu i lau Afioga, a o lea foi e tuu i lou mafaufau saunoaga a le Afioga i le Palemia, e pei foi ona anapo na tulituliaupu ai i le saunoaga a le Sui Taitai, e ui o lea o le a ou pulea lou loto o le a ou malolo ia ua pasi le taimi.

**FOFOGA FETALAI:** O lau Afioga lava ma lou finagalo a o lea ou te taumafai e faataatia i le agatonu la tatou galuega ia aua ne i feifofoiai a o lea na ou avatua le avanoa, ae a faapea o lou finagalo lea o le a tatou faapena ona fai.

**Afioga Hon Palusalua Faapo II:** Ia silasila la, o le saunoaga a le Afioga i le Palemia lea ou te faalogo o lea e tusi i lalo i i, e le siitia e le Malo le tau o

le soifuaga e pei foi o anapo lea na finau ai. E faapefea la ona le siitia o le Malo lea e siitia le tau o le soifuaga.

**FOFOGA FETALAI:** O lea o le a toe faamalamalama atu le tulaga lea e te atugalu ai. Tulai mail au Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoui:** Ua ou manatu o lea e faafogafoga mai e leai lava se isi e mafai ona tuua i lalo le tau o le soifuaga, o upu na. Na o le pau lava le mea e mafai ona fai e le Malo, o le fai o faiga faavae e taofiofi ai le soona televave i luga o le tau o le soifuaga. O upu na Au, a o upu a le Taitai o le Itu Agai la na aumai i le Taitai o le Itu Agai lava ia.

**FOFOGA FETALAI:** Faafetai, o le ala lea lau Afioga i le Taitai o le Itu Agai, ta te musu e taalo i le lua taaloga lea e tau fai atu ae a ou faamalamalamaina atu foi ona e atugalu lea. Ia vaai o lea e manino i le faafogafoga a le Fofoga Fetalai, very clear, ae na ona fautua atu pea i lau Afioga i le Taitai o le Itu Agai ina ia sologa lelei le tatou galuega. E ui o lea ua malamalama le folasaga a le Afioga i le Palemia ma ua talia gofie e le Taitai o le Itu Agai.

Tulai maia lau Afioga i le sao fetalai, o paia o lou aiga faalagilagi, o sa ma faiga, alo i ou faiva ia manaia.

**Afioga Hon SALA FATA RISATI PINATI (Minisita mo Leoleo ma Falepuipui):** Faafetai i lau Afioga i le Fofoga Fetalai ua sau foi le fia moe, taatia ia mea aua a umi foi ua faapea... e faatulou atu ai. Out e manatu mo le faasaoina o le taimi leaga ua vela foi le fala i le tapuaiga ma ua faaaa gagase foi le aiga Minisita faapea lau Afioga i le Palemia ma Minisita Lagolago, ia lea itu o le vai i le mamalu o le Taitai o le Itu Agai, Sui Taitai ma sui usufono mamalu o le Palemene o Samoa.

E faapea foi i Ofisa Sili o Pulega a Matagaluega ma Faalapotopotoga a le Malo, o lau le oo lava i sa ma faigata o Samoa, e faigata o le 'ia e iviivia, e leai se potu e mafai ona autalatalaina, e sui pe toe faaopopo ona paia.

Ou te manatu o lenei taimi o le a tuutuu loa se faamatalaga talu ai o le naunau lava ina ia faasao le taimi ona ua alu le aso o faapea ona tatou fetufaai, a o le tulaga foi faa-Fono o le saolotoga e fai ai. E i ai lau uo na ou fesili i ai, se faamolemole lava ua ta le fia i lau taimi, ae tali le tamaloa, "time, sometimes slow, sometimes hurry up. O le agaga ma le uiga o le faamatalaga, ua umi naua felafolafoaiga ua ala ai ona slow le time ae a faatelevave foi le taimi e fua ia matou lauga tali. O lona uiga la e sao ai le tala a le tamaloa, "sometimes slow sometimes hurry up," o uiga na o le aso lenei. E momoli atu lou agaga faafetai i le faatofalaiga, tofa faatupu, o uiga lava nei o le Fono a Samoa e tapuaia lava faiva o outou o tamalii, o fetuao, o fetu taua o le atunuu ua uma ona tofia outou.

O le lauga a nisi o sui usufono sa taua ai e toalima lava sui usufono sa afea lenei Matagaluega. O le Matagaluega foi lenei o Leoleo, Falepuipui ma Tinei Mu, e i ai lava le mau out e nofo ma au ma o le agaga foi lea out e taumafai ai ina ia still e momoli le feau i le Malu o le Malo ina ia matou auauna atu i le atunuu. O le agaga ina ia faatino i le faamaoni ma le atoatoa e fai ai o matou tiute e tusa ma la matou tautoga. E i ai lava le isi talitonuga out e le auai ai

lou manatu, o le auauna mai o le atunuu ia matou nei, aua e sili lo matou tautua e le manao na i lo le tautua manao, o mafuaaga nei. A tofia matou i o matou tiute e faatino e tatau ona faatino ma le atoatoa. O le ala foi lea e avatu ai se tuualalo i le atunuu faapea sui usufono o le Palemene o Samoa. O a foi ni faaletonu e maitauina e faapea ona le uia e le Malu o le Malo, o lo o i ai le Tulafono e limataitaiina ai ina ia aua nei soli le tulafono. Po o le Leoleo, po o ai lava ia o lena, o le Tulafono ia e usitaia ma ia e mulimulitai ai. O le agaga lea o le Tulafono, o le Tulafono foi na fai e puipuia ain a i o tatou tagata.

Na tatalo mai le sui usufono mo Aiga i le Tai i ni taavale le auaunaga i Faleolo. E leai leai se mea e mafai pe afai e le lava ni tupe. Ae talu ai ona ua faamanuia le Matagaluega i le tele o le mau fesoasoani mai Ausetalia, o lea ua faamaonia ai le Matagaluega o Leoleo e tusa ma le 9 taavale afi fou, masalo o ananafi po o le aso na aumai a ii tua taavale afi e ono mai le meaaloa a Ausetalai, atoa ai ma loli ua uma ona pasia e tolu, o le loli tele pe a lona tau e \$165,000 mo Tafaiagata, a o isi loli e lua e \$80,000 mo Vaiaata ma Olomanu. O le agaga lea e aumai, maimau pe ana faapea e tele ni tupe, a na faapea o au o se money man foi lele, ou te milionea e le tau tag ii le Malo ae out e faia uma lava, e tofiu lava le Leoleo ma le taavale a o le faaletonu o le faatautala o isi Malu o le Malo. O uiga ia o le soifuaga afai o lo o faafofoga ma ii latou o feoi i taavale afi a le Malo aemaise o taavale o lo o faasino tonu i lenei Matagaluega faamolemole ia fai fuafua, o mean a o mea a le atunuu, o aseta a le atunuu.

E pei foi ona saunoa ai se tasi o sui usufono o lea itu o le Malu, alofa i le atunuu a lea, o le tali lea. E le o le Malo le pogai, o le pogai o le tagata faigaluega. O i le faapogai o le mea ua mafua ai ona tele le tupe alu a le Malo ona e leaga o tatou tagata, e le faamaoni. Fai mai le mau ma o lau mau foi lea, se a e lelei lava ma ii lou aiga e te sau foi i le mea e te faigaluega ma e tautua ai e lelei uma lava mea uma mai lava i le lotoifale e te sau ai. Afai – o le a fai atu lau tala e uiga i le fai faatoaga, afai lava o le faifaatoaga lea na tupu mai i lona tuputupu ae o faifaatoaga e le o ii le tau o le soifuaga., aisea? Aua foi a e alu atu ma au taga talo e lima ae \$150 le tau o le tagata e tasi, e \$750 lau tupe i le aso e tasi. Ia se i fesili la po o le a le rate lea e alu ai totogi o o tatou tagata. A labour e laki pe a maua se \$100 e maua i le vaiaso, a o sina taimi puupuu lava e maua ai e le faifaatoaga lenei tupe, out e manatua ai se saunoaga a se tasi o tamalii, e leai se mea e tau o se taugata o le soifuaga. Ona ou fesili lea i ai pe aisea? A tautagata o lena e tuu mai koko, talo ma fai, a e fia ai vaai ni lafumo, fai ni au puua o mea ia e tausi ai le soifua o le Samoa.

Ou te molimau atu ona ua ou tofo i a ii le suamali o faatoaga tetele e fai, na faatigaina au e lou tama i le tele o palota e alu ai le toeaina e fai la ivi ma Tupuola Efi ioe, a o au lenei e tigaina e alu e fai le faatoaga. A maua mai talo aua o le tele o talo e ave e fai ai container ma ave i Niu Sila, se i tulou lava ua ou pepelo, o tala moni ia ou te tautala ai. O na mea uma e sau le tupe i isi talo mai Niu Sila o la lava e faulalai isi tupe e le i uma ona faaaga a o le matou aiga e toatele. Ia vaai i le alofa o le Atua, out e manatua ai le tala a le faifeau o Sili na ia faapea mai ai ia te au, Lisati, a e matua ae lava sau seleni, ia tautuana ia faaaga ia popoto lau fanau. O au talo, taamu, ma au fain a e alu atu le gaioi ta ona maimau lea o le afu, ae a oo ina fua mai le atamai o le ua e ave i ai le faamuamua ma toaga e faaaga e le mafai e se isi ona gaioi lona mafaufau. E moni lelei, tautuana ma tatou ae leai e sa ia te au ona ou aoai lo outou paia, ae out e talanoa au o au.

O le tulaga e pei ona i ai lenei aso i lau maitau, faafetai i le alofa o le Atua ia Samoa, a ou tilotilo i fafo atu o le Maota lenei, e te vaai atu i le mauga la le e taatia mai le Tuasivi ma...a o i lea ese le malu ma matagofie mea uma, ae a Saina? E te le maua le ituaiga saolotoga ma le filemu ma le mama lea, aua e tele le smoke e oo lava i le la e mafai ona pupula ai i le la i le taimi lenei i Saina pe a faapea o la e i ai se malaga e alu, e alu atu e...foi lele pei e lanusamasama vaivai, ia a o i ia tatou, e maeu lava le alofa o le Atua. O le tatou matafaioi lea fetufaai, fefaasoai, aumai avatu e maua ai ia lagona lelei e faatupu ae le tamaoiga o Samoa. O lau mau lea na fai nei talu mai ona ou nofo mai i alii malu o le Malo, ia toto talo, taamu, fai so o se ituaiga mea, ia fai ia lava a pala pala, a ia aua le fiaai, a tele se talo ma mea e faasao mai ona ave lea i fafo, o le tupe e maua mai, o lena le vaegatupe e faasoosoa aua le fofoga taumafa o le aiga toe fuatai. Ae paga lea, ia o le mala faalenatura lava lea ua oso Eveni ia faaletonu uma ai mea sa fuafuaina. A o le agalelei o le Atua, o lea e maua mea e tausi ai.

Na saunoa le sui usufono mo Faasaleleaga Nu.3 e tusa ai ma foliga ua le talafeagai le nofoaga i Savaii le mea o lo o i ai ia le compound a le Malo i Tuasivi i maota foi o lo o fai ai faamasinoga i leoleo faapea foi ma falemai, ma e momoli ia le agaga faafetai i le Komesina o Leoleo atoa foi ma ana lagolago, o le taimi lava lea na saunoa ai ia le tofi ou tali atu o nei e fai ae le galuega ae ou maua nei le faamatalaga na faatino lava ananafi, o ananafi lava na fai ai le galuega, o lea foi ua toe faatino nei le galuega lea. Afai o lea e faafofoga mai le Public Works ia sei tulou lava lou uso a Minisita o lo o faafoeina, a o i ai e o i latou i Savaii o i latou na e ana le fanua e tausi foi e latou le fanua, ae peitai ane ia o le mea lava foi lele ua masani ai tatou, e vaavaai vale po o ai se isi a tu atu e fai le galuega lea, ia e le afaina o lea o lo o i ai pea le malosiaga e fuafua e le Atua mea lelei aua lava le alualu i luma o le taumafaiga o le tatou sa, o le sa o ai? O le sa o Samoa.

Ona oo mai ai lea i le sui usufono mo Falelatai ma Samatau, o le sui usufono o se tasi foi o tamalii ua lauiloa foi ese le tamalii foi, a lalafo mai foi ese le manaia, ioe, ua ta fia faia foi ni mea lelei mo le sui usufono mo Falelatai ma Samatau. O le talosaga i le auala lea i Oloamanu, o le auala lea e tau i le auala foi lea sa nonofo ai tamaiti i mlalo ifo o le 20 tausaga, o lea na aumai ai le talosaga, ia na ona taatia atu lava i le Afioga i le Minisita, o le a lava se mea e totoe i le faasoia, ia e talia ma le faafetai.

Ona oo mai lea i Lalomanu, o le nuu lea o Lalomanu na ou tau maua le tala o i e faasinotonu i ai le Komesina o Leoleo, ona ou manatu lea atonu o le ala lea e ala ai ona le faia ia le post lea pei o le tulaga pei ona moomia ona e i ai le talitonuga foi lele ma e faapea le Komesina, a ou nofo nei e fai ia i, ae faapefea ia isi itumalo, e lelei ia te au lou mativa, mativa fesagai ma i latou ia e ana ia i i i le itumalo o ia, nai lo le fau o ma lelei mo i latou, ae a isi itumalo o lo o faapea ona tatali mai le faasoia.

O le Itupa i Luga o lea ua maua le...

**FOFOGA FETALAI:** Malie lau Afioga i le Minisita, sei tuu atu le avanoa leaga o le sui usufono tonu lea na laga mai le mataupu, tulai mai le sui usufono mamalu.

**Tofa Fagaaivalu Kenrick Samu (Aleipata Itupa i Luga):** Lau Afioga i le Fofoga Fetalai, e leai foi se agaga o lenei tootoo e faalavelaveina le saunoaga



matagofie a le Minisita mo Leoleo, Falepuipui ma Tinei Mu, pau o lea pei e foliga mai o le mafuaaga ua le faia ai ia le Ofisa o Leoleo i Lalomanu ona e i ai se piitaga o le Komesina o Leoleo ia ma le afioaga nei, ae pei o le agaga maualuga lava i lou nei sui usufono ia le soifua maloloina lelei o e o lo o faatinoina ia le auunaga i lea foi tala o le atunuu, aua o le mea lelei iinei i Apia, o le mea lelei foi lea mo matou i tua, ma lou faaaloalo lava, faafetai.

**FOFOGA FETALAI:** Ia tulai mai le Minisita e faaauau le saunoaga.

**Afioga Hon SALA FATA LISATI PINATI:** A la lea ua maua le au o le paipa, o le agaga tonu lea na ou manao ia aumai sao lava e le tofi ia le tala lea, o le mea e lelei mo Apia nei, e lelei mo tua. O lea afai o faafofoga mai le Komesina, ia e tatala le avanoa e fai se fale fogalua i tua i Lalomanu a e manaomia ni taavale se tolu, e maua.

Ona faamuta atu ai lea o se faamatalaga a lou nei sui usufono, lou itumalo malo mo le tapuaiga, o le fautuaga a lou itumalo na aumai ia te au e faapea, sau e alu e sue so tatou i totonu o le Faigamalo ae ia e manatua Sala, aua nei e saili po o le a se mea e fai mai e le Malo ia te oe, ae ia e manatua, o le a se mea silisili e te faia mo le tatou Malo, ia o le tala lea faafetai.

**FOFOGA FETALAI:** Malo, faafetai saunoa i lau Afioga i le sao fetalai lau Afioga Sala, e manatu ua tali uma lagona ma finagalo sa tuuina atu e sui usufono mamalu na afea ai le tatou Matagaluega, malo, malo le tali faatamalii, faafetai foi i le tali atoatoa na tuuina mai mo atugaluga na tuuina atu e sui usufono.

Ua tatou oo mai i le Minisita mo Galuega, Felauaiga ma Atinae Eeseese o le atunuu i lau afioga i le Tiakono Toeaina lau Afioga i le aiga sa-Tunumafono, ia o le Aiga tutasi e malosi ia Samoa ma le paia maualuga o le Matagaluega, tulai mai o lea ua oo i le taimi o le tatou Matagaluega e tali atu.

Tulai mai lau Afioga i le Minisita mo Galuega, Felauaiga ma Atinae Eeseese.

**Afioga Hon MANUALESAGALALA ENOKATI POSALA:** Faafetai i lau Afioga i le Fofoga Fetalai mo le avanoa. E manatu o lea ua tai...malama, ua gagaifo foi le la o lenei aso, ua tuliliva foi foe a le tautai aua ua tau mai nuu mau saaga o pasina o le talalelei, pei o le fetalaiga nai le fatiuga nai le vasaloloa, ua osaosa foi augutu o pupu o Salafai ua mafai ona tatou toa mai i lenei vaega o le tatou Fonotaga a le Palemene. Afio lau Afioga i le Fofoga Fetalai aemaise e mai mauga le paia maualuga i le afio o le Afioga i le Palemia le taitai o le Malo le Kapeneta, le afio o le Afioga i le Taitai o le Itu Agai mamalu eeseese o sui usufono mamalu o le Palemene na fai'a mai le fuifui, aemaise foi o le ofisa o le Fono Aoao, aemaise o le maualuga o faaululuga o Matagaluega ma Faalapotopotoga a le Malo o lagolagosua ma tatou mafuta.

E le faagaloina foi Afia isi ona vao i le tapuaiga a Samoa o lo o faafogafoga mai, Tafatolu o Faigamalo aemaise o le loaloa o le atunuu o le a le oo i ai sa matou faamatalaga o paia lava e taoto ae o se ala ua uma ona aisa. O le manatu ia e nuunuu atu faatini o tausala e faigata o le tauisa o upu popo ma upu pau ma upu taoto e faufau i luga faafogatia liligo paia o le atunuu, o tama ma tina aemaise foi o le malosi seia oo lava i fanau.

O lau molimau i le tala o le Samoa Laalaa, o le upu moni ua galo ia tatou sa afaina Samoa i le Afa o Evan. Aisea? Faafetai i le Atua i le fesoasoani mai ua mafai ai ona faatino e le Malo galuega ua galo ai ia tatou, e tele aafiaga sa i ai lo tatou atunuu i le faaiuga o le tausaga amataga o le tausaga nei, ae ua tuanai atu le lima masina ua tatou vaaia le matalasi ma le matagofie aemaise o recovery works sa faatino e so o se matavai a le Malo ina ia faaleleia lo tatou atunuu. Atonu o le ala lea ua galo uma ai ia vaega ae ua tatou tilotilo i le isi tulaga.

E amata mai la lau tautalaga i le Pulega o Felauaiga i le Laueleele. Ou te manatu o le tasi lea molimau aua o mea na afaina ae ua mafai ona faaleleia i se tulaga maualuga, na afaina ai tatou ae ua siitia le faaleleia o auala. Ina ua tuanai le Afa o Eveni e tele vaega o le atunuu sa afatia, e le gata i lea o lologa na afaina ai o lo o faatino ai auala pei o le auala lea o le Cross Island Road agai i Tiavi fesoatai atu e tau i Siumu ma Falealili. O galuega ia o lo o mafai ona faatino i le taimi nei, o lo o faaauau foi galuega mai Siumu seia paia Tafitoala Safata, e le gata i lea o galuega i le itu Fagaloa o Taelefaga seia paia Salimu, sa motusia ma faaleagaina ae ua mafai ona faatinoina, e le taugofie ia galuega e silia ma le \$15miliona o lo o faatino ai galuega ia sa afaina i le Afa. Ae o lo o faaauau lava le auaunaga masani i tulaga i galuega o le faaleleia o auala ma tulaga uma o i ai, e molimau auala ia i Tiavi, ia ua tele le suiga ua i ai, ma o lo o fai fuafua foi i nai vaega sa faaleagaina ona o le fua lava e le taugofie, o paipa la ma mea o lo o faaogaina ia sa masani e le tele ni magavai e faaleagaina ai le auala i lea vaega, peitai ane, ia sa tatou molimauina i le taimi o le Afa, e tele le afaina, o vaega uma ia ua faaleleia e i ai foi suiga ma laasaga ua siitia ai le faatinoga o galuega, ua taumafai lava ina ia mautu mo se taimi talafeagai.

O le taimi nei o lo o faatino auala laupapa, pei o le auala laupapa i Togafuafua ia ua lata nei ina faamaeaina. O le auala laupapa i Vaimoso o lo o faamaeaina i le taimi nei. E tele foi auala sima po o auala laupapa sa oia i le taimi o lologa na tuanai atu nei, o lo o i ai fuafuaga, o lo o faatalatalanoa foi ma le Faletupe o le Lalolagi e aumai latou fesoasoani i tatou atinae. Aua ua latou molimauina o le agai o latou fesoasoani ma le siitia o le tulaga o i ai auala tetele i totonu o Samoa. O lo o i ai foi le polokalame o lo o faatalatalanoa i le toe faaopoopo lea o le tatou auala four lanes lea e alu atu i Vaitele St seia paia Vaitele e tuaoi ma Toamua. O lo o i ai ma le fuafuaga mo le auala laupapa lea i Leone o lo o tulaga faaletonu i le taimi lenei. E tele tapenaga ma vaega eseese e tilotilo i ai ona mafai lea ona aumai fesoasoani o galuega ia e aumai ai le fesoasoani a le Faletupe o le Lalolagi mo tatou atinae. O lo o i ai foi le fuafuaga mo le auala laupapa i Maliolio, o lo o i ai vaega e fa o lo o fuafua mo fesoasoani e tuuina mai o lalo o le vaega o emergency o lo o fuafua ai tulaga ia. E faatasi ai ma le auala i Falealili St i Tanugamanono seia paia Vauala, tasi lena vaega e tele se suiga o le a taumafai e faatino ai ia galuega. E pei o tulaga ma fuafuaga na. O auala laupapa foi e pei ona saunua Faasaleleaga Nu.3, leai o le uiga na ou taua i le taimi ua tuanai o auala o lo o fuafua o le auala laupapa i Sapapalii o le auala laupapa i Lano, le auala laupapa i Maliolio faatasi ai ma le auala laupapa i Sasina, o auala ia o lo o agai i ai polokalame. O lea ua maua le avanoa e ave le faamuamua i le auala lea i Maliolio ona o le tulaga sa tele soifua na maimau ai ao auala uma ia o lo o fuafua i ai le polokalame a le Malo mo le faaleleia.

**FOFOGA FETALAI:** Malie lau Afioga i le Minisita sei tuu atu le avanoa i le sui usufono mamalu mo Falealupo.

Tulai mai le sui usufono mamalu.

**Afioga Hon Aeau Peniamina Leavaiseeta:** Faafetai tele lava i le faasologa o le au fia ola uma lea e te saunoa i ai le atunuu. Faamolemole nei misi le matou faalogo ae sei toe fai mai lava sau saunoaga i le auala laupapa lea i Maluafou ona ua aafia le toatele o tagata. O le tausaga nei po o le tausaga lea faamolemole lau Afioga i le Minisita? Sei faafofoga mai le lalolagi lea ua afaina ona o le auala laupapa faamolemole.

**FOFOGA FETALAI:** Ia o le ava tele i le sui usufono ae lei saunoa le sui usufono mo Falealupo i le auala laupapa lea. E ui i lea lau Afioga i le Minisita ae tali maia leaga o le aafia o le taulaga atoa.

**Afioga Hon MANUALESAGALALA ENOKATI POSALA:** E popole ona o le tatou Tulafono Tumau nei tei ua soli ese isi ao le lagona o le auala laupapa lea sa asia mai e le Faletupe o le Lalolagi lea ua i ai le faamoemoe po o se vaitau o Setema e fai ai le fonu a le Board ma tuuina i totonu e vave ai ona faatino. O lea foi e aumai agaga o le Faletupe o le Lalolagi e latou te faatinoina i se tulaga fesoasoani mai ai i le tatou atunuu. Ou te iloa foi o la e i ai lava isi magaala e mafai ona fesootea mo le taimi nei ae lafo mai o lea ae tau vaavaai le Malo ma le Pulega i se auala e faatino ai le tatou auala laupapa lea.

Ona ou oo lea i le tulaga sa laga e sui usufono mamalu. O auala galue, ou te manatu o lea ua taoto mai toetiti leai se sui usufono e lagalaga ma tuuina mai talosaga i tatou auala galue. O auala galue lea sa alu le isi vaega i Savaii ua maea ona tatalaina. O lo o i ai foi auala galue o lo o faatino i Upolu nei e lei faamaeaina. O lea foi ua faasalalau nisi o auala i Savaii e lima, e lima foi auala i Upolu nei e i ai le faamoemoe e tataua ona tatala tauofoga i le vaiaso fou ma fuafua ai le faiga o valuations ma iloa ai kamupani ma konekarate latou te faia ia galuega. Ae pei ona ou fai atu e tele lava se fuafuaga sa polokalame i ai ae ua momoe ma manu e le fati ae sau le afa o Evani ua tele ai nisi o seleni ua alu ai ae ua le faatino ai le fuafuaga sa i ai e faatino tatou auala galue i se taimi vave. O le tulaga i auala galue, o le matou fautuaga a maea ona fausia o le galuega lea fai faatasi ma alii ma faipule o afioaga taitasi ina ia taumafai e faamama tatou auala nei. O le tasi lena o faafitaulu ua molimauina, tolu i le fa tausaga ua ola le vao i le alavai ona le mafai ai lea ona tafe le vai i le alavai a ua faaleagaina ai tatou auala galue. O lona uiga ia taumafai pulega a alii ma faipule o afioaga taitasi e fai so latou sao ia galulue faatasi ma le Malo ina ia umi ona faaleleia ia auala a le Malo mo le agai atu i faatoaga ma atinae eseese.

O taligalu lea foi ua faamauina.....

**FOFOGA FETALAI:** Malie lau Afioga i le Minisita sei toe tuu atu le avanoa i le sui usufono mamalu mo Falealupo.

**Afioga Hon Aeau Peniamina Leavaiseeta:** O auala galue, e i ai se tou polokalame mo Savaii mo se faataitaiga o Savaii e taitolu pe taifitu masina

ma o atu se tou polokalame ina ia tapena mai ai nuu leaga o le decoarations o Falealupo e ono auala galue e matou te sauna mai ai?

**FOFOGA FETALAI:** O lea ua maua ae tulai mai le Afioga i le Minisita mo Galuega.

Malie lau Afioga i le Minisita mo le faasaoina o lou taimi sei tuu atu le avanoa i le sui usufono mamalu mo Faleata Sasae.

**Tofa Aveau Tuala Lepale Niko Palamo:** Faafetai i lau Afioga i le Fofoga Fetalai mo le avanoa ona o lea o le a see ese le Afioga i le Minisita ma auala galue ae na ou talosaga atu lau Afioga i le Minisita mo Galuega, Fealauaiga ma Atinae Eseeese sei tagai ane i le auala lea e alu i le vilimaa o le auala galue ao le toatele o tagata o le itumalo e ui ai i i ae pei foi ona ou taua e matua le sao ai lava se pasi. O nai tamaiti aoga uma lava ma tagata o lenei vaega e savavali uma mai lava i Alafua e faatali ai le pasi. Na ona faataatia atu i lau Afioga i le Minisita.

**FOFOGA FETALAI:** Malo o lea ua maua le finagalo o le sui usufono mamalu sa laga i lana lauga.

Tulai mai lau Afioga i le Minisita mo Galuega, Felauaiga ma Atinae Eseeese e faaauau lau saunoaga.

Malie lava lau Afioga i le Minisita mo le faasaoina o lou taimi sei tuu atu le avanoa i le sui usufono mo Falelatai ma Samatau.

**Afioga Taefu Lemi (Falelatai ma Samatau):** I le vaega lava lea o auala galue, ua ou tulai atu ma le faaaloalo e momoli le faafetai i le Afioga i le Minisita ua maua e lima auala ia ua faasalalauina mo Upolu lea ua lavea ai ma le auala o lenei itumalo e momoli atu ai le agaga faafetai.

**FOFOGA FETALAI:** Malie lava lau Afioga i le Minisita mo Galuega, Felauaiga ma Atinae Eseeese sei faamaea atu lava ona tasi ai lea o le taimi e te tali ai.

Tulai mai le sui usufono mo Aana Alofi Nu.3.

**Afioga Toeolesulusulu Cedric Pose Salesa Schuster (Aana Alofi Nu.3):** Faafetai i lau Afioga i le Fofoga Fetalai, na ona tuu atu lava i ou tafatafa o le Afioga i le Minisita le auala o Satuimalufilufi e pei ona ou taua o lea auala e le o se auala galue ao le auala i totonu o le aai e pei ona ou taua ua silia ma le 2/3 o le afioaga o lo o nonofo ai lea vaega ae le o se auala galue o le afioaga faamolemole.

**FOFOGA FETALAI:** Tulai maia lau Afioga i le Minisita mo Galuega e tali atu.

**Afioga Hon MANUALESAGALALA ENOKATI POSALA:** Lau Afioga i le Fofoga Fetalai o lea sa faamanino atu o talosaga lava sa tuuina mai e sui usufono mamalu lea ua faamauina o auala galue, o access roads ma so o se ituaiga auala lea ua faamauina aua polokalame ma fuafuaga a le Malo ma le Pulega.

O le saunoaga a le sui usufono mamalu mo Falealupo, tasi lea itu e lagona ai le faanoanoa aua fai o lea e tau tulituli mai e alu atu se vaaiga o auala galue, o lea e fai ma o atu e vaai po o faamama ao auala galue o lea ua tuuina atu i alii ma faipule e galulue ai ao tatou national road o la e i ai le polokalame a le lawn mowing o lo o faagasolo pea konekarate o lo o vaaia tulaga ia o iina la e alu i ai le asiasiga ao auala galue o mea na e tatau ona tagatagai i ai e pei ona talosagaina alii ma faipule ia fesoasoani mai. O le tasi lea afioaga e tele auala sa faatino e le Malo ae pei e le o lelei foi ona aumai so latou sao e fesoasoani mai. E i ai lava le faiga foi lea e faamama lava e le aiga ia lo latou lumafale, o latou fanua ma tulaga na e mafai ai ona faatino le vaega lea e fesoasoani mai ai aua e utiuti le seleni ao le tele o auala o Falealupo ua uma ona faaleleia ma vali ta muamua. Ae o le tatalo lena.

**FOFOGA FETALAI:** Tulai mai le sui usufono mo Falealupo e saunoa.

**Afioga Hon Aeau Peniamina Levaiseeta:** E maimau lava pe ana i ai ni matou ketapila ae nao le Malo e a ia o le ituaiga lena o lea ou te fai atu ai ao le faamama o la e faamama. Ae manatua la a soli, soli, tulou lava le Maotaga ma le faafofogaaga ua omoomo o iina tonu lava e manaomia ai le masini ae nao outou la e i ai le masini. Pe ua maua mai e faigofie lava, e le o se mea foi lea e.....

**FOFOGA FETALAI:** E manatu o lea ua saunoa malamalama le Minisita mo Galuega le sui usufono mamalu o le matafaioi lava a le Malo o le agai e faatino le auala i lona uluai faatinoina ae o lo o momoli mai foi le talosaga a le Matagaluega o le tatou galuega fai paaga lena i nuu ma afioaga e uma loa ona faavalita le auala ona pasi loa lea i aao o le pulenuu ma le pule mamalu a alii ma faipule e faasoasoa lona faaauauina o lona lelei atoatoa. Ou te fesoasoani atu i le Afioga i le Minisita o lea ua manino le sui usufono mo Falealupo.

**Afioga Hon MANUALESAGALALA ENOKATI POSALA:** O lea sa laga mai foi e le sui usufono mamalu o le Palota Taitoatasi le vaiti o auala. O lea ua faatino le polokalame e i ai auala e lavea i totonu o le lio o Apia o fanua ua uma ona fuaina ma umia saoloto o la ua mafai ona faataatia ai auala o la e la ua galulue e fuaina auala ia ma o latou tuaoi ina ia mafai tatai i ai le faataatiaga o auala. A silasila i le auala la e i Tiavi e ifo mai lalo i luga atu o le Bahai, ua sui le alignment o le taatiaga o le auala lena ona ua saili atu e afaina fanua o le isi aiga ae tiai le mea e faataatia ai le auala. O lea la ua agai faapena le polokalame e sue lelei tuaoi o fanua ua uma ona fuaina ina ia manino ma malamalama le taotoga o auala ona faataatia ai lea o auala. O tua i nuu i tua o la e i ai le Tulafono lea e 10mita le lautele ua uma ona faamatuu mai.

**FOFOGA FETALAI:** Malie lau Afioga i le Minisita mo Galuega, Felauaiga ma Atinae Esee, sei tuu atu le avanoa i le sui usufono mo Palota Taitoatasi.

**Afioga Maualaivao Pat Ah Him:** :Lau Afioga i le Fofoga Fetalai ua matagofie le saunoaga a le Afioga i le Minisita ou te molimau atu faafetai tele

i le agai Tiavi ona ua matagofie ia o le lipeaina o auala nei pei ua ta vaai i atunuu i fafo. E fai mautu e umi se taimi e le toe tagofia faafetai. Pau lava le mea e faamanatu atu faamolemole e te alofa ifo e i ai le auala lena e i Tiavi i le agai i tua i le atinae o lo o faaoga pei o se auala tele a le Malo o lo o i ai le atinae foi lea o le o le Lupesila Resort lea foi sa talosaga atu ai ma le agaga faaaloalo ae faamalo faafetai mo le auala i Tiavai.

**FOFOGA FETALAI:** Malo le faamanatu mai o le sui usufono mamalu.

**Afioga Hon MANUALESAGALALA ENOKATI POSALA:** O le ua faamauina le talosaga mulimuli mai a le sui usufono mamalu. O le tulaga ia sa laga mai.

O le tulaga i resitala e \$5,000 le totogi mo resitala o konekarate i galuega tetele a le Malo. O tatou major civil Works, e talitonu a fua i tupe e faatino mo ia galuega e silia i le \$20miliona tupe e faaagaga e faaalu mo nei galuega tetele, ae sau foi tauofoga – ae pei o le tilotilo e pei ona i ai le Komiti Faatonu ma le Pulega ua talafeagai le \$5,000 mo le totogi i le resitalaina o ia aoaoga ae faatino le galuega. A o le i resitalaina e o le Pulega e vaai masini, loli ma mea uma e iloa ai po o le a le ituaiga capacity o lo o i ai lea konekarate mo le faatino o le galuega. O mea uma na e pe i o lea e fua i ai le tupe lea e \$5,000, e fua i galuega tetele e le i lalo mai o le afa miliona ae agai i luga le tau o nei galuega. E tatau foi ona totogi le feoi o le Pulega i le vaaiga o le resitalaina o masini ma vaega uma lava na.

O le faasea i le aso e faagata ai le resitala, o se mea e umi lava ona faasalalau i le televise ma le leitio le aso e faagata ai le resitala, ae a faatamala lava le tagata e ova ma le masina o faasalalau ma tau i ai le avanoa aemaise lava vaitaimi masani o le amataga o le tausaga, o lena ua i ai se faasalaga lena a o le faasalaga foi ua le mafai ona toe faamauina i ni galuega mo lena tausaga atoa, a ua tuuina mai le tuualalo ma o le a silasila foi i ai le Komiti Faatonu ma le Pulega i se faiga e faamalieina ai nei vaega uma.

O le tulaga lena ia tatou auala, o lea foi ua ou manatu

**FOFOGA FETALAI:** Malie lau Afioga i le Minisita se i tuu atu le avanoa i le mataupu a le sui usufono lea sa ia lagaina, tulai mai le sui usufono mo Faasaleleaga Nu.4.

**Afioga Peseta Vaifou Tevaga:** E leai se agaga e faatauagavale i le saunoaga a le Minisita, ona pau lava le tuualalo a lena Itumalo ina ia faataua e le Matagaluega a le LTA le manulauti a le Malo ina ia tutusa tagata uma. Ia silasila i le mea lea e te saunoa mai a ii le \$5,000 lea e totogi, e fuafua la i le tau o galuega e pei o le mea lea e tau maua atu. Ae a fua i fale tetele nei e fausia e konekarate e leai lava ma se mea o totogia, e \$56miliona le fale a le NPF e leai ma se sene e tasi na totogi e le CaBella po o isi foi konekarate fau fale. O le agaga lena e ala ai ona avatu le tuualalo ina ia faapaleni mea nei. E oo foi i le taimi lea e te faatapulaa mai, silasila foi i le faatapulaa o laisene a le tatou Malo pe tausaga lava o faasalalau, ona pau lava le mea e totogi e le penalty fee ae na o le \$500. O le a la le fua pe afai o le kamupani fou o lea e taunuu mai ua uma ona faasalalau a o lea ua fia maua se galuega i o, o lona uiga e le mafai ona faafaigaluegaina. O le agaga lea lau Afioga i le Minisita ona silasila foi, ona pau lava lea o le Matagaluega a le LTA e maua ai

galuega a le atunuu e pei o le moaina o le vao, faia o auala. O mea nei o fale seia vagana lava i latou ua lava le tomai, a o ituaiga galuega nei e le tatau ona faatapulaa le taimi, silasila foi o le toatele o tagata e aitalafu mai i le Development Bank faapea foi ma le NPF, ae faatapulaa mea nei a o le a faapefea ona totogi tupe a le Malo? O lona uiga ua le amiotonu le Malo i lana manulauti, o le agaga lena e ala ai ona avatu.

E pei foi la o fale, a faasalalau fale e le faapea na o konekarate a Upolu, e le faapea a faasalalau i Upolu e faasalalau na o i latou e leai, e tutusa lelei Upolu ma Savaii. O le mea lea e ala ai ona ou avatu i lau Afioga i le Minisita, e tatau ona aumai mea nei i totonu o le Palemene e soalaupule leaga e fai lava.....

**FOFOGA FETALAI:** O lea ua maua le finagalo o le sui usufono ina ia malamalama lelei le toe tali atu o le Minisita. Malie lau Afioga i le Minisita se i toe tuu atu le avanoa i le sui usufono mo Faleata Sisifo.

**Tofa Lealailepule Rimoni Aiafi:** Faafetai ae ua maitau atu ua see ese le afioga i le Minisita i auala, ae faamolemole na ona faamanatu atu lava le auala i Falelauniu lea e kolosi i uta i Aleisa ona ua fai lava sina toatele o le mamalu o le atunuu e uia lea auala, a ua le mafai foi ona faata a o sina masini se i faagatasi ai mo lenei taimi, ma le faaloalo lava faafetai.

**FOFOGA FETALAI:** Tulai mai lau Afioga i le Minisita e tali atu, out e manatu sa manino lau folasaga.

**Afioga Hon MANUALESAGALALA ENOKATI POSALA:** Lau Afioga i le Fofoga Fetalai, mo le tali atu muamua i le auala o lea ua faamauiina i lalo, leaga o so o se galuega lava tau auala e alu le asiasiga a le Pulega, e o e vaavaai ma fai le latou assessment e fua agai i ai le faasalalauina ma le tulaga o lo o i ai le auala. O le mea lena o lea ua faamauiina ona fesootea lea ma o latou e fai le assessment ma tuuina mai ma faagasolo i ai polokalame. E le mafai ona ou tali atu ina ne i ou maoaluma is au tali ua tuuina atu a o lea ua faamauiina i i, a o le tulaga lena mo le galulue ai i totonu o le Pulega.

Ou te le iloa se resitala o i ai i ni faiga e faagata ai, ua ou le malamalama po o i ai se taimi e tatau ona faapea e faagata i i ae toe faaopoopo se isi masina ae le o le tausaga atoa – pe fia masina o faasalalau ona faagata lea, o so o se mea lava e i ai lona limitation, taimi faatapulaaaina. O lea ua ou fesoasoani atu e lafo mai, o le tulaga i lea mataupu o lea o le a faatalatalanoa i lalo o le Komiti Faatonu ma ave ane i ai ina ia fetuutuunai nei fuafuaga ma ia lelei ona logologo puialii konekarate e taitasi ina ia maua le avanoa e resitala faatasi ai. O le tasi lena auala e mafai ona faatino ai ae lafo mai le mataupu mo fuafuaga a le Komiti faatonu ma le laasaga o le a i ai.

**FOFOGA FETALAI:** Ia se i toe tulai mai le sui usufono pe i ai se isi mataupu fou...

**Afioga Peseta Vaifou Tevaga:** Faafetai lava i le Afioga i le Minisita o lea ua manino ma malamalama, ona pau lava o lea ua saunoa mai le Minisita tailo lava i resitala pe i ai se resitala – e pe i o le mea lea e fia faasao. O resitala ma laisene a le tatou Malo pe a tuai ona totogi, pe tausaga atoa lava o faasalalau ona pau lava le mea e totogi e tatala lava le avanoa i le aufaipisinisi

ae i ai le mea e tau o le penalty fee e faaopoopo ae pe na o le \$50 po o le \$100. O le agaga lea ona o le manatu tele ina ia tuu le avanoa i le aufaipisinisi aua ona pau ia o tagata e faamoemoe i ai le Malo e maua ai tupe ia tatou te ola ai.

**FOFOGA FETALAI:** O lea ua maua le sui usufono mo Faasaleleaga Nu. 4, ma ua e faafofoga i le tali faaiu a le Minisita, taatia o le la o le a fai ai suesuega a le Board, e le faigofie le atugaluga lea na e saunoa mai nei o lea o le a sailiili i ai le Board ona silasila lea i ai i le atugaluga o konemarate o tagata ia ua tuai mai ma i latou ua faatoa taunuu mai i le atunuu a ua le mafai ona resitala mo le tausaga atoa.

**FOFOGA FETALAI:** Faaauau le saunoaga lau Afioga i le Minisita o lea ua maua lea mataupu.

**Afioga Hon MANUALESAGALALA ENOKATI POSALA:** Faafetai i lau Afioga ae lafo maia lou finagalo o lea ua tali atu.

Ona ou oo mai lea i le Pulega o le Suavai, o le tasi lea o Pulega e tele sona aafiaga ina ua maea afa ma lologa, e tele faatanoa ma mea o lo o tapue ai le suavai sa afaina e pei o Alaoa, Malololelei, Fuluasou, Vailima, o nofoaga i nuu i tua e i ai Tafitoala. O lo o faaauau pea nisi o suavai e faaleleia e pei ona i ai Alaoa ae vagana tua i Tafitoala o lo o fuafua ona e tele le aafiaga sa feagai ma lea vaega. O a tatou poloketi o lo o faaauauina pea...

**FOFOGA FETALAI:** Out e vaelupeina le saunoaga a le Afioga i le Minisita ona o lea ua tatou taunuu tonu i le tatou malologa masani o le aoauli. O le a faia se tatou malologa ona toe faaauau ai lea o le saunoaga pe a toe taliu mai.

*Na faataatia ese Taualumaga a le Fono Aoa mo lana malologa i le itula e 4:46 i le afiafi ma toe faaauau i le 5.15 i le afiafi.*

**FOFOGA FETALAI:** Ou te manatu ua latalata foi le po i lona nofoaga ae manatu o lo o faapena ona faatumauina pea le soifua manuia i le tatou Maota.

E faia le malologa o lo o saunoa talifuaitau le Minisita mo Galuega, Felauaiga ma Atinae Esee ma ou te toe tapa le Afioga i le Minisita ina ia tulai mai e faaauau le saunoaga.

**Afioga Hon MANUALESAGALALA ENOKATI POSALA:** Faafetai ua sao i alo le taliga sua ma le faamalosiaga i lau Afioga i le Palemia ma le mamalu o le Maota. E i ai le faiva foi lea o le “faamo’a”, o le vaitau e tapena ai o le masani e oo loa i le taimi e sauna ai ona tata lea o too ma tapenapena aua le faiva. A oo ina faiva e i ai le au faiaga e i ai foi too e le au, ona faapea lea o le tautai e aua le popole fua i tagata fai aga, a tatou taliu i fanua ona fai lea o lau faaso. A oo ina taunuu i fanua ona fai lea o le faaso a le tautai ma faapea, ia si au luagalau ma si au too le au, si au luuga ma si au faiaga.

Ua ou oo mai i le Faalapotopotoga o le Pulega o le Suavai, o lo o faaauau galuega o le faaleleia o le fausia o treatment plants i Tapatapao e mafai ai ona



alu atu le suavai i vaega e i ai Aleisa ma faasolo atu ai. Out e manatu ua sili ne ii le tolu i le fa masina talu ona faagaoioi lea galuega. O lo o faatino foi le tulaga o le faamamaina o le suavai i Vailele, o le tasi lea poloketi o lo o feagai nei ma le Pulega o le Suavai ma o lo o i ai le faamoemoe e tatau ona tatala i le masina fou. O nisi nei o galuega tetele o lo o faaleleia ina ia mafai ona maua e le atunuu le suavai mama e pei ona moomia.

O le tulaga ia tatou vai vili, o lo o i ai le faamoemoe a uma Lepa ua faasolo mai le tatou vai i Faleasiu uta ma nuu i uta e i ai Lepale ma Leulumoega uta e mafai ona oo atu i ai le suavai taumafa ma Faleasiu uta. O le tulaga i le galuega sa tatalaina i Savaii, e pei ona matou talanoa atu o le la o le a faaauau pea le galuega i se tasi o pitonuu i tai o Falealupo faatasi ai ma nuu e i ai Falelima ma Tufutafoe ina ia faasopolia le suavai i lea vaega ma ua atoatoa lea faaitu mo le moomia o le suavai.

O nisi mataupu sa laga e le sui usufono mo Faasaleleaga Nu.2, o le suavai lea o lo o sau mai le vai o lo o i Paluali e alu atu seia gata mai i Puapua Faasaleleaga e i ai ma bore holes o vai vili o lo o i gauta o Iva, Sapapalii ma Faga, o lo o mafai ona fesootai ina ia malosi ai le suavai mo lea faaitu.

O le tulaga i Vaivase uta e pei ona laga e sui usufono mo le Vaimauga Sisifo, ua faataatia ma ua i ai le fesoasoani mai le JICA o lo o galulue faatasi ma le Pulega i le taimi nei mo le design ina mo le suavai mo alaafaga nei.

O le faatanoa i Malololelei ua maea ona sailia le tender e faaleleia ai lea vaega ina ua uma le afa ma ua tele foi galuega e toe faaleleia, ma faasalalauina ai. E pei o vaega ia aemaise uta i Tiapapata ma Vailima o faatanoa uma ia sa aafia i taimi o lologa ma le afa sa feagai ai, ua maea ona toe faaleleia. O le sui usufono mo Aleipata Itupa i Luga, o lea foi ua maea ona design e le Blue Bind e faatino ai le galuega lea mo le tane lea ina ia mafai ona aua ne i toe i ai se vai e maumau a ia faaoga uma mo le tatou faaitu lea i le Matamatagi.

O le vai i Falelauniu pei ona laga foi e le sui usufono mo Faleata Sisifo, o lea ua amata nei galuega a le Pulega o le Suavai mo le fausia o le tane ma faataatia mai alapaipa. O le taimi nei, o lo o ua galulue foi le Pulega o le Suavai mo le auina atu o le loli vai ia mafai ona maua e i latou o alaala i Falelauniu le suavai a o talia ai le faamaeaina o nei galuega. E pei o tulaga na i mataupu sa laga mai e sui usufono mamalu e tusa ai ma le Pulega o le Suavai ma taumafaiga uma sa feagai ai.

**FOFOGA FETALAI:** Malie lau Afioga i le Minisita se i tuu atu lava le avanoa i le sui usufono mamalu ona o lea sa laga i lana lauga. Tulai mai le sui usufono mo Faasaleleaga Nu.2.

**Susuga Papalii Lio Faavaivaiomanu Taeu Masipau (Faasaleleaga Nu.2):** Faafetai lava i lau Afioga i le Fofoga Fetalai. Faafetai ile Minisita o lea ua afea foi le talosaga a lenei itumalo o Faasaleleaga Nu.2. E talitonu lava o le vai i Faasaleleaga pei ona e saunoa i ai, o le matua malosi lava. Ae pei o le uiga o le talosaga foi a si o matou nuu i Fatausi, ona ua tele i uta le auala galue. Toe lava o le laina autu foi lea a tatou, ona toso loa lea o le laina a le aiga latou. E pei o le uiga lena o le talosaga a si o matou nuu i Fatausi. Ma le faaaloalo. Faafetai i lau Afioga.

**FOFOGA FETALAI:** E fia faasaoina lou taimi, e i ai sui usufono mamalu lea e tutulai mai. O le a lafo atu le avanoa i lau Afioga i le Tuiatua Faanofonofu, le sui usufono mo Aleipata Itupa i Lalo.

**Afioga Tafua Maluelue Tafua (Aleipata Itupa i Lalo):** Faafetai i lau Afioga i le Fofoga Fetalai. Masalo o lou ava tele i le Afioga i le Minisita mo Galuega, Felauaiga ma Atinae Eseeese, o le ala lea o lou tu atu, ae na ou faamoeemoe lava i lou uso lea mai Aleipata Itupa i Luga na te avea le ma mataupu. Ma lou agaga faaaloalo lau Afioga, ia e alofagia le matou vai i Saleaamua, o la e lava e faaoga le loli vai e lau atu ai le suavai. E le o maua se suavai, ae ana vili o la e maua. Ma le faaaloalo lava. Se i faataatia atu mo sau fuafuaga i se isi taimi o i luma. Faafetai lava.

**FOFOGA FETALAI:** Malo. Tulai mai le sui usufono mo Siumu.

**Tofa Hon Tuuu Anasii Leota (Siumu):** Faafetai. Na ona toe faamanatu atu i le Afioga i le Minisita lau talosaga i se vai o le matou itumalo i Maninoa. Ona o lena e faaletonu le vai i Tafitoala ma le vaega lena, ae se i silasila ane pe leai se tulaga e mafai ai ona fai se vilivai e vili ai se vai, aua o le nofoaga i luga i Maninoa ua leva ona o atu alii saienisi ma fai mai e lelei i ina e ono vili ai se vai. Ia o lena lava ua atoa tausaga e fia e le i faia lava lea tulaga, ae ua matua pagatia lea vaega o lena itumalo e moomia se vai. Ma lou faaaloalo lava.

**FOFOGA FETALAI:** Malo. Se malie lava le Minisita se i faaujma atu lava saunoaga a sui usufono mamalu ona tasi ai lea o le taimi e tali ai lau Afioga.

Tulai mai le sui usufono mo Aana Alofi Nu.3.

**Afioga Toeolesulusulu Cedric Pose Salesa Schuster:** Faafetai lava i lau Afioga i le Minisita mo le avanoa. E leai e le o se talosaga ona e le i taua i lau lauga se vaega o lou itumalo, ae na pau le vaega na taua i lau lauga lau Afioga i le Fofoga Fetalai o se faamamaavega i tupe maua a lo tatou atunuu e ala mai lea i le Pulega o le Suavai. Ona e talitonu lau Afioga i le Fofoga Fetalai, e pei ona ou taumafai atu i lau lauga, ua tele lava aiga e le gata i lena itumalo ae o le tele o le tatou atunuu, ua tai lua tausaga e le fuaina vai. A e vaai i pili a nei aiga, pe tai \$2,000, \$3,000, tai \$1,000+ a o lea faatoa fua, ua le mafai la ona totogi e lena aiga. A o lea la e talosaga atu ai i lau Afioga i le Minisita, atonu o le tasi lea vaega e faafaigofie, afai e lelei le fuaina o vai i masina taitasi, o le tele foi lea o le seleni o le tatou atunuu o le a mafai ona pueina mai. Ae ia tagai i ai ia toe faaleleia le fuaina o le suavai, aemaise lava ia i latou o lo o faatinoina lea vaega.

**FOFOGA FETALAI:** Malo faafetai. Tulai maia lau Afioga i le Minisita.

**Afioga Hon MANUALESAGALALA ENOKATI POSALA:** Faafetai lava mo finagalo faaalua. Ou te iloa lava e i ai talosaga ia na taua, o lea ua taatia mai. Ou te iloa foi o lea e faafofoga mai le Pulega, ia o lea o le a talanoaina e pei o le pitonuu lea i Fatausiuta, aemaise foi o le afioaga i tua i Saleaamua. O mea uma ia o le a aumai ona o foi lea o le asiasiga e vaai, po

o le a le tulaga e i ai, pe mafai ona oo i ai le suavai i le mea la e i ai, po o le a se faamoemoe e tatau ona faatino ai. Ae faafetai o le agaga lena, ia faasopolia aiga uma ia maua le suavai ae o mea lava na e i ai tulaga faigofie pe afai e agai sao mai. Ia afai o outou afioga i sui usufono, e mafai lava ona tatou feiloai, ae afai foi e ave le talosaga tuusao i le Pulega, ona o lea e fai le asiasiga. Se i vagana tulaga pei ona taua e le sui usufono mo Siumu, ou te iloa tasi lena vaega o le a fai i ai se suesuega. O lea ua faataoto mai, ou te le iloa foi pe sa i ai se sailiiliga sa fai muamua, ae o le a vaai i ai le Pulega.

I le sui usufono mo Aana Alofi Nu.3, faafetai, o aga ia o lo tatou valaauina, a i ai mea e faaletonu, e tupu le faatuatua o le taugologolo. O le tatou galuega tauave lea, o a mea e le o atoatoa i o tatou itumalo, e mafai ona lipoti mai ma faaleleia. Ae faafetai lava mo lea vaega. E tele foi lava e e omai ona fai lea i ai o se fuafuaga e mafai ai ona togitogi le pili ma siaki pe i ai ni faaletonu o latou paipa e ala ai ona tele le suavai e faaaogaina. O galuega uma na o lea e galulue ai le Pulega o le Suavai. E logo mai o atu ua siaki ma fai ai sailiiliga, a i ai faaletonu, o nai mea na e toe fai ia lelei ia le tele se suavai e maumau mo le fofoga taumafa ma le faaaoga ma tele ai latou pili. Ae faafetai lava mo mataupu ua tuuina mai, o lea o le a oo i ai fuafuaga ma sailiiliga a le Pulega o le Suavai, ia maua pea le suavai taumafa.

Ou te manatu o lea ua maea foi mataupu sa laga i mea tau suavai. E faamalulu atu foi pe a i ai ni faaletonu o le Pulega o le Suavai ma le latou auauunaga, leaga e taua tele le suavai mo le fofoga taumafa o le tatou atunuu.

Ona ou oo mai lea i le Faalapotopotoga o le Malosiaga Tau Eletise. O le maea foi o le afa o Eveni sa afaina ai i afa ma lologa, e tele nai faaletonu sa feagai ai, e le gata i le faaleagaina ma motusia ma touulu pou i le agai atu lea i Lefaga, Safata ma Siumu, aua e pei o i sa tele ai le faaleagaina ona o le matagi. O lea ua mafai ona faaleleia tulaga ia i le laina.

O tatou fale-afi, e tele foi fale-afi sa faaleagaina e pei o le Loto Samasoni. O le taimi nei o lo o fai pea tapenaga ma faatalanoaga i vaega uma ina ia mafai ona toe fausia ma maua lea fesoasoani, ina ia maua ai le malosiaga tau eletise e mafai ona faaso mai, ona o afi vai nei e tele sona sao toe taugofie le faatinoga. O le fale o le Fee, o Alaoa, o Lalomauga, o fale-afi uma neis a i ai aafiaga ona o le matagi, ae o la e ua mafai ona toe tulaga mai i se tulaga talafeagai.

O le tatou polokalame lea e faatino nei o le power sector expansion project, o le faalauteleina o le eletise 2008 seia paia le 2016. Tasi lena vaega e i ai le galuega lea i Fiaga. Ia, ou te manatu foi e tele finagalo na lagalaga ona o le faaletonu o le tatou eletise i vaitau ua tuanai, e pei foi ona faailoa atu sa fai faasalalauaga ma mafuaaga na le mafai ai ona faaolaina afi uma ia e fa. O taeao aso 21 o Iuni, o le aso lea e aloaia ai le tuuina mai ma faaola uma ai afi nei e fa. Ou te iloa foi o lo o faafofoga mai le atunuu ma tulaga uma e i ai. Ou te faamalulu atu i le auauunaga. E pei lava ona matou taua, o le eletise e le o se mea faigofie, e aafia ai le soifua ma le ola. Ae o lo o taumafai lava le Faalapotopotoga i se auala ina ia aua ai ne i tele sona aafiaga. Afai e maea le aso a taeao, ou te iloa foi o le a tuuaititia le tulaga o le motusia o le eletise, vagana e i ai tulaga e le maalofia pe afai e faaleagaina se poumoli. O isi foi vaega a malosi le uila ma le faititili, e otometi lava le fiti o ki. O lona uiga ua fai faapitoa ina ia aua ne i afaina, ne i te i ua oo atu i afi pe afaina ai ni maota, pe afai e i ai aafiaga ia i eletise. O taeao o le a faamuta ai galuega ia ma faaleleia ai tulaga o le auauunaga o le eletise. O le a faamalolia tele le

auaunaga lea o le ave o le pre-warning, le faasalalauga muamua, afai e i ai se tulaga e aafia ai le eletise ona o ni faalavelave ma tulaga le maalofia, o le a fai foi le faasalalauga a le Faalapotopotoga ina ia faailoa ai i le mamalu o le atunuu vaega na aafia ma ona mafuaaga. Ia, o le tulaga lena o lo o i ai, o lo o i ai foi i lalo o le poloketi lea, o le a faasolo atu i Savaii. E i ai le fale-afi i Fiaga ma fuafuaga o i ai, a o lo o faatalanoaina foi tulaga i tatou afi vai, hydro. O lea foi na omai sui mai fafo mai faletupe o le lalolagi ma le ADB, sa mafai ona asia tulaga ia. O lo o i ai lava le faanaunauga o le Malo e le o mapu le agaga ina ia mafai ona i ai nisi fale-afi e alu i le vai, aua e tele sona sao ma taugofie ai le tatou eletise. E faapena foi i le tulaga lea o le renewable energy, o lo o i ai foi le Komiti o latou ia e i ai le Afioga i le Taitaifono le Minisita o Tupe faapea foi le Afioga i le Minisita o Punaoa Faalenatura ma le Siosiomaga ma Faauluuluga o Matagaluega Faapitoa o lo o galulue mo le vaega lea.

**FOFOGA FETALAI:** Malie lau Afioga i le Minisita se i tuu atu le avanoa i le faauilavea a le sui usufono mamalu. Tulai mai le sui usufono mo Faleata Sisifo.

**Tofa Lealailepule Rimoni Aiafi:** Lau Afioga i le Fofoga Fetalai, se i malolo tasi foi le Afioga i le Minisita ua leva ona... Se na o le tasi lava le fesili ona o lea ua see ese, o lea ua saunoa mai o taeao e faauma ai le konekarate lea ma hand over le galuega. E avatu le faamalo ma le faafetai. A o le mea lea sa fia maua e lou sui usufono, ou te talitonu lava o lena e i ai aiaiga mo se piriota foi lea e vaavaai ai pea i le vaega lea i ni tagata faigaluega foi nei i le kamupani lea faapitoa e galulue ma le tatou Matagaluega aemaise le taimi amata lea. Afai o i ai, faafetai. Ma le faaloalo lava.

**FOFOGA FETALAI:** A o le i tuuina atu le avanoa i lau Afioga i le Minisita e tali atu, o nai faasilasilaga ona e tataua pea ona logona le Maota i ni tulaga e tulai mai. E faamalulu atu o lea ua loka le faitotoa i lou itu tauagavale, ona o le taumafai i le tulaga pei ona i ai le tatou Fonotaga i le tau talitaliga o le oo mai o le la. E le o se taimi umi, ona o lo o i ai le tulaga lamatia ne i te i ua afaina se sui usufono i le agai atu i fafo. Ae faamolemole lea Itu o le Maota se i faaoga le tatou faitotoa lea i luma mo le taimi lenei, ae taatia se i goto ifo le la se i pouliuligia atoa ona toe faaoga lea. O le faaaliga lea ma le faaloalo.

Se i toe tulai mai lau Afioga i le Minisita mo le faaauauina o lau tali mai.

**Afioga Hon MANUALESAGALALA ENOKATI POSALA:** Faafetai mo le faamanatu mai. E leai se mea e pei lava o le faiva foi lele e fai, e ala uta ala tai, e tapena uma mea uma aua le faamoemoe. O lae ua i ai polokalame aua le vaavaaiga o tatou afi ia ia maua le tomali ma le agavaa talafeagai. O la e foi ua i ai le special team faapitoa lava o lo o nafa ma le vaaiga o Fiaga ona o le maualuga ia aua ne i tele ni lima e tago i ai, o latou lava ia faapitoa e vaaia, a i ai ni faaletonu, o i latou lava foi ia e pau i ai le uluulu o le laau. E pei o tulaga uma na ua tapena i ai mo le tatou faamoemoe.

Ona ou see mai lea i le Pulega o Uafu ma Taulaga o lea e.....

**FOFOGA FETALAI:** Malie lau Afioga i le Minisita, sei tuu atu le avanoa i le faauilavea a le sui usufono mamalu, tulai mai le sui usufono mo Aana Alofi Nu.3.

**Afioga Toeolesulusulu Cedric Pose Salesa Schuster:** Faafetai i lau Afioga i le Fofoga Fetalai, faafetai foi i le Afioga i le Minisita i le faamatalaga foi e tusa o le tatou Malosi Faaeletise, pau le vaega lau Afioga i le Fofoga Fetalai sa laga i se manatu foi o lau lauga i le aso ua sola i le vaega lea pei ona e saunoa i ai i le unforeseen losses, pei ona avatu se atugaluga po o se fautuaga foi, ua silia nei i le tolu i le lima tausaga o lo o sau pea, e silia ma le 18 i le 20miliona iunite e le o mafai ona totogiina pe maua mai ai se seleni a le tatou Faalapotopotoga o le Malosi Faaeletise, o lea e maitau atu o le tele o nei galuega e le Private Sector Expansion Plan atonu o le a mafai ona faaititia ai, o le talosaga la lau Afioga i le Fofoga Fetalai, pe mafai ona faataoto se fuafuaga foi lea a le Matagaluega po o le Pulega ina ia faataoto mai ai po o le isi lima tausaga, afai pe fia ni unforeseen losses ia o le a tatou vaavaai ai e iloa ai foi, afai o se 5miliona o le a faaleleia, ia atonu e tele se sefe mai lea i tupe faaalu a le tatou Pulega, ia a o se sefe tele foi lea mo tupe a le tatou atunuu.

**FOFOGA FETALAI:** Malo. Ia o lena ua oo atu le fautuaga, tulai mai lau Afioga i le Minisita e faauau le saunoaga.

**Afioga Hon MANUALESAGALALA ENOKATI POSALA:** O tulaga ia i eletise maimau, e lua vaega e i ai, o le system losses e le mafai ona alofia, a o le technical losses, ia o le vaega lea o lea e tilotilo i ai le Faalapotopotoga, o la foi e i ai tulaga i mita temporary o aafiaga foi lele, o vaega uma ia o la ua agai i ai, ona o la foi e i ai le tilotilo i mita ia e aumai, o la ua taofia ae vaavaai tulaga talafeagai ma...ia o le tilotilo foi lele faa-Inisia manino ma malamalama ae le o nofoai ia le Faalapotopotoga i auala e tataua ona mafai. Sa i ai foi tulaga sa i ai ona pei sa tuuaia ia nisi e le o mafai ona maua mai ai e le o manino ai ma malamalama, a o lea ua totogi uma le eletise, e le tataua ona toe i ai se faafitauli e tulai mai, o lea foi la ua faigofie ona faatino galuega a le Faalapotopotoga ina ia mafai ona ausia vaega ia ma faaititia le tulaga faaletonu lea i le tatou eletise maimau.

Ona oo mai lea i le Pulega o Uafu ma Taulaga, o lo o faagasolo pei ona i ai le tulaga sa laga mai ona o le ramp foi lea o le uafu i Mulifanua, o la ua maea ona faaleleia na galulue ai le Faalapotopotoga o Vaa ia ua faaleleia lea vaega. A o fuafuaga pei ona i ai i le faaleleia o auaunaga ia a domestics wharfs ia e i ai pei o Mulifanua ma Salelologa, o lea ua agai i ai le tatou Pulega.

O le vaega lea pei ona taua o le lisi, lau Afioga i le Fofoga Fetalai o lea ua ia te au le kopi o le deed of list lea sa faatino sa sainia i le aso 24 o Iuni 2010 ia le tulaga lea, ma le faaaloalo lava. Ia o mataupu na ma le Faalapotopotoga o Vaa a Samoa, o lo o manuia lava ma sologa lelei, e i ai foi nisi o fuafuaga faataatitia atonu o le a i ai se taimi ona silafia lea e le Kapeneta ia polokalame o i ai mo le Ofisa o le Pulega o Uafu aemaise foi o le Faalapotopotoga o Vaa ma le latou galuega faatino.

E momoli foi le agaga faafetai i le paketi i le faatinoina ona e i ai tupe ia e faaagaaga mo a tatou CSO, o le tasi lena molimau o le fai alofa o lenei Tala o le Tupe, e le o tuuaititia ai le agaga aua o tupe nei o lo o fesoasoani agai i le

viliina o le suavai ma oo atu le suavai i maota ma laoa. E le gata i lena o le malosi faaeletise aua o lo o mafai ai ona faatino le tulaga e subsidize ai ia tulaga o new connected, o laina foi ia e fesootai mo le faaolaina o nai aiga mamao o le tele o isi ua o agai i uta i auala galue, ua tele le sao o le tatou Malo ua le faamamafa le uluulu i le Faalapotopotoga, ae ua apaapa atu aao alofa ina ia mafai ona lagolagosua ina ia maua e o tatou tagatanuu ia le faamama avega talafeagai.

E oo foi i le talosaga sa tuuina mai i a tatou street lights, ia tasi lena aoga o tupe nei ina ia mafai ai ona totogi ai ia vaega mo le faapipiina o a tatou moli ia auala, o lea foi ua maitau atu, e tele talosaga sa talosaga mai ai sui usufono mamalu, o lea foi o le a agai i ai le Faalapotopotoga e fai a latou assessment ma o e asi, ona tuuina mai lea i le Komiti o le CSO mo se faaiuga mo ia vaega uma.

E pei o le matou tala lea i vaega sa laga, ae momoli atu le agaga faafetai e tusa ai foi ma finagalo foi ua faaalua ma fautuaga na tuuina mai, e tapena ai ma matimati ai galuega a Faalapotopotoga ma Matagaluega o lo o i lalo o le matou Sector, aua le agai i luma.

E avea foi lena avanoa lau Afioga i le Fofoga Fetalai e fai ai sau tala o lo o faafofoga mai lou itumalo, o tupu ma ee aemaise o faleupolu tofia, aemaise o le itupa o tina ma vaega eseese o le malosi e faamoemoe i ai le tatou Malo ma o tatou aiga e oo lava i nai a tatou fanau. E le faagaloina foi lau susuga i le Toeaina Kereta ma le faletua aemaise o le aufaigaluega i fata faitaulaga e fia i totonu o Safata, malo tapuai, ia alofagia e le Atua lo tatou sa i le faaiuga o lena tausaga ia manuia fuafuaga uma.

Ia manuia lau afioga ma lena Palemene, faafetai.

**FOFOGA FETALAI:** Malo faafetai saunoa i lau Afioga i le Minisita, e manatu e le mama lau tali mai leaga e lagona uma e lena Maota e tata logo pea Masefau ma tuitui atu lou faitotoa, leaga e le o se Matagaluega laitiiti lau Matagaluega, o le Matagaluega o Atinae Tetele o lo o atinaeina le tele o le galuega i totonu o le tatou atunuu, e le gata i le vaitaumafa, eletise ma le anoanoai o galuega faatino o lo o tua i ai lo tatou Malo ma tapa atu i ai le tele o Matagaluega eseese, aemaise o le Afioga i le Palemia ma le Kapeneta, malo galue, malo le onosai.

Ia ua tatou taunuu mai i le Matagaluega o Punaoa Faalenatura ma le Siosiomaga, tulai mai lau Afioga e faigata i le paia o le aiga sa-Peseta ma le Faleiva i lau fetalai Matautu ma le Muaautasi, ia tulai maia lau Afioga i le alii Polofesa e tali i finagalo o sui usufono mamalu.

**Tofa Hon FAAMOETAU LOA ULAITINO FAALE TUMAALII:** Lau Afioga i le Fofoga Fetalai, ou te muamua ona ou tapui le tapu a Tupu ma ou faatulou atu i ou paia ma ou sa Samoa, leai o ou paia ma ou pa o se upega lavelave, e le mafai e se leo a au nei ona auau faamata toaga ia paia. Ona ou faapea lea, taoto atu ia ou paia faagalua e le fati, aua o paia e faataotooto a o se alaoo, ae nuunuu atu faatini o tausala i le aufuelolua ma le autulatoa, aua o latou e faafaileleina upu o le atunuu.

E avea foi lena taimi ou te faatalofa atu ai i lou itumalo o Gagaemauga Nu.3, talofa Matautu o le paia lava lea i le afio o aiga sa-Peseta, susu le Maopu ia Leota, alaalatai le Usoalii ae mamalu mai le Faleiva ma upu ia te oe Matautu.

E faatalofa atu foi Satoalepai i le afio o aiga sa-Peseta, afio Maiava, susu Mataia alaalatai le aitu tagata ia Mauigoa, aemaise o le lavelave i le fale Toalepai ma oe Satoalepai.

Ou te faatalofa atu foi i le Aufaigaluega paia a le Atua o lo o nonomanu aua lava se manuia o lo ta itumalo i Ekalesia e fia o i totonu o le ta itumalo, o outou lava o se olo punimatagi a o paolo tau le Atua foi i totonu o afioaga. Ma e manatua foi i lenei taimi, e ao lava ona ou oo atu e avatu se faamaisega i le tulaga o le valaau paia a le Atua i le faa-Tama o le tatou Matagaluega i le Itu o Tane, i le susuga lea ia Siueva Gogo, aemaise foi o lo matou aiga le aiga sa-Taito, le paia i le afio o Taito ma ona alo, afio foi aiga sa-Umalau, aemaise lau fetalaiga Tauasa o le Lauti na laulelei. O paia na faataotooto o lo tatou itumalo e le mafai lava ona suia e se isi.

Ona ou oo mai ai lea, ia tapuai maia, ae sei ou sagai ane e faatino le auauauna na tofia mai au i totonu o le Maota e lo outou paia ma lo outou mamalu. O mataupu na laga mai e sui usufono, ua uma ona ou vaevaeina lava i mataupu e tali atu ai i faafesili na aumai.

Ma e muamua atu i taligalu ma talivai, e le gata foi i lea o auala i fanua lisi o le Land Board po o le Komiti o Eleele. O faiga faavae lava a le Matagaluega o Punaoa Faalenatura ma le Siosiomaga, e taunuu mai loa se talosaga i le Matagaluega alu loa se asiasiga e suesue ma assess ia le matautia po o le lamatia foi o afioaga ae le gata foi i lea o le soifua lelei o tagata, ma o iina la e vave maua mai ai le tali i le tulaga o le vave ona fai e faamuamua ma le faasolosolo mai, aua pei lava ona silafia o le tele ia o talosaga e faatoai mai i le Matagaluega, peitai ane, e le lava se seleni e faatino uma ai i le taimi e tasi. Pei ona outou silasila i le Tala o le Tupe o lenei tausaga 2013/2014 o lo o aumai ai iina le \$1miliona mo taligalu ma talivai, ae o lo o aumai ai foi ma le \$500,000 mo auala ia e pei ona ou taua, peitai ane la, e le o manofonofo ai le Matagaluega i le tulaga o le sailia o seleni e auala lea i poloketi o lo o avatu i tatou paaga o lo o fesoasoani mai i le tatou tali atu i fesuisuiaiga o le tau, ma e i ai la isi poloketi e fai faatasi ma isi Sector po o le Matagaluega foi i totonu o le Malo, tai pei o faatoaga, e le gata foi i lea o tagata tafafao maimoa mai. Ma o i i la lea e fai ai le vaevaea lea ina ia mafai ona avatu nisi taligalu o lo o afaina ai ia fale turisi e fai i lalo o isi polokalame, a o isi foi taligalu ma talivai o lo o ave i lalo i isi foi polokalame po o poloketi, tai pei la o le Adaptation Fund po o le Least Developed Countries Fund (LDCF).

O vaega uma ia o lo o aumai ai tupe o lo o taumafai e faasoaso ae ia manatua foi e le faapea o aumai uma i le taimi e tasi nei seleni Afai lava e lima tausaga e auauai mai ai le poloketi lea, e auauai mai foi i tausaga taitasi ma o iina la o lo o faasolosolo ai le faaso a le Matagaluega i le tulaga o le faatinoina o talosaga a sui mamalu o le atunuu po o sui usufono o le Palemene ma afioaga. Ona oo atu ai lea o sau faamatalaga i talosaga mo le vaitafe i Vaisigano. O lo o i ai le fuafuaga a le Malo e fai ni talivai i itu o le vaitafe ina ia aua nei toe tupu le tulaga lea o le salalau mai o le vai pe a sau mai uta. O lea foi ua nofo uta le Matagaluega pei lava ona aumai e isi sui usufono pe mafai ona toe eliina faalelei le alavai ina ia tafe le vai mai uta e agai i tai. O nei galuega uma e i ai lava auala ma faiga faavae a le Malo po o le Matagaluega foi o lo o faatino ai. E le gata ina alu asiasiga a le Matagaluega, fai assessment, afai o le a faatino loa ona e sauniuni lea o ata o le faatinoina o le galuega ma faataufo loa lea aua le fausiaina. O lo o fesili nisi o sui usufono po o le a le mea ua oo i ai le polokalame o le SIACM 1 &

2? O le tali o lo o fausia ai auala laupapa, e le gata foi i lea o auala i le west coast faapena foi ma taligalu. O lea la ua oo nei le SIACM 2 i lalo o le polokalame o le PPCR po o le Pacific Programme for Climate Resilience.

Ona ou oo mai lea i eleele, o le tasi lenei o mataupu na laga mai ma e tele foi ni sui usufono na saunoa i ai. O nisi o sui mamalu sa saunoa e faamatuu atu ni eleele o lo o i tuamaota ma tualaoa o afioaga ina ia maua ni eleele e galulue ai ao nisi foi o lo o saunoa e faapea e le o lava eleele o le Malo ma e tataua ona faaeteete ai. Mo le silafia, o eleele i lalo o le matafaioi a lenei Matagaluega, o eleele o le Malo, eleele o le Esetete Tausi, o isi eleele faaleaganuu o lo o lisi atu e fai ai pou telefoni ma atinae faapena. E na o le 20% o le aofai o eleele o le atunuu o lo o i le vaega lea, ae 80% o eleele faaleaganuu. O lea la a silasila e laitiiti lava se vaega o eleele o lo o i lalo o eleele ia o lo o i lalo o le Malo ma o lo o ave lava le faamuamua a le Matagaluega i atinae a le Malo, ma e i ai le manatu o le tasi lenei aseta aupitosili ona taugata i le agai i luma mai o eleele aua ua utiuti eleele o le upu moni lava lena. O lo o alu pea i luga le tau o le aseta e pei foi ona saunoa nisi sui usufono na amata mai i le \$8,000 ao lea ua oo i luga i le \$80,000 i le \$100,000 i le kuata eka. O le tulaga lena o lo o i ai. O le faaaogaina o nei eleele a le Malo, o lo o faaaoga i falemai, e le gata foi i lena o faleaoga, o nofoaga ia o lo o gaosia mai ai le eletise mai le suavai, pei o Fiaga ma Vaiaata ma eleele o lo o tapue ai le suavai, pe o lo o viliina ai foi le suavai. Sa i ai foi e na fesili pe mita nei vai mai le manava o le eleele ma o le upu moni o lo o issue laisene po o pemitia e le Matagaluega ma o lo o mita foi ina ia iloa le aofai o le suavai o lo o maua i lalo o lea vaega o le atunuu ma lea vaega. Manatua foi o Samoa e le pei o isi atunuu e i ai latou vaitafe tetele. O tatou e laiti lava nai vaitafe o lo o i ai ma o ia vaitafe o lo o taumafai e faaaoga e gaosia mai ai le eletise ae le gata foi i lea e faaaoga e fafaga mai ai faatanoa e pei la o le sau lea i Fuluasou po o Tapatapao foi aua le fofoga taumafa o le atunuu. O talosaga uma lava ua taunuu mai i le Matagaluega i eleele e ese mai compensation, o lo o galulue ai nei le Matagaluega e vaavaai i ai po o a tonu ni eleele o avanoa e mafai ona lisi atu ae le mafai ona faatauina ona pei ona ou taua ua utiuti le faasoa a le Matagaluega i le tulaga o eleele.

**FOFOGA FETALAI:** Malie lava lau Afioga i le Minisita mo Punaoa Faalenatura ma Siosiomaga sei tuu atu le avanoa i le sui usufono mo Faasaleleaga Nu.2 leaga lea sa afea i lana lauga.

Tulai mai le sui usufono mo Faasaleleaga Nu.2.

**Afioga Papalii Lio Faavaivaiomanu Taeu Masipau:** Faafetai i lau Afioga i le Fofoga Fetalai, malo faafetai i lau Afioga i le Minisita mo Punaoa Faalenatura ma Siosiomaga mo le tolaulauina ma le faamalamalamaga o lea mataupu aemaise lava eleele o le Malo. Atonu e le o toe po malae i le talosaga a lenei itumalo o Faasaleleaga Nu.2 i Safotulafai ma Sapapalii ona o le tele o le lauta o lenei itumalo o lo o i le Malo. Sa faapea e lei oo i le Malo ae peitai talu ai nei ua mautinoa mai ai ua uma ona faafanua e pei ona ou taua i lau lauga i le taimi o Siamani lea na faaunuu ai toaiina o lenei itumalo ma fao atu ai ma eleele e pei o le mafuaaga lena. O lona uiga o eleele ia sa fesiligia foi le Matagaluega ae faapea mai o eleele tau le Malo po o public land. O lona uiga o la e i lalo o le Malo e le o ni eleele faaleaganuu, po o ni eleele umia saoloto ao eleele ua i lalo o le Malo (public land). Aua foi e tolu



lava ituaiga eleele a le tatou atunuu. O le uiga la o se talosaga leaga o lea foi sa taua le Tulafono toe teuteu o le 2008 o lo o manino ai iina o lo o i ai le avanoa o afioaga e mafai ona avatu ai talosaga i le Malo ona faamatuu mai ai lea i lalo o le Tulafono toe teuteu 2008 e avea ma eleele faaleaganuu. Sa fesiligia foi le loia a le Matagaluega o le talitonuga foi lena o le Matagaluega. E pei e foliga mai o le ala foi lea o le taumafai atu o se fuafuaga ma se faatatauga a lau Afioga i le Minisita ma le Matagaluega e tuuina atu ai ni talosaga e faaoo atu i lau Afioga ma le Matagaluega po o le a le ala fua ma le fuafuaga tataua ma le talafeagai e matou nei e manaomia le fesoasoani. Ma le faaaloalo lava lau Afioga.

**FOFOGA FETALAI:** Malo faafetai. Malie le Afioga i le Minisita mo le faasaoina o lou taimi, tulai mai le sui usufono mo Aiga i le Tai.

**Afioga Ifopo Matia Filisi (Aiga i le Tai):** Faafetai lava i lau Afioga i le Fofoga Fetalai mo le avanoa. O le faasaoina lava o le taimi o le Minisita ou te toe faamanatu atu faamolemole le itumalo lenei o Aiga i le Tai e lisi uma latou fanua i aoga, aoga kolisi, aoga tulagalua e lisi uma mai lava i le Esetete po o le Malo. O lea ou te toe tatalo atu ai ma le agaga faaaloalo tele e manatua ifo – e le o manao e faatau mai ao se tau e i lalo ifo i eleele saoloto e lisi ai. Ma le faaaloalo lava.

**FOFOGA FETALAI:** Malie lava lau Afioga i le Minisita sei tuu atu le avanoa i le sui usufono mo Aana Alofi Nu.3.

**Afioga Toeolesulusulu Cedric Pose Salesa Schuster:** Faafetai i lau Afioga i le Fofoga Fetalai mo le avanoa. Na o le taugologolo foi i le Afioga i le Minisita e moni lau saunoaga o le tele o eleele i totonu o le atunuu pe 80% o eleele faaleaganuu, ao le tatalo a lenei itumalo e pei ona saunoa se tasi o sui usufono mai Aiga i le Tai, o lenei itumalo o Aana Alofi Nu.3 e le atoa se 10% o eleele o i totonu o le afioga. E ova i le 80% o lo o faamauina o eleele a le Malo o le ala lea o le tagitagi mai pea o lenei itumalo ini eleele pe a tau ane so outou finagalo.

**FOFOGA FETALAI:** Malo o lea ua maua e le Minisita mo Punaoa Faalenatura ma Siosiomaga.

Tulai mai lau Afioga i le Minisita e faaauau le le tali mai.

**Tofa Hon FAAMOETAULOA ULAITINO FAALE TUMAALII:** Faafetai mo sui usufono ma faafesili na tuuina mai. O le tulaga o le tatalo mai a le Afioga i le sui usufono mo Faasaleleaga Nu.2, o le tulaga lena ua i ai o lea ua i luma nei o le iloiloga a le Matagaluega e pei lava ona e tautino mai foi i le tulaga afai lava e le manino po o le a ituaiga status o le eleele o lo o i ai lava le tulaga e faamanino mai ai. Ao lea la e manino le tulaga o eleele na ae pei ona fai atu o lea e ave le faamuamua i poloketi ia e fai ai iina pei foi o Tapueleele lena e i ai wáter catchment areas. O lea e i le talosaga o lo o faagasolo i le taimi nei.

O le tulaga e pei ona fesili ai le sui usufono mo Aiga i le Tai, e moni o lo o lisi e latou eleele mai le Esetete Tausi aua le fausiaina o faleaoga. O lo o

vaavaai foi i ai le Matagaluega i le tulaga lea aua o lea e faapea e manao e faamama le lisi o lo o tuuina atu ai eleele ia.

O le faafesili a lou uso a sui usufono mo Aana Alofi Nu.3, ua tulai mai ao lea o le a oo atu i ai lau faamatalaga i le tulaga lea aua o lo o i ai le Komiti lea na filifilia e le Malo ma le Komiti a le afioaga o lo o faasolo nei talanoaga i le tulaga lea e manao le Malo e vave ona soalaupule le mataupu ina ia maua se faaiuga lelei mo itu uma e lua. O le mea lena aua o lena e te silafia, ou te iloa foi o lena e te i ai i totonu o le Komiti a le tou afioaga, o lea foi e i ai le Komiti a le Malo ua uma ona tofia e galulue faatasi. O le tulaga lena ua i ai le mataupu lea. E pei lava ona ou fai atu e le lavea compensation lands i lau tala lea na fai atu ona o le tulaga o lou mafaufau atu i le mataupu a Satapuala.

Ona ou oo mai loa lea i le issue lea i le puipuiga o le siosiomaga. O le puipuiga o le siosiomaga ua toatele foi i latou ua faafetai mai i le Matagaluega i Upolu faapea foi Savaii ona o le lelei ona faatino o lea auaunaga a le Matagaluega, ae o lo o toatele foi i latou o lo o faapea mai e le o lelei ona faatino. Ua uma ona fai le faaiuga a le Kapeneta i le ituaiga konekarate e aoina le lapisi sei tulou ona o faafitauli na aliali mai i loli e open e tele ina lelea solo le lapisi ma paepae solo i luga o le auala o lea la ua fai ai le faaiuga na o kamupani lava e i ai loli faapitoa lava mo le aoina o le lapisi sei tulou lava. O enclosed trucks ona pau lena o ituaiga loli e mafai ona talosaga mai i konekarate e aoina le lapisi.

E avea foi lenei taimi e fautua atu ai i konekarate o lo o faamanuiaina i le faatinoina o lea auaunaga, ina ia tautuana ma outou e le faapea na o le mea o i ai le fata lapisi sei tulou e ao mai le lapisi. O le auala atoa o lena zone o lo o aoina le lapisi e tatau lava ona include ai aua o le matafaioi lena a le konekarate. Ua uma foi ona ave i ai le tuutuuga a le Matagaluega i le faatinoina o ia auaunaga.

O le isi mea o le tele lava foi o le o atu o loli lapisi ua le o i nofoaga e ave sao i ai le lapisi e pei o Tafaigata land fill po o Vaiaata foi i Savaii ae pei ua o atu lafoai i nisi o nofoaga o le atunuu. O lea e avea ai foi lenei avanoa ona o le la e faalogologo mai konekarate, o le tulaga i ai a faapena le faatinoina o le auaunaga, a faamaonia loa ua terminate ai lava iina le konekarate ma le toe faaauauina, aua o mea uma na e tatau ona fai.

O lo o i ai foi nisi o sui usufono o lo o talosaga mai ina ia faaoga sui usufono o itumalo i le tulaga o polokalame faalauiloa o le siosiomaga i nuu i tua. O le tulaga lena, o taimi e tatala ai atinae i nuu i tua o lo o taumafai lava – e fai lava lau faatonuga e logo le sui usufono o lena Itumalo ina ia i ai i le tatalaina o lea atinae. O lea foi e faafogafoga mai le Matagaluega o le mea lena o lo o uunaia nei ma e tatau foi ona i ai i fonotaga ma nuu i le faalauiloaina o auaunaga a le Matagaluega ina ia nofo malamalama ai i latou ma fesoasoani atili i le pitolaau a le Matagaluega i le faatinoina o ona tiute.

**FOFOGA FETALAI:** Malie lau Afioga i le Minisita se i tuu atu le avanoa i le Tamaitai Minisita Lagolago.

**Afioga Hon Gatoloaifaana Amataga Alesana Gidlow (Faasaleleaga Nu.1):** Lau Afioga i le Fofoga Fetalai faafetai mo le avanoa. Ua ou faalogologo atu e pei ua see ese le Afioga i le Minisita i le tulaga lea o lapisi se i tulou le afiafi ma le mamalu o le Palemene. Sa ou fesiligia pe faamata e

mafa'i ona faasili atu ona e faatasi lava ona aoina le lapisi i lo matou Itumalo faamolemole?

**FOFOGA FETALAI:** Tulai mai se tasi o sui usufono mo Aana Alofi Nu. 1, Afioga Hon Leaupepe Toleafoa Apulu Faafisi ona sosoo ai lea ma se tasi o sui usufono mo Falealili, Afioga Tusa Misi Tupuola.

**Afioga Hon Leaupepe Toleafoa Apulu Faafisi:** Lau Afioga i le Fofoga Fetalai, faafetai mo le avanoa a ua ou manatu e ao ona faafetaia le saunoaga matagofie ma le manino a le Afioga i le Minisita a o faafofoga tapuai mai foi Samoa. O le tulaga lea e tatau ona aafia ai ma le sui usufono ina ia mafai ona fesoasoani ai foi o le tasi lea vaega o o tatou tiute aua e faalogo foi lou itumalo ia Au, e pei o le tulaga lena. A o sina au saunoaga aua o le la ua manino le faafofoga mai a i latou o lo o faia lea galuega o le aoina ma le faamamaina e ala i lapisi, a o sina fautuaga i afioaga e o atu loli lapisi ua faatamaia e taifau ona salalau solo lava lea po o le tiute o le faatu o le loli ae fai le galuega o le faamaopopo, o le mea lena e ao ona lapataia Pulenuu ina ia fofoga o latou nuu ma aiga o le tiute lena e faamaopopo ma faamama, faafetai.

**FOFOGA FETALAI:** Tulai mai se tasi o sui usufono mo Falealili, Afioga Tusa Misi Tupuola.

**Afioga Tusa Misi Tupuola (Falealili):** Faafetai i lau Afioga i le Fofoga Fetalai, faafetai atu i le saunoaga a le Afioga i le Minisita mo Punaoa Faalenatura ma le Siosiomaga i le tulaga e pei ona saunoa i ai. O le mea tonu lava lea sa ou taua i lauga ma o le agaga moni lava na ala ai ona tuuina atu i luma o lau Afioga ma le mamalu o le Maota, i le fia faaaogaina pea o tofi o sui usufono i le avatu i ai o le fesoasoani e le gata i le itumalo o le sui usufono lava ia i so o se polokalame, aemaise o le fesuisuiaiga o le tau ona o lea ua maitauina le aafia tele o i tatou, a o le mea taua lava o le maua o avanoa e mafai ai ona fai a tatou polokalame ma itumalo taitasi mo le agai i luma o le tatou atunuu. Faafetai tele i lau Afioga i le Minisita ona o lena ua e saunoa tonu mai lava i le mataupu lea ma le faaaloalo lava faafetai.

**FOFOGA FETALAI:** Tulai maia lau Afioga i le Minisita e faaauau le tali atu.

**Tofa Hon FAAMOETAUOLOA ULAITINO FAALE TUMAALII:** Lau Afioga i le Fofoga Fetalai, o le tulaga i le faafesili a se tasi o sui usufono mo Faasaleleaga Nu. 1, Afioga Hon Gatoloaifaana Alesana Amataga Gidlow aua o lea na sau a i lana saunoaga e faapea na o le faatasi i le vaiaso e aoina ai le lapisi i le Faasaleleaga. O le a se i vaai i ai le Matagaluega i le konekarate lea e tausia le zone, e fesootai ia. Atonu o le konekarate e tatau ona faatolu ona aoina le lapisi i le vaiaso ae le o faamaoni le konekarate. O le tulaga lena, e le mafai ona ou tali atu ai, a o lea e faafogafoga mai foi le Afioga i le Ofisa Sili o Pulega ma le Matagaluega i lea tulaga.

O le tulaga o nuu ma afioaga, o le mea lea e taua ai tele le faaaoga o sui usufono aemaise o komiti faufautua o lo o i ai i le Siosiomaga mo le tulaga lena, o lea e faaaoga i latou na e o atu i nuu i tua ma lipoti mai ni mea o

faaletonu i le auaunaga lea, ma faapena loa ona galulue le Matagaluega i le faatinoina o ona tiute.

Ona ou oo mai ai lea i le tulaga lea, o lo o faafesili se tasi o sui usufono po o fea o i ai le tulaga o le case a le Aleipata Marine Protection Project? O lo o taoto nei le mataupu lena i le suesuega a Leoleo ma o lo o faaauau pea suesuega. Sa ou sailia nei foi ma o le faaaliga mai o lo o faaauau pea suesuega. O lo o i ai lava se feeseeseaiga i le tulaga o le setup po o le puleaina o le trust fund ma ua toe oo mai le afioaga e mananao e toe aumai i lalo o le Matagaluega le poloketi lea i lo le tuu atu i afioaga i tua, o le mea lena na tupu ai le faafitauli lea e i ai nei le tulaga o suesuega nei. O le tali atu lena i lea tulaga i le mea ua oo i ai le Aleipata Marine Protection Project.

**Tofa Fagaaivalu Kenrick Samu (Aleipata Itupa i Luga):** Lau Afioga i le Fofoga Fealai...

**FOFOGA FETALAI:** E le o faamalieina le sui usufono i le tali a le Minisita. O le a tuu atu pea le avanoa pe a faapea o i ai se isi mea faaopoopo.

**Tofa Fagaaivalu Kenrick Samu:** Lau Afioga i le Fofoga Fetalai, e muamua ona momoli le agaga faafetai tele lava i lau Afioga i le Minisita ma le Ofisa Sili o Pulega e tusa ai o le mataupu sa ou faafesili atu ai, leaga o lou itumalo ua amata ona malamalama i le mataupu lena. O le ala foi lea na ou avatu ai, na pau lava la latou tala ia te au, Fagaaivalu, matou te fia faalogologo o afea le mataupu lena i sau faamatalaga. O le tulaga o le faamalamalamaga a le Afioga i le Minisita, faafetai tele lava.

Lou Itumalo o lena ua tali atu le Minisita, tatou talia le tulafono ma lou faaloalo lava faafetai.

**FOFOGA FETALAI:** Tulai mai le sui usufono mamalu mo Aana Alofi Nu.3.

**Afioga Toeolesulusulu Cedric Pose Salesa Schuster:** Faafetai atu i lau Afioga i le Fofoga Fetalai mo le avanoa, leai na ona ou fesoasoani foi i le saunoaga a le Afioga i le Minisita ona o lea ua taua e lavea ai foi au. Sa ou sailia se fesoasoani i le tausaga ua tuanai mo le vaega tonu lea a le LTA, o le mea moni lau Afioga ua tolu tausaga o faatali se lipoti, e fesoasoani atu ai lau Afioga i le Minisita i le suesuega e pei ona taua, o lo o talia foi e i latou sa latou tauaaoina mai ia au le fesoasoani e le gata ia Aleipata ao Safata.

**FOFOGA FETALAI:** Ia lafo atu ia i le Afioga i le Minisita e fai i ai lau polo faasoa i le tulaga lea ma ia alofagia talosaga a sui usufono mamalu.

Tulai mai lau Afioga i le Minista.

**Tofa Hon FAAMOETAU LOA ULAITINO FAALE TUMAALII:** Faafetai, e le mama le mataupu lea i le Matagaluega leaga o lea ua afaina ai meaalofa o lo o aumai i totonu o le atunuu aua le faatupeina o le Poloketi ma ou te le o nofonofa foi i le iloilo ina ma le suesueina o cases ia ma aumai leaga o lea e tauvlea le tulaga o poloketi nei ma afaina ai foi vaegatupe ia e ono maua mai ia tatou paaga e fesoasoani ai i a tatou atinae.

Ona ou oo mai lea i le tulaga lea sa fesili ai se tasi o sui usufono i pisinisi o lo o faia e aunoa ma ni pemita. So o se atinae lava e faia i totonu o le atunuu e tatau lava ona i ai se pemita e faatino ai lea atinae. Afai la o lo o fai se atinae e aunoa ma se pemita, ou te iloa ua e run lava e oe le risk o le afaina o lau pisinisi pe afai ae maua atu e le Matagaluega i le faatinoina o le Tulafono. E tatau lava aua e tele aiaiga ma e tele foi galuega e fai e faamalieina ai le Tulafono ao lei tuuina atu le pemita po o le laisene. O lea la e i ai foi nisi o fai pisinisi ua pei foi lea na ona manao lava e fai aua ua maua le nofoaga faapea o se night club po o se nofoaga i totonu o le taulaga, fai loa ma le pisinisi ae leai se laisene ona momolitu mai loa lea e neighbours ona oo mai lea ua faasea mai i le Matagaluega, ao le faalavelave o le sese o le auala na amata mai ai le pisinisi. O lea e aioi atu ai ia alofagia sei uia auala o le Tulafono ao lei faatinoina ma le tele o le afaina o outou aua e taugata le tulaga o le pisinisi pe afai ae taofi ma le faatinoina ai.

O lea foi na fesili nisi o sui usufono i fuafuaga o le town plan, ua uma ona ou tali atu o lo o galulue ai le PUMA ma le MWTI e pei ona saunoa le Afioga i le Palemia i le plan lea o le Taulaga o Apia.

Ona ou oo mai lea i le fesili lea na fesili ai se tasi o sui usufono i energy divisions i lalo o le MOF ma le MNRE pe e le tatau ona tuufaatasi? O lau tali atu i ai i le taimi nei o lo o lelei le tulaga lea, aua o lalo o le Matagaluega o Tupe o latou ia e gafa ma policies ma finances i le suega o donors e ave i ai poloketi o lo o tapenaina mo le faatupeina. O malosiaga e le o faapitoa, e le pei o le MNRE o le renewable energy lea e faapitoa i ai, e le faapea la na o le MNRE o lo o lavea ai i i. O lo o i ai foi isi Pulega Tumaoti a le Malo pei o le LTA, EPC ma le SROS. O vaega uma ia o lo o lavea i totonu o energy suppliers i le tulaga o lo o i ai. E pei la o le function po o le aoga o le MOF o le coordinate ao isi Vaega Tumaoti o le faatinoina o le auaunaga. O lo o maioio lava functions ia e lua.

**FOFOGA FETALAI:** Tulai mai le sui usufono mo Aana Alofi Nu.3.

**Afioga Toeolesulusulu Cedric Pose Salesa Schuster:** Faafetai mo le avanoa, faafetai foi i le Afioga i le Minista mo le faamalamalamaina o se manatu e tuuina atu.

E faavae se lagona lau Afioga i le Minisita e pei ona e silafia le poloketi foi lea o le PICTAREP o lea e implement mai i le Finance, a o latou ia o lo o faatinoina, e le na o tupe la, ae pei o lea a talosaga atu i vaega tonu ia tau Green House Recovery Payment e pei o lea e faasino i o. E pei o se vaega lea sa avatu ai se fautuaga po o mafai ona vaavaaia, ona o lea foi ua e saunoa, o le renewable energy e i lalo o le Matagaluega o le Siosiomaga. Ae talitonu se lagona lau Afioga i le Fofoga Fetalai, tasi lea vaega tele e faaitiitia ai pili moni a aiga taitasi o energy efficiency. Ae pei ona maitau atu, e le o i ai se isi e pei ona e saunoa e oo mai i le taimi nei e le o i ai se Matagaluega e ao ona latou vaavaaia tonu.

O le talosaga lea ina ia mafai ona faatulaga ona e taua tele lea tulaga, ona e taua lea vaega i lau lea iloa mo le lumanai o le tatou atunuu. Faafetai.

**FOFOGA FETALAI:** Ou te fautuaina le sui usufono mamalu ona e maitau le Nofoa e taua tele le fautuaga, ona o lou naunau pea o lau Afioga e i ai le tomai faa-siosiomaga, e manaia lou afio i le ofisa o le Minisita e inu ai se lua

ipu kofe ona fai ai lea o le lua faasoa i mea ia e agai i ai fautuaga a lau consultancy, ina ia faafaigofie ona tuufaatasi mea ia ia faigofie ona maua uma alagatupe ia e te finagalo i ai e fai uma ai energy suppliers ma energy sufficient ma mea uma ia e te saunoa i ai. Ae tulai maia lau Afioga i le Minisita, ou te manatu ua manino lea tulaga e faasolo mai le tali.

**Afioga Hon FAAMOETAULOA ULAITINO FAALE TUMAALII:** Faafetai mo le fesoasoani mai foi a le sui usufono mamalu. Ma o lo o i ai le poloketi foi lea a le Pacific Energy Efficient Programme, o lea e nafa ma le tulaga lea o le faaititia o le energy loses, ae faafetai mo le fautuaga e pei ona tuuina mai.

Ona ou oo mai loa lea i le tulaga foi lea o le galulue soosootauau a le vaega lea o le Matagaluega o Faatoaga faapea foi le SROS ma isi vaega i totonu o le atunuu. O lo o tele galuega o lo o faatino faatasi e le Matagaluega (MNRE) ma isi, faapea vaega tumaoti e i ai le SROS.

I le tulaga lea o le talo, o lo o galulue faatasi ai le SROS ma le South Pacific Commission i lalo o le polokalame lea e taua o le PARDI po o le Pacific Agriculture Research and Development Initiatives. E pei o le PAEDI lea e sau ai le funding lea. O le faatinoina o le research o lo o vaevae lelei lava i vaega, e tofu le USP, SROS ma le MAF ma le vaega e faatino. E tofu lava le vaega ma lana matafaioi e faatino. Ma o lo o agai lava i ai e tai pei la o le tulaga o le talo lea ua uma ona develop e le MAF ituaiga talo ia o le a develop, a o le SROS e suesue i le tulaga o le lelei atoatoa o le talo i le tulaga o le taumafa. E le gata i le taste a o le nutritional value, o mea uma na o lo o galulue ai, atoa foi ma le umi ona lelei le talo, e faatatau lea i maketi i le ave i fafo, i le tulaga la lena o lo o galulue faatasi uma ai itutino ia o le Malo ina ia fesoasoani i le atinae o le talo mo le lumanai.

Ou te manatu ona pau ia o mataupu na laga mai e sui usufono. Ma le faaaloalo lava.

**FOFOGA FETALAI:** Ia malie lau Afioga i le Minisita toe toalua lava nai sui usufono ia masalo... se i tulai muamua lau Afioga i le sui usufono mo Faleata Sisifo.

**Tofa Lealailepule Rimoni Aiafi:** Lau Afioga i le Fofoga Fetalai, faafetai lava i le Afioga i le Minisita i le tali maeaea i le tele o fesili. A o le vaega taua lea sa laga e lou nei sui usufono ma ou te tautala pea i ai i taimi uma ona o le taua o le Matagaluega lea o le SROS. O le mea mautinoa lava, o lea ua uma ona tino mai nisi o suesuega ua faatino. A o le fesili lea e miliona lona tau, pei o le fesili muamua lea e fesili ai le faipisinisi, pe valuable, ona alu lea e fai. O le mea la lea lau Afioga, o ita ia, ta te fia vaai o faatino mai, e o atu le aufaipisinisi e fai ua ta fia vaai i mea o lea ua faatino. Aua e pei o le taimi nei, na ona faatino lava ma ia faatu mai foi lele, like all dress up and nowhere to go. Lau Afioga, e pei o le mea lea e tau tatai i ai lou manatu, pe i ai se business model a lau vaega ia alu atu le tagata faipisinisi ae faapea mai o le tau lea e fai ai ma mea ia e fai ai ona fiafia lea o le tagata ia complete atoa le package na i lo le fai ma taofi, ma e mei i le isi mea fou e fai, ae o lou manatu, ua tatau ona tino mai ni falegaosi e tatou te fiafia uma ai. Ma le faaaloalo lava.

**FOFOGA FETALAI:** Malo faafetai. Tulai mai le sui usufono mo Faasaleleaga Nu.4.

**Afioga Peseta Vaifou Tevaga:** Faafetai tele lava i lau afioga i le Fofoga Fetalai, faamalo foi malele i lau Afioga i le Minisita, e faigata foi oe o le Minisita mai Matautu, po o le paia foi lea i le Aiga Sa Peseta. O le agaga lena na ala ai ona tuai ona ou tulai atu ona ou te ava tele i lau Afioga a o lo o e sausau. Na o nai mea lava ou te fia faamanatu atu lau Afioga, ona o nai mea ia na ou avatua ananafi ia, sa ou musu e vave atu ona e taputapuai pea lau saunoaga. O si ou nuu lea o Puapua i mea foi ia na aafia i lologa lea ua aveese ai le falesa, ne i te i ua toe maua mai e galu ona toe afaina foi lea o le aualatele o le Malo aemaise foi o nai aiga o lo o taulalata ane. E faapea foi la i le isi mea lea na aafia i si ou nuu i Asaga, lea na aafia foi le auala sima, o i ina tonu lava i augutu o le vai, na solo uma i lalo, a o i ina lea o lo o i ai le faasao a si ou nuu, lea e tua i ai si ou nuu i le ia lea o le tilapia, o anae ma tuna. Ia na ona faamanatu atu lava i lau Afioga ne i galo, ona o tulaga ia e tatalo atu ai i lau Afioga e ave i ai le faamuamua i le faasoa a lau Afioga ma le Matagaluega. Ma lou faaloalo lava.

**FOFOGA FETALAI:** Malo faafetai o lea ua maua le finagalo o le sui usufono. Malie le Minisita se i tulai mai le sui usufono mo Aana Alofi Nu.3.

**Tofa Toeolesulusulu Cedric Pose Salesa Schuster:** Lau Afioga i le Fofoga Fetalai, e le i tele sau faamatalaga i le SROS, a o le fautuaga lau Afioga i le Fofoga Fetalai, ona sa ou taumafai e faailo nisi o auala e mafai ona tagatagai i ai le Pulega mo le agaigai i luma. Ae ou te talitonu o le taimi nei ua silia ma le 700 i le 800 laau i totonu lava o Samoa. E i ai foi le vaega lea o le bio-prospecting, o le tele o atunuu lea e mafai ona latou suesuea ma maua mai ai companse, patent, ona fai ai lea o fualaau. E pei ona masani le tatou atunuu i le vaega lea o le mamala. Atonu o se fautuaga i lau Afioga i le Fofoga Fetalai, a mafai aua e le taugata tele le faatauina o masini ia e fai ai nisi o screening ia, atonu e mafai ona sell e mafai foi ona maua mai se seleni a le tatou Pulega ma mafai foi ona taofia i totonu o Samoa le puleaina o nei laau. Faafetai.

**FOFOGA FETALAI:** Malo. Malie le Minisita se i tulai mai le Afioga i le Taitai o le Itu Agai.

**Afioga Hon Palusalua Faapo II:** Lau Afioga i le Fofoga Fetalai, mo le faasaoina o le taimi o le Minisita, o lea ua maua tonu mai lava e le Minisita le mataupu sa lavea i lau lauga, o le fale foi lea o le SROS lea ua maea ona totogi le ata ae oo mai lava i le aso e le i fausia. Pe mafai ona faapuupuui mai e lau Afioga lea tulaga, ona ua fai si leva ona totogi o le ata, ae oo mai lava i le aso e le i.... Pe fai pe leai pe le afaina lea tupe ua alu i le ata. Ma lou faaloalo lava.

**FOFOGA FETALAI:** Ia, e manatu tele i lo tatou va nonofo. Ae o lea lava e tau talatala atu ae pei ona silafia o lea ua tali le Malo i fesili na tuuina atu. A o fesili ia e lua; o fesili fou uma lau Afioga i le Minisita. Ae o le a tuu atu pea i le lua va tapuia ma le Aiga Sa-Tunumafono Matautu ma le Itu Aana. Ua

uma ona fai i ai e faaopoopo i luga o le lua talanoaga ma le mea lea tau fualaau o mamala, o maali ma talie, pau, ifilele ma malava. Ae o le a tuu atu pea i lau Afioga i le Minisita.

**Afioga Hon FAAMOETAULOA ULAITINO FAALE TUMAALII:** Faafetai. E ui lava ina fou nisi o fesili, ae o le a taumafai lava e tali atu. O le tulaga o oloa o lo o gaosia i totonu o le SROS, o lena ua silafia, ua uma ona test le falaoamata mai le ulu, ma o lea na aumai faapitoa lava le Chef mai Amerika, lea na fai mai lana polokalame o le kuka i luga o le TV i le tulaga o le faiga o pizza ma isi taumafa e gaosia mai i le falaoamata. Ia manatua foi, o le SROS lava ia o le Scientific Research Organisation, na o le develop lava o new products ma fai scientific research, a o le au faipisinisi, o latou e faatinoina. O le tulaga foi la o le tapenaga o le commercial policy po o se model po o se mea faapena, o lo o fai foi i totonu o le SROS i le tulaga lea o le fai atoa mai lava i raw materials seia oo lava i le final product o le oloa ina ua uma ona pack lelei. O le mea la lena e i ai, e pei foi la o isi oloa ua uma ona faaalua e le fale suesue faasaienisi, o le tulaga lea i le suauu e kuka ai taumafa e gaosia mai i le avoka. O le isi tulaga o le mea lea o le bio-diesel ua uma foi ona test ma o le la ua utu ma feoi ai taavale a le SROS faapea taavale a le MNRE, faapea foi taavale a diplomatic corps ia e pei o le SPREP ma le Amepasa o Amerika. O le fesoasoani malosi lena i le faaitiitia o greenhouse gas emissions o lo o faapogai i le fesuiaiga o le tau. O lo o i ai foi isi poloketi o lo o faatino i totonu o le SROS e fesoasoani i lea tulaga.

O le tulaga i le fesili a le sui usufono mo Faasaleleaga Nu.4 i le tulaga o le auala laupapa ma le vaitafe, e pei lava o lena e i ai i totonu o le lisi lea na tapena e le Matagaluega, se i ou siaki i ai i le tulaga lena i Puapua?

O le fautuaga a le sui usufono mo Aana Alofi Nu.3 i le tulaga o laau foi nei e i ai o latou public health claims po o le aoga foi e togafitia ai gasegase mo vai ma isi tulaga. O lo o i ai le poloketi o lo o faatino nei i totonu o le SROS e tau o le medicinal herbs o lo o vaavaai i tulaga ia o vailaau nei e maua mai i laau ia. Ma o lo o latou suesue nei i ai i le tulaga lena e pei ona faafesiligia e le sui usufono mamalu. O lo o i ai foi e o lo o faigaluega i totonu o le SROS, o lea ua sue atu o latou faailoga maualuluga e i ai le MSc ma le PhD i totonu o Iunivesite i Niu Sila, ae fai atu suesuega iinei i le tulaga lea o le faiga o research ia i ituaiga laau eseese. Ma o le mea foi lea o lea e faamalosia e le Faalapotopotoga ina ia aua ne i omai tagata mai fafo ma claim faapea o latou o experts a tatou laau, ae faaletonu tatou e ona meatotino ma oloa faalenatura nei.

Ona ou oo mai ai lea i le fesili mulimuli a le Taitai o le Itu Agai, e moni ua uma ona draw le plan o le fale lea, ma e le o nofonofo ai le Faalapotopotoga o le SROS, o lo o taumafai e sue se donor e faatupeina le fale lea. Afai e submit i se likely donor, e manao e vaavaai i le full package ua uma lelei ona tapena le proposal. E pei o le tali atu lena i le faafesili a le sui usufono mamalu. Ona pau ai lea o fesili ua uma ona faaoo mai i lenei Sector. Ma e momoli atu lau faafetai i lau Afioga i le Fofoga Fealai i le faatautaia o le tatou Fonotaga aemaise foi o le mamalu o le Fonousu a Samoa. Soifua.

**FOFOGA FETALAI:** Faafetai tulei saunoa i lau Afioga i le Minisita mo Punaoa Faalenatura ma le Siosiomaga. E talitonu e manino ma malamalama le tofiga o lau afioga ona e le faigofie. O lo tatou atunuu, e oge i oa eseese o



minerale ma mea eseese, ae peiseai ona pau lea o le mea o lo o tatou tua i ai o oa faalenatura, faafetai. E manatu ua manino ma malamalama atugaluga o fesili ma fautuaga na tuuina atu e Matagaluega aemaise o sui usufono mamalu na lagaina atu mataupu, malo le galue malo le onosai.

O lea ua tatou taunuu mai i le Afioga i le Minisita mo Aoga, Taaloga ma Aganuu, lau Afioga i le Sao Magele, e le tau faafuluina le paia maualuga, le paia i Aiga Salevalasi, le paia i le Tootoalii, Leauanae ma Sasulu.

Tulai mai o lea ua avanoa le Maota mo le saunoaga a lau Afioga i le Sao.

**Afioga Hon MAGELE MAULIU (Minisita mo Aoga, Taaloga ma Aganuu):** Lau Afioga i le Fofoga Fetalai, e manatu o Samoa ua uma ona tofi, e le toe faamaupueina pe toe mamanuina aua ua taoto a o se alao. O paia le popo foi ma ona pa le solo, ia o paia e faavavau. Ona ou faapea lea, o le a nuunuu atu paia ia.

Ou te manatu foi e faapea le tapuaiga a lou itumalo o Faasaleleaga Nu.1 i ona tupu ma ona ee, faleupolu o tofiga ma failauga, faletua ma tausi, saao ma tamaitai aemaise le malosi o le afioaga, aemaise le tapuaiga mamalu a le Aufaigaluega Paia o le Talalelei i Fata Faitaulaga e fia i totonu o le itumalo. Ona ou faapea atu lea ma le faaaloalo, tapuai maia, o lea ua uma ona sausaunoa Gatoloai i lo ma vaa seelua, a o si au agiagi lea e tau faamatala ai nisi o mataupu e pei ona laga e sui usufono mamalu.

Lau Afioga i le Fofoga Fetalai, o le aoaoina o le fanau o le aia tatau, “Education of our children is a right, not a privilege.” O le talitonuga lea o lo o faavae ai e lo tatou Malo le atinaega o aoaoga mai lava i le taimi na tulai mai ai le Vaega Faaupufai lenei e tauaveina le Malo o Samoa. O le aoaoina o fanau o le aia tatau.

O le talitonuga foi lea o lo tatou Malo e le ese ma le talitonuga o le Fai Salamo, “Faaauta, o le fanau o le tofi lea mai le Alii.” O le a le uiga o le tofi? O le responsibility. Faaauta o le fanau o lau responsibility mai le Alii. A o le a lea mea o le responsibility? A lea na toe tali lava le poto o Solomona i le Faataoto? Ia aoao ia le tama e tusa ma ona ala aua a oo ina matua lava ia e le toe tea ese ai.

Lau Afioga i le Fofoga Fetalai, mai le faavae lea a le Faigamalo o le aoaoina o le tamaitiiti o le aia tatau, lea na fanau mai ai poutu taua e fa lea e poupou ai le atinaega o le Ofisa o Aoga, le Matagaluega ma le tatou atunuu i le taimi nei.

1. Access: ia lava aoga, faleaoga, ia tulata ia aua ne i o mamao tamaiti e sue le faleaoga.
2. Equity: ia maua avanoa tutusa, e le faailoga lanu, le faailoga tagata ma le faailoga tapuaiga.
3. Quality: ia maualuga ma aloaia le aoaoina; ma le poutu lona fa,
4. Ia talafeagai ma manaoga o le atunuu ma manaoga o le tamaitiiti lava ia mataupu ua aoaoina.

Lau Afioga i le Fofoga Fetalai, e oo mai i le taimi nei e silia i le 100 a tatou aoga amata ua i ai. E 142 Aoga Tulagalua a le Malo. E 24 Kolisi ma aoga maualuluga a le Malo, ae tolu a tatou Iunivesite; o le Iunivesite Aoao o Samoa, o le OUM ma le Iunivesite tuufaatasi lea o le Iunivesite a le Pasefika i Saute.

Lau Afioga i le Fofoga Fetalai, ua tóatele fanau ua aoga lava i o latou nuu ma o latou itumalo, ae ui i ia laasaga taua, e le o nofoai le Malo ma le Matagaluega o lo o vaavaai pea i mea e faaleleia atili ai le auaunaga a le Ofisa o Aoga.

Ua le toe i ai se suega o le Tausaga 8, o lea o le a faigofie ona see atu tamaiti i le Vasega 9 e fua i le mafai e le tamaitiiti ona aoina le tomai, le poto ua faatulagaina e le toe fuafua i togi e maua i suega. O le pa puipui lea sa i ai le fanau.

O le tausaga nei, o le a localise ai completely le school certificate ma le PSSC. Ua siitia togi ia e ulufale ai i le Iunivesite Aoao o Samoa mo le tikeri o le Bachelor of Education. Aisea ua fai ai lea tulaga? Ina ia malolosi tamaiti e aotauina mo le faafaiaoga. O lo o galulue nei le Matagaluega ma le PSC e toe faatulaga totogi o faiaoga.

O le taimi nei o lo o faatali e le Kapeneta se fautuaga a le Remuneration Tribunal mo ni faatosina ma ni totogi talafeagai mo faiaoga o le matematika ma le faasaenisi.

Lau Afioga i le Fofoga Fetalai, o lea ua maea le isi suiga tele. Ua sui mai le tolu kuata i le fa kuata o le tausaga faale-aoaoga. O lea foi ua fuafua le Matagaluega e sui taimi aoga mai le 9.00 i le taeao i le 3.00 i le afiafi mo Aoga Tulagalua, ae 9.00 i le taeao i le 4.00 i le afiafi mo Aoga Mauululuga. O lea suiga ina ia lava le taimi mo le aoaoina o mataupu e le o lava le taimi e pei o le matematika, kemisi, fisiki, biology ma le general science. E faaoga foi le taimi faaopoopo mo extra curricula activities e pei o le faitau tusi i le faa-Samoa ma le faa-Peretania, o le atiaeina o taaloga i so o se taaloga i totonu o aoga, o le tusiata, musika po o a lava nisi o ituaiga o mea e vaai atu faiaoga e talafeagai.

Lau Afioga i le Fofoga Fetalai, o nei suiga e le o ni suiga na faivavale. O suiga e faavae i luga o suesuega lea e faamauina ai le tele o le aoga o itula faaopoopo i le taumafai o le tamaitiiti. E o faatasi le sui o le taimi ma le faamalosia o le tatou zoning ina ia taofi tamaiti i aoga i o latou afioaga ma o latou itumalo ina ia aua ne i lolofi mai i Apia ma tumutumu vale ai i le taulaga.

Lau Afioga i le Fofoga Fetalai, aua tatou te fefefe e fai suiga. A tatou fefefe tatou te le laa i luma, ae le o ni suiga foi e ta i ni papa maa. A tatou o atu foi e i ai ni faaletonu, e faapena. A o le faanaunautaiga o le taimi o le tamaitiiti aoga. O le taimi o a tatou aoga e fa mataupu aua a tele mataupu a le tamaitiiti o le lima, a o le taimi lenei e fitu mataupu, valu isi ae iva isi, a o lea lava e tumau le taimi e pei ona tatou i ai i aso ia. O lona uiga o lea e iniini mai isi itula uma ma ua le lelei le aoaoina. O le tala lea a le isi Pule Aoga, o la e fai aoga afiafi ona ua le lava le taimi.

Ua tuufaatasia e le Matagaluega se poloketi e toe matimati ai ma faalautele le aoaoina o tomai o matata eseese ina ia mafai foi ona faaoga Aoga o Matata Eseese ia e tupulaga talavou o le atunuu ua leai ni galuega.

Ou te faafetai i le sui usufono mo Vaimauga Sisifo i lana saunoaga malamalama i fuainumera na aumai. O lea ua tatou iloa ai, o Vaimauga le isi itumalo o lea e tumu ai talavou potentially, ia o tagata faatupu faalavelave ia i le lumanai. O le a le tatou galuega e fai? O lea ua silasila i ai le Matagaluega, afai e maua mai se poloketi i a tatou paaga, tasi lea vaega o le atunuu e muamua i ai.

Lau Afioga i le Fofoga Fetalai - corpora punishment. O le Tulafono a le Ofisa o Aoga lea e i ai nei, na o le pai lava faapea (*faatusa i ona aao*) i le tamaitiiti faasala le faiaoga ma tuli. O le mamafa lena o le Tulafono lea e i ai. Ua i ai faiaoga ua tutuli, leaga na o sina tamai po lava ae aafia ai. E avea foi le Tulafono lea e fai ma mea e leai ai ma se tamaitiiti e fia faiaoga. O ai a fia faiaoga, a mao sau po i le tamaitiiti ae tuli oe? O lea e silasila le Matagaluega i le Tulafono lea pe toe fai sona teuteuga. O le taimi nei lau Afioga i le Fofoga Fetalai, o lo o sikolasipi tamaiti uma o le Year 1 i le Year 8. O lea foi ua faagasolo fuafuaga e sikolasipi ai tamaiti uma i le Year 9 i le Year 11.

Sa taua e se tasi o sui usufono, o le a le mea e le tuu atu i ai ma le Year 12 ma le Year 13. Ae tuu e a na mea lelei pe a maua le tupe? O sikolasipi ia na ou taua e le o ni sikolasipi e o i fafo, a o sikolasipi e aoga fua ai e totogi e le Malo pili, e le tataua ona toe i ai se faanoi e le alu ai se tama po o se teine i se aoga.

**FOFOGA FETALAI:** Malie lau Afioga i le Minisita mo Aoga, Taaloga ma Aganuu, e manatu o lea ua saausi lava le faafofogaaga a le Maota i le saunoaga ma le folasaga i lenei itula aafia. Ae ou te momoli atu vaimalu i puega ona o lea ua tatou taunuu i le tatou taimi malolo o le aafia. O le a tuu atu le avanoa e toe faaauau ai le saunoaga pe a tatou toe taliu mai.

Ou te faasilasila atu o le a faataatia ese Taulumaga masani a le Fono Aoa o lana malologa masani o le aafia.

*Na motusia Felafolafoaiga ina ua faataatia ese Galuega a le Fono Aoa o le itula e 7:00 i le aafia seia aulia le itula e 8:00 i le po.*

*Na toe faaauau Taulumaga a le Fono Aoa o le itula e 8:00 i le po.*

**TULAFONO TAU FAAOFI O LE FAATATAUINA O TUPE  
FAAOPOPO (NU.2) 2012/2013 MA LE TULAFONO TAU FAAOFI O  
LE FAATATAUINA O TUPE 2013/2014 – felafolafoaiga faaauau i luga  
o le faitauga faalua**

*Na toe faaauau felafolafoaiga.*

**FOFOGA FETALAI:** Ou te faasilasila atu ua toe amatalia nei Taulumaga a le Fono Aoa Faitulafono. Ou te manatu ua matu fau i le taliga o le sua i a outou Afioga i sui usufono mamalu, ua maua foi faasiliga malosi aua lava le faaauauina o le tatou Fonotaga i lenei itula o le po.

E malolo le tatou Fono mo se malologa o lo o faapea ona saunoa le Afioga i le Minisita mo Aoga, Taaloga ma Aganuu e talifuaitau i mataupu sa laga e sui usufono e uiga i lana Matagaluega. Ia, tulai maia lau Afioga i le Minisita mo Aoga, Taaloga ma Aganuu e saunoa.

**Afioga Hon MAGELE MAULIU:** Faafetai lava i lau Afioga i le Fofoga Fetalai mo le avanoa ua tuuina mai e toe faaauau atu ai lau tali i mataupu sa laga e sui usufono e uiga i lenei Matagaluega o Aoga, Taaloga ma Aganuu.

Ia ona ou oo mai lea i le Project lea na amata i le 2007, e i ai ni faafitauli na faafeagai ma lea poloketi, ona ua vave ona fai e le lava le infrastructure. Peitai o lea ua lelei nei le tatou infrastructure, o lea la ua logoina mai e toe sauni e amata i le tausaga fou le poloketi lea.

O le faatalatalanoa ole Matagaluega ma le Komiti Faafoe o Aoga Amata i le taimi nei le talosaga e totogi e le Malo totogi o faiaoga amata. E le faigofie a o lo o i ai faatalatalanoaga i le taimi lenei.

O le tatou polokalame o faleaoga o lo o faagasolo pea, o a tatou paaga o le malo o Saina, o le malo o Iapani ma le polokalame tuuafaatasi lea a le tatou Malo o le CSSP. E fautuaina le mamalu o le atunuu ia silasila i le JICA ma le CSSP ona e fai si tuai o faleaoga ia o Saina. O le polokalame la lea e le faatumua e au tou forms, tou te o lava outou e fai a outou talosaga i le JICA ma le CSSP. A o isi talosaga uma ua uma ona faapepa, aua le popole, e leai lava ma se talosaga e leiloa o la e ua lisi uma, ae ala ona tuai ona le utiuti o le seleni.

O malae taalo, e faasolo pea o tatou malae taalo, masalo e le o toe umi ae fai le faaiuga a le Tenders Board i tatou malae taalo.

**FOFOGA FETALAI:** Malie lau Afioga i le Minisita se i tuu atu le avanoa i le sui usufono mo Alataua Sisifo. Tulai mai le Afioga i le sui usufono mamalu.

**Afioga Lafaitale Patrick Leiataualesa:** Masalo e leai se agaga e fia faalavelave i le saunoaga matagofie a le Afioga i le Minisita mo Aoga. Ae ua ou tulai atu ma le agaga faaaloalo, na pau lava lea o se vaega o atinae na oo i ai le matou talosaga ma Minisita uma lava ia, sa i ai le agaga e le toe tatalo i nisi mea ua lava ma totoe le suavai taumafa o lenei itumalo. Ae ua ala ona ou tulai atu ona o la e faafofoga mai le itumalo lenei. Na ona ou fesili atu, masalo na i ai se tou feutanaiga i se taimi ua sola i se kolisi a le nuu lenei. Masalo e silafia e lau Afioga i le Minisita, o a lava mea e tulai mai ou te agai sao atu lava i lau Afioga. O lena foi sa tatou feiloai ina ua taunuu mai si ou nuu o Falelima, ma o ala ia o mea. A o le kolisi lenei, o lea la ua fai fai tonu sa fai, o lea ua toe omai nei le nuu fai mai o le a sau le latou malaga i le Palemia. Ou fai atu lea, ‘tou te o e a i le Palemia?’ Agai sao mai i le Minisita mo Aoga ma talosaga, tatou ui i ala o mea. Ia ai sa fetuunai ma tulaga faapena, o lea la ua ou fesili atu, pe e te malamalama i le vaega lea, leaga o la e faafofoga mai le itumalo, e fia iloa po o fea tonu e taoto ai le vaega lea, po o ai sa fai upu i le tulaga o lea faamoemoe. Ma le agaga faaaloalo.

**FOFOGA FETALAI:** Faafetai mo le faafesili. Tulai mai lau Afioga i le Minisita.

**Afioga Hon MAGELE MAULIU:** Faafetai mo le fesili a le sui usufono. O lea sao u talanoa faalauaitale atu, e le o le le iloa e le Matagaluega o Aoga o le tou talosaga. A ia silafia e le sui usufono, a muamua mai le talosaga a le isi nuu, e alu i le faasologa. O le tulaga lena e i ai. E le o le iloa la le tou talosaga, o la e ua uma ona fai le galuega a le Matagaluega o Aoga i le itumalo ma le tulagalua, ua faamalieina aiaiga uma. Ae pei ona ou fai atu, e tele manaoga ae leai se tupe, o lea la e faasolo ai, a oo mai lava i le taimi, o le

taimi lena. Ae afai tou te manao vave i le isi ono masina ua maua le tali, o la e i ai le tatou JICA ma le CSSP.

**FOFOGA FETALAI:** Malie lau Afioga i le Minisita se i toe tuu atu le avanoa i le sui usufono mo Alataua Sisifo.

**Afioga Lafaitale Patrick Leiatuaalesa:** E leai se agaga e faalavelave i le saunoaga matagofie. E matagofie tele le saunoaga, ae ua ala ona ou tulai atu, ona e le o matou na vave mananao mai i se mea. O le ala lena o lou fai atu, o lea ua fesili mai nei toeaia ia te au, ia, se i matou o atu, ae matou te le i mananao i se kolisi, e le o au foi na faia. Ae ua ala ona fesili mai toeaia, ona sa offer le taimi, ua tea le taimi na offer ai ia mea, ae leai lava ma se mea o taunuu.

**FOFOGA FETALAI:** Ia, malie ia le finagalo o le sui usufono. E manatu ua malamalama le folasaga a le Afioga i le Minisita. Ou te talitonu foi o lea ua saunoa malamalama le Afioga i le Minisita o lo o i lalo o le faasologa o polokalame o mea tau aoga. Ae ina ia faapuupu ai le mataupu i le tulaga, o lea ua faafofoga manino le itumalo ua tali le Minisita, ia, o lea foi ua manatu ua matua malamalama lelei le tulaga o le faamalamalamaina o lea mataupu. Tulai mai lau Afioga i le Minisita.

**Afioga Hon MAGELE MAULIU:** E faaauu atu pea a tatou malae taalo, masalo o lo o i le Tenders Board le tulaga lea mo tatou malae taalo na muamua mai ona faasolo atu ai lea. Aua le popole e uma lava ona fai outou malae e le i oo i le palota. Taimua le kolisi o Pesega i le faiga o le latou foundation. E le o toe avea la a latou tamaiti i le foundation a le NUS, a ua maitaulia le papatutui pea o le foundation a le NUS. Ma o le mea lea sa talanoa ai foi i ai le Matagaluega i le tulaga lea, ma o lo o fai feutanaiga ma le NUS i le tulaga e foia ai le faafitauli lea, aemaise o se tulaga foi lele e tilotilo ai i le faaofi mai i lalo o tatou colleges i se taimi talafeagai.

O lo o i le Kapeneta nei le pepa e talosaga ai le Kapeneta i se talosaga mo a tatou lava aoga i fanua ia e lisi e tatou aoga mo se faamamaavega. O se taimi ona fai lea o se faaiuga a le Kapeneta, o lea foi e i ai lou uso a Minisita, o le tulaga lea.

Lau Afioga i le Fofoga Fetalai, e faauma atu ai e faapea; fai mai le isi faiaoga tautaua lava; “The education of our children is far too important to be left to the teachers alone.” Ona o le taua tele o le aoaoina o le fanau, e le mafai la ona tuulafoai le galuega lea e tauave na o faiaoga. E moomia le galulue faatasi o matua ma le pule a alii ma faipule, ia tatou galulue faatasi i le atinae o aoga a tatou fanau ina ia taunuu i le manuia.

Ona faaiu atu ai lea lau Afioga i le Fofoga Fetalai.

**FOFOGA FETALAI:** Malie lava lau Afioga i le Minisita, e i ai lava nai mataupu laiti ia e lua. Faapuupu mai lau Afioga i le sui usufono mo Aana Alofi Nu.3.

**Afioga Toeolesulusulu Cedric Pose Salesa Schuster:** Faafetai lau Afioga i le Fofoga Fetalai, faafetai atu foi i le Minisita mo le tali malamalama i manatu foi sa faapea ona faaali atu. Na pau le vaega lau Afioga i le Minisita,

faafetai atonu o lea ua e taua le vaega lea mo tatou high schools i vocational training. O se tasi o vaega o le faafesili sa avatu i le taimi ua tuanai, e le gata i high schools, ae po o tapena se vaega lea ona o le tele o tatou tamaiti lea e au maka i le Iunivesite e pei o le Polytechnic sa i ai i aso ia, e tele ina see i ai tatou alo ma fanau e le au i lea vaega, faamolemole.

**FOFOGA FETALAI:** Malo faafetai. Ia, tulai mai le Afioga i le sui usufono mo Faleata Sisifo.

**Tofa Lealailepule Rimoni Aiafi:** Faafetai lava i le Afioga i le Minisita mo le tali matagofie. O sina fesili puupuu lea i le tele o fuafuaga ia ua faataatitia ma faagasolo, fuafuaga fou. Ae pe i ai la se body foi lea, se vaega e vaavaaia po o talafeagai ma tino mai ia lelei. Ou te talitonu na o le vaega lea a le SQA, ae lea pei na o luga i le secondary level. Po o i ai la se fuafuaga a le Afioga i le Minisita ma le Matagaluega e amata mai i lalo i le primary level po o lalo i le pre-school level, ina ia faigofie ona galulue faatasi ma tatou iloa ma mautinoa le lelei atoatoa o kolisi ia ua fai ma isi aoga. Ma le faaaloalo lava, faafetai.

**FOFOGA FETALAI:** Faafetai. Ia tulai maia e faauma mai le saunoaga ma fai le tali faaiu lau Afioga i le Minisita.

**Afioga Hon MAGELE MAULIU:** Lau Afioga i le Fofoga Fetalai, o le sui usufono mamalu mo Aana Alofi Nu.3, o lau folasaga i le amataga lea sa ou taua ai aoga i le matata esese ma tatou kolisi. O fuafuaga foi lea i kolisi uma pe afia lava e lava le seleni aua la fanau foi nei e le malolosi tele, ae faagasolo i ai i latou, afai e malolosi lava, ua mafai ona omai i le tatou aoga o le matata esese.

Ona faauma atu ai lea, faafetai tele. Ia manuia tele lau Afioga i le Fofoga Fetalai, manuia le Taitai o lenei Itu faapea foi le Taitai o le la Itu, manuia le tapuaiga a Ofisa Sili o Pulega o Matagaluega. Ia manuia le po.

**FOFOGA FETALAI:** Malo. Faafetai saunoa i lau Afioga i le Minisita mo Aoga, Taaloga ma Aganuu. E momoli atu le agaga faafetai tele ona o le folasaga matagofie, ou te manatu foi ua manino ma malamalama ai finagalo o sui usufono na faaalua. E momoli atu foi le faafetai tele i le Ofisa Sili o Pulega ma le tatou Matagaluega o Aoga, e le mafai ona fesiligia le tele o le sao taua o le Matagaluega ma le auaunaga. Ou te talitonu o se atunuu aoaoina lelei, o se atunuu manuia. Malo faafetai mo tali ua tuuina mai aua le taumafai e toe tali atu i finagalo na faaali.

Ia ua tatou taunuu mai i le Afioga i le Minisita mo le Soifua Maloloina. A o le i oo atu i lau Afioga i le Minisita, e faaleoina lenei avanoa taua i le agaga faaaloalo ia te au nei o le Fofoga Fetalai, ou te momoli atu ai le faafetai faapitoa i lau Afioga i le Minisita mo le Soifua Maloloina ona o le aafia ma le valaaulia faaaloalo o le Palemene o Samoa, o au nei o le Fofoga Fetalai ma le Failautusi o le Fono. Faafetai tele mo le manatu mai ma le valaaulia na tuuina mai na tatou malaga atu ai i Finland ona o le tulaga o nisi o polokalame faalauiloa o le faaauauina o le polokalame o le soifua manuia o tagata. Ma o lenei polokalame e tautino atu le tele o le taua o le sootaga vavalalata e faaauau ai pea le faiga paaga lenei a le Palemene ma le Matagaluega o le

Soifua Maloloina e ala i le Komiti faa-Palemene o le SPAGHL. Ma e momoli atu ai le agaga faafetai tele i lau Afioga i le Minisita, ma ou te augofie lava i au malaga uma e te finagalo e valaaulia ai au ma le Failautusi o le Fono. Its gonna be a long term partnership. E manatu foi ua faamalieina le taimi sa i ai ma le tele o le aoaoina o le faatulagaga o le tatou declaration o le non-communicable diseases. O le manatu ma le manulauti o le fonotaga i le tausaga lenei, o le health in all policy. O lona uiga, e aafia uma le mea tau health i policy uma a le Malo. E momoli atu ai le agaga faafetai tele, e le mafai ona omiomia faaniualeale lau Afioga i Alo o Tamaalelagi lau Afioga i le Minisita, e momoli atu le agaga faafetai tele e faaleoina ona o le valaaulia o le tatou Palemene sa fai ai au nei o le Taitaifono o le tatou Komiti o le SPAGHL. Ia malilie isi sui usufono e le i o e le uma le faiaso a le Alii. E i ai se taimi ona omai lea e alu le tatou malaga i Manono e faamalie ai outou finagalo.

O lenei itula, tulai mai lau Afioga i le Minisita, o mamalu ma sa o le paia i Aiga o Mavaega, paia o Satuala, mamalu i le Faletolu ma le Lauti na laulelei, ia tulai maia e tali mo le saunoaga a le Matagaluega.

**Afioga Hon Palusalue Faapo II:** Lau Afioga i le Fofoga Fetalai o se mea e fia malamalama ai.

**Afioga Hon TUITAMA TALALELEI TUITAMA (Minisita mo le Soifua Maloloina):** Faafetai lava i lau Afioga i le Fofoga Fetalai mo le saunoaga faalaeiau.....

**FOFOGA FETALAI:** Ia malie lau Afioga i le Minisita, o e fesili mai i lau folasaga po o e fesili i le Minisita.

**Afioga Hon Palusalue Faapo II:** Aua e maitauina e lau Afioga i le taimi o felafolafoaiga e toeititi atoa le tai 30 minute o faamalamalama mai e le Afioga i le Minisita mea na laga, o la la ou te toe tulai atu ai, ou te le iloa la po o a isi mea e toe faamalamalama, ae ua maea ona tali mai le Minisita. Pei o le mea lea e fesoasoani atu ai i le tatou galuega o lenei afaifi.

**FOFOGA FETALAI:** Ona o oe o le sui usufono matua o le SPAGHL e tatau lava ona e faaaloogia le tali mai a le Minisita, o mea ia na tali mai ai le Minisita e na o ni nai vaega, o lea o le a tatou faalogologo lelei i le tali aloaia a le Minisita i lenei afaifi e faamalamalamaina ai atili polokalame sa lagaina e le tatou Maota.

Ia tulai mai lau Afioga i le Minisita ua avanoa le Maota e tulei saunoa.

**Afioga Hon TUITAMA TALALELEI TUITAMA:** Faafetai, lau Afioga i le Fofoga Fetalai e mafiafia le mea lea ou te...leai e faapena foi se lagona, e leai se isi mea ou te toe lauga ai o lea ua maea, ae na ona ou fia pai atu i lou itumalo ia ona ou toe malolo lea.

Ae ia ee i fatalele lau Afioga i le Fofoga Fetalai, mapu ane foi i...le Taitai o le Malo ma le aiga Kapeneta, tainane foi le puapua ma ona la i le ee papaaao o lona itu o le Maota e faapea foi lenei itu o le tatou Maota Fono, ae faapea foi ona pai atu ma le agaga faaaloalo aua le tapuaiga a Lana Afioga Mamalu O Le Ao o le Malo ma le Masiofo, faapea foi le Sui o le Fono a Sui Tofia ma

le Masiofo. Le faafofoga tapuai mai foi o le mamalu o le tatou atunuu i le paia i Tama ma o latou Aiga, Aiga ma o latou Tama, Usoga a Tumua ma Pule, Ituau ma Alataua, Aiga i le Tai ma le Vaa o Fonoti. E faapea foi le tapuaiga a lou itumalo Aana Alofi Nu.1, le paia o lea itu o le itumalo ia Faleasiu, a o le paia lava lea aua aiga Satuala ma le Aigaomavaega faapea foi aiga Taulagi, Alo o Tamalelagi, Tamaaitu ma le Maugafa, aemaise le fetalaiga i le Faletolu ma Fuaifale, e faapea foi i le la itu o le vai i fale Fasitoo i le ee papaaao o le aiga Satuala lau afioga Leaupepe ma Aiono e faapea Sua ma Toaleafoa, ma le mamalu i le Falefitu ma upu ia te oe le tuua ia Tauauvea. Ia o paia sautuafafa ia o lenei afiafi, tulouna ia.

Ua ē le manu ua logo foi i le vateatea, ua logo le nai ama ua logo foi le nai tea, ua logo ia utu segisege le mauga nai utu manua, aua ua mamalu ma ua paia ia le aso ma le tatou mafutaga. O lenei aso ma le feagai ai o le paia i le Maota i lau Afioga ma le faatauaaogagase o le mamalu o le Palemene, e i ai lava le talitonuga ua matua faasopolia tulimanu uma o le atunuu, aemaise foi o vaega eseese o faafitauli aua le sailiga Malo le tofa tatala ma le tofa saili, o lea ua oo lava i ona ooooga, ua sua le aulapauta ua sua le aulapatai, ua amia le uta mamao ua amia foi le uta lata mai. O lea foi ua fai le pou i faleolo ae saili le tikitiki le ao savaii, ona o le a, ona o lo outou finagalo saili Malo aua se ai mo Samoa i lenei foi Fonotaga a le Palemene e pei ona outou faatauaaogagase ai i lenei aso atoa, ua alu atu foi ma lenei po. O uiga lava ia o le tatou valaauina e tatou te le alo lava i se ata o le laau.

Ae i lenei afiafi ona ua saunoa i le Afioga i le Fofoga Fetalai ma faaopoopoina foi se talitonuga a le Afioga i le Taitai o le Itu Agai, e faapena foi sou taofi, o le tele o mataupu sa laga, o lea lava sa ou taumafai e tali atu i le taimi sa laga ai, ma ua lagona foi lou agaga fialia ua le o toe tele sau galuega o totoe mo lenei itula.

E 31 ia sui usufono mamalu na saunoa i le Tala o le Tupe, e 16 na afea le Matagaluega lenei i vaega e fia malamalama ai e faapea foi ma fesili na fesiligia ai, pei la ona ou fai atu ua maea ona ou tali atu i mataupu na laga, ae pau lava ia o nai vaega na ou siaki atu i au faamaumauga, o lea sa misi ia te au, ia nei avea ma se ma ou masei aua le va faafeagai ai ma le faatinoga o lau galuega e pei ona tofia ai au.

O le vaega muamua lea sa laga e se tasi o sui usufono mo Falealili, Afioga Tusa Misi Tupuola, o le tulaga lea i le afi moli. O lea la ua uma ona ou faamalamalama le vaega lea o le taimi nei o le matafaioi lea ua lafo atu i le EPC e latou te vaaia uma afi o lo o faaogaina e mo le auaunaga a le Malo, ae ui lava i lea, ua ou saili ma maua le faamatalaga ua oo mai ia te au, o le vaiaso na tea nei na taunuu mai ai spare parts sa oka i fafo mo le faaleleia o le afi lea moli i Poutasi, ma o le vaiaso fou o lea ua faamoemoe o le a faapipii ai ia parts fou ma toe faaola ai le afi.

O le Vaimauga Sisifo, o lea sa saunoa e faatagisia ia ni tusi valaau mo le faaulufalega foi lea o le tatou falemai fou, e pei ona maua i manao aua le faafofogaaga a lenei Palemene o lea sa saunoa sao lava le sui usufono, o le falemai, o le falemai o Vaimauga Sisifo. O lona uiga lau Afioga, o tatou e talimalo, e le valaaulia la tatou e tatou lava ia, o tatou e tatou te valaauina isi e omai sei molimau le tatou galuega, ae ua faafetai tele i le avanoa o lea ua faamanatu mai ai e se tasi o sui usufono o le Vaimauga Sisifo, Tofa Lenatai Victor Faafoi Tamapua, ona o lea e tapenapena ia le tulaga o le faatinoga o le tatou taligamalo, aua e tataua ona i ai ni a tatou faaaloaloga e fai, o lea la ua



amata ona tilotilo ia pe ua lava se 50 ni a tatou sua e lafo atu i lena itu, ma ni ipu meaai se 3,000 aua e fai sina toatele o le tatou auvalaaulia, a o tatou e ona ia le faaulufalega. O lea la o le a tatou feiloai i se taimi ona tatou soalaupule lea mo le faamaotiina o lea vaega.

O Vaisigano Nu.1....

**Tofa Lenatai Victor Faafoi Tamapua (Vaimauga Sisifo):** Lau Afioga i le Fofoga Fetalai....

**FOFOGA FETALAI:** Malie lava lau Afioga i le Minisita, masalo o lea o le a tautino le solo a le tamaloa. Tulai mai le sui usufono mamalu.

**Tofa Lenatai Victor Faafoi Tamapua:** Malo faafetai. E leai foi se agaga e faalavelave i le saunoaga matagofie foi a le Afioga i le Minisita, ona o lea sa laga, ia o le a fai mea faalogo atu lava ia ma aumai foi le lagolago i vaega na e pei ona e saunoa mai ai, ia o le a tatou galulue faatasi ai, ma le faaaloalo lava.

**FOFOGA FETALAI:** Malo.

**Afioga Hon TUITAMA TALALELEI TUITAMA:** Se o le manaia o le galulue faatasi.

**FOFOGA FETALAI:** Ioe, se o tama o le town area e le solomuli. Malie lava lau Afioga i le Minisita, sei tuu atu lava le avanoa i se tasi o sui usufono mo Falealili, Tofa Tusa Misi Tupuola.

**Afioga Hon TUITAMA TALALELEI TUITAMA:** E lei saunoa i ai se tasi o sui usufono mo Falealili, Tofa Tusa Misi Tupuola i i le mataupu lea.

**Tofa Tusa Misi Tupuola (Falealili):** Faafetai i lau Afioga i le Fofoga Fetalai mo le avanoa. Sa ou musu e faalavelave i le Afioga i le Minisita i le amataga leaga o lea faatoa saunoa, ae ua maua foi le avanoa lea sei maua ai se malologa a le Afioga i le Minisita, leai ua ou tulai atu e faafetai tele lava i lau Afioga ona o lau saunoaga malamalama, ae ana ou iloa o lea e i lalo i le vaaiga a le EPC, ia semeamanu ou te oo i le Afioga i le Minisita mo Galuega, Felauaiga ma Atinae Eseese. Ae faafetai tele i lou fesoasoani mai, ae toe lava o le falemai ma isi vaega na e te lei saunoa i ai, ma le faaaloalo.

**FOFOGA FETALAI:** Tulai mai lau Afioga i le Minisita e faaauau mai le saunoaga.

**Afioga Hon TUITAMA TALALELEI TUITAMA:** Lau Afioga i le sui usufono mo Falealili, o vaega na ua uma ona ou tali atu i ai muamua, ae ai ua galo ia oe. Ae o le ala ou fesili atu lea analeila, po o le a le taimi na leaga ai le afi ae pe na logo le Pule o le falemai ona o tulaga la ia, aua e le o sao outou i le EPC ae logo le Pule o le falemai, o le galuega lena a le Pule o le falemai e faafesootai le EPC aua le tulaga lea.

O Vaisigano Nu.1, o le faalua lea ona laga e le Afioga i le sui usufono le mataupu lea i le tulaga lava lea pe afai e toe siitia le falemai i se tulaga o lo o i ai nei i Sataua.

**Afioga Tufuga Gafaleata Faitua (Vaisigano Nu.1):** Lau Afioga i le Fofoga Fetalai faamolemole pe i ai se avanoa.

**FOFOGA FETALAI:** O lea o le a faamatala atu ona avatu lea o le avanoa e tali mai, pe i ai se isi mea?

**Afioga Tufuga Gafaleata Faitua:** Leai, o le manatu na tuu atu e na ona taatia lava i ou tafatafa, e le faapea e manaomia se tali ae na ona taatia lava i tafatafa mo le lumanai, pau lea; ma le faaaloalo lava.

**FOFOGA FETALAI:** Tulai mai lau Afioga i le Minisita.

**Afioga Hon TUITAMA TALALELEI TUITAMA:** Ia o lau tala lea o le a fai atu, o lea ua faataatia i i i ou tafatafa, ia o le a taatia lava i i i ou tafatafa, faafetai lava mo le faamama avega.

O Vaisigano Nu.2 ua uma ona ou tali i le tele o vaega sa laga ma fia malamalama ai le sui usufono mamalu, ae o nai vaega ia o lea sa fai ai se faamaoniga ma le sailiga i le faamaonia mai e le Matagaluega, o lea ua maua ai le malamalama aua le faafesili a sui usufono.

O le tulaga i le pathologist po o le fomai faapitoa mo le suesueina o gasegase ma tulaga faapena, i le taimi o lo o aotauina se tasi fomai a tatou o Dr. Phillip Amosa i Fiti mo le faatinoga o le galuega lenei, ae mo le taimi nei o lo o galulue faatasi ai nei la le Matagaluega o le Soifua Maloloina ma le Matagaluega o Leoleo ma Falepuipui, e i ai le pathologist lea e sau e fai taotoga mo gasegase la ia mo tino maliliu o i latou e maliliu i faalavelave faafuasei mo criminal activity, ia po o mea e aofia ai le tulafono, o latou la ia e tau forensic pathologist ae i ai foi lona tomai mo suesuega o gasegase faa-Fomai o lo o galulue faatasi ai o lea e afaafa ai ia le Matagaluega o le Auaunaga o le Soifua Maloloina ma le Matagaluega o Leoleo ma Falepuipui, e totogiina le oo mai o le fomai lea e faatino a latou galuega. Ae o le pathologist lea o lo o aotauina muamua e faapitoa lava clinical pathologist mo mai a le falemai, ae afai la e i ai se taimi e aumai ai lava e le Matagaluega o Leoleo ma Falepuipui latou se latou pathologist mo mai e faapitoa lava i sailiga o tulaga foi ia e faaletonu e aafia ai le tulafono na mafua ai ona maliliu, ia o lana lona matafaioi. Sa taua foi se latou pathologist se latou tagata foi lea faata, ua tele foi la ua uma ona ou talanoa i ai i le vaega lea, a o le taimi nei o lo o aotauina le tatou fomai e mo le tulaga lea o le vaega o faata i Niu Sila, o le susuga lea ia Glen Fatupaito.....

**FOFOGA FETALAI:** Malie lau Afioga i le Minisita, sei tuu atu le avanoa i le faauilavea a le sui usufono mamalu, tulai mai le sui usufono mo Faasaleleaga Nu.2.

**Susuga Papalii Lio Faavaivaiomanu Taeu Masipau (Faasaleleaga Nu.2):** Faafetai lava i lau Afioga i le Fofoga Fetalai mo le avanoa.

Malo faafetai i le saunoaga malamalama a lau Afioga i le Minisita. O lea ua maua atu e pei o lea ua i ai se forensic pathologist a leoleo lava ia. O lona uiga e pei o se fesoasoani mai le AFP mai Ausetalia pe a, ae e leai se mea o i ai. O le mea e sili faafetai o lea ua manino, o lea o le a ese lava se pathologist faapitoa i case a leoleo, ese le pathologist mo le falemai. Ona pau lava le agaga o le talosaga ma le auga o manatu na avatu, o le delay foi lea mo taimi o nai o tatou tagata. O le mataupu taua lea na ou avatua ona o le amataga o le masina nei lea na i ai le faalavelave sa tupu, ae faatoa avanoa mai i le aso 1 o Iulai. Po o leoleo po o le falemai, o le agaga o le talosaga ina ia vave aua nai o tatou tagata aemaise foi o nai aiga e malaga mai fafo i tulaga faapena. A o lea ua manino, ona pau lava le tatalo ia vave mo nai o tatou tagata. Faafetai ma le faaaloalo lava.

**Afioga Hon TUITAMA TALALELEI TUITAMA:** O le mea lena sa ou taumafai e faamalamalama atu muamua ona e eseese matafaioi.

O le tulaga sa i ai muamua sa faaoga pathologist a le falemai e fai ai taotoga a leoleo. O le taimi nei, o lea ua agai i luma lea vaega ua eseese. E ese lava taotoga e aafia ai le Tulafono e sailia ai i latou e maua atu ua leva ona maliliu ma aafia i laau malolosi ma isi ituaiga faalavelave faapena e aafia ai, ma e ese la le matafaioi lena, ese foi le matafaioi o lo o faatino e le falemai mo galuega faafomai.

O le ala lea na ou taumafai atu ai e faamalamalama atu muamua. O lea la sa fesoasoani lava le falemai i le taimi muamua, a o le taimi lenei o lea ua amata ona tuu eseese vaega ia ona e tele le eseese. O lea la na ala ai ona afaafa le falemai ma le Ofisa o Leoleo i pathologist lea e faaoga nei ona e i ai ona tomai i vaega e lua i le falemai ma galuega tau Tulafono. O i ina lea e afaafa ai ina ia aumai e faamama ma taugofie ai aua e le o i ai foi se pathologist a le falemai latou, a o galuega lava ia i mea ia tau pathologist, e patino lava i le Ofisa o Leoleo ma le Loia Sili aua o le latou matafaioi lena.

O le vaega tau pharmacist lea foi sa laga e le sui usufono lea, ou te faapea atu ua maea ona fai le faatalanoaga i le tulaga lea i le vaiaso na tea nei, ma o le faaiuga o Iulai o le a amata ai le tatou Pharmacist fou i le falemai i Motootua.

O isi tomai faapitoa o lea o lo o faasalalau nei mo le faatinoga o isi galuega tau falemai, e i ai le Specialist na te toe review ina pe toe silasila i le tulaga lea e i ai le Medical Doctors career part, ona o le fautuaga a le Salary Tribunal e tusa ma le faatalanoaina o le tulaga o le toe silasila ma vaavaai pea i le agai i luma o le auaunaga a alii ma tamaitai fomai. O lona uiga o se Specialist e toe silasila i le faagasologa ma le faagaoioiga o le falemai fou lea o i ai nei o le General Outpatient and Emergency Department, aua o le vaega lea o tomai faapitoa, a o tatou o le mea lea e fai nei o le fomai lava ua avanoa e alu atu i ai i ina. A o le tulaga lava ia i le faatinoga o le galuega lea i lona atoaga, e faapitoa lava tagata e tataua ona galulue ai. O lea la ua avanoa foi le tulaga lea i se tasi e toe silasila i le amata ona faavasegaina ina ia uma ane aua o le phase two lena lea o le a fai nei o le falemai fou. Ia uma ane ae ua uma foi ona faataoto ma faatulaga tulaga ia i latou e faatinoina galuega e tauave i totonu o le falemai fou lea.

O lo o avanoa foi i le taimi nei se Specialist e tilotilo i le faaogaina o le falemai ina ia ave ma falemai e aotauina ai i latou o lo o aogaina i Aoga Faa-

Fomai po o le Teaching Hospital, ona o le taua tele mo le agai i luma o le tatou Aoga Faafomai o lo o i ai nei.

Ona ou oo mai lea i Vaimauga i Sisifo, o lea ua uma ona talanoa atu. O le Vaa o Fonoti, o lea ua uma ona ma talanoa nei ma le sui usufono mo le Vaa o Fonoti, o lo o silasila pea i se nofoaga e talafeagai ina ia mafai ai ona faatino se auaunaga i Fagaloa ona o le taumamao, ae ona e le i maua se fanua. Ou te iloa a i ai se taimi e maua ai se fanua e talafeagai ma le vaega tonu o lo o taulai i ai le itumalo o Fagaloa aemaise lava le nuu lea o Taelefaga, ona toe talanoa lea i lea vaega ma fuafua lelei se tulaga moomia mo lea vaega.

O le itu mulimuli lea sa laga e se tasi o sui usufono mo Salega, Afioga Afualo Wood Utu Salele o le tulaga lea i le OUM. Ua uma ona ou tali atu i le isi vaega o le fesili i le taimi ua tuanai, a o le tulaga lea i le OUM. O lena ua outou silasila ane i le Tala o le Tupe, e \$960,000 le tupe lena e avatu ai. O lea ua faatupe e lo tatou Malo le OUM. O lo o galulue nei le Komiti ua uma ona tofia e le Kapeneta mo le faatinoga – ownership po o le avea ai o le aoga e pulea toatasi ma umia e lo tatou Malo. E tele le lavelave o tulaga ia ona o aafiaga o Tulafono sa faavae ai lena taumafaiga, a o lo o i ai le faamoemoe e le o toe mamao ona taoto lea i lagatonu le tulaga lea i le Aoga Faafomai o le Iunivesite o le OUM.

Lau Afioga i le Fofoga Fetalai, ona oo mai ai lea i le faaiuga o sau folasaga i lena afiafi, e pei o mataupu ia o lea sa laga mai e sui usufono i a latou lauga faalauaitele o lea ua maea ona ou tali atu i ai. Atoa ai ma le mataupu lea e tulai mai ai le sui usufono lea, ua uma foi.

**FOFOGA FETALAI:** Ua e faafofoga ua tali atu le Minisita Saleaula?

**Tofa Levaopolo Talatonu:** E sao lelei lau Afioga i le Fofoga Fetalai.

**FOFOGA FETALAI:** O le a tuu atu pea le avanoa, faapuupuu mai.

**Tofa Levaopolo Talatonu:** Na uma lelei lava ananafi i le taimi sa ou avatu ai se manatu vaivai o lena itumalo, e lei i ai lava se finagalo manino o le Afioga i le Minisita i lena mataupu. Ona pau lava le mataupu lea sa agai i ai o le faoina o lou taimi, a o lea foi la ua le tali mai.

O le auga ma le faamoemoe o se manatu lau Afioga i le Fofoga Fetalai sa tuuina atu ananafi, o le gafatia e le 80% o le atunuu o mea ia o medical check. Sa ou taua ai le \$18miliona lea e aumai o le grant. Pe mafai ona faasafua i private doctors latou te faatinoina ai le galuega lea faasolosolo i nuu i tua? Aua o lea ou te iloa e gafatia e tatou i le taimi lena ona fai a tatou siaki i le tai ono masina. A o tua ma Savaii o lo o i ai le tulaga lena o le le gafatia. O la foi e fai i Niu Sila, Ausetalia ma isi atunuu le fesoasoani a le Malo i le avatu o grants i private doctors, ona agai lea e fai siaki. A lelei ona faatino le vaega lena lau Afioga i le Fofoga Fetalai, e reduce le tupe lea ua vaia nei.

Silasila lau Afioga i le Fofoga Fetalai i le Tala o le Tupe, ua oo i le \$10miliona le tupe lea ua ave agai i le Falemai Faamamatoto. O lea ua \$10miliona le tupe e ave i ai ona o le faamai lea.

**Afioga Hon TUITAMA TALALELEI TUITAMA:** Lau Afioga i le Fofoga Fetalai, o lea o le a tali atu.

**FOFOGA FETALAI:** O lea ua maua Saleaula, ou te manatu o lea ua maua uma le auga o lou faamoemoe. Tulai mai lau Afioga i le Minisita e tali mai.

**Afioga Hon TUITAMA TALALELEI TUITAMA:** Ou te tulai e faamanatu atu i le sui usufono, e le i oo i ai i le vaega lea. Na gata lava i le fuaina o tagata lapopoa ae maua ai le suka. O lana saunoaga lea na fai, e leai se galuega a le afaigaluega a le Soifua Maloloina lea e o atu i tua, na o le fuaina o tagata lapopoa. O le vaega la lena o lea na ou faamalamalamaina, ae na uma ai lava i ina. E le i oo i le vaega lea lana folasaga ananafi. O le a ou tali atu pea i ai i le vaega lea.

**FOFOGA FETALAI:** O lea o le a tali atu. A lea ua uma ona e folasia? (*I le sui usufono mo Gagaemauga Nu.2*). Faafetai i lau Afioga i le Minisita mo le Soifua Maloloina.

**Afioga Hon TUITAMA TALALELEI TUITAMA:** O le a ou tali i le vaega lea ma ua uma foi ona ou tali i ai, ae e le fia faalogo i ai. O lea e fai le partnership a le falemai ma fomai tumaoti. A lea e faafofoga mai o falemai ia i tua o lea e vaai e fomai tumaoti? E \$200 i le itula lea e galulue ai e o atu ai i Savaii ma Upolu. O le taimi foi lenei, o fomai tumaoti foi ia lea e vaai i ai i le Out Patient, a o le vaega lea e taumafai mai i ai le sui usufono e le o manatu i le lavelave o le mea lea i le o atu o tagata e vaai le fomai tumaoti, faamaumau e ia ona aumai lea o le lisi ave i le Malo e totogi mai tagata nei, ae e leai se monitoring system e iloa ai po o ai tonu tagata na vaai, po o ni tagata ia e tatau ona vaai e le fomai. E tele le lavelave o le mea lea.

O le mea lea e taumafai mai ai i le taimi lenei, e le mafai ona faatino i le taimi lenei.

**Tofa Levaopolo Talatonu:** Lau Afioga i le Fofoga Fetalai, e sese mamao lava le mea lea e agai mai ai le Afioga i le Minisita. Onosai mai la le Afioga i le Minisita se i avatu tonu lava le mea sao u.....

**FOFOGA FETALAI:** Malie Saleaula, ana e onosai se i faamalamalama aua o lea e le i oo le saunoaga a le Minisita i le mea tonu lava lena.....

**Tofa Levaopolo Talatonu:** Lau Afioga i le Fofoga Fetalai, leaga o lea ua sese le mea lea ua tatai i ai le itu sa avatu ai se manatu.

**FOFOGA FETALAI:** O lea e agai e taua uma le utilise ina o private doctors ma le private service agai i le Matagaluega. O lea o le a oo le Minisita i le tulaga lea e faamalamalama mai.

Malie le sui usufono mo Saleaula, se i tulai mai le Afioga i le Minisita.

**Afioga Hon TUITAMA TALALELEI TUITAMA:** Lau Afioga i le Fofoga Fetalai, o le tali lena a le Malo. Ma le faaaloalo tele lau Afioga i le Fofoga Fetalai. Ia manuia lo tatou afiafi.

**Tofa Levaopolo Talatonu:** Lau Afioga i le Fofoga Fetalai, e moni o lea e faasolo le polokalame lea o le tai \$200 lea e ave i o i fomai. O le agaga lea e avatu, o lea foi e o ane o tatou tagata totogi tupe i le falemai, a o le agaga

tonu lea e avatu, faaoga le \$18miliona, aumai se vaegatupe e vaai fua o tatou tagata; ia regular foi, e taitolu masina ma siaki. O i ina e puipuia lelei ai ma aumai i lalo le vaegatupe lea e faaalu i Niu Sila.

**FOFOGA FETALAI:** O lea ua maua Saleaula. E taua tele lou finagalo ona o le maua fua lava lea tatou te agai e uunai. Silasila foi oe i le folasaga matagofie a le Minisita.....

**Afioga Hon TUITAMA TALALELEI TUITAMA:** Na ona fia faamalamalama lava o le itu lea.

**FOFOGA FETALAI:** Tulai mai lau Afioga i le Minisita mo le Soifua Maloloina.

**Afioga Hon TUITAMA TALALELEI TUITAMA:** O lea e faitau lava saunoaga uma ia ou te faalogo atu i ai o lea e fai mai o lea e vaai fua i uta i le falemai. Pau lava lea na o le tai \$5 lea e o atu tagata totogi. I suesuega ua 16 nei tausaga talu ai, na fai ai le sailiiliga i uta i le falemai. O le tupe lea e totogi e le Malo ae e le o fai fuaina, o lea e totogi e le Malo. O le tupe lea i lene taimi e vaai ai le mai e tasi e \$42 i le alu atu i totonu, sue le pepa, alu i o vaai le fomai, alu e fai le fusiga, fai le tui ma mea uma faapena. A faaopoopo faatasi, o le average e \$42 ae na o le \$5 lea e totogi e le mai.

E le o vaai fuaina la i le falemai o lea e totogi le \$42 e vaai ai le mai e tasi i lo tatou falemai lea e i ai nei - ua leva la ona fai.

**FOFOGA FETALAI:** Faafetai, e manatu ua malamalama lea mataupu.

**Tofa Levaopolo Talatonu:** Lau Afioga i le Fofoga Fetalai, o le \$5 o le tupe, a o le \$18miliona o le tupe faameaalofa lea e aumai lea e avatu ai se manatu.

**FOFOGA FETALAI:** O lea ua maua Saleaula. E manatu o lene.....

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai, o mea faapenei, a avatu loa le tali a le Malo ua uma. E leai lava ma nisi tali e toe.....a avatu lava le tali ua uma, ua uma nai lo le mea lea o le finau ai lava, finau ai lava, finau ai lava. A avatu loa le tali a le Malo ua uma. O lea e faasolo mai a tatou galuega, ua uma foi ona saunoa atu le Minisita, ua uma, ua finito.

**FOFOGA FETALAI:** Ia malie ia Saleaula, o lea lava e taumafai atu o le amanaia o lo outou naunau mai e ala foi i le tautuaina o lo tatou soifua maloloina.

O lea o le a tatala lo tatou falemai fou, nothing is free. If you want good service you have to pay it. O tulaga na ina ia uunaia pea i o tatou tagata, e leai se tietie fua e toe maua.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai, o le mea lea e pei ou te fautuaina ai le sui usufono. E tutu soo mai loa le sui usufono, o lona uiga o la

e ona. O le faalavelave lea o tatou pe a Fono i le po, e i ai lava i latou e le taofiofi. Se i alolofa a fai a tatou Fono ona aua lea le faasuaava aua o le mea lea e tupu ai le finauvale.

**Tofa Levaopolo Talatonu:** Lau Afioga i le Fofoga Fetalai o le aga lea ma le masani a le sui usufono mo Gagaemauga Nu.2 o le tu lava i taimi uma. E leai la se mea e tau o se ona aua e le faatagaina i totonu o le tatou Maota le ona.

**FOFOGA FETALAI:** O lea ou te malamalama i le tulaga lea e le o ni ai avea o le a tulituliapu ai oe pe afai o lena e te mama o lo o i ai le Faamasino Sili, o le Atua na te faamasino ia te oe po o tutupu mea na ia te oe.

Ae faafetai atu i lau Afioga i le Minisita mo le Soifua Maloloina e talitonu ua taumailelei le igoa a ipu a le alii e ala i le tuleiga ma le saunoaga i lenei aso ma le faatofalaiga.

Tulai maia lau Afioga i le Minisita mo Tina ma Taimatai, Atinae o Nuu ma Afioga ma Agafesootai ia te oe le Tumua Leulumoega. Ou te talitonu o sa ma faiga aua le itumalo i le paia i le Matua na togi, le Faleiva ma le Fale Tuiaana, tulai maia o lea ua agai i le taimi o lau Matagaluega. Ou te talitonu e leai ma nisi ona o le lalelei o au ie o le iniini ma mea uma ia na saunia e manatu e lei fesiligia lau Matagaluega ae tulai maia e fai le saunoaga.

**Tofa Hon TOLOFUAIVALELEI FALEMOE LEIATAUA:** Faamalo faafetai i lau Afioga i le Fofoga Fetalai e tusa foi ma le avanoa ua tuuina mai aua le faasologa o Tali a le Malo e ala i Afioga i Minisita. O lea ua oo mai i le matou Matagaluega ma e faatalofa atu ai foi i le faafofoga tapuai a le atunuu aua foi ou tulaga faalupeina i ou sa ma mamalu masani e le tau oo i ai se faamatalaga o Samoa o le atunuu tofi aemaise foi tulaga Faale Malo i lona Tafatolu e talitonu lava e taoto lava ao se ia ua uma ona aisa ou paia Faale Malo.

E le gata foi i lea ao mamalu faale tapuaiga aua le aufai tatalo e taiati o Ekalesia Kerisiano ma le mamalu o le Aufaigaluega Talai a le Atua aua lona finagalo.

Ao leni lava Maota pe a liliu mai i ai se faamatalaga i le ee o lau Afioga i le Fofoga Fetalai, o le ee foi itu na lua i le Palemia ma le Kapeneta, Taitai o le Itu Agai faapea foi Minisita Lagolago ma le mamalu o sui usufono o le Palemene. Ia vaeatu le tapuaiga i Faauluuluga o Matagaluega ma Faalapotopotoga Tumaoti ma le mamalu o le aufaigaluega o lo o latou tautua matavela aua le tausia o le Fono a le atunuu e ala i le Palemene.

O sa foi ma mamalu o tatou uso a tuaoi, leai e talitonu lava o le tatou fale lava e tasi ae pau lava le mea o le eseese o Faigamalo. I le tapuaiga a le Kovana ma lana Au Taupulega faapea foi Taitai o Maota e Lua i lau Afioga i le Peresetene, o le Senate ma le Fofoga Fetalai o le Maota, ia tapuai maia o lea lava e alo le sa o Tumua nei ma Puleono i Salafai.

Ou te tulai ma le agaga faaaloalo aua foi mataupu sa feagai ma le mamalu o le Maota i latou lauga faalauaitete. Lau Afioga i le Fofoga Fetalai, e le tele ni mataupu sa aafia ai leni Matagaluega o Tina ma Tamaitai, Atinae o Nuu ma Afioga ma Agafesootai e aafia ai ma i latou e i ai manaoga faapitoa i alo ma fanau faapea foi tupulaga talavou. E le gata foi i lea o le Matagaluega po o le Ofisa o le Komesina o Sulufaiga ma nisi foi o Komiti Faapitoa a le tatou Malo

e ala i le Komiti o le Faleula, Komiti o Pulenuu i Salafai ma Tumua nei aemaise foi le Komiti o Tina ma Tamaitai o lo o galulue aua lava le atinae o le atunuu ma le tautuaina.

O mataupu sa laga e aafia ai le Matagaluega o le a le agai lava se faamatalaga i tulaga o faiga faavae ua malamalama ona ua noanoatia foi lauao o Taemanutavae, ae ua taunuu le upu i le igoa ipu a Lemalufaitoaga ua Faataugagase ma le soatau lenei aso ae ua tu foi le loma ona ua faalava le Amoa ona o le naunau lava ina ia faauma le tatou galuega i lenei po i se finagalo o le Palemia aua le tatou Malo. Ae o nai mataupu ia sa laga e sui usufono mamalu o tulaga o Vai Tumaoti. O Vai Tumaoti ia e aafia ai sui usufono sa saunoa o le Vai Tumaoti sa laga e le sui usufono mo Falelatai ma Samatau o le tulaga o le latou Vai Tumaoti. O lena galuega ou te tulai mai ua faagasolo ae peitai ina ua alu atu le asiasiga o lo o tu i le faaletonu nisi o paia o lo o maua waste pipes sa faaoga e konekarate i lena vaitaimi ou te leiloa pe na silafia e le Minisita sa tulai mai i lena vaitaimi. Peitai o lau faatonuga e le taumamafa tupu ma ee o le atunuu ini vaitaumafa e faaoga ai ituaiga paipana. O le ala lena na toe fesui ai, e ui foi ina faaalu ai tupe a le Malo ae peitai e faamuamua le soifua maloloina o le mamalu o le tatou atunuu. O le mea lea le sui usufono mo Falelatai ma Samatau e lei faia ona o le tautua a Leulumoega ia te oe ao le tautua a le Minisita aua le Malo ma le atunuu. O le mea la lea ua uma ona faatino le galuega lea na fai na faaiuina ia Fepuari o le tausaga nei ma toe o le tatalaina o tatou vai. Na ona faapena atu ae tatou te fesootai lava leaga e le mafai ona tuumamaina le tautua a le Malo ao lo outou naunau mai foi i le fia maua o le suavai taumafa mama o le vai foi o lo o galulue soosoo tauau ai le Matagaluega ma le Matagaluega o le Soifua Maloloina faapea foi le SROS po o Suesuega Faa Saienisi ina ia mautinoa e faaauu lava le tulaga o le suesueina o le vai ina ia iloa o lo o faapena foi le faiga o vai ia e pulea i lalo o le Faalapotopotoga o Vai a le atunuu. O le mea la lea o le faamoemoe maualuga lena Falelatai ma Samatau o se taimi ona tatou feiloai lea ao le vai ua uma ona faataoto lo outou vai e afua mai Falevai seia oo mai lava i Siufaga. O le mea la lea o lo o mataitu pea ae ua lafo atu foi le faatuatuaga i le Komiti e taitai ai le sui o le nuu aemaise foi o le tulaga o galuega fai a le tatou Matagaluega e saga mataitu ai pea pe i ai nisi mea o faaletonu ae lafo mai pea le tou faatuatuaga i galuega fai a le tatou Malo e ala i le Matagaluega.

E le gata i lea o le vai tumaoti, o le vai lea o Saaga i Siumu, na laga foi e le tou sui usufono, o le mea lea ou te leleiga ai le tou sui usufono o lo o fealualuai toatasi nao ia ae le o momoenoa le tamaloa o le fale Tuamasaga. O lo o matua mataitu lelei aua le suavai o Saaga, Saaga o lo o i totonu o le lisi o galuega fai ao aoaoga ma tulaga faapena i le faamasani i le silasila i le faaagaina o le vai ma le tulaga o le vaavaaia faalelei o Vai Tumaoti o lena ua uma ona faia tatou aoaoga. Ua molimau mai le Matagaluega ua maea na tulaga toe lava ina faataunuu. O le mea lea aua le popole o lo o i ai Mose ma le Au Pefofeta aua le tautua a le Malo e le mafai ona tuuina.

O le isi Vai Tumaoti sa nao le faafetai, faafetai i le Sui Fofoga Fetalai ma le itumalo o Palauli Sisifo, lena ua outou faafofoga mai ua faafetai mai lo outou sui usufono o mea na a tamalii. O le faaaloalo i le faaaloalo ae a oo ina maea tatou galuega aua sa i ai le fetuunaiga o le tou galuega ona ua faitioina le ata na faataoto muamua ae peitai ua matou lolo lava i se finagalo o lo outou sui usufono ina ia faaleleia ma faataoto lelei le vai ina ia aua na ona faapea ua fai



lo outou vai tumaoti e ala i le fesoasoani a le Malo ae tou te le o taumamafa ai ona na i ai ni faaletonu sa i ai. O lea la ua uma ona faalele ma ua galulue le konekarate ma le faamoemoe o le a matua matagofie ma lelei lo outou vai i le taimi foi tatou te feiloai ai aua e tatau foi ona sami na mea. O le mea lea le paia e, o le afioaga aua foi le mamalu o le Aiga Salevalasi aemaise foi Alo o Sina ma la lua tausiga ia te oulua o tama o le nuu Tuitolovaa ma Tuato aemaise le mamalu i le fale Salemuliaga. O le mea lea e faailoa atu ai na o le pau lena o vai tumaoti na laga mai.

O le tasi itu o le \$1miliona o lo o i totonu o le Tala o le Tupe ua faatulagaina.....

**Tofa Hon Tuuu Anasii Leota:** Lau Afioga i le Fofoga Fetalai.....

**Tofa Hon TOLOFUAIVALELEI FALEMOE LEIATAUA:** E le malie lou finagalo i le faamalamalamaga lea na avatu.

**FOFOGA FETALAI:** Malie lau Afioga i le Minisita mo Tina ma Tamaitai, sei tuu atu le avanoa i le sui usufono mo Siumu.

**Tofa Hon Tuuu Anasii Leota (Siumu):** Lau Afioga i le Fofoga Fetalai e momoli le faafetai i le Afioga i le Minisita o lea ua ou faalogologo atu ua maea le aoaoga ae leaga o lea e pei e tiutalaloa lana saunoaga ae fia maua taimi faamolemole e sauna mai i ai lou itumalo, ma le faaaloalo lava.

**FOFOGA FETALAI:** Tulai mai le Minisita mo Tina ma Tamaitai.

**Tofa Hon TOLOFUAIVALELEI FALEMOE LEIATAUA:** Lau Afioga i le Fofoga Fetalai, na pau lava lau fesoasoani soia tou te toe taia ni sua a tagata o le Matagaluega e o atu ma le toe faitai pe a le faataunuuina le vai aua e le o ni mea na a le Matagaluega. E le tauanauina foi outou. O le mea la lea, o lea ua i totonu o le lisi ae aua te popole e fai lava i se vaitaimi ae le o le tausaga fou ao le mea sili lava o lea ua tau le ai. Aua le popole o le mea taua lava o le fai i le taimi ua lalata i lou soifua.

O le tulaga lea aupito sili ona taua lea na fesiligia e le sui usufono mo Siumu, o le miliona lea o lo o i le Tala o le Tupe leni e faasafua atu e tusa ai i se finagalo silasila mamao o le Malo ma le mea lava leni o le tauanau mai, tauanau mai ao lea ua i ai le finagalo o le Malo mo le faaleleia o aiga ma o latou Maota na faaleagaina ma ni meatotino foi i le afa o Evani. O lena miliona o lea ua oo mai ia te au le pepa e 173 aiga o lo o i lalo o le faatulagana o aiga e fai sina mamafa o le mafatiaga. E le o tagata ao fale lea e fai atu ai. O la ua uma ona avatu meaalofa o solo ma mea faapena o fesoasoani mai fafo ao tupe nei ua fuafuaina mai le miliona lena e 173 i latou ua aafia i lalo o faamanuiaga ua faatulagaina o le P1 ao le P2 o aiga e fai sina maualalo e le natia o mea una na e tou mananao lava e silafia. E tai \$3,000 aiga e i lalo o le P1 ae \$1,656 aiga e i lalo o le P2, o lona uiga e le mamafa tele ae pau lava le mea e tatau ona fiafia ae soia tou te tagisa ae pau lava le mea e le nofonono avatu e le Malo nei faamoemoe ona e alolofa moni i tagata. E faamuamua le Atua i le tatalo ae alolofa moni i tagata e pei ona taulagalaga mai pea le Taitai o le Itu Agai. O le mea lena silafia ai.....

**Tofa Lealailepule Rimoni Aiafi:** Lau Afioga i le Fofoga Fetalai.....

**Tofa Hon TOLOFUAIVALELEI FALEMOE LEIATAUA:** E le o aafia Faleata i le mea lea faamolemole lau Afioga i le Fofoga Fetalai.

**FOFOGA FETALAI:** Malie lau Afioga i le Minisita mo Tina ma Tamaitai leaga e ava tele i le...O le a lau faauilavea?

**Tofa Lealailepule Rimoni Aiafi:** O le tupe tonu lava lea e fia fai atu ai fesili leaga sa taua i lau lauga.

**Tofa Hon TOLOFUAIVALELEI FALEMOE LEIATAUA:** Se faamolemole e lei aafia i le saunoaga a le sui usufono mo Faleata Sisifo. Ia leaga o le ulupoo o lau uo, ua lelei o le a ou nofo i lalo.

**Tofa Lealailepule Rimoni Aiafi:** O le popolega lea e i ai i le Komiti e manaia le agaga o le faasoaina o le miliona ao le popolega lea e i ai aua o lea ua uma ona faatumaoti e le Malo le Vaega o le DMO e pei o latou e tufaina mea ia nei tei ua faaluafesasi ma le tufaaga a le Afioga i le Minista ma lana Matagaluega ae pe sa manaia le tasi o se agency a le Malo e fai ai nei tei ua feteenai. Aua o lau vaai i ai e tasi pe le aiga Vaitele la e i ai.

**Tofa Hon TOLOFUAIVALELEI FALEMOE LEIATAUA:** Lau Afioga i le Fofoga Fetalai, o lea ua maua atu le finagalo o le sui usufono.

**FOFOGA FETALAI:** O lea ua maua e foliga mai e te le faatuatuaina le Minisita ma lana tufatufaga.

Tulai mai lau Afioga i le sui usufono mo Aleipata Itupa i Lalo.

**Afioga Tafua Maluelue Tafua (Aleipata Itupa i Lalo):** E leai lava se agaga e fia faalavelave i le Afioga i le Minisita ua see lona sa. O le mea foi ua fai sina vevela o le afiafi na o le sau ai ma le fia moe. Lau Afioga i le Fofoga Fetalai ua ou tulai atu ma le agaga faaaloalo na lavea le mea lea i lauga. E lei lauga ai le sui usufono mo Siumu tailo leaga ou te lei i le taimi na lauga ai le sui usufono mo Siumu ao lea ou te manatua na ou laga le \$1miliona lea.

O lona lua sa ou talanoa atu i lau Afioga i le Minisita i le faasoasoaina o le tupe ma nai aiga. O le agaga o lou tulai atu ma le faaaloalo o nai aiga matou te tuaoi o tagata tonu ia atonu o lea na i ai le agaga o le Malo e ave i ai se fesoasoani. O lea e molimauina e le Afioga i le sui usufono mo Palota Taitoatasi le mea lea ou te talanoa atu ai o tagata uma ia e nofo lisi i Matautu. Na ou siakiina le lisi na o le tasi lava le aiga Moataa na e i ai ae pe 10+ nai aiga. O lona uiga e le o atoatoa le lisi e ui e le o le Malo na faia le lisi o le Vaega Tumaoti ae pei o le agaga lea ua ou tulai atu ai ona ou te talitonu o lena e i ai nai aiga na e misi, ma le agaga faaaloalo.

**FOFOGA FETALAI:** Tulai maia lau Afioga i le Minisita mo Tina ma Tamaitai, Atinae o Nuu ma Afioga ma Agafesootai.

**Tofa Hon TOLOFUAIVALELEI FALEMOE LEIATAUA:** Faafetai lau Afioga i le Fofoga Fetalai mo le avanoa, ae o le faauilavea leai o le atugalu o

le sui usufono mo Faleata Sasae faapea e sese le faafoeina e le Matagaluega, e leai, e galulue faatasi le Matagaluega o Tina ma Tamaitai ma le DMO ma le vaega o le Ofisa o Leoleo ma le Ofisa foi o le Soifua Maloloina ma le Ofisa o Aoga, o Ofisa uma lava na e galulue faatasi ma le Matagaluega. O le lisi la lea o le lisi na tapena mai i le galulue faatasi lea ma...O lea la o le a ou laaina atu o itumalo lea e i ai le Vaimauga West, se o le faalavelave lava lenei o Lipoti faapenei e faa-Samoa mai igoa ae sau ai ma le mea faa-Peretania, o au ou te le manao i na mea. O Vaimauga Sisifo, Vaimauga Sasae, Faleata Sisifo, Safata, Siumu, Lefaga ma Faleaseela, Anoamaa Sasae ma Fagaloa. Ou te faamalulu i le sui usufono mo Aleipata Itupa i Lalo, o le mea ua tusia o le upu a Pilato, 'ua tusia.' O le mea la lena ou te faamalulu atu ai i le sui usufono mo Aleipata Itupa i Lalo....

**FOFOGA FETALAI:** Malie lava lau Afioga i le Minisita, sei tulai mai lava, e faa-tasi le taimi e tali ai e faigofie ai lau galuega, sei tulai mai le sui usufono mo Siumu.

**Tofa Hon Tuuu Anasii Leota:** Faafetai mo le avanoa i lau Afioga i le Fofoga Fetalai, e pau lava lea e faaali le faanoanoa i le saunoaga a le sui usufono mo Aleipata Itupa i Lalo faapea ou te lei lauga ai, ae o lea sa faafofoga lelei mai, o lea na lauga mai ia te au le Afioga i le Minisita, o lona uiga e mamafa lau lauga na fai i ai, masalo ou te lauga ai o i tua i le tanoa ava le Afioga i le sui usufono. O le itula lenei ou te faafetai i le Afioga i le Minisita, faafetai, faafetai i le Malo ua ae se tofa o lea ua maua se avanoa e maua ai se fesoasoani mo aiga na afaina tele i le Afa ua tuanai atu nei, aemaise o le Vaimauga, Siumu, Safata, faafetai mo le avanoa.

**Afioga Tafua Maluelue Tafua:** Malie lau Afioga i le Fofoga Fetalai, sei soso atu lava i le mataupu pei ona saunoa le Afioga i le Minisita, e leai se faafinauga e faia lau Afioga ou te faaaloalo tele i le Afioga i le Minisita, a o le upu faapea lea faapea o le mea ua tusia ua tusia e Pilato, ou te le iloaina po o ai lea tagata e igoa ia Pilato, ou te le iloa foi ma te le masani. Pau lava le mea ou te iloa e au ia o lea ou te talanoa atu i nai aiga ia matou te tuaoi sa lavevea, o lou fale na matua lavea lava e leai se mea e tasi na tu na malepe uma i lalo lou fale lea na fai sa...e molimau le Afioga i le Palemia sa ma i ai i le Aso Tofi o le vaiaso na tea nei. O le mea lea ou te tulai atu ai ma lou faaaloalo, a maua nai aiga ia e nofo lisi i tua ifo o nai aiga o Salanoa ma Myna Pau, o lena e i ai le suafa o Myna ae le o i ai le igoa o lou aiga, e moni lava ou te nofo i Aleipata ae i ai nai ou fanua i Vaimauga, o le tele o le Vaimauga na lavevea uma lava i le Vaisigano. O le mea lena o lea ou te tulai atu ai ma lou agaga faaaloalo, a ta iloa se mea e le fair ma le sao le faiga, ia ta te complain atu foi, ae o lou tulai atu lea ma lou faaaloalo, ou te iloaina e au ia e le o sao le faiga o le lisi, ma lou faaaloalo.

**FOFOGA FETALAI:** Malo faafetai, faasao lou taimi, tulai mai lau Afioga i le Taitaifono o le Komiti o Tupe Maua ma Tupe Totogi.

**Susuga Hon Papaliitele Niko Lee Hang:** Faafetai i lau Afioga mo le avanoa, e le fia faalavelave foi i le folasaga matagofie a le Afioga i le Minisita, mo le faasaoina lava o le taimi o lau Afioga e tau ese mau ia, ona o

le mataupu lea sa faatalanoaina e le matou Komiti, o le faaaliga mai le Matagaluega o le tupe lea na faasoia i pisinisi laiti foi ia na afaina i le Afa, a o lea e tau maitau atu i le saunoaga a le Minisita mo mea o laoa, fale ma maota ia na aafia. O le faamatalaga e fesoasoani i aiga foi ia na aafia latou pei ni maumaga o tuafale ia ma ni toga kapisi e faasoia ai le tupe lea. A o le popolega sa i le matou Komiti e pei ona tuuina atu le fautuaga i le faasoaina sei toe silasila le Matagaluega.

**Tofa Hon TOLOFUAIVALELEI FALEMOE LEIATAUA:** Lau Afioga i le Fofoga Fetalai, o lea ua ou maua atu le faauilavea a le Taitaifono. E eseese mamao lava le tupe lea e aumai e le Matagaluega o Tina ma Tamaitai, ese le tupe la e talanoa mai ai, aua e le o ni pisinisi mea ia, e leai ni pisinisi e oo i luga i se 173 ma se 186, ia o aiga mea ia i totonu o nuu ia.

**FOFOGA FETALAI:** Malie lava lau Afioga i le Taitaifono, sei faamanino mai po o le a tonu le....

**Tofa Hon TOLOFUAIVALELEI FALEMOE LEIATAUA:** Lau Afioga, ua fia faagasolo le galuega, na o le umi i tagata ia e faauilavea ae le fetui, ae o le a ou nofo i lalo leaga o lena ua fai lau faatonuga.

**FOFOGA FETALAI:** Ia malie ia ana o se isi lava ae leaga o le Taitaifono o le Komiti o Tupe ma Tupe Totogi lea.

**Susuga Hon Papaliitele Niko Lee Hang:** E faamalie atu i lau Afioga i le Minisita, leai o mea moni ia ou te talanoa atu ai ona o le tupe lea sa fesiligia e le matou Komiti ona o le \$1miliona e le o se tupe laitiiti, a o le faasoaina o le tupe ia e tufa o tupe, o le faamatalaga lena na aumai i le Matagaluega na molimauina le tupe lea, o lena e i ai le matou fautuaga ina ia faasoaina tatau le tupe, toe silasila le Matagaluega toe faamalieina tulaga uma e...ae leai se aoga e teena le....

**Tofa Hon TOLOFUAIVALELEI FALEMOE LEIATAUA:** Lau Afioga i le Fofoga Fetalai o lea ua ou maua atua, ae sa tatau ona tuu mai pea sei fai atu lau folasaga.

**FOFOGA FETALAI:** Ia saunoa ia lau Afioga i le Minisita.

**Tofa Hon TOLOFUAIVALELEI FALEMOE LEIATAUA:** Afai ua saunoa le Taitaifono o mea moni, ae o ni mea pio ia mea ou te fai atu ai, vaeatu le faafofoga a le atunuu ma le Maota? E le ave tupe, o le mea lena e tatau ona silafia e le Taitaifono, o vouchers e aumai ona ave lea i le faleoloa, aumai ai oloa po o a mea o mea faufale po o mea faapena, o le faiga lena o lea e tau fai ai, o le puipuiga lava ia alu tatau tupe, e le faapea o le faatauagavale ia i latou e ona ia meatotino nei, ae o le agaga lena o le fautuaga, o faiai ia e lotea mea ia e le laitiiti, o le matua lauia lava pei lava foi ona saunoa soo le Afioga i le Palemia, o le mea lena e....

**Afioga Hon Palusalua Faapo II:** Lau Afioga i le Fofoga Fetalai, o se mea e fesoasoani atu i le Afioga i le Minisita ona o lea ou te i ai foi i le Komiti o

Tupe, o la e sao le saunoaga a le Taitaifono o le Komiti, ona sa tapa le Matagaluega ona o atu lea faamalamalama, o le faamalamalama tonu lava le la lea e saunoa ai le Taitaifono o le Komiti o Tupe Maua ma Tupe Totogi, ioe, o lau fesoasoani atu lena ona o lana Matagaluega na o atu ma le faamalamalama.

**FOFOGA FETALAI:** Tulai mai le Afioga i le Minisita.

**Tofa Hon TOLOFUAIVALELEI FALEMOE LEIATAUA:** E i ai le upu foi lele e fai i le vai lea e i Salafai fai mai, 'e puese le vai o Samata,' vaeatu lau Afioga i le Fofoga Fetalai, ou te iloa ana e pue maia, ma le isi mea, o la outou fautuaga lea pei foi ona saunoa, e le faia e outou le faaiuga. O lea e silafia e i latou ua i ai le potu masani ma le faataunuina o galuega nei, o lea la e i ai le fautuaga lea, ioe, o le mea la lena e faamalie atu ai o le final draft lea, o le mea lena o le a faagaioi ai galuega a le Malo, ae le avea ni tupe ae ave vouchers e tala mai ai oloa e aumai ai oloa ona ave lea e fai ai galuega a aiga, ae le avea ni tupe o la e manino mai i i ia le faaupuga o mea nei o cash transfer procurement vouchers, ua e tagai mai la i ai o vouchers ia e ave e procure mai ai oloa, ae totogi la e le Malo agai i le kamupani ae o le a toso lava le laau felefele, a ua fai atu le matou faamatalaga o matou lea e tauaaoina mea faapenei, e tatau ona outou alolofa talia mai, sei omai foi outou ona fai lava lea o le mea tou te finagalo i ai. O le mea lena pei e foliga o le a pule mai outou i le faasoaga o le mea lea, leai la, afai ua ave so outou finagalo e ave tupe, ae la ua vaavaai atu le Komiti ia latou ia e tauaaoina mea ia, ia leai...ai oloa, ma le faaaloalo.

**Afioga Hon Palusalue Faapo II:** Lau Afioga i le Fofoga Fetalai, e le o se sese o matou o le sese o le Matagaluega i le o atu e faamalamalama i le Komiti, ana faapea e faamalamalama atu faapena, e leai se faaletonu lau Afioga i le Minisita, o lea ou te lagolagoina ai le Afioga i le Taitaifono.

**FOFOGA FETALAI:** Malie le Taitai o le Itu Agai, o lea ua maua e le...le Taitai o le Itu Agai....

**Tofa Hon TOLOFUAIVALELEI FALEMOE LEIATAUA:** O lena foi ua e faafofoga i le sui usufono mo Falealupo, o lena na ona fai atu lava o le sui usufono mo Falealupo e sese sese, sese e tu loa i luga e sau sese ai foi ma oe. Ae malie ia lau Afioga i le Fofoga Fetalai, e faaauau le tali a le matou Matagaluega.

**FOFOGA FETALAI:** Ia e manatu....

**Afioga Hon Aeau Peniamina Leavaiseeta:** Lau Afioga i le Fofoga Fetalai, leaga o lea ua tau lou igoa, ae sau lona defend ina, silasila lau Afioga, silasila lelei i le tulaga o le Maota ma ana galuega, e le Taitaifono fua le Taitaifono, otherwise, o tagata uma lava e i lalo o le Taitaifono, tulouna lava, e valea uma lava, a faapea e sausaunoa se Taitaifono o se Komiti, e amanaia, otherwise....

**FOFOGA FETALAI:** Ia alolofa maia o lea ua taumafai atu le Nofoa e faafilemu le tatou mataupu, e manatu....malie lau Afioga i le Taitaifono, ia

ou te talitonu o lea ua talifuaitau le Minisita. E faamalulu atu foi i le mau eseese o Tutuila ma Ape i se faamatalaga na tuuina atu e le Matagaluega, e le o ni ai avea po o se tamaliaga ua toesea e la outou Komiti. Ia malie foi lau Afioga i le Minisita, ia ua alu le lua vaiaso o faaaogagase le Komiti o Tupe e tau faapaleni tulaga uma, o le a foi se faamatalaga ua tuuina atu, ia malu ave i fale lou finagalo ae alofa ifo i le faaopoopoga o le lisi i le talosaga a le Tui Atua, ona atoa ai lea o faaumauga ma nisi o mea e fia tuuina atu.

**Tofa Hon TOLOFUAIVALELEI FALEMOE LEIATAUA:** Lau Afioga i le Fofoga Fetalai, e faamalie atu i le Taitaifono, se e le o ni ai avea o oe, ia e lagolago mai i le mea a le Malo o lea ua fai le faaiuga o le tulaga lea.

**FOFOGA FETALAI:** Malie lau Afioga i le Minisita o le a avatu ia le avanoa e faigata le Afioga i le Taitaifono ma lana Lipoti ua tuuina mai.

**Susuga Hon Papaliitele Niko Lee Hang:** Ia faafetai mo le avanoa, e leai e le o fesiligia e le matou Komiti le faamaoni o le Afioga i le Minisita aemaise foi le Matagaluega, ana faapea na sao le faamatalaina mai o le faaaogaina o le tupe, semeamanu e faamalieina le matou Komiti, ae peitai ane, o lea ua saunoa le Afioga i le Minisita, ia ae ese foi la faamatalaga o molimau ia na matou fesiligia i le tulaga lea, ae peitai ane, ia o le a fai ai le finagalo o le Minisita, o lea foi ua uma ona ou faamatalaina analeila i le Afioga i le Palemia, e leai sa matou paoa e suiina ai ni faaiuga i mea ia ua aumai i le Tala o le Tupe, ae na o le fautuaga, ona ne'i faamalieina le Komiti i le faasoaina ona o faamatalaga na tuuina mai i le taimi na fai ai le faatalanoaga o le Tala o le Tupe. E pei o le tulaga lea ae faamalulu atu i lau Afioga i le Minisita e aoga ma taua le fesoasoani lea, ae peitai ane, a silasila foi i le lisi ia taatia ia faapena.

**FOFOGA FETALAI:** Ia o le a lafo atu ia i lou lufilufi mea lelei o lau paaga tutasi aua lo oulua soolua toe sootuli ia te oulua o Tumua o le atunuu, ia faasoa lelei le lisi lea ua talosaga atu ai lo tatou Maota. Ae lafo atu ia i ou aao lau Afioga i le Minisita.

**Tofa Hon TOLOFUAIVALELEI FALEMOE LEIATAUA:** Faafetai, faafetai i lau Afioga i le Fofoga Fetalai mo le faatautaia o le tatou Fono, ou te faamalie atu foi i le Taitaifono o le Komiti, ia e leai o mea na avatu ia outou ae o lona uiga, ua toe faavae ai le mafaufauga lelei o latou foi e ana le tapenaga lenei lea ua tuuina mai i le Matagaluega, ia o lea ua ou faailoa atu e leai se mea e ufiufia, ae talitonu lava ua faamalieina lau Afioga i le Taitaifono, ae lau Afioga i le Tui Atua Faanofonofu, taatia maia, taatia maia lou finagalo pei lava o le igoa o le isi tamaloa la ua tuumalo.

Ae o le tulaga lea na aafia foi i le saunoaga o le sui usufono mai Siumu, ia o le mea lea o le asiosio o lo o aafia ai nai aiga, ae faamalie atu e le aafia i totonu o le seleni lenei ona o le seleni ua uma ona faataoto lona faaaogaina, o le asiosio na faatoa tupu ua lua nei vaiaso talu ai, ae o lena e te silafia auala e fai ai mea o la foi e faafofoga mai le itumalo, ia o iina e tapena i ai lou sa.

O le mea lea taatia maia lou finagalo ae fai le galuega ia, o la e i ai le DMO o le Ofisa lena o Faalavelave Faafuasei e agai i ai le talosaga leaga o mea e aafia i lalo o mea o mala faalenatura po o tulaga foi o mea e tutupu i le

asiosio lea, ua ou le iloa po o le a le mea ua aafia soo ai Siumu, ae le afaina, pau lava le mea ia outou lototetele ma tatalo i le Atua e faamagalo tatou.

Ona ou oo mai lea i le tulaga o le finagalo o se tasi o sui usufono mo Vaimauga Sisifo, Tofa Lenatai Victor Faafoi Tamapua, lea sa ia tautino le solo a le tamaloa, tulaga o le tofi Pulenuu ma le tofi tamaitai, ia e faamalulu atu foi i le afioaga o Magiagi pei ona sau i le saunoaga a lo outou sui usufono, o mea faapena e le taliina atu iinei, o lea lava ua taoto faiga faavae a lo tatou Malo e ala i le Matagaluega i le tauaaoina foi e le Minisita e faapea foi ia le Pulega ma o mau foi ua tuuina mai, e le na o Magiagi o aafia ai, e fai foi sina feoloolo o nai afioaga ia e aafia o latou sui pulenuu, ia ua e silafia foi e tafafao taliga o tufugauli, ma a vaavaai atu lava lo tatou Malo e faaletonu foi pulenuu i le latou auaunaga, e fai lava le tiute o le Malo. O le mea la lea e faamalie atu ai i se tasi o sui usufono mo Vaimauga, Tofa Lenatai Victor Faafoi Tamapua, taoto mai o le a i ai foi se taimi tatou feiloai ma nisi foi o afioaga o lea o lo o i le laina lava e tasi o latou tofi pulenuu, ona o lea lava e mataitu e le Malo e vaavaai atu lava e le o lagolago mai i galuega a le Malo. O lea faatoa lagolago mai i le taimi lenei ona ua naunau ua fia toe maua le tofi, ae pau lava o le mea, ia tatou maua le loto o le salamo ma le loto mauualalo. O outou na o sui o nuu, aua o le mea foi lena na fai ai e le Malo le teuteuga ua aveese le pulenuu ua outou manatu lava outou o outou e pulea nuu, ae ia outou iloa lelei, e i ai foi le e na te vaavaaia outou, ae vaavaai mai e le Atua matou nei o Minisita ae vaavaai e matou outou. O le mea la lea ia outou malamalama i le mea lena, ae lafo mai o sui o le tatou Maota e aafia ai tofi pulenuu i o latou afioaga i itumalo, e leai e le o ia i matou foi se agaga e faapea e fuao lo outou mamalu, a o le agaga moni lava ia tatou maua le galulue faatasi, o le agaga lena o le Malo, ia galulue faatasi le Malo e afua i le Matagaluega o sui o nuu ma sui tamaitai o nuu ma sui o le Malo i totonu o nuu e le o ni nuu faavae, vaeatu lo outou mamalu pe afai o faafogafoga mai, ia o ai ni afioaga pei ona ia te au le lisi masalo toetiiti lava 20, ae aua tou te popole. A outou amio lelei, o la e fai mai le tala a le Alii i le tama o Kaino, "O lo o taoto i luma i le faitotoa le agasala." O le mea lea, ia e amiolele. A e amiolele, ua ou poloai foi aua nei i ai se isi e oo le lima ia te oe. O le mea lea pulenuu e, ia outou amiolele.

**FOFOGA FETALAI:** Malie lava le Minisita se i lafo atu le mataupu, o le talosaga vaivai a le Falevaimauga. Tulai mai se tasi o sui usufono mo Vaimauga Sisifo, Tofa Lenatai Victor Faafoi Tamapua.

**Tofa Lenatai Victor Faafoi Tamapua:** Lau Afioga i le Fofoga Fetalai, faamalo faafetai. Ia faafetai lava i lau Afioga i le Minisita e tusa ai ma le amanaia foi o le talosaga lea sa avatu foi i le folasaga. O le agaga lava ia na avatu ai faapea o lou tagata ua maea ona totogi cashpower o lae ua faagasolo uma vaega ia i uta i Magiagi, sa faapea o lou taulamua, ona o lea ou te molimauina o lo o faapea ona faia pea le galuega a le pulenuu o lo o i ai i le taimi nei, po o le sui foi o le nuu po o le susuga ia Tuiono, po o le tina foi o lo o fai ma sui o le Malo i le vaega lea.

**FOFOGA FETALAI:** Malo faafetai toe faamanatu mai. Saunoa mai lau Afioga i le Minisita mo Tina ma Tamaitai, Atinae o Nuu ma Afioaga ma Agafesootai.

**Tofa Hon TOLOFUAIVALELEI FALEMOE LEIATAUA:** O lea ua maua atu le finagalo o lou uso. Lau Afioga i le Fofoga Fetalai, na ona Lenatai o le tama a o le Tamapua. O le mea lea Tamapua, aua e te popole, lafo maia lou faatuatuaga, o lea ua ou fai atu. E leai e vaavaai lava foi le tatou Matagaluega i le tulaga e tataua ona oo i ai fuafuaga faapenei.

Lau Afioga i le Fofoga Fetalai, o le tulaga lena o tofi pulenuu ma ni eseese foi i totonu o tatou Afioga o le tatou atunuu o lo o aafia i lea vaega, na pau lava lena o le matou tala atu. Lau Afioga i le Fofoga Fetalai, o le tatalo i tulaga o sui pulenuu faapea foi sui tamaitai o nuu e pei ona maua i nisi o finagalo faaalua, ia tatou maua le galulue faatasi. O le faamoemoe o le tatou Malo, o outou e limataumataua i ai le Malo i le tulaga o le faaleleia o pulega lelei i totonu o afioaga, ina ia tausisia e tagata soifua uma le agaga o le tausi o le filemu ma usitai foi i tulafono a afioaga, e pei ona i ai le tatou polokalame o pulega lelei i totonu o afioaga o lo o faagasolo ai nei foi galuega a le tatou Matagaluega, lea na amata mai i afioaga ia e i ai Afega. Ua uma ona faataunuu a latou foi fuafuaga i tulafono faataatitia, aemaise foi o afioaga o Fagafau, Salepouae. Ma o lea ua taoto foi le fuafuaga mo nisi ia o nuu lo o taumafai mai a latou fuafuaga e i ai Tapueleele, o Satufia i Satupaitea, e faapea foi Fusi i Safata. O le mea la lea, o le agaga maualuga, ia outou alolofa i le faamoemoe o le tatou Malo ia tausisi i le faamatagofieina o tatou aai, ia toaaga e toto le talo ma le fai ma fai a tatou asiasiga, ina ia faapena ona manuia le tatou atunuu. Ua matou vaavaai i molimau ola, ua matua mau le tatou atunuu. O le mea foi la lena o lea e moomia e le tatou Malo, ia outou matua tulai mai e faamanino i e o lo o tetee ma latou faaleaga le tatou atunuu fai mai ua oge, ua fia aai, ua matitiva. Ae ou te fai atu, a tatou galulue faatasi le paia e o sui pulenuu ma sui tamaitai o nuu, e le gata i le faamatagofie o aai, aemaise ai foi o le galueaiina o le laueleele i tuamaota faapea foi tualaoa, ae le gata i lea o tulaga o aoaoga o lo o faagasolo ai nei foi galuega a Matagaluega, mo le mamalu o tina ma tamaitai o afioaga. E pei la o tulaga o suisui, o polokalame e aoaoina mo kuka, e faapea foi le tuiina o teufugalaa, o le elei, o mea uma faapena, o lea e faagasolo atu ai polokalame a le tatou Matagaluega. O le mea la lea ia outou alolofa foi ia tatou galulue faatasi, e maua ai manuia o le atunuu lautele.

O le tasi itu lau Afioga i le Fofoga Fetalai, o le vaega lea o le Ie Samoa i le polokalame lea, o lo o Taitaifono ai foi le Palemia, a o le Matagaluega o Tina ma Tamaitai, Atinae o Nuu ma Afioaga ma Agafesootai o lo o faatupeina e ala i le finagalo o le Malo. Faamalo faafetai. O lo o maitauina lo outou galulue malosi i le uunaia ma le lalagaina o le toga i le matagofie ma le lelei o lo o moomia e tusa o le fuafuaga a le tatou Malo ma le Komiti o le Ie Samoa.

Ia, ona taualuga lea o se matou tala i se finagalo o se tasi o sui usufono i le tulaga o talavou ma alo ma fanau, o lea ua outou faafofoga, e afua mai i totonu o aiga i matua i le va ma le fanau ona faalelei la outou amio ma le tulaga o le va, ia maua le faaloalo ma tausisi i le avafatafata, aemaise ai la, ia agai lo outou finagalo i le tapenaina o tulaga i mea o pisinisi laiti. E pei ona i ai le sauniga i le vaiaso ua tuanai, lea sa tufatufaina ai foi faailoga faapitoa mo tupulaga talavou o e ua matua aafia lava i le faiga o faatoaga lelei ma faigafaiva lelei, aemaise ai foi o le tulaga o atinae, e i ai manupapalagi, o fale inisia, o le suisui ma mea uma lava faapena. O lena ua outou molimau lava outou e tusa ma lea sauniga, ua tele tupe ua outou maua ae talavou lo outou



soifua. O le mea lea ia aveaveo ai lo outou avaoto e pei o lea upu i lo outou naunautaiga ma le faamoemoe o le tatou Malo, ia manuia o outou faiva. E le uma ai, o tausaga uma e faatino lava le tatou polokalame lea o faailoga faapitoa mo talavou aua le atinae o lo outou soifua talavou a o tatou i ai i lenei lalolagi.

Ou te talitonu ona pau lea o vaega.....

**FOFOGA FETALAI:** Malie lau Afioga i le Fofoga Fetalai se i avatu le avanoa mulimuli lea i le Afioga i le Taitaifono. Tulai mai lau Afioga i le Aloalii Papaliitele.

**Susuga Hon Papaliitele Niko Lee Hang:** Lau Afioga i le Fofoga Fetalai, e maitau atu ua faaiu mai le saunoaga a le Minisita ae na afea i lau lauga le Fale Lomitusi e tusa ai foi ma le sailiga a le matou Komiti sa matou maitauina ai le tulaga o le tele o aitalafu la e i totonu o le Faalapotopotoga lea. A o le feeseeseaiga la e i ai, sa matou talanoa foi i le tele o Matagaluega a le Malo, e le tutusa a latou records ma records a le Fale Lomitusi. Ma le isi mea lau Afioga, po o sao tau ia e fai ai tau a le Fale Lomitusi ina ia taumafai e maua ai se tupe mama? Aua o le isi Faalapotopotoga lea e tataua ona maua ai ni tupe mama ma aumai dividends foi nei i totonu e fesoasoani i le Tala o le Tupe. A o le tulaga lea se i silasila ane lau Afioga i le Minisita i feeseeseaiga lea i le Fale Lomitusi ma Matagaluega a le Malo lea e aitalafu i lau Matagaluega.

**FOFOGA FETALAI:** Faafetai. Tulai mai lau Afioga i le Minisita.

**Tofa Hon TOLOFUAIVALELEI FALEMUE LEIATAUA:** Lau Afioga i le Fofoga Fetalai ma le faaaloalo ou te tali atu ai, ua uma ona faatino e le Matagaluega le fuafuaga mo le Fale Lomitusi. E sao au o lo o taoto mai i le lipoti a le Suetusi Sili, e silia ma le miliona tupe e le i maua e le Matagaluega e ala i galuega fai a le Fale Lomitusi, ona o le tele lava o Matagaluega a le Malo ma Faalapotopotoga i a latou galuega e le i totogia. Ua fai si leva, ae peitai o lea ua i ai le lagona, e talosagaina lava le Malo ina ia i ai se taimi i luma e faatutoatasi ai lenei galuega o atinae a le Malo, ina ia avea o se pisinisi e faatino ma faagaioi e se vaega tumaoti. Peitai i le taimi lenei, o lo o taumafai malosi le Matagaluega ina ia maua mai pea se fesoasoani e ala i se faatagaga a le Kapeneta aua nisi o seleni o lo o pau e pei ona outou faafofoga mai i ai, ina ia fesoasoani ai ia toe maua nai masini lelei. O masini la e i ai ua fai si leva o tausaga, ae peitai, o la e lava o lo o taumafai ai aua le auaunaga ia faataunuu e tusa o lea vaega o tiute fai o le tatou Malo. O le mea lea lau Afioga i le Taitaifono, e pei o le agaga lena, e lelei le mataupu, ae a oo lava i le taimi talafeagai, ou te talitonu o le sologa manuia foi lena o atinae a le tatou Malo, pe afai foi o le a tuu atu i se tino tutoatasi latou te faagaioiina. O se faaiuga a le Malo e faamoemoe i ai e ala i le Palemia ma le Kapeneta.

Ma lou faaaloalo ou te faapea atu ai, ua maea ai galuega a le Matagaluega. Ou te faafetai atu ai i le tapuaiga a si ou itumalo o Aana Alofi Nu.2 i le tatou laulua i Nofolii ma Leulumoega, e le tau faalupea o outou sa. O Sa Tuala lava ia o le Aiga Faalagilagi, o Sa Tanuvasa o le Laau na Fausia, e faapea foi i lou Tapaau Leulumoega i le Toaiva ma Alipia o le Tuiaana ma le mamalu i lo tatou nuu ma le itumalo. O le mea la lea, ia faafetai mo le tapuaiga. E faamaise atu foi i le Aiga Sa Oloapu, aua ua gau le tasi o pou o le Fale

Tuiaana le fetalai a Niuapu i lo outou Aiga Sa Oloapu, ia faamaise atu le Atua. Tatou toe feiloai foi i se aso o i luma pe a ae ma le malo le faatautaiga a le Palemene. Ia manuia lenei po.

**FOFOGA FETALAI:** Malo. Faafetai saunoa i lau Afioga i le Minisita mo Tina ma Tamaitai, Atinae o Nuu ma Afioga ma Agafesootai. Ua manatu ua malamalama atugaluga aemaise foi le taumafai atu o le tatou Maota Fono nei e fesiligia le Matagaluega o lo o e galue ai. Faafetai galue, malo le onosai.

Ua tatou taunuu mai i le Minisita mo Fesootaiga ma Faamatalaga Tekonolosi i le afio o le Alaalataua, Susu Tuisugaletaua ma Luamanuvae, Pulemagafa o le Faiga ma le mamalu i le na talia le tanoa ma le Fetalai ia Saleupolu. Tulai mai lau Afioga i le Tiakono Toeaina po o lau Afioga i le Tiakono Toeaina po o lau Susuga i le Aoa Fesoasoani, o lea ua tatou taunuu mai i le tatou taimi o le folasaga a le tatou Matagaluega.

**Afioga Hon TUISUGALETAUA SOFARA AVEAU (Minisita mo Fesootaiga ma Faamatalaga Tekonolosi):** Faafetai i lau Afioga i le Fofoga Fetalai o le Maota o Samoa. E faatulou atu foi i le paia o le tatou Maota Fono nei i le afio o le Afioga i le Palemia ma le Kapeneta ma lenei Itu faapena foi lena Itu o le Maota i lau Afioga i le Taitai o le Itu Agai ma le mamalu eseese o sui usufono ua mafai ona tatou nunumi faatasi o fuafuaga mo lo tatou Malo. O lea ua opogi ufiufi le tatou laufanua i le pogisa o le Atua, ma o i e tatou te molimauina ai pea Lona agalelei ma le silisili ese lava o ona tualumaga, lea ua taitai manuia mai ai le tatou folauga i le Maota nei i ana tualumaga i le tatou Fono i lenei aso ma lenei vaiaso, i lona tulaga manuia ma le saogalemu, ona o le agalelei ma le faasoa mai o le Atua ma lona tamaoiga e ala eseese i o outou finagalo ma manatu. O lea la ua tatou tini taunuu ai i lenei vaega o le afiafi o lo o maua pea le soifua laulelei e le paia maualuga o le tatou Maota nei. I le faafofogaaga foi a Samoa ma lana tapuaiga, aemaise le Afio o Lana Afioga Mamalu O Le Ao o le Malo ma le Masiofo, faapea foi le Sui o le Fono a Sui Tofia ma le Masiofo ma le faafofogaaga a Samoa i ana faiga malologa o lenei afiafi, e mautinoa o lo o usi mai le maimoa ma le faafofoga i tualumaga o le tatou Fonotaga nei. Faafetai le tapuai, faafetai onosai, faafetai foi lagolago mai i le galuega a lau Palemene e pei ona matou galulue ai.

E lima nai mataupu sa laga mai mo lenei Matagaluega, ma o isi vaega sa laga mai ua uma ona ou tali atu i ai, ae o isi ia o vaega e le i matua atoatoa i ai se faamatalaga i le taimi ua sola ina ua laga mai.

Sa fesiligia e se tasi o sui usufono mamalu pe aisea e le faalauteleina atu ai le polokalame o le broadband highway i isi vaega pe na o le Malo e faagata ai. Ma o le mea moni lava, o lea e amata i le vaega o le Malo, e amata i tatou Matagaluega faale-Malo aemaise faalapopotoga. A maea lena ona tatala atu lea i tua. O le a faapena le faagasologa o le vaega o le amataga o le galuega, e amata muamua i vaega eseese o le tatou Malo ma ana Faalapopotoga ona faasolo atu ai lea i tua.

**FOFOGA FETALAI:** Ou te vaelupeina le saunoaga a le sui usufono mamalu, ou te faamalulu atu i le Afioga i le Minisita aua ou te talitonu ua see lou sa mo le tali mai a le tatou Malo, leaga o lea ua tatou taunuu i le tatou malologa masani o le po nei. E lelei lava le tatou sailiili malosi, na o sina

i puti ua tali mai ai le tatou Matagaluega, ona tatou tuutuuloloa ai lea i le ta o le 11:00 i lenei vaega o le afiafi.

O lea ou te faasilasila atu ai o le a faataatia ese Taulumaga a le Fono Aoa mo lana malologa mo le afaifi nei.

*Na faataatia ese Taulumaga a le Fono Aoa mo lana malologa i le itula e 9:23 i le po ma toe amatalia i le itula e 9:50 i le po.*

**FOFOGA FETALAI:** E i ai le talitonuga o lenei ua tatou taunuu mai i le vaega faaiu o le tatou Galuega, e i ai foi le talitonuga atoatoa ua fafaoisia lo outou malosai i le tino, agaga, mafaufau ma le loto e faafoe ai a tatou galuega seia maea lenei itula afiafi.

E momoli atu le agaga faafetai tele ma le agaga faapalepale i le paia mauuluga o le tatou Maota, malo le onosai, malo le tauatai. O lo o faagasolo pea la tatou galuega ma le faanaunautaiga e pasia lava le Tulafono Tau Faaofi o le Faatatauina o Tupe 2013/2014 i le po lenei, ina ia mafai ona tuumamaina ai la tatou galuega mo le aso a taeao, ona o lo o i ai nisi o Tulafono Tau Faaofi e tataua ona tuuina mai i luma o le Maota aua le faafoefoeina o nisi o Matagaluega aemaise o nisi o faiga faavae a le Malo ua tataua ona faagaioi. O le mea lea ia onosai mai le paia ma le mamalu mauuluga o le tatou Maota i lau Afioga i le Palemia ma le Kapeneta, o le faanaunautaiga ina faamama la tatou galuega ma ia tatou tiga puupuu. O lea ua faatulaga la tatou taimi i le ta o le 11:00.

O le a tuuina atu le avanoa i le Afioga i le Palemia mo le Lafo faatu.

#### **LAFO MO LE TOE FAAAUAUINA O ITULA FONO**

**Susuga Hon TUILAEPA FATAIALOFA LUPESOLIAI AIONO NEIOTI SAILELE MALIELEGAOI:** Ou te tulai atu ma le agaga faaaloalo e faatu le lafo, *Ina ia faagasolo le tatou Galuega seia oo ina pasia le Tulafono Tau Faaofi o le Faatatauina o Tupe 2013/2014 i le po nei.*

*Faaluaina e le Sui Palemia, Minisita o Tupe ma le Minisita o Fesootaiga ma Faamatalaga Tekonolosi.*

*Na faamaonia le lafo.*

*Na toe faaauau felafolafaiga i luga o le faitauga faalua o le Tulafono Tau Faaofi o le Faatatauina o Tupe Faaopopo (Nu.2) 2012/2013 ma le Tulafono Tau Faaofi o le Faatatauina o Tupe 2013/2014.*

**FOFOGA FETALAI:** E faia le tatou malologa o lo o faagasolo le tali a le Afioga i le Minisita mo Fesootaiga ma Faamatalaga Tekonolosi. O lea ou te toe tapa ai lau Afioga i le Minisita mo Fesootaiga ma Faamatalaga Tekonolosi aua le faaauaina o le Tali.

**Afioga Hon TUISUGALETAUA SOFARA AVEAU:** Faafetai i lau Afioga i le Fofoga Fetalai, out e manatu ua sao i alo le taliga o le sua ma le faamalosi tino i lenei afiafi ma ua maua se faasiliga malosi. Ua maea ona ou tali atu i le vaega muamua e tusa o le fesiligia o le tatou polokalame o le Board Band highway po o ala ea lautetele e faaaogaina e amata mai i le tatou Malo ma Faalapopotoga a le Malo. O le mataupu lona lua e pei ona laga mai e se tasi o sui usufono e ala i le initaneti ma lona tau, ou te faamoi i le manatu na tuuina mai i le agaga o lo o faapea mai ua maualuluga le tau o lo o faaaogaina ai le initaneti. E sao lea tulaga, ona o totonu lava o le Pasefika ma le tulaga o lo o i ai, o Fiti o lo o maualalo, ogatotonu Samoa ona sosoo ai lea ma Vanuatu i le pito i luga ua maualuluga foi isi motu ma ua feoloolo lava ona faasolosolo atu tatou. O le masina o Aperila e pei ona ou faamatala atu muamua sa tuuina a ii lalo tau e fesootei ai i latou ma telefoni eseese a i laua o lo o faaaogaina telefoni feaveai. Ona faaitiitia ai lea o le tau mai le 17.7sene i le 13sene, o le taimi lenei ua faapauina ma ua faagasolo atu a ii le faatauina auiliili. E mautinoa o le a maua ai foi ma le pau. O le masina o Aperila sa faapauina ai le tau i se tasi o kamupani o lo o tuuina atu i le initaneti ma o lea tau e pau maualalo lava, peitai ane sa tuuina mai e pei o ala o le faiga o lenei galuega ma lenei atinae na tuuina mai ai ni faasea a nisi o Kamupani se 4 o lo o latou faatinoina lenei faamoemoe ma sa faia i ai le saililliga mai lena taimi a le Pule Faatonu ma o le aso sa tuuina atu ai le tali i nei mataupu ia i latou o e na aumai lo latou finagalo faasa. O totonu o le isi lua po o le tolu vaiaso ona faatoa maua ai lea o le isi tali mulimuli ma e talitonu e ono tele foi se fesoasoani i le tau o le initaneti e faapau ai pe a oo ina faatino ia faamoemoe taua a le Susuga i le Pule Faatonu.

E pei ona ou fai atu muamua o lo o taitaia le galuega a le Pule Faatonu e ala i tulafono e tatau ona matua maioio lelei ma malamalama ia i latou o e aumai lo latou leo i totonu e faapena foi ona maioio lelei tali atu a le Pule Faatonu ia i latou e tatau ona ave i ai le fesili ma faatulaga ai le tali mulimuli.

O le vaega lona lua o lo o faamoemoe e tuuina atili ai i lalo le tau o le tatou initaneti, e pei ona ou faamalamalama atu muamua o lo o saili pea le tatou Komiti Faapitoa ua uma ona tofia mo lenei mataupu, faatasi ai ma le tatou Malo ma le Matagaluega i le sailiga o se tatou Sub marine cable e lua ai po o le sui ai o le tatou tatou cable o lo o i ai nei ma le talitonuga o le a tele atu lona avanoa e toatele ai i latou e faaaogaina ma pau atili ai le tau o le tatou initaneti. O le isi faamoemoe lena o lo o faagasolo ma ua fai foi sina leva ona faagasolo, e fai le feiloaiga i le masina fou ma le World Bank ina ia faamanino vaega tetele ma le taua o lea polokalame.

Sa fesiligia le Matagaluega e uiga i le isi technology fou lea sa saunoa mai ai le isi sui usufono e taua o le paluni. O le faiga fou lea po o le launch balloon sa tatalaina i Niu Sila i le vaiaso atu i tua a ua leva ona faaaoga i isi atunuu e i ai Fimland, Suetena ma latou na ua leva ona latou faaaogaina le techonolgy lea ona fai foi lea tuu. O le faamoemoe o lea technology e pei o le satellite ae maualuga laitiiti atu le mea e taula ai le satellite na i lo le vaega e taula ai le paluni lea e faalapoia e tusa ma le 35 afe futu le maualuga faapena ae maualuga laitiiti tonu lava le mea e felele ai vaalele. O i ina e faalele i ai le paluni lena o lo o i ai ma masini faapitoa e pei o le faaaogaina o le satellite ma tuuina ifo ai i lalo ala ea nei e pei o le faiga o lo o fai ai satellite.

Masalo o lo o sailiili pea e le tatou Matagaluega lea vaega, a o le technology e tele lona aoga mo le agai i luma ae manatu e le o se taimi lenei mo i tatou i lea vaega a o le a aveesea pea i le fuafuaga a le tatou Matagaluega, o le a fai pea ma tilotilo i ai pe i ai ni suiga lelei po o ni suiga faigofie atoa ai ma ni suiga e taugofie mo tatou. O le a le mafai ona tapunia ai le faitotoa mo lea vaega.

O le tulaga lona tolu sa tuuina mai ai manatu feoloolo o nisi o sui usufono i le tulaga o le faaslalaua a le televise....

**FOFOGA FETALAI:** Malie lau Afioga i le Minisita se i tuu atu le avanoa i le faamanatu a le sui usufono mo Faleata Sisifo.

**Tofa Lealailepule Rimoni Aiafi:** Lau Afioga i le Fofoga Fetalai, faafetai atu i le Afioga i le Minisita mo fuafuaga tuutuu mamao aemaise lava o le initaneti. O le a le toe i ai se manatu a o le a matou onosai ma talia lou alofaiva ia manuia e le o toe mamao. Ona pau lava le mea o lea ua e saunoa i le Marine cable, ou te talitonu o le tasi lea o fuafuaga aoga tele ma le lelei ma o le a tele se fesoasoani i lea vaega. Ona pau lava le tuualalo i lau Afioga, e tatau ona taofiofi mau le tatou Malo i lea vaega aua e aumai foi ma tuu atu i le vaega lea i tua e fai tauvaga ai ma faipisinisi ma toe afaina ai foi tatou, ma le faaaloalo lava ae malo lava faafetai.

**FOFOGA FETALAI:** Malo faafetai, tulai le Minisita e faaauau lou tali atu.

**Afioga Hon TUISUGALETAUA SOFARA AVEAU:** Faafetai i lau Afioga i le Fofoga Fetalai e tusa o itu taua e pei ona laga mai, ioe. O itu uma nei o lo o i totonu o le faavaa lea o lo o tilotilo i ai le tatou Matagaluega ina ia Iloilo totoa i ai, e le faatopetopeina lea mataupu a o le a Iloilo pea i le vaega e mafai ona faaaogaina uma e i latou, e tatau ona sao i ai i totonu ma faatauina mai ina ia taugofie e aunoa ma se lamatia i le faatuaoi e pei ona maua ai i nisi taimi, o le faamoemoe lena, ae tatou talosia ia vave ona oo mai le taimi tatou te faataunuu ai lea faamoemoe.

O le polokalame o le televise e pei ona ou fai atu, o le masina o Mati sa faia ai le monitor mulimuli po o sailiiliga i le maitau lea a le Pule Faatonu, sa taamilo ai i le atunuu ma mataituina ai vaega eseese o lo o maua ai. O le vaega o lo o faaletonu o le itu Asau, Neiafu ma Falealupo o lo o tumau pea le faatonu i ina. O le faamatalaga e pei ona tuuina mai muamua, o le faamatalaga foi lea o lo o tuuina mai e faapea ona o le afi po o le eletise o lo o masani ona faaaogaina e i latou o lo o maua mai i le solar. Afai e maua le solar i le ao ae a oo la i le po lea tatou te mananao ai e matamata i le televise ua femoemoai, ae a ki loa ma le moli ua atili ai ona vaivai. O le tulaga lena o lo o taatia ai le mea lea ae le o mapu ai la matou Matagaluega i le fagufagu pea. O le lua vaiaso talu ai foi sa tuuina atu ai le tusi foi i Kamupani o lo o faia televise.

E pei ona ou fai atu o lo o i ai aulape i lalo o le Tulafono a o lo o manumanu foi e faaoga vave ia aulape ona o le manatu alofa i le toatele o le atunuu, aua e toatele le atunuu i le isi itu ae pen a o le 12 po o le 11% o lo o i le isi itu. E fai fuafua faapena ina ia aua ne i aafia tele finagalo a o lea lava o lo o taumafai le galuega, ae se i tatou tilotilo pea i se taimi e le o toe mamao atu

ona fai loa lea o se isi iuga mautu. Aua e le mafai ona tatou faaauau faaletonu ai pea faapea a o taimi o latalata mai e tilotilo pea i ai ma fai ai se tonu mautu i lea mataupu. O isi aiaiga nei na ala ai ona tuuina atu laisene e faaoga e i latou o le au fai televise. E le mafai la ona faaalualu loa faapea e aunoa ma le faaogaina o le manaomia o tulaga uma e pei ona maioio i le tuuina atu o le laisene e tataua ona faamalieina uma nei tulaga uma. Ua umi le taimi sa tuuina atu a o lea lava e le o i ai se suiga tele.

E i ai nai vaega laiti o leitia, sa toe siaki nei ona e i ai le isi vaega lea sa faailoa mai o lo o faaletonu le maua o le leitia ma ua aumai le faamaoniga nei i le aso e leai o la sa lelei lava le leitia o lo o maua e ia vaega o le atunuu. Ae ai o i ai se vaega o le atunuu e le o manino lelei ai le leitia po o le maua foi i le isi taimi ae le maua i le isi taimi. O le galuega lea o lo o taumafai atu ina ia faaleleia, o le taimi lenei ua faigata ona fai se galuega mautu mo le 2AP mo faasalalauga ona o lo o alo atu le tatou Matagaluega i le faiga o le galuega o le ofisa fou o le 2AP, o lo o ave uma i ai le malosi i ina ma tilotilo i ai ina ia lelei faataunuu lea faamoemoe.

Ona maea ai lea o mataupu e pei ona laga mai.....

**FOFOGA FETALAI:** Malie lau Afioga i le Minisita o lo o i ai nai sui usufono o lo o tutulai atu mo ni mataupu. O le a avatu muamua le avanoa i le sui usufono mo Aleipata Itupa i Lalo ona sosoo ai lea ma le sui usufono mo Falealupo.

**Afioga Tafua Maluelue Tafua:** Faafetai lava i lau Afioga i le Fofoga Fetalai, e faamalie atu i lau Afioga i le Minisita mo Fesootaiga ma Faamatalaga Tekonolosi ua manaia lava ua see lou vaa ae o lea ou te faalogo atu o tau Asau ma Falealupo i le faaletonu o le tv coverage ae malie lou finagalo ou te lei lauga ai ae sa ou lauga ai i le tausaga le na tea nei ona ua matua faaletonu lava le tv coverage i Aleipata atonu e faapea foi i Lepa, Aufaga ma Lotofaga. O lea ou te tulai atu ma le agaga faaaloalo na ona faamanatu atu i lau Afioga i le Minisita ma taatia atu i out ala ane. Ma le faaaloalo lava.

**FOFOGA FETALAI:** Malo faafetai. Malie lau Afioga i le Minisita Mo Fesootaiga ma Faamatala Tekonolosi, mo le faasaoina o lou taimi sei tuu atu le avanoa i le sui usufono mo Falealupo.

Tulai mai le sui usufono mo Falealupo.

**Afioga Hon Aeau Peniamina Levaiseeta:** Faafetai tele i lau Afioga i le Fofoga Fetalai, ioe lau Afioga i le Minisita mo Fesootaiga ma Faamatalaga Tekonolosi e faapena foi matou. O matou e mamao tele, a matou matamata i le tv pei ua matou iinei i Apia. Pe mafai ona fai se pou? Aua o lena ua uma ona e saunoa mai o mea uma ia o solar – pe mafai ona fai se matou pou e umi i lalo ifo o ao ina ia faafaigofie ai? Ae pei o le matou talitonuga lena, na ou talatalanoa foi i tagata fai mai seiloga e fai se tou pou.

**FOFOGA FETALAI:** Malo faafetai o lea ua maua le finagalo o le sui usufono. Malie lava lau Afioga i le Minisita mo Fesootaiga sei avatu le avanoa mulimuli lea i le sui usufono mo Falelatai ma Samatau.

Tulai mai le sui usufono e saunoa.

**Afioga Taefu Lemi:** Faafetai i lau Afioga i le Fofoga Fetalai, faafetai foi i lau Afioga i le Minisita mo Fesootaiga ma Faamatalaga Tekonolosi na ou taua laisene ia e faamatuu i nisi o leitio. Emoni e le ni leitio a le tatou Malo ae e le o maua mai e le tele o nuu FM faamolemole lau Afioga i le Minisita. Pe le mafai ona fai ni aiaiga i le taimi e faamatuu ai laisene e poloaina ai pe i ai se aiaiga foi lea e alu ai le taimi ma le tausaga ia oo atu ua faasopolia lea auaunaga? E pei o le uiga lea o le talosaga lau Afioga i le Fofoga Fetalai.

**FOFOGA FETALAI:** Tulai maia lau Afioga i le Minisita mo Fesootaiga ma Faamatalaga Tekonolosi e tali faaii.

**Afioga Hon TUISUGALETAUA SOFARA AVEAU:** Faafetai. O le itumalo lea o Aleipata e sao o lo o i ai i le lisi o faamaumauga o le monitor mulimuli e le o maua se tv i Lalomanu ma le vaega uma lena atoa i Aleipata Itupa i Luga ma Aleipata Itupa i Lalo faapena foi se vaega o Lufilufi ma se vaega laitiiti o Siumu, faapena foi la i Falealupo e le o maua foi, lea sa ou lauina atu muamua. O le faamatalaga e pei ona tuuina mai o Falealupo lava latou ma le itu o Asau ma Neiafu, e faapea o la e lelei le pou ae le o mafai ona lelei le transmission ona e le o lava le paoa. O le paoa la le faafitauli lea e le ola ai ao la e faapea e faaaoga le solar e ola ai. Ao le faalavelave la e faaaoga le solar i le ao, e le o lava le battery e loka ai ma store ai le malosi lea e faaaoga ai le transmission i le po. Aua o le tele lava o taimi o lea e faaaoga e tatou le tv i le po aemaise lava taaloga ia e fai i le po. O le faafitauli lena ae ua leva ona tau mai le faafitauli lea ae foliga mai o lea foi sa alu atu le asiasiga talu ai nei aae le o faia lava i ai se galuega. O le mea lea e fai atu ai e taatia mai sei toe taumafai atili aua o lea lava matou te tuitui pea i ai i le mea e gata ai.

O leitio e pei ona saunua le sui usufono mamalu mo Falelatai ma Samatau, ioe, e i ai leitio e le oo mamao atu, manatua o le tele o isi leitio lea e faaaogaina nei isi ituaiga alaleo foi ia e maualuluga tele range ae le mamao le alu atu i tua. O lona uiga e i ai foi faafitauli o na ituaiga leitio. O lo o i ai i totonu o aiaiga o le laisene mea uma ia sei vagana leitio po o tv o lo o faaaoga mo fesoasoani ae le se faiga pisinisi. O le vaega la lena o lo o tuufau lava latou aua e le o se mea e maua ai ni tupe a i latou ia ae fesoasoani mo nisi. O lona uiga o la e i ai le faamoemoe e maua ai le fesoasoani ao le vaega latou lea o laisene faapisinisi e pei ona tatou talanoaina e faigofie ona fai aua e le o se mea faigata le faatino loa o isi faamoemoe la e i ai. Ae e fai foi ma le fuafua ma le alofa ona e fuafua foi i tupe o lo o faagaoioi ai isi galuega ma nai tupe o lo o maua e nai na pisinisi ina ia taumafai e faaola nai lo le tape motu ona atili ai lea ona le maua se mea e nai la tagata ma leai se mea e maua e le aufaapisinisi, o le agaga tonu lava lena.

Ona faaii atu ai lea o se faamatalaga i lenei afiafi lau Afioga i le Fofoga Fetalai aemaise le tatou Maota faafetai lava foi mo le avanoa, faafetai mo le lava papale mai ma le manatu faatauaina o le tautua a lenei Matagaluega o lo o matou tauaveina ma matou galulue atu ai. Ia manuia lenei afiafi, soifua.

**FOFOGA FETALAI:** Malo faafetai saunua i lau Afioga i le Minisita mo Fesootaiga ma Faamatalaga Tekonolosi, e i ai le lagona maualuga ua matua talia ma le agaga faafetai e le tatou Maota le folasaga manino. Ia o ou mama,

o lea lava e tagitagi mai le atunuu o le tv ona e fai o taaaloga a le Manu Samoa aemaise le tatou toe manumalo i le Commonwealth lea o le a tatou sauni atu i ai. O le toatele o le au tapuai e manatu e tau i manu lo tatou Malo ae faamalo le onosai.

Ua taunuu mai i le toala faaautama o le aso, le Minisita o Tupe e ou le Tala o le Tupe aua le paia maualuga o Palauli le Falefa ma le mamalu i Ao e fa ma Faleupolu e fa, lau Afioga i le Tupufia Faaolatane o le Gafa ma lau Tofa Tiatia o le faatumutumuga o le Aiga Salemuliga ma lou Gautaalamavae.

Tulai mai o lea ua avanoa le Maota mo lau saunoaga.

**Afioga Hon FAUMUINA TIATIA FAAOLATANE LIUGA:** Lau Afioga i le Fofoga Fetalai o le Maota o Samoa o le a ou le toe oo i mamalu ma paia o le atunuu aua e le mafai ona toe faaopoopoina pe toeseina se iota o ia paia ma ia mamalu ona ua utiuti foi le tatou taimi ma ua tatau foi ona faagasolo le mataupu e pei ona tauaofia ai nei le Palemene.

Lau Afioga i le Fofoga Fetalai e muamua ona ou avatu le faamalo i lau Afioga i le faatautaiga o le Fono mamalu a Samoa. Malo le onosai, malo le lava papale. E avatu foi lau faamalo ma le faafetai i sui usufono o lenei Maota i saunoaga i le Tala Faatatau Faaopoopo (Nu.2) o Tupe 2012/2013 faapea foi le Tala Faatatau Autu o Tupe 2013/2014. O finagalo o sui usufono mamalu sa saunoa i lenei Tala Faatatau Autu o Tupe o se sao taua lea o lenei Maota i le tapueina pea o le atinaeina o lo tatou tamaoai.

E avatu lau famalo ma lau faafetai i le Taitaifono ma sui mamalu o le Komiti o Tupe Maua ma Tupe Totogi o le Maota mo le Tala Faatatau Faaopoopo (Nu.2) o Tupe 2012/2013 ma le Tala Faatatau o Tupe 2013/2014.

O lau Susuga i le Taitaifono, o lea na e talosagaina nai atinae mo nai aiga i Aleisa e ui lava e te le o mautinoa le lumanai. Aua e te lotu vaivai e leaga e ono determine ai lou destination, o le uiga lea e tau mai ai e le o i ai sou faatuatua ao oe o se tagata e mafuta i le Atua. O le oa o mafaufauga ma fautuaga taua o lo o faataatitia mai i lenei Lipoti e matua aoga tele mo le faaleleia atili ma le faatautaiga o le atinaeina o Samoa. O le Tala Faatatau Autu o Tupe 2013/2014 o lo o atagia ai le faasolosolo i se tulaga lelei o lo tatou tamaoai. Faataitaiga, i le Tala Faatatau o Tupe i le tausaga ua mavae o le tau o le soifuaga na i ai e 5.9% i le masina o Mati 2012. I le tulaga ua i ai nei ia Mati 2013 ua .02% le tulaga ua maualalo ai le tamaoai. O le a le itu? O lea ua silasila lenei Maota i le mea o lo o fesoasoani ma tautua pea le Malo e galueina o tatou laufanua. O taiala lautetele o aga o le maketi e tele oloa ua taugofie, a utiuti oloa ua taugata, e faigofie lava ona tatou malamalama i ai. E tatau ona tatou faafetai i le aufaifaatoaga, faafetai i le mamalu o le atunuu aua ua faatino la outou pitolaau. O le pitolaau a le Malo o le saunia lea o avanoa e tapue ai lo outou fia galulue ma o le mafuaaga foi lena ua faataatitia ai polokalame a le Matagaluega o Faatoaga ina ia tapue ma ave le fesoasoani i le aufaifaatoaga i afioaga ma alaalfaga i tua. O faiga faavae lautetele a le tatou Malo e faatupulaia ai pea le tamaoai, o le faia lea o atinae e maua ai galuega ma tuuina atu ai tupe i le mamalu o le atunuu ma le aufaipisinisi tumaoti e faataavili ai le tamaoai. O gaoioiga po o faatinoga o auaunaga eseese e faalagolago lava i tupe maua a le Malo, tupe faameaalofa mai tatou paaga e faapea foi faunegatupe e mama tului i atinae ua matua talafeagai lona faatinoina. Lau Afioga i le Fofoga Fetalai, i le faasiliga o tupe alu i lo tupe maua i le Tala o le Tupe o lo o faataatia nei, e 4.8%, a fua i le faasiliga o



tupe alu i lo tupe totogi i le tausaga faaletupe 2012/2013 lenei o le a faaiuina 30 Iuni 2013, e 6.1% ae a fua la i le tatou feagai ai ma le afa o Evani ao lea lava ua pau i le tulaga na i ai, o le lauga autu o le Tala o le Tupe i le tausaga ua mavae sa faataatia ai se polokalame e auauai ona faasolo pea ina maualalo le pasene o tupe faasili i lo tupe totogi i le 3.5%. Pe ana leai le afa o Evani ma le tatou taligamalo lea ua faatupeina i le Tala o le Tupe 2013/2014. Lau Afioga i le Fofoga Fetalai ma le mamalu o le Palemene, e leai se tupe e sili atu i lo tatou tupe maua.

Lau Afioga i le Fofoga Fetalai, o le avanoa lea ou te faafetai tele ai i le Minisita mo Tupe Maua ma le Matagaluega ona o le galulue fita i tuga aua le sailiga o tupe mo lenei Tala o le Tupe. Lau Afioga i le Fofoga Fetalai e momoli foi le faamalo i Matagaluega uma o e na fai sao i le faatupeina o lenei Tala o le Tupe. O fuafuaga foi a le tatou Malo e toe iloilo ai le tau o auunaga o lo o faatinoina pea e le Malo ina ia siitia le auunaga service efficieny ma ia laina tutusa ai le tau o auunaga o lo o faatino e le Malo ma Pisinisi Tumaoti o lo o faatinoina nei auunaga i le atunuu lautele.

Lau Afioga i le Fofoga Fetalai o le faatalanoaina o lenei Tala o le Tupe.....

**Afioga Hon Palusalue Faapo II:** Lau Afioga i le Fofoga Fetalai o se mea e fia malamalama ai.

**FOFOGA FETALAI:** Malie le Minisita o Tupe sei tuu atu le avanoa i le Taitai o le Itu Agai.

**Afioga Hon Palusalue Faapo II:** E faamalulu atu i lau Afioga i le Minisita o Tupe ona o le taua o le mea lea ua oo i ai lau saunoaga, auunaga, faaleleiga o auunaga, ao lea e faailoga fesili i lou mafaufau po o le a le auunaga lea e faalelei i le siitia o le penisini? O le a le auunaga lea e fia faalelei pe a siitia nei le tau o le penisini? Taoto le falemai ia aua e sao.

**Afioga Hon FAUMUINA TIATIA FAAOLATANE LIUGA:** O lea ua ou maua e le toe tau lauga le sui usufono mamalu. Faafetai o lea ua ou maua atu lou finagalo. Lau Afioga i le Fofoga Fetalai, o lea e aga atu le Malo i tauofoga mo le tau o le penisini e amata atu ia Aokuso po Setema 2013 o le tausaga nei. O masina e lua ia ua tea na pau ai le penisini ia Mea toe pau foi ia Iuni. Afai lava o le trend lea e alu ai le tau o le penisini i fafo aemaise lava o Singapore e leiloa foi pe toe pau ia Iulai. O lea ou te faatali nei i le lipoti i le tau o le penisini mo le masina fou. E leai la se penisini e siia. O le penisini o lea e fai le tender. E faigata la ona ou taua aua e le i tapunia le tender ona o lea e faagasolo faatoa tapuni ia Aukuso. E faigata la ona ou tau atua, ae ou te iloa e le i siitia le tau o le penisini i le 200% aua afai o la e alu i lalo le tau o le penisini ma le suauu, e alu i lalo.

O le mea lena o lea e aoga ai le finagalo o le Maota ma le faaaliga o finagalo o sui usufono mamalu o le Palemene. O le tau o le suauu i le taimi lenei, o la ua popole atunuu o lo o i ai le suauu. Aua foi o lea ua tele atunuu ua atinae le eletise faafouina po o le malosiaga faafouina. O lona uiga ua amata ona laititi le maketi e faatau i ai le suauu mai le manava o le eleele. O le mea lena e tataua ona silafia. O le mea foi lena tatou te iloa ai e ono alu i lalo le tau o le suauu ma le penisini pe afai o le trend lea o lea ua o ai le lalolagi aua e le na o tatou. O lea ua tatou o uma lava i malosiaga faafouina mo le puipuiga o le

siosiomaga. O le a le mea lea e tupu nei? O lea tatou te tuuaia nei i mala faalenatura.....

**Afioga Hon Palusalue Faapo II:** Lau Afioga i le Fofoga Fetalai, e faamalulu atu lava i le Minisita.

**FOFOGA FETALAI:** O le a tuu atu le avanoa lau Afioga i le Taitai o le Itu Agai.

**Afioga Hon Palusalue Faapo II:** Afai la o i ai se faamoemoe ailoga e siia le penisini? A silasila la i le siitaga lea e aumai i inei e 200% pe afai la o le a pau. O le a la le mea o le a aumai ai i inei le 200% o le siitaga lea o le a i ai o le penisini, le levy? O le mea lena o lea ou te fia malamalama ai.

**FOFOGA FETALAI:** O le a tuu atu le avanoa o lea ua malamalama. Masalo e ese le mea lea e agai i ai le 200% lea o le levy, ese le mea lea e saunoa i ai, a o le a tuu atu pea le avanoa i le Afioga i le Minisita.

**Afioga Hon FAUMUINA TIATIA FAAOLATANE LIUGA:** Afai o le levy lea e ave i le ACC e 1 le sene, afai la e 2%, o lona uiga ua 2 sene pe 3 sene. O le mea lena e tau mai ai.....

**Afioga Hon Palusalue Faapo II:** Lau Afioga i le Fofoga Fetalai e 200% lea e i inei.

**FOFOGA FETALAI:** Tulai mai lau Afioga i le Minisita o Tupe.

**Afioga Hon FAUMUINA TIATIA FAAOLATANE LIUGA:** Afai e 200%, o le levy i luga o le penisini. O le ACC e 1 le sene la e tipi aua a faapea e le iloa le tagata i le vaa, pe lavea le tagata i le taavale, o la e sauni mai e tau. E 1 le sene ae maua le \$20,000. A le iloa le vaa ae 1 le sene....o lea la o le a 2 sene.

**FOFOGA FETALAI:** Tulai mai le Taitai o le Itu Agai.

**Afioga Hon Palusalue Faapo II:** Lau Afioga i le Fofoga Fetalai, o le mea lava lea leaga o lea e fai mai e ono pau le tau o le penisini, a o lea e sau le siitaga lea o le a i ai e 200%, o lona uiga e 3 sene mai le lita e alu i ina. E 3 sene mai le lita, a 10 au lita e utu e 30 sene, ae e le 10 ni au lita e utu toetiiti 100 au lita e utu. Afai la e 100 lita, o le siitaga lena lau Afioga. O le siitaga lena lau Afioga i le Fofoga Fetalai, e foliga mai e 1 le sene i le taimi lenei, ae a maea le 200%, e fai lava sina tele.

O le mea lea e fia maua ai se faamalalamalama.

**FOFOGA FETALAI:** Tulai mai lau Afioga i le Minisita.

**Afioga Hon FAUMUINA TIATIA FAAOLATANE LIUGA:** A lena e te faamalalamaina lau mataupu? E manaia aua o le mental le mea lena e te talanoa i ai. Afai la e 200% le sii o le sene e 3 sene, o le a le mea e ala ai ona

tupu? Totogi le 3 sene aua e tele atu le tupe e maua, aua a e lavea gau lou lima, e maua lau \$5,000 po o le \$10,000.

**Afioga Hon Palusalue Faapo II:** E faamalulu atu lava lau Afioga i le Fofoga Fetalai. Ou te le o talanoa i le lavea, o lea tatou te talanoa i le siitaga o le penisini. E le o se auunaga le mea lea o le penisini, o le siitaga o le tau o le penisini, a o le lavea ia o le mea mulimuli e fai. O lea e tulituliloa atu lau saunoaga e faapea e leai e le faaono siia.

**FOFOGA FETALAI:** O lea ua maua, o le a tuu atu le avanoa i le Minisita o Tupe.

**Afioga Hon FAUMUINA TIATIA FAAOLATANE LIUGA:** Faafetai i lau Afioga i le Fofoga Fetalai. O lau fesili e foliga mai o lea e te faapea e sii le penisini. O le penisini o la e tender i le taimi lenei, e le iloa po o le a le tau, a o lea e talanoa mai oe i le levy. O le levy lea e 1 sene e tipi e totogi ai tau i tagata e lavevea i faalavelave. Pe maluu, pe le iloa i le vaa afi, so o se mea e faaoga i ai suauu ma penisini e tau e le ACC. O le tali lena, o le 3 sene.

**Tofa Levaopolo Talatonu:** Lau Afioga i le Fofoga Fetalai.....

**FOFOGA FETALAI:** O le a tuu atu le avanoa Saleaula faapuupu mai.

**Tofa Levaopolo Talatonu:** E puupu lava. Ona pau lava le mea lea e fia malamalama ai. E tusa ai ma faamaumauga o le saunoaga a le Afioga i le Minisita o Tupe e faapea e siitia mai le 3 sene i le 5 sene i le lita. O lea la ou te faalogologo atu o lea e vau lava i le 3 sene, ae ou te le iloa la po o le a le sao. O lea e iinei le saunoaga a lau Afioga e faapea sa siitia mai i le tausaga ua tea nei e faapea ua siitia mai le 3 sene i le 5 sene i le lita, a o lea la ou te faalogologo atu o lea lava lua te finau i le 3 sene.

**FOFOGA FETALAI:** O lea o le a ou tali atu Saleaula e vave. O le levy lea e tipi i tagata faigaluega e 1 le sene, e tipi agai i le tau mo tagata e lavevea i faalavelave faafuasei. O le 200% lea e taua i le mea lea tou te saunoa mai ai, o le pasene lena o lea ua sii i luga i le levy lea e tipi i le tagata. Ia manatua foi e 1 le pasene lea e tipi mai au tagata faigaluega agai i le ACB? O le 200% la lena, e 1 le sene muamua ma le 2 ua 3 sene. O le faamalamalamaga lena.

**Afioga Hon Palusalue Faapo II:** Lau Afioga i le Fofoga Fetalai, e 1 le sene mai le penisini. O lona uiga po o fea lava tatou te o i ai, o le 3 sene mai le penisini lea o le a sii aua la le mea lea o le tau mo faalavelave faafuasei. Po o fea lava tatou te femeiai ai, o lea o le a sii le penisini i le 200% e mafua mai i le levy lea.

**FOFOGA FETALAI:** O le a tuu atu la i le faamalamalamaga manino a le Afioga i le Minisita. O lea ua tatou feteenai i le levy ma le tau o le penisini. O le tau o le penisini, e eseese lava i masina uma. O lea na saunoa le Minisita, o Me, Iuni, Iulai, pau, pau, pau. E le iloa la le mea e oo i ai ia Aukuso, a o le

levy lea o lea ua tau manino le tulaga lea ona o le fetuunaiga i tau'i mo faalavelave faafuasei.

Tulai mai lau Afioga i le Minisita.

Se i fesoasoani mai le afioga i le sui usufono.

**Afioga Hon Leaupepe Toleafoa Apulu Faafisi:** Lau Afioga i le Fofoga Fetalai e fia fesoasoani atu. O le mea nei foi ua fai sina matutua, ae ua fai foi sina malulu o ea malulu o le Maota nei. Afai lava e faamalie le manao o le sui usufono i lona finagalo, o lona uiga e toe faatu foi se isi lafo ina ia oo taeao, ae tatou te le i oo lava i o tatou aiga talu mai analeila. O le mea la lea, aua le tulia i le finagalo e faamalie, aua o le saunoaga a le Malo, o le saunoaga lena. O le mutaaga lena e faamalamalama ai mea, ae e le se i tau faamalie le finagalo o le sui usufono.

O le fesoasoani atu lena, ua malulu le tatou fale nei.

**FOFOGA FETALAI:** O lea ua maua atu, faafetai lava i le fesoasoani mai a le sui usufono mamalu.

**Afioga Hon Palusalua Faapo II:** Ia, tatou alu sese ia faapena. Tatou alu sese ia, ua ta le fia tulai atu.

**FOFOGA FETALAI:** Tulai mai lau Afioga i le Minisita o Tupe. E ui lava ina logo eseese Tutuila ma Ape, a o lena e manino le faamalamalama a lau Afioga i le Minisita.

**Afioga Hon FAUMUINA TIATIA FAAOLATANE LIUGA:** E leai, e le siia le tau o se lita i se 200% e pei o le finagalo lea.

Lau Afioga i le Fofoga Fetalai, e 31 sui usufono mamalu o le Palemene na sausaunoa, ma sui usufono foi e toafa o le Palemene e le i saunoa ae na aumai le latou lagolago i le Tala o le Tupe. E i ai la vaega o lo o totoe e le i oo i ai sau faamalamalama i le taimi ua tuanai.

Lau Afioga i le Fofoga Fetalai, o se tasi o sui usufono sa saunoa i le toe totogiina o pasese o le au penisione i le va o Apia ma Tutuila ma le toe foi mai. O le vaega lea lau Afioga i le Fofoga Fetalai na aveesea ona e faaono set ai se precedence e totogi ai pasese o tagata e o ai i fafo atu o Samoa leaga e international le va lea. O le mea lena ua le toe faatinoina ai pasese e totogi e le Malo po o le NPF i tagata penisione e malaga i le va o Apia, Pago and back.

O le isi vaega sa lavea foi i saunoaga a sui usufono na faapena foi ona oo i ai le saunoaga a le Taitaifono o le Komiti o Tupe Maua ma Tupe Totogi i le tulaga lea i le silasila o le Malo, aemaise le Matagaluega o Tupe i le faamalosia o ni faatonuga ina ia mafai ai ona totogi aitalafu a Matagaluega o lo o nofo aitalafu, e le gata o kamupani tumaoti, ae faapena foi i le va ma isi Faalapotopotoga a le tatou Malo. O se fautuaga e matua onomea ma talafeagai ina ia aua ne i tele ni aitalafu e faaputupu ma atili ai ona tele aitalafu a Matagaluega, e faapena foi i a tatou Faalapotopotoga tumaoti.

Lau Afioga i le Fofoga Fetalai, sa i ai foi fautuaga i tulaga i Lipoti faaletausaga. O lea foi ua uma ona faataatia e le Matagaluega o Tupe le tulaga ia mafai ona usitaia Tulafono po o taiala ma faiga faavae ina ia mafai

ai ona oo mai Lipoti faaletausaga ua uma ona sueina e le tatou Suetusi Sili ma lona Ofisa.

Lau Afioga i le Fofoga Fetalai, o lo o faafogafoga mai le tele o le aufai-pisinisi aemaise foi o le vaega lea i fale talimalo.

I le tolu masina talu ai na faamaonia ai e le Kapeneta se stimulus package e fai ai se tulaga faapitoa ina ia aveesea ai se tulaga e agai atu ai i le Tulafono nisi o pisinisi po o fale talimalo ona o le tulaga o i ai nei le tamaoaiga o le lalolagi. O lea la ua tuuina atu ai e le gata ua restructure aitalafu ina ia faamaualalo le tologiina o a latou aitalafu i le NPF ma le Faletupe o le Atinae, ae faapena foi ona ave i ai se faamama avega e faalaiti ai interest rates po o le tuu foi i se tulaga mama, e sili atu lena ina ia toe foi nei pisinisi i se tulaga lelei i le lua tausaga po o le sili atu.

Lau Afioga i le Fofoga Fetalai, ona o au foi o le Taitaifono o le Komiti lea o le National Energy Committee lea foi sa laga ma talanoaina le tulaga o faiga faavae a lo tatou Malo e uiga i lenei foi oa po o le oloa taua mo le faaogaina i totonu o lo tatou atunuu. E pei lava ona ou taua o faalavelave faalenatura lea tatou te feagai e all man made. O lona uiga o lo tatou faatamala i le tausiga o lo tatou tamaoaiga, o le tele foi lena o faalavelave faalenatura e aafia ai tatou.

O lea ua pasia e lenei Palemene ou te iloa o le Paeaiga talu ai le tulaga e aua ai ne i toe susunuina a tatou lapisi aua o lo tatou ave pea o le ea vevela i luga, o le a atili ai ona mafanafana le ea i le vateatea ma oo atu ai i tulaga e le faafiafiaina ai le tagata soifua.

E tasi foi lena vaega aua o lea sa taua le lapisi. O le tele o atunuu laiti, tasi lea fili numera tasi, e le lelei ona fai le lapisi. E i ai le mea lea e tau e latou o le 3R, o lona uiga o le reduce, reuse, recycle. O lona uiga e tatau foi ona silasila lo tatou Malo aemaise o le Matagaluega o Punaoa Faalenatura ma le Siosiomaga ina ia faamalosi nei tulaga e pei ona tatou oo atu ai i nisi o convention o le climate change. E le toe tea tatou ma mala faalenatura. Ua ala ona ou taua le vaega lea lau Afioga i le Fofoga Fetalai ma le mamalu o le Maota, o le a feagai pea tatou ma mala faalenatura e le gata i timuga a o afa. E tatau la ona tatou nofo sauni.

Lau Afioga i le Fofoga Fetalai, e muamua ona ou faafetai i le Afioga i le Palemia ma le mamalu o le Kapeneta i le lagolagoina o la matou Matagaluega i le tuufaatasia o le Tala o le Tupe e pei ona tuuina mai i le Palemene lea o lo o i lumamea nei.

E momoli atu foi lau faafetai tele ia te outou.....

**Afioga Hon Aeau Peniamina Leavaiseeta:** Lau Afioga i le Fofoga Fetalai.....

**FOFOGA FETALAI:** Malie lau Afioga i le Minisita se i tuu atu le avanoa i le sui usufono mo Falealupo.

**Afioga Hon Aeau Peniamina Leavaiseeta:** Lau Afioga i le Fofoga Fetalai, faafetai tele lava i lau Afioga i le Minisita o Tupe, ua malie lava le faafogogaaga a le Atua ma sa matou faalogologo, ae le faigofie le galuega, faamalo faafetai. Na o le tasi lava le fesili leaga e taua, a faaipoipo loa le fesili ma lau tala ona manaia lea.

I le saunoaga ma le malelega a le Taitaifono analeila, sa logona ai e le atunuu atoa ma le Palemene, SOE po o Faalapotopotoga a le Malo, e 16,

leaga e ogaoga. E tolu i le tausaga faaletupe na omai ma le lelei po o le lau olive, ae 13 e leai se mea na o aitalafu e faitau miliona. O le fesili puupuu lava la; o le a le mafuaaga i lau galuega tele lea i le faaopoopoga. O le a le mafuaaga? Aua e lua lava mafuaaga inefficient ma le....

O lona lua o fesili, o le a la sau saunoaga?

**FOFOGA FETALAI:** Malo faafetai. Malie lau Afioga i le Minisita o le a avatu le avanoa e tali le Taitaifono ona avatu ai lea o le avanoa i lau Afioga.

**Susuga Hon Papaliitele Niko Lee Hang:** Mo le faasaoina o le taimi o le Afioga i le Minisita, sa le fia faalavelave foi i le saunoaga matagofie a le Afioga i le Minisita, ae i ai se saunoaga a le Minisita e fia faasao lau Afioga, ona ua saunoa le Minisita ua ou le mautinoa le lumanai o au atinae. O le sao o lau faamatalaga, ua ou le mautinoa le lumanai o lou nofoa. E leai se mea o le a ou sau ai fua ii faamatala au atinae i le Palemene. Ma lou faaaloalo tele.

**Afioga Hon FAUMUINA TIATIA FAAOLATANE LIUGA:** Lau Afioga i le Fofoga Fetalai, ou te le tali i le fesili a le sui usufono mo Falealupo lea e te saunoa i ai. Ou te iloa o lea e le o lagona lelei mai au e le sui usufono mo le Au Palota Taitoatasi, Susuga Hon Papalii Niko Lee Hang i lau tala na fai i ai. Sa talosaga mo ana atinae mo lona itumalo. Ona toe taua ai lea e ui lava e le o mautinoa le agai atu i le lumanai. Lea na ou taua i ai, aua ne i avea lona finagalo faapena e avea ma mea o le a seti ai le destination o lenei taimi, aua so o se tagata lava o le Atua, leai e le popole, aua e fai lava e le Atua le auala e foi mai ai lana auauna.

**FOFOGA FETALAI:** Malo. Ou te manatu ua manino lea tulaga. Ia, e ava tele ma le faaaloalo i le Tama matua.

**Afioga Hon Aeau Peniamina Leavaiseeta:** Lau Afioga i le Fofoga Fetalai faamolemole lava, ma le ava tele ma le faaaloalo tele, ua uma ona ou tali i lana saunoaga manaia. A o lea la o le a ou faapea... a e le talia lau fesili, tulou lava o le upu e to ia te au i lau lava gagana, e oo la lau folasaga lea. Ae ou te iloa e maopoopo lelei pe a e silafia mea ia. Ae afai e leai, e le afaina.

**FOFOGA FETALAI:** Tulai mai lau Afioga i le Minisita o Tupe.

**Afioga Hon FAUMUINA TIATIA FAAOLATANE LIUGA:** Ona o le sui usufono mamalu sa Fofoga Fetalai, o lea la ou te faapea ai au o lea e malamalama i le Tulafono. A e le saunoa i le mataupu, e le tataua ona e fesili ai. Ae ui lava o lea, le sui usufono mo Falealupo, leaga e faigata le tatou va nonofo ai i le motu i Salafai. O le tausaga faaletupe lea e lipoti mai ii lea e i ai le vaega e toatolu lea ua faaoo mai, o le tele o i latou e le i sueina tusi. Afai e le i sueina tusi, e le mafai ona aumaia le dividend aua e tataua ona faamaonia le tupe mama ona iloa ai lea, aumai foi le 50% i le Malo e fai ai lona Tala o le Tupe, ona faapena lea. Aua o le mea lona lea na saunoa i ai le Afioga i le Taitaifono, e 16 ae na o le 3 SOEs lea ua aumai. A o lea ou te tilotilo atu i le tausaga faaletupe lea e ii, o le 2012 i le 2013. O accounts o le 2013, o lea e le i uma le tausaga faaletupe lenei, o lona uiga o le Tulafono la e i ai, e tataua ona oo atu ia Oketopa i le tausaga nei ua ave tusi e sue ma ave le Lipoti

Faaletausaga i le Matagaluega o Tupe, Kapeneta ma le Palemene. Ma lou faaaloalo lava lau Afioga i le Fofoga Fetalai.

**Afioga Hon Aeau Peniamina Leavaiseeta:** O lea ua maua, ou te talitonu ua fiafia uma lava tagata. Ae lau Afioga i le i le Taitaifono, e i ai le mea lena e misi, toe faasao uma mai lava e oe le mea lena i se taimi. E pei uma lava e le atoatoa foi lau...

**FOFOGA FETALAI:** Se i tali atu ia le Taitaifono leaga o ia e ana le Lipoti ua toe saunoa mai i ai le sui usufono mamalu. Tulai mai lau Afioga i le Taitaifono o le Komiti o Tupe.

**Susuga Hon Papaliitele Niko Lee Hang:** Lau Afioga i le Fofoga Fetalai, faafetai mo le avanoa. Ia o lau uo le toaina lea, se i ta talanoa i tua faamalamalama le tulaga lea. Faafetai.

**FOFOGA FETALAI:** Tulai mai le sui usufono mo Aana Alofi Nu.3 e faapuupuu mai ona avatu ai lea o le tali faaiu a le Minisita.

**Afioga Toeolesulusulu Cedric Pose Salesa Schuster:** Faafetai lava i lau Afioga i le Fofoga Fetalai mo le avanoa, faafetai atu foi i lau Afioga i le Minisita o Tupe mo le faamalamalamaina o le tele o le vaega o le Tala o le Tupe. Na pau lava si faafesili lau Afioga ona o lea ua taua le vaega tonu lea sa agiga foi i se faamatalaga i se aso ua tuanai, i se tuualalo po o se fautuaga foi po o se fesili pe mafai ona vaavaai le tatou Malo i auala foi nei faaletulafono e mafai ai ona fai se tulafono e le gata i pisinisi a o tagata taitoatasi e mafai ona install ai e latou solar panels po o isi renewable energy e faaalu ai le latou eletise ae toe buy back i le credit ona faataugofie lea o a latou eletise e alu i renewable e pei ona e taua ae maua ai foi se isi fesoasoani i eletise maua a le tatou Malo.

E le gata i lea lau Afioga, pe i ai foi ni faamamaavega po o ni conditions e mafai ona tuu i ai e faafaigofie ai ona faatauina mai i lenei vaitau vaega ia o solar panels e aiga taitasi ae le na o le tatou faalagolago i kamupani tetele ae ou te talitonu o le tele o nisi aiga e mafai ona latou taumafai i lea vaega.

**FOFOGA FETALAI:** Malo. O lea ua maua le fesili a le sui usufono. Ia ou te manatu... Malie lau Afioga i le Minisita se i tuu atu le avanoa i le sui usufono mo Faasaleleaga Nu.4. Tulai mai lau Afioga i le sui usufono.

**Afioga Peseta Vaifou Tevaga:** Faafetai lava semeamanu o lea ua maua le avanoa e sefe ai le avanoa o le Minisita. Ona o le talosaga foi lea avatu ananafi, ona o lea e taoto i lalo o le Matagaluega o Tupe le faleaoga foi lea o si ou nuu i lalo o le polokalame a le Malo o Saina. O le faleaoga foi lea o Asaga ma lou faaaloalo lava, na ona faamanatu atu lava i lau Afioga i le Minisita. Ma lou faaaloalo lava faafetai.

**FOFOGA FETALAI:** O mea tau aoga ma mea tau eletise lea ou te maua atu. Ae tuu atu pea i lau Afioga leaga o lena e i ina tulaga o mea tau tupe.

**Afioga Hon FAUMUINA TIATIA FAAOLATANE LIUGA:** Faafetai. E ui lava ina e le o au na fai mai ai fesili a le toalua lea, ae o le a ou tali pea i ai. Le sui usufono mo Aana Alofi Nu.1, o le manaia ia o ou mafaufauga. Aumai sau tusi se i matou talanoa i le MECC ona maua ai lea. So o se mafaufauga lelei e maua ai le lumanai mo tatou, o mea ia e tatau ona tapue ma tapue atili e le tatou Malo.

O le faleaoga foi o le afioaga o le sui usufono mo Faasaleleaga Nu.4, o la e ua faamauina ma ua i ai foi i le lisi o talosaga i le Malo Saina. Lau fioga i le Fofoga Fetalai, e momoli atu lau faafetai tele faapitoa i au Minisita Lagolago, lea sa matou galulue faatasi i lalo o le Finance Sector. Faafetai tele i o oulua sao ma lo oulua agaga tautua i le atunuu, aemaise o matafaioi na tatou galulue faatasi ai i le faamalu o le Matagaluega o Tupe ma le tatou sector o le Finance.

Faafetai tele i le Failautusi o Tupe, le Pulega aemaise o le aufaigaluega a le Matagaluega o Tupe o e na gapatia ma noonooia i le sauniuniga ma le tuufaatasia o le Tala o le Tupe e pei ona i lumamea nei i le Palemene o Samoa. Faamanuia tele le Atua ia te outou i le auauunaga e le faatuaioia, faamanuia le Atua i le tatou Matagaluega. I Faauluuluga o Faalapotopotoga ma Pulega o le Finance Sector, faamalo le galulue, foai pea e le Atua le malosi e tautua ai Samoa e pei ona ofoina ai lo outou soifua mo le atunuu.

Faafetai i le Failautusi o le Fono Aoaofaitulafono faapea le Pulega ma le Matagaluega mo le sauniuniga o mea uma e pei ona tauaofia ai le Palemene o Samoa, e le gata i totonu o le Maota nei, ae faapea foi sauniuniga mo le tausiga o faamalosi o sui usufono mamalu o le Palemene.

E avea foi lau faafetai i Faauluuluga ma Faalapotopotoga Tumaoti a le Malo, malo le tautua. Ia alofa le Atua e foai atu lo outou malosi e faatinoina ai lo outou valaaulia. Le malu o le Malo o lo o gapatia ma noonooia i le tautuaina o le tatou Palemene, faamalo le galulue.

Si ou itumalo pele o Palauli le Falefa, faamalo le tapuai, faamalo le tatalo ia te outou Tapaau e fa ma Faleupolu e fa, faapea foi si ou nuu o Tafua i le nofo a Faafeagaiga i le Susuga i le Toeaina ma le Aufaigaluega paia a le Atua i so o se fatafaitaulaga i totonu o le itumalo. Faamalo le tatalo faamalo le tautua. E le sili le tai i lo le tapuai. Lau Afioga i le Fofoga Fetalai, faafetai tele mo le avanoa. Soifua.

**FOFOGA FETALAI:** Malo faafetai i lau Afioga i le Minisita o Tupe. E talitonu le faamoemoe ua logo i tino matagi lelei i lenei afiafi, o lea ua tautino le faamalamalamaga o mataupu uma na saunoa i ai sui usufono mamalu, aemaise le faafofogaaga a le tatou atunuu. E momoli le agaga faafetai i le Matua o le fale Gagai fomauga i le Alii o le Itu ma le Matagaluega, o outou mama na. Ia sagai anea i o le tai aua le faaauuina o le tatou galuega, ma le faataunuuina e pei o le a pasia i le po a nanei.

Ua tatou taunuu mai i le Matagaluega mo Tupe Maua, lau Afioga i le Tama matua o le Maota lau Afioga i le Minisita, o mamalu sauoo ma paia popo aua Alaalagafa ma le Nofo a Tulafale faapea Tauagaeseese ia te oe Falealili, tulai maia o lea ua maua le avanoa e sausu ai le tatou Matagaluega.

**Tofa Hon TUILOMA LAMEKO (Minisita mo Tupe Maua):** Lau Afioga i le Fofoga Fetalai, lau Afioga i le Palemia ma le mamalu o le Kapeneta, lau Afioga i le Taitai o le Itu Agai faapea foi le mamalu o Ofisa Sili o Pulega ma



Pule Sili o Matagaluega ma Faalapotopotoga ua mafai ona faatasi mai i lenei po.

E muamua ona faapoipoi lilia faa-alofisa o tupu nai le malae o le vavau, aua ua paia ma mamalu atoatoa le Maota i Tiafau nei, o le Maota o le faautugatagi a Samoa, o le Maota o lo o lipoi ai upufai o Malo. Aisea? Aua o lea ua atoa tootoo faitauina o le atunuu. O lupe lava sa faia mai le fuifui, a o lea ua fuifui faatasi i le alofa o le Atua. Lau Afioga i le Fofoga Fetalai, a o le i faia se manatu e faatatau i le Tala Autu o le Tupe 2013/2014, muamua ona faatulou atu i le tapuaiga a Samoa o lo o mafai ona faafogafoga mai i lenei po. I le afio o Lana Afioga Mamalu o Le Ao o le Malo, le paia maualuga i le Sui o le Fono a Sui Tofia ma le Faamasino Sili, le mamalu i Ofisa Sili o Pulega o Matagaluega aemaise foi le mamalu i ulu o Ekalesia eseese i totonu o Samoa nei.

A o le i faia se manatu i le Tala o le Tupe, e muamua ona faatulou atu foi i lo matou itumalo o Falealili, i le paia ia Alaalagafa ma lo la Nofo ma le Tauagaeseese ia Falealili.

I le Tala o le Tupe lenei, e momoli atu le faafetai i lau Afioga i le Taitaifono i sui usufono mamalu o le Komiti Tupe a le tatou Malo. E momoli foi le faafetai tele i le Matagaluega o Tupe aemaise Matagaluega eseese na latou saunia lenei Tulafono Tau Faaofi o le Faatatauina o Tupe 2013/2014.

E mai le vaai lautele a lou nei sui usufono i le Tulafono Tau Faaofi o le Faatatauina o Tupe 2013/2014, o lo o faia ma le fuafua lelei, e le gata i le tamaoaiga o Samoa a o lo o vaai foi e faatusatusa agai i le tamaoaiga o le lalolagi. E le o po se lilo i le tatou vaavaai i le tulaga o le tamaoaiga o atunuu eseese o le lalolagi aemaise o atunuu malolosi e pei o le Iunaite Setete o Amerika, o lo o i ai foi i latou i le tulaga pagatia o lo latou foi tamaoaiga.

O lo o taua e nisi o faamatalaga i le vaai i le Tulafono Tau Faaofi o le Faatatauina o Tupe 2013/2014, o lo o taua ai i nisi o faamatalaga se vaega e faapea ua tele naunau nonogatupe. O lou talitonuga o so o se nonogatupe e i ai lona fua e fua lelei ai, e leai se mea e eseese ai ma tupe lava a oe ia ma le tou aiga. E le faapea o le tele o le nonogatupe le mea e taua i lou talitonuga. O le mea e aupito sili ma taua, o so o se nonogatupe e totogi ia te oe, o le tou aiga, nuu po o Ekalesia, o le mea e numera tasi i le vaai o lou tomai ma lou agavaa e mafai ona totogi au nonogatupe. The ability to pay the loan, nisi e oo i le tai fia loans. O lenei Tulafono Tau Faaofi o le Faatatauina o Tupe 2013/2014, o le aofa o le tupe o lo o faaagaga mo le totogiina o nonogatupe e \$45miliona, a o le aofa o tupe maua a le Malo e \$538,250,45 – ma le \$538miliona, o le a la le tala o lo o fai mai, o le tala o lo o lelei ona fuafua lelei lou tamaoaiga ma au tupe maua ma tupe faaoga, \$538miliona ae na o le \$45miliona e alu i nonogatupe.

Lau Afioga i le Fofoga Fetalai, o le ata lea e momoli atu ai le faafetai, faafetai i Ofisa Sili o Pulega, faafetai i Matagaluega mo lo latou tomai, aua e le faia toatasi e le Matagaluega o Tupe. E mai le \$538,470,000.00 e ao e le Magaluega o Tupe Maua toetiiti lava 90%, ona faasolo mai ai lea i Matagaluega eseese o se ata o le faafetai. O le mea lea i lou sui usufono e momoli atu ai le faafetai tele i Matagaluega eseese aemaise lava o le Ofisa Sili o Pulega ma le Matagaluega mo Tupe Maua.

E i ai faafitauli o lenei olaga e oo foi i le Matagaluega mo Tupe Maua, o so o se galuega e fai e i ai lona faafitauli a o le mea lea na filifili ai i tatou ina ia vaai totoa, afai o i ai ni mea o faaletonu o lo tatou tiute. Ua avea foi lenei

avanoa ou te faafetai atu ai i lau Afioga ma le mamalu o le Palemene i le Ofisa Sili o Pulega ma le Matagaluega mo Tupe Maua, e pei ona ou fai atu e le faigofie. Ua uma foi ona ou fai i le Matagaluega, o lou tiute ma lo'u tiute e fai le mea e aupito sili ona lelei ina ia maua uma tupe a le Malo, e momoli atu ai le faafetai tele i le Matagaluega aemaise o Ofisa Sili o Pulega ma Matagaluega eseese.

O nai manatu ia i le tulaga aua ua uma ona faafofoga i ai i le tulaga lautele o le tatou Tulafono Tau Faaofi o le Faatatauina o Tupe 2013/2014, o lea ua avatu i ai ni manatu. O mea e faigofie ona fai ma iloa ai le tulaga o lo o i ai le tamaoiga o le atunuu e faatusatusa ma isi o le lalolagi.

Ona oo ai lea i lenei taimi lau Afioga i le Minisita o lo o feagai ai, nei galo ni mea ma le Itumalo o Falealili. Ua uma ona saunoa atu lou uso a sui usufono e pei foi o auala, paiap, telefoni ma mea uma. O lo o faaletonu auala e o i nuu i tai o Falealili. Ia faapea foi ona alolofa le Matagaluega mo le Soifua Maloloina mo le faaleleia o le falemai i Poutai.

O nai manatu ia lau Afioga i le Fofoga Fetalai, atoa ma le agaga fiafia e momoli atu ai le faafetai tele i Matagaluega uma a le Malo mo le saunia o le Tulafono Tau Faaofi o le Faatatauina o Tupe 2013/2014 mo lenei tausaga. Ia manuia le Fono.

**FOFOGA FETALAI:** Malo malele, faafetai saunoa i lau Afioga i le Minisita mo Tupe Maua po o lau Afioga i le toe ulutaia o le Maota. Ona manatu lea e le toe laeia le toga lelei pe toe sulaina le toga matagofie, e manatu foi e le tau fesiligia le sao taua o le Matagaluega mo Tupe Maua, e momoli atu le faafetai i le Ofisa Sili o Pulega ma le Matagaluega malo le onosai, faafetai le galulue, e tele le sao o le tatou Matagaluega aua le faatupeina o le Tulafono Tau Faaofi o le Faatauina o Tupe 2013/2014.

Ua tatou taunuu mai i le Minisita mo Faamasinoga ma Pulega Tau Faamasinoga. Lau Afioga i le Sao Faapito le Aiga Salevalasi ma lo outou Vaa Taumualasi, le paia o le Faleatua, tulai mai o lea ua oo le tatou galuega i le Matagaluega o Faamasinoga ma Pulega Tau Faamasinoga.

**Afioga Hon FIAME NAOMI MATAAFA (Minisita mo Faamasinoga ma Pulega Tau Faamasinoga):** Lau Afioga i le Fofoga Fetalai ma le mamalu o le Palemene i sui usufono, ua tatou faatasi foi ma Ofisa Sili o Pulega o Matagaluega ma Faalapotopotoga a le Malo, aemaise foi o le Susuga i le Failautusi ma le afaigaluega a le Matagaluega o le Fono. Ua ou tulai atu e soosoo atu le pitolaau a le Kapeneta e tusa ai ma le tatou galuega o lo o i le Laulau a Fono.

E muamua ona momoli atu le faafetai i lau Afioga i le Taitaifono o le Komiti o Tupe Maua ma Tupe Totogi e tusa ai o le Lipoti ua taatia i luga o le Laulau a Fono aemaise o le Tulafono Tau Faaofi o le Faatatauina o Tupe 2013/2014. O lenei faafetai ou te faaali atu ai foi ma le agaga faafetai ma le fiafia foi, i le taliaina o nisi o fautuaga ua taatia mai mo le Matagaluega mo Faamasinoga ma le Pulega Tau Faamasinoga, aemaise o le itu i le faaleleia o le maota o le Faamasino Sili faapea foi le maota o lo o faamoemoe i Salafai mo le vasega o Faamasino. E talia foi ma le faafetai le agaga o le asiasiga na oo atu ma le faapea mai e le o lava le \$100,000 o lo o faaagaga mo lea faamoemoe, talosia a o i ai nisi tupe e mafai ona faasao, o le a faapena ona mulimulitai i fautuaga a le Komiti o Tupe Maua ma Tupe Totogi ina ia mafai

ona faaleleia ma faatele le maota mo Faamasino i le faatinoina o le galuega i Savaii.

O lo o faamauina foi e pei ona i ai le fautuaga i nisi o Matagaluega i le fia maua lea o a tatou Lipoti faaletausaga i le taimi e tatau ai. Out e manatu o le Lipoti o le tausaga 2012, o le Fono e sosoo ai o le a mafai ona faaulufale mai ai lena Lipoti a o isi Lipoti uma ia o lo o taatia o le 2009, 2010 ma le 2011 o lea ua i totonu o le faagasologa o Pepa a le Palemene. Ae pau lava lau Afioga i le Fofoga Fetalai e tau ala atu i le Nofoa, i le Taitaifono ma le Komiti o Tupe Maua ma Tupe Totogi, se i silasila ane i le vaega o le Lipoti mo lo matou Matagaluega o lena o lo o i ai nai feeseeseaiga ma le tulaga o lo o sese ai le igoa o le matou Matagaluega i le faa-Peretania. O lena o lo o tau ai la matou Matagaluega i lalo o a outou fautuaga o le Matagaluega o Siosiomaga.

Ae se i faasolo atu ia nai tali pupuu i nisi o mataupu sa laga. Sa faalogologo lava ma le totoa i le saunoaga a le Minisita o Tupe aemaise foi o le lagalaga mai o le sao a Faalapotopotoga a le Malo po o tatou SOES i tupe mama e fesoasoani mai ai i tupe maua a le tatou Malo. Ona pau lava lea o sau faaopoopoga i lau faitau atu ai i lea vaega, i le maitauina o nei Faalapotopotoga e tolu ua mafai ona ofi mai lo latou sao ona o lea na saunoa le Afioga i le Minisita ua maea ona suesueina foi a latou tupe ma ua mafai ona vaea mai ai tupe mama mo galuega a le Malo. Ua maitauina o Faalapotopotoga nei o le Samoa Housing, Falemeli, SIFA, o Faalapotopotoga uma nei o lo o faaluulu e tamaitai. E le gata i lea o lea foi ua faamauina ma ua saunoa le Afioga i le Minisita mo Tupe Maua, ua i ai foi le siitia mo lenei tausaga o le galuega a lana Matagaluega aemaise foi o le taitaiga a le Ofisa Sili o Pulega o le isi foi tamaitai ua siitia ai i le afa miliona tala mo tupe maua a le Malo.

Ou te manatu ona o au o le tamaitai, ou te fia faamauina lea galuega lelei ma ua faailoaina ai foi le au o le iniailau a tamaitai e tusa ai ma le tautuaina o le Malo.

O mataupu sa laga lau Afioga i le Fofoga Fetalai, e faaalua lava le agaga faafetai i sui usufono ua saunoa ma le maitauina ua i ai le siitia laitiiti i luga o le auunaga a lenei Matagaluega, e ala lea i le lipoti mai i lenei Palemene ma ua atagia mai ai le mafai ona faagasolo galuega a le Matagaluega aemaise lava o le faagaioiga o mataupu e oo atu i luma o le Faamasinoga, o so o se faamoemoe lava mo auunaga a le Malo i lenei Matagaluega, e faamoemoe lava i ana tagata faigaluega e faatinoina. E le gata i le itu o auunaga po o le administration aemaise foi o le vasega o alii ma tamaitai Faamasino. O le tausaga faaletupe lenei o le a maea ona faagasolo, e tele se fesoasoani e ala mai i le faaopoopoina o le afaigaluega po o ua latalata i se 30 nisi o le afaigaluega na faaopoopo i le Matagaluega mo Faamasinoga ma Pulega Tau Faamasinoga ma faapea foi ona faaopoopo i ai nisi o Faamasino i le Faamasinoga o Fenua ma Suafa e toatolu ma le tatou ma le tatou Faamasino e tasi o lo o lagolago mai mo nai masina o lenei tausaga, Susuga Ida Malosi mai Niu Sila, ua tele lea fesoasoani, atonu o ia itu o le a fesoasoani i le siitia o le auunaga a le Matagaluega. O le galuega lava ia e faifai pea, e le gata i le i ai o i latou e faatinoina galuega aemaise foi o le faatinoina o ala o mea, procedures ma auivi o galuega po o systems e mafai ona faaleleia atili ai le galuega a le Matagaluega ma nisi o avanoa o lo o maua mo vaega eseese o le Matagaluega e aotauina ai i ni matata faapitoa.

Sa fesiligia ma e ou te manatu foi e aiga le mataupu lea sa laga ma i nisi o faaiuga ua leva ona taaitia, ou te le alofia foi lea mataupu. I faamaumauga a le Matagaluega e tusa ma le 15 a tatou faaiuga ua fai sina umi ona taaitia a o lo o galulue le Matagaluega aemaise o le vasega o Faamasino ina ia mafai ona faamamaina lea vaega o lo o totoe i le faatinoina o galuega a le Faamasinoga.

Sa laga foi se finagalo o nisi o sui usufono i le faatulaga mai lea o ni Faamasinoga Faapitoa, o lea sa taua ai e faapea i faamasinoga i mataupu tau le Siosiomaga. Lau Afioga i le Fofoga Fetalai, ou te manatua o le tatou Fonotaga foi lenei i le tausaga ua mavae, sa laga ai foi lea mataupu. O le tali sa ou tuuina atu i lena taimi ma e faapea foi i lenei taimi, e pei a laga mai lea mataupu ona tatou manatu lea e foliga mai o le a faatulaga ni faamasinoga eseese, a o le mea moni lava o le auala e faatino ai aemaise o se atunuu laitiiti e pei o tatou, o le faamaopoopo lea po o le tapena. A faapea ua amata ona atagia mai ua faatupulaia ni mataupu i le siosiomaga, po o le isi vaega lea ua faatupulaia mataupu tau fesootaiga, po o mataupu faapisinisi, e tapena le Matagaluega aemaise o le vasega o Faamasino ina ia maua foi se fesaosoani mo i latou ina ia maua le poto masani, e mafai ona faafoeina ai mataupu faapitoa faapenei aemaise foi o le isi ituaiga faamasinoga tatou te malamalama uma i ai, o le faamasinoga e taua o le family court po o mataupu tau le fatuaiga. O lea la o lo o i ai le tamaitai Faamasino mai Niu Sila o Ida Malosi, o ia o se tamaitai Faamasino e faapitoa lana galue i le Family Court ma lagolago mai ai i le taotu Faamasinoga i le taimi a o tatou galulue faatasi ai ina ia mafai ona faatupulaia le poto masani o le tatou Faamasinoga i ia ituaiga mataupu. A tatou le maua foi le poto masani ona ou manatu lea tatou te saili mai mai Faamasino o lo o i ai le poto masani e mafai ai ona faagaioia ma galueaiina nisi o mataupu e oo ma ii luma o le Faamasinoga mai lea taimi i lea taimi.

Ou te manatu lau Afioga i le Fofoga Fetalai, e faaiu atu ai lau faamatalaga i le talosaga o lo o taatia pea mo lo matou Matagaluega, i le faaoo atu lea o le auunaga aemaise o le itu i Sisifo o le motu o Salafai, o lo o fuafua pea i ai le Matagaluega atonu e le o toe mamao ona mafai lea ona tali atu i le manaoga o lea foi itu o le atunuu.

O sa matou tali atu puupuu lea ma le faaaloalo. Ia manuia tele le afiafi.

**FOFOGA FETALAI:** Se i tulai mai le sui usufono mo Falelatai ma Samatau aua o lau Afioga o le Minisita Lagolago o le Matagaluega.

**Afioga Taefu Lemi:** Lau Afioga i le Fofoga Fetalai, ua ou tulai atu e ui ona o au o le Minisita Lagolago mo Faamasinoga ma Pulega Tau Faamasinoga, ou te maitau atu e le o i i le Taitaifono o le Komiti o Tupe Maua ma Tupe Totogi faapea foi ma le Sui Taitaifono, toe toalua maua lea i i, e maitauina o lo o fai se malologa a nisi o sui usufono o le Komiti, ae faamalulu atu e tusa o le faaletonu lea na taua e le Minisita, o le mixed up i le faaogaina o le igoa o le Matagaluega. E faamalulu atu ai i le Tamaitai Minisita ua le o se ata lafoia lea o le fita i tuga o le galuega sa feagai ma le Komiti ae ona o le faaletonu lava i le taimi na tuufaatasia ai le tatou Lipoti, o le mea lea e faamalulu atu ai.

**FOFOGA FETALAI:** O le mea sili e le o sese le title needs o le Lipoti, o le faapapalagi e faapena o le environment lava o le Faamasinoga foi i le isi

taimi, ae faafetai atu i le fesoasoani mai a le tatou Komiti. Ou te manatu foi lau Afioga i le Minisita malo i ou faiva manaia ma e manatu le lagona o lea foi ua e faailo le matautia o le maualuga o le auunaga faa-tamaitai, e le tau selu atu leaga o oe o le taupou mamana o le Kapeneta, e matua gata tala ae le gata upu e faalupelupe atu ia te oe o le tamaitai Sa. Ua i ai foi e i ai le upu a le atunuu e fai i tausala, o le itula o le po e lelei ai la outou malolo o lo o outou galulue pea ma o lena anava e le mafai ona tuua o lea lava e alu aua e au la outou inailau, e au mea uma. O outou mama na, lau Afioga i le Tamaitai Minisita aemaise o le afio o lau Afioga i le Faamaisno Sili, le mamalu i le Afioga i le Peresetene ma le Ofisa o Faamasinoga, malo le galulue. Ou te talitonu o le tafatolu lena o le tatou Faigamalo o la outou pito laau i le tauaveina ma le faamamaluina o Tulafono e tuuina atu e le Maota lenei faamalo lava. E momoli atu i lau Afioga i le Minisita moomooga alofa i le Faamaino Sili ma le Ofisa o le Faamasinoga malo le galulue.

Ia o le a le tau faafuluina lau Afioga i le Palemia o lea ua oo mai le Tali a le Malo i lau Afioga i le Sui Palemia.

**Tofa Hon FONOTOE NUAFESILI PIERRE LAUOFO:** Lau Afioga i le Fofoga Fetalai, o le a mapu ia i lagooe le taputoa o alii seu aua ua malutia paia faaifo gata o Samoa o le atunuu tofi, ua taoto i fata ae i lumafale ou paia faale-atunuu, paia faa-faigamalo, aemaise lava ou paia faale-Talalelei i tafa e fia i le aoao o Samoa e afua mai i le nofoaga e gagae ai le la seia paia le nofoaga e gagaifo ai le la.

Ae auau lafo ia sou leo ma le faaaloalo i lenei itula o le afiafi, se i molimoli atu ai se tala e tusa ai ma lenei mataupu e pei ona laga mai i lenei Tulafono Tau Faaofi o le Faatatauina o Tupe 2013/2014 e tusa ai foi ma lenei vaega tumaoti po o le Private Sector.

Lau Afioga i le Fofoga Fetalai, e le faaitiitia lava le tapuaiga a le tatou Malo i le faiga faapaga i le va o le Malo ma le Vaega Tumaoti po o le Private Sector, o lo o i ai le vaega lea o le aufaipisinisi tumaoti. E faaauau pea le faiga faavae lea a le tatou Malo, ma e faatauaina pea ona o i latou nei o lo o faamoemoe i ai le Malo mo le uunaia o le tatou tamaoiga. E tele polokalame fesoasoani mo faipisinisi tumaoti, o lo o i ai foi le vaega seleni i lenei Tulafono Tau Faaofi o le Faatatauina o Tupe 2013/2014 mo i latou nei. Ua maea ona ou taua nisi o nei fesoasoani i le malamalama ua sola ma le aso ananafi ae na ona ou toe fia pai lava i ai i fesoasoani mo le aufaipisinisi tumaoti po o le grant po o le Private Sector, mo le Faalapotopotoga o le Au Gaosi Oloa faapea foi le vaega lea o le Asosi o Faletalimalo, Pisinisi a Tamaitai po o Women in Business po o le Chamber of Commerce ma isi i le tulaga o seleni i le faagaoiina o a latou Faalapotopotoga mai le \$100,000 i le \$150,000. E faaauau pea lenei polokalame ma o le agaga foi o le tatou Malo e le faaitiitia le galulue pea ina ia faatosinaina mai pisinisi mai fafo aua se fesoasoani i le tatou tamaoiga ina ia faapena ona siitia lona lelei ma manuia ai tagata lautele i le tulaga o galuega faapea foi isi faamanuiaga.

O lo o faaauau pea polokalame a le PSSF, o le polokalame lenei o lo o galulue faatasi ai le Malo ma nisi o paaga, development partners e i ai le UNDP faapea ma le Malo o Niu Sila ma ua i ai le fesoasoani e \$1.5miliona i totonu o le Tulafono Tau Faaofi o le Faatatauina o Tupe 2013/2014 mo a latou foi galuega mo le tausaga faaletupe o lumanai nei. O ia fesoasoani

eseese e aofia ai le faalauiloina o a latou oloa faapea a latou auunaga lautele.

Sa saunoa se tasi o sui usufono i le tulaga taua o le faaauau o le SBEC ma e faaauau ai pea lea polokalame e le tuua, o lea polokalame ua tulai mai nei e laititi i le miliona le tupe o lo o i totonu o le Tulafono Tau Faaofi o le Faatatauina o Tupe 2013/2014 e fesoasoani mo Pisinisi Laiti. O le taua o lea vaega ua lipotia mai e silia atu i le 300 le aufaifaatoaga ua uma ona resitala ma avea ma sui auai o lena polokalame taua. O le taua foi o lea vaega lau Afioga i le Fofoga Fetalai, ona e sili atu i le 80% o a tatou tagata galulue o lo o galulue i totonu o le agriculture sector i so o se tulaga eseese lava tau faatoaga. O le taua lena aua o lea sa saunoa nisi o sui usufono i le tulaga tau galuega employment, e silafia foi o le isi taua o lea tulaga e pei ona silafia o le 80% o a tatou fanua faale-aganuu, o tatou uma lava e i ai o tatou sootaga i o tatou fanua nei. O polokalame uma ia ae ua mafua ona ou oo i polokalame lau Afioga i le Fofoga Fetalai ona o lo o fesiligia pea e nisi le tulaga po o i ai se fesoasoani i totonu o le Tulafono Tau Faaofi o le Faatatauina o Tupe 2013/2014 mo pisinisi tumaoti po o le Vaega Tumaoti. Na ona faaila atu o fesoasoani faapea a o lo o tele lava fesoasoani, e i ai foi nisi fesoasoani i lalo o le Tala o le Tupe a le Matagaluega mo Faatoaga, Faleoloa o Faatoaga ma Faiga Faiva. O lo o i ai foi seleni faapena e fesoasoani ai i le aufaifaatoaga aua o le aufaifaatoaga o le aufaipisinisi foi i latou e le o nisi foi tulaga. O lo o i ai foi le vaega ua taua o le commercial farmers, o i latou na o lo o tele foi lo latou sao i le atiaeina o le tamaoiga o le tatou atunuu. A o le tulaga maoti ma manino e leai ni tupe a le Malo e tufa fua atu mo le aufaipisinisi. O polokalame nei ou te talitonu e agavaa uma ai lava i tatou pea tatou taumafai i ai.

Sa saunoa se tasi o sui usufono i le taumafai ina ia faatupulaia pea i tatou e agavaa ai i matata eseese. O lo o i ai a tatou polokalame e pei ona silafia i le Iunivesite, a o i inea i le sector lena o lo o faaauau pea le polokalame o le Aperenitisi, o lea ua ou vaai atu e maua le 200 o i latou o lo o i totonu o le polokalame lea i le taimi nei, o lo o aoaoina ai le faakamuta, le palama, faimoli, le uelo ma isi matata eseese faapena. Ua uma ona ou tautala ma faamalamalama le Komiti o le CODEX i nisi foi tauaofiaga o le tatou Palemene, ona sa fesiligia foi e nisi tulaga o le saogalemu o taumafa tuuapa, tuufagu o lo o auina mai totonu o le tatou atunuu, o le Komiti lea a le tatou Malo o lo o mataituina tulaga o taumafa faapenei. Masalo o lea e manatua e le i mamao atu nei na auina mai ai foi faasilasilaga ma lapataiga i luga o le TV ma le nusipepa e tusa ai o mayonaise e faapena ona le saogalemu mo le taumafa i le tulaga o le soifua maloloina, ma o le tele foi la o nei mayonaise ua aveeseina mai faleoloa. O le tulaga lea o lo o galulue ai foi le Komiti lena, e momoli atu ai le faamalo i le Matagaluega o le Soifua Maloloina o lo o galulue soosootauu ma le Matagaluega o Pisinisi, Alamanuia ma Leipa i le mataituina o oloa faapenei. A o le fautuaga lava ia pe a faapea o i ai ni eleni, aua sa saunoa se tasi o sui usufono i le tulaga o eleni ua faaletonu, e lelei lava le lipoti mai ma aumai ni taumafa faapena o faaletonu i le tatou Matagaluega o le Soifua Maloloina, po o le Matagaluega o Pisinisi.

**FOFOGA FETALAI:** Malo faafetai i le faamalamalamaga a lau Afioga i le Sui Palemia. E faamalulu atu se i tulai mai le sui usufono mamalu mo Faleata Sisifo.

**Tofa Lealailepule Rimoni Aiafi:** Lau Afioga i le Fofoga Fetalai, e tasi lava le fesili i le Afioga i le Sui Palemia, ona o lea ua oo lana saunoaga i le CODEX lea, o lea sa ou taua i le taimi foi lea o le Food Bill po o fea ua oo i ai le tatou Tulafono lea. Ou te iloa ua leva ona galulue ai le Matagaluega ma le... ae moomia tele aua o lea tuueseese ma le Drugs, po o fea tonu la le vaega lea ua i ai le Tulafono lea. Ma le faaaloalo lava.

**FOFOGA FETALAI:** Malo. Ia tulai mai lau Afioga i le Sui Palemia.

**Tofa Hon FONOTOE NUAFESILI PIERRE LAUOFO:** E sao lelei le saunoaga a le sui usufono o lo o i ai Food Bill o lo o tapena nei e le Matagaluega o le Soifua Maloloina. Masalo ua lata ina maea tapenaga ia, o se taimi o muamua ona faapena foi lea ona faaoo mai i le Maota pe a maea uma tapenaga o le Tulafono Tau Faaofi lena. O nisi o fesoasoani, o lena ua maea ona saunoa atu le Minisita o Tupe i le tulaga o le stimulus package i fesoasoani i le afaipisinisi e moomia fesoasoani i lena vaega.

Ona faapea ai lea o se tala lau Afioga i le Fofoga Fetalai, lou itumalo e Anoamaa Sisifo, tupu ma ee, faletua ma tausii faapea talavou, aemaise le au ositaulaga ma le Afaigaluega paia a le Atua, ua faamalo tatalo, malo le tapuai. Ia faamanuia pea le Atua ia te outou ma outou faiva. Ia folau i lagima le tapuaiga a Lana Afioga Mamalu o Le Ao o le Malo, faapea le aufai tatalo o le tatou atunuu, le loaloa o Samoa mai ona mauga maualuluga seia oo i le fanau iti. Agalelei le Atua i lau Afioga i le Fofoga Fetalai, le Afioga i le Palemia, Minisita o le Kapeneta ma Minisita Lagolago. Liua le vai o le tamaitai i le la itu o le malu, alofagia e le Atua le soifua o le Taitai o le Itu Agai, Sui Taitai, faapea sui usufono mamalu uma o lena Itu. Ia maua foi se faiga malologa lelei i lenei afiafi e susuga i Ofisa Sili o Pulega ma Faaululuga o Matagaluega ma Faalapotopotoga Tumaoti a le tatou Malo. Soifua. Ia manuia le po.

**FOFOGA FETALAI:** Malo faafetai saunoa, malo le fetalai i lau Afioga i le Sui Palemia. O lea ua logona le Maota i le tuleiga ma le saunoaga aua finagalo o tatou sui usufono. Ia, o manu na. Ua tini tauao le tatou faamoemoe. Tulai maia lau Afioga i le Palemia.

**Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fetalai, ua ou vave tulai atu ina ia faasaoina ai lau Afioga, e fitu ou faalupega ne i te i ua e le maua uma mai. Faafetai atu i le mamalu o le tatou Maota. Na amata ona tali atu Minisita i au upu tomua. Ae o le tolu ai lenei o aso o ou fesoasoani e faamalamalama nisi o mataupu sa laga, e aofia ai ma faatoaga. O nisi lava la fautuaga na tuuina mai, ua ou talia uma lava, ma o le a faatino. O le mea lea, faafetai tele i le tofa paia ma outou fautuaga. Ma ou te fautuina loa lau Afioga ina ia faagasolo le Tala o le Tupe.

**FOFOGA FETALAI:** Malo, faafetai saunoa i lau Afioga i le Alo o Malietoa. Ua lava ia lena o le ava atu ona e le mafai ona omiomia faaniualeale ou sa ma ou faiga lau Afioga i le Tulauniu o Atua lau Tofa.

Ou te manatu o lea ua maea ona saunoa sui usufono i tulaga tau tupe ma le tamaoaiga o Samoa, ma sa aofia faatasi ia saunoaga o le Tulafono Tau Faaofi o le Faatatauina o Tupe Faaopoopo (Nu.2) 2012/2013 ma le Tulafono Tau Faaofi o le Faatatauina o Tupe 2013/2014. Ua maea ona faatuina le lafo ma ua faapea ona faaluaina, e i ai le Tulafono na faaofi i le aso 30 Me 2013. O lea o le a tuuina atu loa le Fesili.

*Na tuuina atu le Fesili ma faamaonia ai le lafo na faatuina i le aso 30 Me, 2013 ma faitau faalua ai le Tulafono Tau Faaofi o le Faatatauina o Tupe Faaopoopo (Nu.2) 2012/2013 ma le Tulafono Tau Faaofi o le Faatatauina o Tupe 2013/2014.*

## **TULAFONO TAU FAAOFI O LE FAATATAUINA O TUPE FAAOPOPO (NU.2) 2012/2013 – iloiloga auiliili**

**FOFOGA FETALAI:** Ou te manatu o le a sagai atu loa le Fono Aoa o le Iloiloga Auiliili o le Tulafono Tau Faaofi o le Faatatauina o Tupe Faaopoopo (Nu.2) 2012/2013.

I le faagasologa o le Iloiloga Auiliili o le Tulafono Tau Faaofi e mafai ona saunoa faatepa sui usufono i Mataupu o lo o tusia i le Pepa 2013/2014 Nu.8, Tala Faatatau Faaopoopo Lona Lua o Tupe Maua ma Tupe Totogi a le Malo o Samoa mo le Tausaga Faaiuina Aso 30 Iuni 2013, atoa ai ma le Pepa 2013/2014 Nu.16, Lipoti a le Komiti o Tupe Maua ma Tupe Totogi i Tupe Maua ma Tupe Totogi a le Malo o Samoa mo le Tausaga Faaiuina aso 30 Iuni 2013, P.P.2013/2014 Nu.8.

E tusa ai ma Tulafono Tumau 134, e amata le Iloiloga Auiliili o le Tulafono Tau Faaofi i ona Faamatalaga.

### **FAAMATALAGA MUAMUA**

#### **VAEGATUPE MA TALA FAATATAU FAAOPOPOGA I TUPE FAATATAUINA**

**MATAGALUEGA FAAMATALAGA AOFAI TUPE ALU**

**MATAUPU TAU LE VA I FAFO & FEFAATAUAIGA: - \$239,290.**

*Faamaonia.*

**PUNAOA FAALENATURA: - \$396,010.**

*Faamaonia.*

**GALUEGA, FELAUUAIGA & ATINAE ESEESE: - \$66,222.**



*Faamaonia.*

**AOFAI FAAOPOOPOGA I TUPE ALU AOA 2012/2013: - \$701,522.**

*Faamaonia.*

**FAAMATALAGA LONA LUA**

**FAAITIITIGA I TUPE FAATATAUINA**

**MATAGALUEGA FAAMATALAGA FAAITIITIGA I TUPE ALU  
MATAUPU TAU LE VA I FAFO MA FEFAATAUAIGA: - \$(263,000).**

*Faamaonia.*

**PUNAOA FAANATURA: - (445,393).**

*Faamaonia.*

**GALUEGA, FELAU AIGA & ATINAE ESEESE: - \$(47,008).**

*Faamaonia.*

**AOFAI FAAITIITIGA AOA I TUPE ALU 2012/2013: - \$(755,401).**

*Faamaonia.*

*Na faamaonia le Faamatalaga Lona Lua e avea ma Vaega o le Tulafono.*

**FUAIUPU 2: Faamatuu atu ma le Faatatauina o le \$701,522 mai le  
Faaputugatupe a le Matagaluega o Tupe.**

*Faamaonia.*

**FUAIUPU 3: Faaititiga o Aofaiga na uluai faatatauina ma toe faasoasoa atu i isi galuega faatino ma galuega faatino laiti.**

*Faamaonia.*

**FUAIUPU 1 MA LE IGOA:**

**FUAIUPU 1: Igoa puupuu ma le amataga.**

**IGOA: Faatatauina o Tupe Faaopoopo (Nu.2) 2012/2013.**

*Faamaonia.*

*Na faagasolo le Tulafono Tau Faaofi o le Faatatauina o Tupe Faaopoopo (Nu.2) 2012/2013 e aunoa ma se Teuteuga.*

**TULAFONO TAU FAAOFI O LE FAATATAUINA O TUPE  
FAAOPOPO (NU. 2) 2012/2013 - faitauga faatolu**

**FOFOGA FETALAI:** Tulai mai lau Afioga i le Minisita o Tupe.

**Afioga Hon FAUMUINA TIATIA FAAOLATANE LIUGA:** Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o le Faatatauina o Tupe Faaopoopo (Nu.2) 2012/2013 i lona faitauga faatolu.*

*Faaluaina e le Minisita mo Fesootaiga ma Faamatalaga Tekonolosi ma le Minisita mo Tina ma Tamaitai, Atinae o Nu'u ma Afioga ma Agafesootai.*

*Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoa'o Faitulafono.*

**TULAFONO TAU FAAOFI O LE FAATATAUINA O TUPE  
2013/2014 – iloiloga auiliili**

**FOFOGA FETALAI:** O le a sagai atu loa le Fono Aoa'o i le iloiloga auiliili o le Tulafono Tau Faaofi o le Faatatauina o Tupe 2013/2014 ma Tala Faatatau Autu o Tupe Maua ma Tupe Totogi a le Malo o Samoa mo le Tausaga Faaletupe Faaiuina aso 30 Iuni 2014 faapea le Lipoti a le Komiti o Tupe Maua ma Tupe Totogi i le Tala Faatatau Autu o Tupe Maua ma Tupe Totogi a le Malo o Samoa mo le Tausaga Faaletupe Faaiuina aso 30 Iuni 2014.

E tusa ai ma le Tulafono Tumau 134, e amata le iloiloga auiliili o le Tulafono Tau Faaofi i lona Faamatalaga.

**FAAMATALAGA MUAMUA**

**VAEGATUPE MA TALA FAATATAU**

**MATAGALUEGA: TUPE ALU FAATATAUINA.**

**FAATOAGA: - \$19,344,572.**

*Faamaonia.*

**PISINISI ALAMANUIA & LEIPA: - \$26,470,656.**

*Faamaonia.*

**FESOOTAIGA & FAAMATALAGA TEKONOLOSI: - \$4,697,618.**

*Faamaonia.*

**AOGA, TAALOGA & AGANUU: - \$95,754,478.**

*Faamaonia.*

**TUPE: - \$88,992,607.**

*Faamaonia.*

**MATAUPU TAU LE VA I FAFO MA FEFAATAUAIGA: -  
\$20,850,329.**

*Faamaonia.*

**SOIFUA MALOLOINA: - \$87,638,161.**

*Faamaonia.*

**FAAMASINOVA & PULEGA TAU FAAMASINOVA: - \$9,147,566.**

*Faamaonia.*

**PUNAOA FAALENATURA MA SIOSIOMAGA: - \$30,049,575.**

*Faamaonia.*

**LEOLEO & FALEPUIPUI: - \$26,509,219.**

*Faamaonia.*

**PALEMIA: - \$7,673,363.**

*Faamaonia.*

**TUPE MAUA: - \$11,911,131.**

*Faamaonia.*

**TINA MA TAMAITAI, ATINAE O NUU MA AFIOAGA MA  
AGAFESOOTAI: - \$10,230,335.**

*Faamaonia.*

**GALUEGA, FELAUAIGA & ATINAE ESEESE: - \$86,662,896.**

*Faamaonia.*

**OFISA O LE LOIA SILI: - \$3, 659,914.**

*Faamaonia.*

**SUETUSI: - \$3,136,087.**

*Faamaonia.*

**KOMESINA O FAIGA PALOTA: - \$1,655,416.**

*Faamaonia.*

**FONO AOA O FAITULAFONO: - \$5,382,621.**

**Tofa LEALAILEPULE RIMONI AIAFI:** Lau Afioga i le Fofoga Fetalai, e leai ua fai alofa atu ona o lea ua tau fesasisasiai lau Afioga i le Fofoga Fetalai, ae se i fai sina au malologa laitiiti o lea o le a uma.

**FOFOGA FETALAI:** E leai o lea ou te alofa atu ia te outou. A ua outou le lavava, tulai. O lea e lava le Itu lea o le Maota e pasia le tatou Tala o le Tupe. O lea foi o le a toe togi la outou solo a o lea ua tatou lalata i le tini.

*Faamaonia le vaegatupe e \$5,382,621.*

**KOMESINA O SULUFAIGA: - \$560,173.**

*Faamaonia.*

**KOMISI A LE AUFAIGALUEGA O GALUEGA A LE MALO: - \$3,799,425.**

*Faamaonia.*

**OFISA O FUAINUMERA FAAMAUINA: - \$4,330,229.**

*Faamaonia.*

**KOMISI O LE TOEFUATAIGA O TULAFONO: - \$1,246,097.**

*Faamaonia.*

**AOFAI O TUPE ALU AOA O FAATATAUINA A MATAGALUEGA  
2013 – 2014: - \$549,702,468.**

*Faamaonia.*

**FAAMATALAGA.**

*Faamaonia.*

**FUAIUPU 2: Faamatuu atu ma le Faatatauina o le \$549,702,468 mai le Faaputugatupe a le Matagaluega o Tupe.**

*Faamaonia.*

**FUAIUPU 3: Faamatuu atu ma le Faatatauina o le \$662,926 mai le Teugatupe a le Tausi Mavaega.**

*Faamaonia.*

**FUAIUPU 4: - Faamatuu atu ma le Faatatauina o le \$16,491,074.**

*Faamaonia.*

**FUAIUPU 1 MA LE IGOA:**

**FUAIUPU 1: Igoa Puupuu ma le Amataga.**

**IGOA: FAATATAUINA O TUPE 2013/2014.**

*Faamaonia.*

*Na faagasolo le Tulafono Tau Faaofi o le Faatatauina o Tupe 2013/2014 e aunoa ma se Teuteuga.*

**TULAFONO TAU FAAOFI O LE FAATATAUINA O TUPE  
2013/2014 – faitauga faatolu**

**FOFOGA FETALAI:** Tulai mai le Afioga i le Minisita o Tupe.

**Afioga Hon FAUMUINA TIATIA FAAOLATANE LIUGA:** Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o le Faatatauina o Tupe 2013/2014 i lona faitauga faatolu.*

*Faaluaina e le Minisita o Fesootaiga ma Faamatalaga Tekonolosi, Minisita mo Tupe Maua ma le Minisita mo Tina ma Tamaitai, Atinae o Nuu ma Afioga ma Agafesootai.*

*Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoaofaitulafono.*

*Na faaalua le fiafia o sui usufono i le patipati o latou aao.*

**FOFOGA FETALAI:** Ua toe patipati foi la o le a o lea ua uma a tatou galuega?

E momoli atu le agaga faafetai tele i le paia ma le mamalu o le Maota. O lea ua tatou taunuu tonu lava i le taimi na saunoa mai ai le Failautusi o le Fono Aoaofaitulafono ua tatou toe faapoo lava i le isi itula atoa ona o le lagona e tataua ona faamaea nei le Tala o le Tupe. E momoli atu ai le agaga faafetai tele i le paia maualuga o lo tatou Maota i lenei aso.

E manatu o lea ua tapau tiala o le tautiga aua le faalelega fulu, ua faliu foi le la i lona tauafiafi, ua sola foi le fetu o Leapai ma le agi malu o le tuaoloa i lenei afiafi. E manatu ua tau i manu, ua le ao lealea, ua le autoa ae ua tatou vaai i ataata o Tauleleia. E momoli atu ai le agaga faafetai i le paia maualuga o lo tatou Maota i lenei aso, e manatu o lea tapau tiala o Tautiga aua le faalelegafulu, ua faliu foi le la i lona tauafiafi, ua sola le fetu o Leapai ma le agi malu o le tuaoloa i lenei afiafi, ia e manatu ua tau i manu, ua le au lealea le au toa ae ua tatou vaaia ataata o Tauleleia.

E momoli atu ai le faafetai tele i le paia maualuga o le tatou Maota, e manatu ua tele le tatou galuega ua tatou ausia, ia e le o ni upu e avane ai, ma lou agaga faaaloalo ma lou migao tele e tataua ai, ia e momoli atu le agaga faafetai, e faafetai atu i sui usufono mamalu uma o le tatou Maota, sa outou gapatia mai lava i le uluai aso sa tatou uluai sausu ai ma faaali lo outou tofa ma la outou faautautaga oo, na ona momoli atu o le faafetai a le Nofoa, e momoli atu foi le faafetai tele i lau Afioga i le Palemia ma lau Kapeneta ia e lagona le faatauvaa, ona o lea ua tatou taunuu i le aso fou ae ua pasi ai ma le tatou Tala o le Tupe fou, o le agaga ma le faamoemoe o le vave ona pasia o le vave foi lea ona faaoo i aao o le Malo aua le faatinoina o ana galuega.

O a ni faaletonu, o a ni upu ma ni tala, o a foi ni feeseeseaiga o felavasaiga o upu ma lape o lauga, ia le Maota o le atunuu, malu le vai. E leai se atoatoa, leai se agaga e tu ai ma sausu i Tiafau, ia o le Malae Fono e sa e tagi ai ma na ai le tupu i lona nofoaga pe a maua. O le agaga ma le faamoemoe o le Nofoa, ia e momoli atu le agaga faafetai. O le talitonuga ia o le aso a taeao, ia o lo o i ai nisi o Tulafono e fia tuuina mai, ia ona faapena lea ona faagasolo i nisi o Tulafono taua na tuuina mai foi tusi talosaga ma le manaoga o le Malo, ua tataua ona tuuina atu i Matagaluega aua le faaauauina o le galuega.

Ia o le a tatou faia se malologa o lenei po, e momoli atu le faafetai tele i le tapuaiga a Samoa, ia Samoa e, e manatu le lagona pai mai lava le mafanafanaga o le faamalosiua ona o la outou tatalo ma la outou tapuaiga, tui

mai pea le mulipapaga ma tapuaia faiva o lou Palemene, e talitonu e manuia mea uma ona o la outou tatalo. E faapena foi le Aufaigaluega paia a le Atua i lenei po, ia tatalo i le Atua o Ierusalema, o le Atua o Isaako, ma le Atua o Iakopo e talosia le alofaiva ina ia iu le galuega i le aso a taeao.

E momoli atu le faafetai tele i Faauluuluga o Matagaluega ia te outou o tupu ma ee o le atunuu, ia tulafale ma faleupolu o tofiga ia tainane le ituvai o tina i faletua ma tausii o saoa ma tamaitai, aemaise o uso ma tuafafine ma fanau ua tatou faatasi i lenei aso, ua loa ona outou faaaaogagase, e manatu foi o lea ua tau i le suni tau i le tini lenei afiafi, ia viia le Atua.

Ae lei tapunia aloaia le tatou Fono fai se tatou malologa i lenei po, ia ou te tuuina atu le avanoa i lau Afioga i le sui usufono mamalu i le aloalii i le sui usufono mo Faasaleleaga Nu.2 e tulai mai e fai se tatou tatalo faaiu ia ona tatou malolo ai lea.

**Tatalo.**

*Na tolopo Taulumaga a le Fono Aoa o le itula e 12:00 i le vaeluaga o le po seia aulia le itula e 9:00 i le taeao o le Aso Faraile, 21 Iuni 2013.*